


周禮疏義伯文集 下



中華民國二十五年十二月初版

(80024.1)

國學基誠意伯文集二冊

每部實價國幣伍角伍分

外埠酌加運費匯費

撰者 劉基

編校者 何鏜

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

D六五一五平

大

（本書校對者 喻飛生 蔡仲宣 林東塘 殷秀山 徐壽齡）

誠意伯文集卷之十

古樂府

艾如張

有苑者林。衆鳥萃之。我欲張羅。榛楛翳之。旣礪我斧。又傷我徒。孰是輿穢。而不剪除。爰升于虛。以和乃麓。有條我綱。載秩我目。有鳥有鳥。五采其章。嚙嚙嗜嗜。率彼高岡。張之弗獲。憂心且傷。寤寐懷思。曷云能忘。有鳥五采。亦旣來止。昭其德音。以相君子。君子豈弟。其儀是若。艾而張矣。云胡不樂。

芳樹

蔚彼芳樹。生于蘭池。景風晝拂。榮泉夜滋。燁如其光。炫于朱曦。含華吐芬。嚶鳴滿枝。君子有酒。以遨以嬉。羽觴交橫。吹竹彈絲。相彼草木。允惟厥時。良辰易徂。能不懷思。沛其邁矣。其誰女悲。

上陵

零雨霏霏。亦降于桑。愴懷中懷。念昔先皇。惟昔先皇。創業孔艱。寤寐與懷。能不永歎。精靈安所。體魄焉依。幽明隔絕。曷已其思。堂堂梓宮。在彼高岡。霜露是萃。能不慨傷。禮起由情。將情繫物。溥斯索矣。庶其罔闕。郊社旣虔。宗廟孔威。上陵是申。式昭孝思。

將進酒

有酒滿湛亦盈于觴。酌言進之。思心洋洋。亦有兄弟在天一方。安得致之。樂以徜徉。有酒在尊。既旨且清。何以酌之。有觥其觥。豈不欲飲。惜無友生。愴恨傷懷。曷云其平。兄弟之合。如壘如簾。朋友既比。如網如維。死喪急難。是責是庇。今日有酒。如何勿思。人亦有言。解憂惟酒。載懽載嘏。亦孔之咎。我觴維瓊。我學維以。以樂兄弟。以宴朋友。

上之回

上之回。六龍矯捷光耀。拂鷺鳥。轡石關。匝棠梨。揚靈旗。縣月支。天馬來。宛居劉。穆上玄。釐穰穰。坐明堂。朝萬方。翁披離。玉燭光。於億年。樂未央。

朱鷺

朱鷺來。玉山巔。積翁引。燦臆延。朱鷺來。絕流楫。飲赤水。食丹砂。朱鷺來。炎德加。威昆明。滇甕訛。朱鷺來。集太液。帝錫祐。荒廣斥。朱鷺來。燁煌煌。挾鷓鴣。媒鳳凰。朱鷺來。皇之輝。神筭演。無窮期。

巫山高

巫山高。哉鬱崔嵬。下有江漢。浮天回。深林日月照不到。洞谷闔闔生風雷。危峯半出赤道上。落日猿狖鳴聲哀。虎牙赤甲鬪雄壯。風氣以之而隔闔。楚王遺跡安在哉。但見麋鹿跳蒿萊。當時忠臣放澤畔。乃與斬向相。徘徊山中妖狐老不死。化作婦女蓮花腮。潛形譎跡託夢寐。變幻涕泪成瓊瑰。神靈震怒不可禱。雲霧慘淡昏陽臺。猛風吹雨洗不盡。假手秦矩歛飛灰。精誠感應各以類。世間妖孽匪自來。君不見。商王夢

中得良弼。傅巖之美。今安匹。巫山何事。近楚宮。終古怨恨。流無窮。

戰城南

朝戰城南門。暮戰城北郭。殺氣高衝白日昏。劍光直射旄頭落。聖人以五服限夷夏。射獵耕織各自安。土風胡爲彼狂不自顧。而與大國爭長。雄高帝定天下。遺此平城幕。陛下宵旰不遑食。擁旄仗鉞臣不羞。登南城望北土。雲茫茫。土膻膻。蚩尤馮牙雷擊鼓。舉長戟揮天狼。休屠日逐渾邪王。羶車尾尾連馬羊。橐駝載金人。照耀紅日光。遙道而來歸帝鄉。歸帝鄉。樂熙熙。際天所覆罔不來。小臣獻凱未央殿。陛下垂拱安無爲。

君馬黃

君馬黃。我馬驪。二馬八足爭驅馳。回頭顧影雙驕嘶。尾端散作縹虹飛。黃馬矚日黃金品。驪馬謂是玄天精。眼前好醜那能明。吾聞良驥稱以德。不聞於世驪黃色。世無伯樂識者誰。有德無色空自知。

思悲翁

弱齡輕日月。邁景想神仙。顧往諒無及。待來徒自憐。黃金棄砂磔。劬心鍊丹鉛。鑿石不得水。沉劍徒窺淵。流光不我與。白髮盈華顛。杖策出門去。十步九不前。歸來對妻子。鹿竈午未煙。干時乏計策。退畊無園田。霜蒲怨青松。逝矢恨驚弦。已矣復何道。吞聲赴黃泉。

聖人出

聖人出。臨萬方。赤若白日登扶桑。陰靈縉精星滅芒。羣氛辟易歸大荒。曉暖寒谷熙春陽。枯根發苗暢幽

藏潛魚躍波谷鳥翔花明草暖青天長。青天長。聖人壽。北斗軒轅調氣候。北辰中居環列宿。八風應律九歌奏。圓方交格神靈輳。聖人出。陽道開。億萬年。歌康哉。

釣竿

斫竹作釣竿。抽繭作釣絲。滄洲日暖波漣漪。綠蒲茸柳葉垂。鈎織餌香魚不知。石鱗激水溪毛動。玉燕迴翔竿尾重。大魚入饌腮頰紅。小魚卻放淵沚中。更祝小魚知我意。長逝深潭莫貪餌。

思美人

雨欲來。風蕭蕭。披桂枝。拂陵茗。繁英隕。鮮葉飄。揚煙埃。靡招搖。激房帷。發綺綃。中髮膚。懣寂寥。思美人。隔青霄。水渺茫。山峩峩。雲中鳥。何翛翛。欲寄書。天路遙。東逝川。不可邀。芳蘭花。日夜凋。掩瑤琴。閑玉簫。魂蒙衆。心搖搖。望明月。歌且謠。聊逍遙。永今宵。

關山月

關山月。明風惻惻。萬里黃雲雜沙磧。夜深羌笛吹一聲。征人相看淚沾臆。古人以綏服奮武衛。耕戰守禦不外求。何人倡此戍邊策。千載以貽中國憂。關山月。圓復缺。何忍年年照離別。願得馳光照明主。莫遣邊人望鄉苦。

楚妃歎

江漢揚波六千里。上有巫山蠱天起。錦衾一夕夢行雲。萬戶千門冷如水。聞道秦兵下武關。君王留連猶未還。山深不見章臺殿。汨羅冤淚空潺湲。尙憶前王好馳逐。宮中美人不食肉。回狂作哲須臾間。至今相

業歸孫叔。楚宮無復如昔人。況有神女如花新。悲來恨新還憶故。誰能斷卻巫山路。

上清詞三首

王子晉。好吹笙。吹得神仙下玉京。一朝羽化隨風去。回首故宮芳草生。
天上月。影悠悠。似鏡看看又似鉤。自是嫦娥甘寂寞。桂華相對度千秋。
河漢水。九秋清。涼月滿空聞鴈聲。鴈聲不到夢先到。白露濕衣天未明。

漢宮曲

小雨如煙晝掩扉。捲簾忽見燕雙飛。不知春色能多少。總向昭陽柳上歸。

江上曲八首

數樹垂楊綠水邊。問郎何不繫蘭舡。浦沙新漲青山遠。半夜月明無杜鵑。
會記樓船夜泊時。家家絃管鬪腰肢。于今絃管歸何處。縮束枯蒲當酒旗。
昨夜月明天似水。今晨月落水如天。天長水遠人何處。蘆葦蕭蕭一抹煙。
紫桂香銷五夜霜。碧雲收盡玉蟾光。琅玕不是人間樹。何處朝陽有鳳凰。
月出前山青黛寒。鴈聲遙下碧雲端。草根錯認驪珠吐。自是西風白露團。
賓鴈來時月滿洲。于今鴈去月如鉤。鴈來鴈去何時了。月照離人又白頭。
憶見垂楊縹綠絲。陡看秋菊映疎籬。柳花作絮隨風去。菊綻金葩欲似誰。
紅蓼丹楓一色秋。楚雲吳水共悠悠。人間萬事西風過。惟有滄江日夜流。

寒夜謠二首

良夜悠悠。星河滿天。風吹窗櫺。聲如管絃。無酒可飲。寒不能眠。枯腸飢鳴。百慮交煎。人生一世。不滿百年。寤寐懷思。曷維其然。內省不疚。有愧聖賢。今夕何夕。歲聿其徂。草木凋落。山川縈紆。瞻彼鴻鴈。拂翼天衢。誰誰和鳴。載悠載徐。雖無羽翰。心與之俱。華月出雲。青鐙在隅。歌以寫懷。云何其吁。

夜夜曲

冬夜恒苦長。夏夜恒苦短。短長相蔽虧。殷勤望推挽。紉茅作繩。繩易斷。汲水作池。池易旱。故鏡塵昏。難遠照。故衣絮敝。無新暖。西風嫋嫋。吹桂枝。白露點點。苦黃葉滿。

秋夜曲

木落霜露繁。烏啼夜方永。起行望明月。西風次鴈影。鴈飛一何急。烏啼安所集。徘徊不能寐。望月空佇立。佇立河漢傾。誰家砧杵聲。關山渺千里。何處不傷情。

長歌續短歌

短歌調促。情苦悲。長歌引愁。無絕期。短聲欲盡。長聲續。似是荆山人。泣玉悲。哉荆山泣玉人。但知貴玉不貴身。縱令哭盡歌堪聽。何異春花委路塵。古稱悲歌可當哭。傷心如中金石鏃。更不必聽蔡琰茄。又何必聽漸離筑。長歌飄揚徹九天。短歌嗚咽入九泉。徒言歌哭兩情異。誰知歌聲尤可憐。

牆頭花

牆頭花紅錦妬。美人抱瑟倚高樓。只恐花飛逐風去。熒熒絳蠟送殘宵。燕語鶯啼斜日暮。

望行人

朝聽乾鵲鳴。暮見燈花結。鵲鳴燈結無定期。鏡裏青雲看成雪。人生百歲難長保。天上孤鸞海中老。滔滔逝水不回西。灼灼秋花幾時好。一朝復一朝。一夕復一夕。只恐君心念妾時。妾身已作山頭石。

長松梢

長松梢青拂天。歲暮商飈急。寒苦令人憐。陰崖有樸檜。生在荆棘下。霜凋荆棘葉。網綴如簷瓦。春風破水凍。勁綠不曾赫。禍福相倚伏。豈不在所招。寧爲樸檜莖。莫作長松梢。

折楊柳

東風二月春如酒。不見百花惟見柳。柳絲縮煙留暝鴉。柳花蕩漾迷羲和。美人捲簾看不足。柳色萋萋始娥綠。夜來微雨清郊圻。鶯黃相應鳴塤篋。欲寄柔條無信使。空將淚染回文字。

王子喬

王子喬乃是毘王之子。皇王之孫。深宮洞房不稱意。卻駕白鶴尋軒轅。虹蜺爲旆雲爲旛。飄然乘風上崑崙。王子喬去何之。朝發陽谷暮崦嵫。六龍九鳳相追隨。穆王西上不得王母訣。胡爲元氣獨爾私。王子喬去不還。后稷功業委如山。猶有九鼎知神姦。王城日夕生茆菅。爾獨胡爲白雲間。王子喬空長歎。

走馬引

天冥冥。雲濛濛。當天白日中貫虹。壯士拔劍出門去。手提仇頭擲草中。擲草中。血漉漉。追兵夜至深谷伏。

精誠感天天心哀。太一乃遣天馬從天來。揮霍雷電揚風埃。壯士呼天馬馳橫行白晝。吏不敢窺。戴天之恥自古有必報。天地亦與相扶持。夫差徒能不忘而報越。棲於會稽又縱之。始知壯士獨無媿。魯莊稽紹何以爲人爲。

結交行

朋友以義合。久要貴不忘。結交或匪人。騶虞化爲狼。君不見市井人。盃酒忽相得。傾肝瀉膽無所惜。一朝需求不稱意。口裏驅蛭心上虵。更聞背語觸疑心。牆角車輪亦生翅。君不見耳與餘。又不見田與竇。當其得意時。刎頸以相就。寧知嫌隙反掌成。坐令衽席生戈兵。古人重結交。晏子眞其人。任文執誼。羊豕之合。死生棄置安足陳。

梁甫吟

誰謂秋月明。蔽之不必一尺翳。誰謂江水清。淆之不必一斗泥。人情旦暮有翻覆。平地倏忽成山谿。君不見桓公相仲父。堅刁終亂齊。秦穆信逢孫。遂遠百里奚。赤符天子明見萬里外。乃以薏苡爲文犀。停婚仆碑何震怒。青天白日生虹蜺。明良際會有如此。而況犂角不辨粟。而稊外。問皇父中豔。妻馬角突兀連牝鷄。以聰爲聾。狂作聖。顛倒衣裳行羨藜。屈原懷沙子。胥棄魍魎。叫嘯風淒淒。梁甫吟。悲以悽。岐山竹實日稀少。鳳皇憔悴將安棲。

春日行

白日出東陸。垂光曜中天。大哉至陽德。蕩蕩無頗偏。坐令慘烈化滋潤。頃刻枯槁回鮮妍。聖人法天道。神

化參玄微。春朝著典禮。上下同光暉。垂衣向明物。自育帝力偉。偉偉無人知。春天和。春日麗。但願宇宙長如春。聖明天子千萬歲。

牆上難爲移行

窮水不可以航。石林不可以車。人生貴守分。牆上難爲趨。茫茫八極內。狹徑交通衢。紛紛皆轍迹。擾擾論鎔銖。焦原詫齊踵。龍頷夸探珠。片言取卿相。盃酒興剪屠。機事一朝露。妻子化爲魚。林間有一士。蓬蒿翳窮廬。種稻十數畝。種桑八九株。有酒且飲之。無事卽安居。孰知五鼎食。聊保百年軀。悠悠身後事。汲汲復何如。

少年行

駿馬狐白裘。玉勒黃金羈。賓從如浮雲。顧盼生光輝。朝驅紫陌塵。暮醉青樓姬。但見花月好。寧知霜雪飛。住苒世途異。淒涼瑤草衰。園田皆易主。親友盡睽違。學書時旣晚。躬稼力已微。歲晏寒風生。倚牆聽隣機。逝水不可挽。枯蓬安所依。佇立爲爾歎。感我淚沾衣。

獨漉篇

獨漉復獨漉。月明江水濁。水濁迷龍魚。月明復何如。楚國皆濁。屈原獨清。行吟澤畔。哀哉不平。上山采茶。下山采藥。心在腹中。何由可白。豺狼在後。虎豹在前。四顧無人。魂飛上天。珠玉委棄。不如泥沙。躡冠戴履。萬古悲嗟。

懷懷歌

白鷗養雛時。夜夜啼達曙。如何羽翼成。各自東西去。
昨夜霜風起。入戶復吹帷。兒啼母心酸。母愁兒不知。
養兒圖養老。無兒生煩惱。臨老不見兒。不如無兒好。
食蘗苦在口。食蓮苦在心。苦心無人知。苦口淚沾襟。
男兒初生時。蓬矢桑弧弓。老大卻思家。懊惱無終窮。

王昭君

漢庭不賞微功。士昭君卻向胡中死。昭君辭漢入胡中。胡女悲愁漢嬾喜。含情欲怨當語誰。手彈琵琶淚沾衣。掖庭望幸從此絕。巫山有路他生歸。殷勤說與上林鴈。好在明年再相見。漢恩如海長自深。妾自生來命如線。賤妾一身何足惜。可惜當年劉敬策。遂令上策重和親。欲倚紅顏清塞塵。只恐妾身先草露。漢宮無復如花人。

塘上行

塘上何所有。有蒲與荷花。蒲花難開荷易落。使我歎恨長咨嗟。鴛鴦戲我後。鵲鵲翔我前。四顧不見人。淚下如流泉。浮萍遠淥井。寄身滄江渚。滄江不應竭。是妾命如許。朝淚灑玉臺。夕淚沾羅袞。采荷得見蓮。中復懷苦心。廣筵列肴蔬。好者卽美味。荼蓼有時甘。菘葵有時棄。嚴風吹秋林。蕙蘭化爲草。於悒今可憎。芳菲故嘗好。行亦私自憐。坐亦私自憐。願爲天邊月。流影玉階前。

君子有所思

晨上龍首山。徘徊望咸京。交衢錯萬井。甲第連公卿。鞍馬相照耀。冠蓋如雲行。扈從金宮歸。賜酒銀甃盈。前庭列騎騎。後苑羅傾城。寵極妬心起。歡餘驕氣生。田竇巧相奪。蕭韓互摧傾。快意在一時。報復延戈兵。范睢掉柔舌。穰侯去彊羸。寧知幽燕客。接踵夸雄鳴。茫茫前車轍。遺跡猶未平。胡爲不自悟。坐使憂患并。二躩獨何人。千載垂令名。

上山采蘼蕪

上山采蘼蕪。山峻路迢遞。下山逢故夫。悲風生羅袂。憶昔結髮時。願得終百年。變故不可期。中道相棄捐。蓮實生水中。石榴生路側。未嘗掛齒牙。中心豈能識。上山采蘼蕪。羅袖生芳菲。因君贈新人。莫遣秋霜霏。落葉辭故枝。不寄別條上。白日無回光。誰能不惆悵。

雙桐生空井

雙桐生空井。井空桐葉稀。葉稀不自蔽。鳳鳥將安歸。雙桐生空井。井泥泉不出。桐根日夜枯。何由伐琴瑟。美女篇

南國有美女。粲粲玉雪顏。眉目豔華月。色暎清秋寒。紛黛不敢流。佩服惟幽蘭。一朝備選擇。得廁金宮班。貞心恥自衒。望幸良獨難。況蒙衆女妬。倩笑誰爲歡。恒恐芳桂枝。寂寞零露溥。素手發瑤琴。泠泠奏孤鸞。宮商合要妙。遺響風珊珊。大音世罕識。日暮空盤桓。安得託宵夢。集君瑤臺端。相思不可極。踟躕起長歎。玉階怨

長門燈下淚。滴作玉階苔。年年傍春雨。一上苑牆來。

秋思

梧桐生碧砌。密葉暗金井。驚心昨夜月。照見棲禽影。

長門怨

白露下玉除。風清月如練。坐看池上螢。飛入昭陽殿。

宛轉歌

星稀月白河闌干。飢蟲籲號莎草寒。美人望月歌宛轉。瀟湘水碧蒼梧遠。愁魂一夜不得歸。化作斷雲天際飛。

長相思

長相思在沅湘。九疑之山鬱蒼蒼。青天蕩蕩林木暗。落日虎嘯風飛揚。欲往從之水無航。仲尼有德而不用。孟軻竟死於齊梁。松柏摧折桂生蠹。但見荆棘如山長。長相思斷人腸。

雉子班

雉子班。飛脩脩。鳴鸞鷲。踉蹌出沒灌莽中。袞裳煥爛頰曠瞭。野人拄翳潛置媒。和聲相應無驚猜。黃間一發激流電。錦綉披裂委草萊。林棲野啄本無累。嗜欲沉溺禍所胎。君不見天池鳳凰食竹實。逍遙至和永終日。

朗月行

朗月何朧朧。照我綺牕中。牕中美人不能寐。起看玉宇生秋風。秋風飄飄吹木末。織雲卷盡懸明月。

惡風出海來。海水蕩漾龍鱗開。寒光噴沒碧落外。白浪湧作金銀臺。何處悲風怨羌管。誰家舞榭笙簧暖。長信宮中漏水長。昭陽殿裏更籌短。漏長更短總含情。開窗坐視河漢傾。廣寒宮在何處。欲往從之渺煙霧。青雞汗漫不可期。桂華如雪東方曙。

大牆上蒿行

牆上蒿。方春擢秀何芄芄。炎天六月旱無雨。枝葉枯死隨飄風。世情翻覆不可擬。人生有身莫依倚。君不見樊將軍。一朝函首西入秦。又不見劉越石。仰天長歌握中璧。三士自殘因二桃。子胥終棄吳江濤。世人見機苦不蚤。何不看取牆上蒿。

鷄鳴曲

日將出。鷄先鳴。千門萬戶聽鷄聲。美人錦帳愁欲曙。壯士苦心煎百慮。人間百年能幾日。日日鷄鳴催日出。一朝過了。復一朝。白髮蕭蕭此生畢。齊妃播淑德。感彼蟲薨薨。周宣悟姜后。功業光中興。亦知國家共如此。莫恠鷄鳴催早起。

邯鄲才人嫁廝養卒婦

邯鄲有才人。豔色如朝霞。嫁作廝養婦。雲鬢埋泥沙。憶昔趙王全盛日。夜夜綺筵張寶瑟。中山美酒盈羽觴。一笑黃金滿千鎰。繁華過眼如轉蓬。故宮禾黍秋芄芄。明珠白璧走函谷。墜簪遺珥空悲風。人生最苦是衰老。白首無歸向誰道。華門夜水月光寒。臥聽鷄駘踈枯草。

出塞

居延風高榆葉空。狼煙夜照甘泉宮。將軍授鉞虎士怒。蚩尤亘天旗尾紅。麒麟前殿催賜酒。已覺此身非已有。猛氣遙將日逐吞。壯心肯落嫖姚後。鴈門城外沙如雪。玉帳霜濃鐵衣折。長劍須披瀚海雲。哀笳莫怨天邊月。北風烈烈刁斗鳴。回看北斗南方明。驚箭離弦車在坂。不勒燕然終不返。

入塞

狐裘蒙茸沙磧裏。望見玉關驚且喜。關門候吏記曾逢。白髮相看淚如水。歸來放馬咸陽原。舊遊今有幾人存。斜陽慘淡照籬落。閑看鄰翁戲子孫。

孤兒行

蓬頭跛足誰家兒。滿面塵埃雙淚垂。爺娘棄我不待老。骨肉無人但兄嫂。兩身一氣不相知。陌路茫茫向誰道。清晨采薪日入歸。殘羹冷飯難充飢。欲言問兄兄不顧。嫂是他人更奚訴。人生一世爲弟兄。同根自合同枯榮。爺娘在日曾眷戀。願兄回看死人面。

病婦行

夫妻結髮期百年。何意中路相棄捐。小兒未識死別苦。啞啞向人猶索乳。箱中探出黃金珥。付與孤兒買饜餌。不辭瞑目歸黃泥。泉下常聞兒夜啼。低聲語郎情不了。願郎早娶憐兒小。

淮南王

淮南王好神仙。澄心鍊炁守自然。收拾真一歸中圓。化爲五色黃金丸。乘風駕景飛上天。飛上天。逍遙遊。八鸞捧轂龍翼轉。虹蜺繽紛夾綵旂。上窺九陽下六幽。回頭大笑武皇帝。柏梁桂館空清秋。

蜀國弦

胡笳拍斷玄水結。湘靈曲終斑竹裂。爲君更奏蜀國弦。一彈一聲飛上天。蜀國周遭五千里。峩眉峩峩連玉壘。岷蟠出水作大江。地老天浮戒南紀。舒爲五色朝霞暉。慘爲虎豹隍陰霏。翁爲千嶂雲。雨人噓爲百。里雷霆飛。白鹽雪消春水滿。谷鳥相呼錦城暖。巴姬倚歌漢女和。楊柳壓橋花暮暮。銅梁翠氣通青蛉。碧鷄啼落天上星。山都號風寡狐泣。杜鵑嗚咽愁幽冥。商悲羽怒聽未了。窮猿三聲巫峽曉。瞿塘噴浪翻九淵。倒瀉流泉噴木杪。樓頭仲官羈旅客。故鄉渺渺皆塵隔。含悽更聽蜀國音。不待天明頭盡白。

昔昔鹽

楊柳正萋萋。門前碧草齊。別離如昨日。白髮滿春闈。飄花兼淚落。行雲逐望迷。綠苔凝履跡。粉汗浥書題。夢到龍沙北。魂銷馬邑西。卷簾雙燕入。開鏡一鸞啼。腸共吳江繞。眉將楚岫低。攀枝憐並蒂。窺沼妬雙棲。躍水寧無劍。通天亦有犀。那看明月夜。登樓惑馬蹄。

東飛伯勞歌

南飛鷓鴣北飛鵠。黃昏鳴鷄白日燭。珊瑚石上栽兔絲。鴛鴦獨宿枯桑枝。永夜涼蟾入羅幕。蟬翼不如秋。鬢薄寒塘露蓮千葉紅。可憐寒露空隨風。

雙燕離

雙燕營巢時。雙飛復雙語。輕盈柳陌風。振迅芹塘雨。巢成近繡幃。雙宿更雙飛。爲蒙主人愛。不信有睽違。四月溫風起。榴花發紅葢。拾蟲還哺雛。出入無停晷。五月教雛飛。繞巢舞烏衣。側避蛛絲過。斜縈柳線歸。

六月雖翼老。分飛各相保。脈脈傍珠簾。依依集蘭繚。世事有轉旋。陵谷一朝遷。昆明延劫火。甲第化猷煙。帶睡驚飛出。風沙兩相失。死生不得知。嫵婉從茲畢。回看舊主人。粉黛成灰塵。天高塵渺渺。海闊波鱗鱗。住菴朝還暮。惻惻向何處。毛凋半夜霜。淚滴三春露。露寒霜又濃。憔悴不成容。同心諒難隔。魂魄終相從。

烏棲曲

霜華着樹成秋蕊。樹頭棲烏驚夜起。起向幽閨啼數聲。閨中美人泣到明。吳宮烏啼夜已分。宮中不聞人盡聞。夜深風落茱萸子。沉沉漏斷啼烏死。

三洲曲

三洲洲上花柳春。三洲浦裏多商人。酒旗紅袖明江閣。客舡只望洲邊泊。八月風吹洲上樹。樓舡卻向江西去。紅粧送別各沾巾。驚動新來江北人。

武陵深行

武陵溪一何深。水有射工射人影。陸有丹蛇長百尋。嗟哉武谿不可臨。溪之水深且闊。鳥不敢飛。龍不敢越。海氣連天日月昏。商露着人肌肉裂。嗚呼。丈夫寧能沙場百戰死。有骨莫葬武谿水。

遠如期

遠如期。近別尙云可。遠期能不悲。憶昔辭君出門去。手種庭前松柏樹。樹今成器人未歸。洞房白髮秋霏霏。高原有梧隰有櫟。待君北邙山下。

大堤曲

大堤女兒顏如花。大堤堤上無豪家。東家女作西家婦。夫能棹舡女沽酒。春去秋來年復年。生歌死哭長相守。君不見。襄陽女兒嫁荊州。撞鍾擊鼓烹肥牛。樓舡一去無回日。紅淚空隨江水流。

明月子

朱閣綺疏瓊作戶。明月照人秋獨苦。桂花吹冷眠不成。誰家高樓絃管聲。倚樓空望別離處。唯有清光自來去。月圓正好缺復催。人生見月能幾回。

短歌行

來日苦短。去日苦長。日長不自覺。日短令人傷。君不見。望後月。又不見。霜中蓋。清光縱好。魄已虧。芳心欲動。根先死。少年不知老。可悲。衰老卻憶少年時。

長安道

長安道。送盡芳菲到枯槁。人生衰盛苦不常。何異長安道。傍草。漢家將軍初拜官。門前上客車班班。一朝世衰煙燄歇。車輪無聲馬蹄絕。明年有詔封冠軍。依舊車馬來如雲。

隴頭水

隴頭水。征夫淚。征夫之淚滴隴頭。化爲水入秦川流。水流向秦川。嗚咽鳴不已。何因得天風。吹入君王耳。

秋宵吟

玄蟬催秋入湘簾。芙蓉露浴胭脂淡。銅烏吻水添夜長。碧草歛愁歸寒蟄。羅帳無人五更雨。梧桐驚啼白楊語。春光爛熳不得知。霜露淒涼奈何汝。

車遙遙

車遙遙馬竭竭。不知何人始作車。長與人間載離別。回風吹起羅帳塵。低頭恨殺作車人。

陽春歌

帝車東指淑景昭。冶容冉冉生寒條。枯根相顧一時起。陽春只在霜雪裏。枝頭候禽鳴滑滑。暖煙日夜催花發。蜂喧蝶競方及時。風雨宿昔成離披。人間但見陽春好。未識春陽有枯槁。

鳴鴈行

嚙嚙鳴鴈鳴達旦。舉翼相連拂雲漢。平原漠漠生野煙。鴈飛只向江南天。江南十月多禾黍。一半輸官半供汝。明年二月歸養雛。雛成又望江南去。

獨不見

暖煙漾春林。色紫膩。雨摧紅。出花蕊。蝶飛撩亂燕飛輕。嚶鳴相應俱有情。有人抱瑟上高閣。坐對粧臺彈別鶴。曲終顧影還徘徊。東風自吹羅帳開。

梅花落

種梅長江邊。歲晚花始發。東風爲愛桃與李。卻使孤芳坐銷歇。美人高樓深紫霞。捲簾一見長嘆嗟。世間有榮卽有悴。君不見海中碧樹終無花。

折楊柳

去年送君楊柳青。暖風晴日花冥冥。今日思君瑣窗綠。柳條又綴黃金粟。君心卻似條上花。隨風飄蕩不

思家妾心已作科上槁。縱得春光爲誰好。折取長條寄遠人。人生四十無青春。

秋夜月

秋夜月黃金波。照人哭。照人歌。人歌人哭。月長好。月缺月圓。人自老。

棗下何纂纂行

棗初作花時。纂纂臨路歧。八月棗成實。纍纍曜朝日。棗花纂纂蜂蝶翻。棗實纍纍人滿園。嚴風蕭瑟枯葉飛。蜂蝶不來人亦稀。

白苧詞二首

鏗華鍾。伐靈鼓。青娥彈絲白苧舞。文竿迎風雉振羽。長袖奮迅若雲舉。博山霧合春濛濛。玉缸搖火生長虹。翠蕩紅翻如夢中。

暖香結暝嬌青春。翠釵珠壓光照人。鳳簫十二煙霧勻。鴻鶯燕嬌波龍鱗。玉觴交飛酒如沼。門外斜陽在林杪。宮中沉沉天未曉。

蛺蝶行

軟芳晞露春鮮妍。上有蛺蝶飛翩翩。暖風扶暝撲天起。翠重紅輕迷欲死。東園無花留不住。相隨又過西園去。沉沉斷夢失韓憑。卻抱霜華怨秋曙。

鈞天樂

君不見天穆之山二千仞。天帝所以觴百靈。三嬪不下兩龍去。九歌九辯歸杳冥。我忽乘雲夢輕舉。身騎

二虹臂六羽。指揮開明闕。帝關環佩冷。冷風雨。明月照我足。倒影搖雲端。參差紫鸞笙。響震瑤臺寒。我欲聽之未敢前。空中接引皆神仙。煙揮霧霍不可測。翠葩金葉光相射。鯨鍾虎籥鏗鴻濛。撼昆崙兮殷唄。峒揚天桴兮伐河鼓。咸池波兮析木風。遂升泰階朝玉帝。側身俯伏當瓊陛。訊曰。太極拆裂爲乾坤。紛紛枝葉皆同根。胡爲妄主水火金木土。自使激搏相熬煎。臣聞三皇前。羣物咸熙熙。衆子戴一父。皞皞無偏私。忽然元氣自蕩瀟。變換白黑分賢癡。蚩尤與黃帝。從此興戈矛。流毒萬萬古。爭奪無時休。骨肉自殘賊。帝心至仁能不憂。帝不答。臣心迷。風師咆哮虎豹怒。銀漢淘湧天鷄啼。飄輪撇捩三島過。海水盡是青玻璃。踞神奔鬼恠惕驚起。遺音颯颯猶在耳。夢耶遊耶不可知。但見愁雲漠漠橫九疑。

周小史

婉孌周小童。冶容敵花紅。鮮雲委綠髮。明星爛雙瞳。采蘭澧水湄。挾彈長陵東。擲果閩春市。卷衣嬌金宮。流盼溢華彩。言笑生芳風。常恐秋露零。瑤草成衰蓬。食桃坐翻覆。倩笑徒爲工。繁華豈不好。不知身所終。吾聞濟川楫。乃屬植鱗翁。悠悠萬世下。德業光無窮。

結襪子

昔有信陵君。乃在大梁城。親爲貴介弟。位冠諸侯卿。傾家待國士。倒屣延豪英。詣門謁朱亥。虛左上侯嬴。袖椎奪兵符。救趙蜚英聲。河外走蒙鶩。宗社賴扶傾。于今不可見。寂寞傷人情。

拔蒲三首

拔蒲清川渚。水淺蒲不長。自非排風羽。莫羨凌雲翔。

拔蒲江水涸。終日不盈把。嫌殺紫鴛鴦。雙戲蒲葉下。
拔蒲復拔蒲。織作波紋篋。無處寄相思。秋風露蓮淡。

從軍五更轉

一更戍鼓鳴。市上斷人聲。風吹鴻鴈過。憶弟復思兄。
二更月上城。照見兜鍪光。側身望山川。淚落百千行。
三更悲風起。樹上烏鵲鳴。枕戈不能眠。荷戈繞城行。
四更城上寒。刁斗鳴不歇。披衣出戶視。太白光如月。
五更星斗稀。霜葉光爛爛。健兒爭先起。拂拭寶刀看。

前有尊酒行

前有尊酒芳以飴。舉杯欲飲且置之。丈夫有志可帥氣。胡爲受此麴蘗欺。禹惡旨酒。而玄德上達。桀作酒池。而南巢是蔡。商辛惡來。以白日爲夜。糟丘肉林。相枕藉。瑤臺倏忽成灰塵。流毒猶且遷殷民。夫差醜而納施。楚國酣而放屈。姑蘇臺上麋鹿遊。鄢郢宮中狐兔出。灌夫罵坐。禍延魏其。竹林稱賢。神州蕪藜。亡家破國。有如此。酒有何好而嗜之。前有尊酒釀以清。酌之白日成晦冥。眼花耳熱亂言語。元氣耗斲肝膽傾。乃知酒是喪身物。衛武之戒。所以垂休聲。

公無渡河

丈夫不愛死。成仁心所安。殞身苟無故。哀哉徒自殘。水能殺人人共知。公獨茫然狂以癡。黃河渺渺無津。

涯乃欲絕流而渡之。公也溺死人誰悲。世路如何險惡實多。平地倏忽滔天風波。利淫欲餌孰知其佗。不見不聞縱橫網羅。固不必如公之癡。可搆以魚中之鉞。亦不必如公之狂。可禽以伏甲之觴。眼前言咲百媚出。寧知兵刃羅心腸。公無渡河河無津。箜篌一曲愁殺人。

隔谷歌

戰鼓咽悲風。弓折不可把。弟兄隔谷不相聞。咫尺人間與泉下。丈夫誓許國。殺身非所憐。兩心本一氣。何能坐相捐。登埤四顧望。慨慷肝膽裂。不見救兵來。但見繞城鐵甲光如雪。飛禽在羅罔。尙或念其飢。身爲高官馬食粟。忍見手足居重圍。相彼鴻與鴈。亦各顧匹儔。挽弓射一猿。羣猿拔箭聲啾啾。鳥獸且有情人。心獨何尤。嗚呼。田家紫荆雖微木。不忍聽君歌隔谷。

步虛詞五首

太微啓靈宇。紫殿含祥風。圓光照無外。梵炁來冲融。仙人魚鱗次。羽葆朝當中。離羅鬱蕭臺。縹緲浮太蒙。秦階平六符。文昌位三公。北斗運元化。軒轅成歲功。稽首玉陛下。道遙樂無窮。鬱華開赤殿。結鄰炫黃文。葳蕤爛霄漢。照耀下土墳。東華蹕嚴駕。西崦泮昏氛。神行肅臺臺。象化陶醺醺。景風調塊垆。玉燭煥煙燼。冥茫密勿間。敎忽幽朗分。萬靈仰無私。九真告成勳。重陽峨寶闕。衆星拱高垣。寥寥太虛庭。巍巍無極尊。白虎伏右騂。青龍承左轅。玄武後躩踞。長離前騰鶩。黃靈正常居。萬有歸一元。希微眇穉粟。浩蕩彌乾坤。高卑各奠位。神化無窮源。步虛歸太一。精心覲樞庭。浮浮回極運。淇淇規中清。五神謹訶衛。六位肅枚寧。東溟升陽曜。西海生陰靈。

炎光熇玄室。湧醴液朱陵。駸駸羸穢除。綿綿淳粹凝。妙用無邊方。攝身遊帝青。
焚香禮玄梵。肅駕朝紫宸。游雲結華蓋。鮮飈翼飛輪。披煙上閣道。佩月攀鉤陳。服食丹霞漿。嗽嚙甘露津。
琅琅歌洞章。寂感虛皇嘯。飄飄廣莫風。舒嘯青林春。沆瀣六合外。永與無始隣。

氣出唱

今日不樂振策遠遊。東上泰山。巍何脩脩。道逢仙人。要我同仇。蒸霞爲糧。烹玉爲羞。玄英素蕤。光華蔓流。
日觀茵蔯。葩華九州。令我從之。身輕若浮。道以五鸞。翼以兩虬。朝翔玄圃。夕止蓬丘。謁見王母。雲眉月眸。
青娥三千。或舞或謳。風吹琅玕。聲如鳴球。雜花並開。莫知春秋。洪崖先生。勸我此留。自揣凡骨。非仙者儔。
七情交煎。一觸百抽。又病慙僻。無藥可瘳。崇崇清宮。蕩無涯陬。列仙如沙。不少一瀉。王母咲聽。拜謝叩頭。
歸來山林。曷標曷鉤。熙熙泰和。長樂無憂。

班婕妤

昭陽秋清月如練。笙歌嘈嘈夜開宴。長信宮中辭釐人。獨倚西風詠紈扇。傾城自古有褒妲。紅顏失寵何須怨。泠泠玉漏掩重門。一點金釵照書卷。

神絃曲

紫桂飄香九萬里。三山地色如凝水。水妃骨冷不能眠。金簪素指敲冰絃。泠泠玉泉滴貝闕。閨壑菱蛟泣幽碧。青瞳小髻歌繁霜。霜飛風。江低昂。瞳矐紫燄出海樹。天清月落空相望。

短歌行

涼風西來天氣清。雲飛水落山崢嶸。髮膚剝削稜骨生。鮮芳菸悒成枯莖。百蟲哀號百竅鳴。凡有形色皆不平。成之孔艱壞厥輕。羈人含愁起夜行。列星滿天河漢橫。繁思攢心劇五兵。天高何由達其情。歸來託夢通精誠。

長歌行

秋夜夜長月照軒。夢見天神與我言。曜靈循環周四垣。四時迭代成寒溫。枯榮生殺相爲根。我於萬物何怨恩。生丁其時命所存。六淫洶湧無鍵關。由其弗約離其魂。春葩敷披夏實繁。外美中瘁誰能捫。風霜涸寒肅不驚。納華狀真歸本元。掃滌浮穢夫何冤。我今語女開女昏。生生殺殺無窮源。斂女旨蓄守女門。扶桑赫赫升朝暉。

燕歌行

霜飛動地燕草凋。沙飛石走天蕭條。江河倒影陵谷搖。白日慘淡晝爲宵。美人迢迢隔雲霄。青冥無梯海無橋。魚枯鴈死星芒消。沉沉思君不自憯。愁如驚風鼓春潮。歲云暮矣山寂寥。梧桐葉落空乾條。崑崙層城阻且遠。蒼梧九疑煙霧遙。瓊田瑤草芟芻蕘。江蘼澤蘭成艾蕭。登高望遠肝肺焦。安得羽翼搏長鸞。

江南弄七首

江南細水細綺波。江南綵女雛鳳歌。凝嘶引睇紆青蛾。紆青蛾。舒窈窕。網軒綉戶鎖嬌春。不放杜鵑來木杪。

雄龍呼雌江底鳴。山搖谷殷江波驚。餘音不斷隨風征。隨風征。入湘竹。截玉鑽星吹向天。楚江六月無炎

燠。

湖波澄明日色鮮。畫鷁相隨出采蓮。嬌紅曼綠鬪春妍。鬪春妍。倚徘徊。今朝花盡且歸去。明日更有新花

開。河曲懸匏渭濱竹。碧鮮削出藍田玉。輕翎參差飛羽謾。飛羽謾。幽簧含。丹櫻瑤笛調清吹。月明紫鳳來麤

麤。采菱女子木蘭船。翠裙紅袖青玉鈿。搖光蕩影惜嬋娟。惜嬋娟。愁夕暉。拔蒲歌斷鯉魚入。歸去芰荷香滿

衣。江草萋萋春渺渺。江臯出遊多窈窕。輕霞衣裳碧雲嫋。碧雲嫋。紅日斜。鴛鴦飛過綠渚去。東風吹落菖蒲

花。巫山宮峽巫峽長。瑤姬出舞朝雲翔。翠葩嫋嫋金支光。金支光。丹葉艷。寶鷄爲使鳳爲驂。去雨來風樂無

步出夏門行

步出夏門。遙望滄海。九河茫茫。碣石安在。魚龍漫漶。日月掩藹。三山何所。弱水浼浼。羲和曷往。鼈極孰宰。發鳩之羽。其心不改。安期不死。桃實可待。悠哉沛乎。歌以永慨。

丹霞蔽日行

丹霞何煌煌。蔽此白日色。炎埃被九野。照灼后土赤。朱陵開火府。燿爛相蕩射。山蒸絳紅氣。川瀉丹砂液。

穹玄變光曜。衆草相烜赫。迴迷河林蕩。高奪昆命碧。鬱華不能神。跋烏已化魄。女媧在青天。歲莫還鍊石。

鳥生八九子

樹上鳥。一生八九子。相呼啞啞聒人耳。何不學啣泥燕。和鳴集桃李。又不學鷹與隼。奮翅高飛碧雲裏。胡爲巢此庭樹間。啄腐吞腥饜吻勞。少年挾彈如流星。禍機潛發不見形。翎摧折身首磔。螻蝻傷殘誰女惜。

猛虎行

君不見昔者牛哀病七日。化作猛虎形。躑踞衣裳。佩帶換毛尾。棄置衽席。眠茅茨。怒牙出吻。目閃電。頃刻不識妻與兒。昨日燈前相啖語。豈意今朝化爲虎。嗚呼。世上茫茫化虎人。祇應化心不化身。

行路難二首

君不見。水上澌。往來條忽隨波移。又不見。花上蜂。東枝飄落尋西枝。世人食葵不食蕪。莫倚結交心匪石。君不見。避席武安人。卽是當年竇家客。

君不見。白日光。不照幽草心。又不見。石上雲。膚寸遂成陰。世間會合良難得。況有巧言能燦金。伏波臺葬魏碑仆。當時豈是非知音。智謀啓疑忠逆耳。平地反掌生崎嶇。行路難。愁最深。

野田黃雀行

野田雀。喙啄啄。朝食山下禾。暮食山上粟。千百爲羣。叢薄裏。忽然驚飛若蜂起。飛飛卻落稻田中。衆口齊啄。稻爲空。農夫力田望秋至。沐雨梳風盡勞瘁。王租未了私債多。況復爾輩頻經過。野田雀。鷹隼高翔不

汝擊農夫田父愁何極。

何當行

念離莫悲歌。悲歌慘於哭。思鄉莫望遠。望遠傷心目。九疑迢迢隔湘川。空山落日啼杜鵑。梧桐摧折鳳凰去。蛟蜃出沒波滔天。令我四顧心茫然。淚如懸崖瀉流泉。樊桐有路到玄圃。何當飛墮王母前。

射虎詞

長戈如林夾弓弩。言向深山射猛虎。獠兒蒙躡走如風。所過天羊皆爲空。紛紛散入人家宿。丁男上山婦女哭。前行聞虎心先畏。一虎當頭萬夫棄。折弓墜刃委如土。卻向人前作威武。

苦哉行

鷄不可使守門。狗不可使司晨。驅車梁弱水。日暮空悲辛。我欲乘風謁閭闔。虹蜺彌天雲霧合。九關虎豹森駭人。長跪陳辭關不荅。錯石作璵璠。鬼神驚見欺。截梁爲構榼。般垂拊膺淚交頤。衝風結玄冰。道惡不可履。巫咸上天去。澤凍神蒼死。我欲竟此曲。此曲多苦聲。鴻鴈向天北。因之寄遺情。

起夜來

微月就沒銀河爛。城烏啼啼夜將半。憂愁不寐攪衣起。仰看明星坐待旦。威弧歷落連天狼。兩旗欲動風不揚。槐根王侯夢未覺。豈知鷄聲堪斷腸。

長相思

長相思。妾在天南君在北。紅顏未必無人知。葑菲不羨君王食。相思迢迢隔天河。長夜不眠愁奈何。欲憑

魂夢到君所。君門九重虎豹多。長相思。向誰道。涼風日夕吹桂枝。可惜馨香暗中老。

無愁果有愁曲

君不見陳家天子春茫茫。後庭玉樹凝冷光。樓船江上走龍陣。宮中只報平安信。酒波灑灑蒸粉香。暖翠烘煙妬嬌鬢。無愁老夫貂鼠裘。降旗搖動臺城秋。生綃束縛檻車去。始信人間果有愁。

妾安所居

憶昔嫁君時。紅顏豔春華。今與君別離。明珠化爲沙。女兒嫁夫願偕老。何異青松纏蔓草。一枝一葉俱有心。生死長當兩縈抱。誰言妾心君不知。芳蘭委棄同蒺藜。妾欲有言君不見。君車遙遙妾空戀。君家大宅荒路隅。可憐棄妾安所居。

放歌行

鴻鵠搏紫霄。鷓鴣守苞桑。豈惟異所志。羽翼有短長。玄陰變白晝。闔虛侵太陽。一鹿走中原。熊虎競騰驤。植竿成壘壁。舉袂爲攬槍。叱咤倒江河。蹴蹋摧山岡。犬牙據險要。瓜瓣割土疆。六奇誇曲逆。三略稱子房。磨牙各有伺。裂眦遙相望。龍蛇未分明。智力正爭強。孔明魚得水。毛遂錐脫囊。霧晦豹始變。海激鵬乃翔。嗟爾獨何爲。抱己自摧藏。

鴈門太守行

赤符復漢祚。褒德先侯封。陽燧焰發鑿。霜隴山鳴鍾。馴雉集中牟。乳虎去弘農。抱鼓夜無聲。桑陰麥芄芴。循良一何多。謠歌滿兒童。賢哉洛陽令。卓魯相繼蹤。擲姦若明神。外猛中有容。正獄除煩苛。平賦寬畸窮。

黎民拜恩惠。吏卒服至公。身歿德不墮。絃歌祠廟崇。望美安陽亭。頑懦興廉風。彼哉肉食者。輿馬愧盲聾。
豔歌行

亭亭松柏樹。結根幽澗隈。高標拂雲日。直榦排風雷。曾經匠石顧。謂是梁棟材。明堂未構架。厚地深栽培。熒星入天闕。武庫一朝災。搜求到櫟樸。谷赤山城垓。般爾死無人。鈎繩付輿臺。路阻莫自致。棄之于草萊。天寒斧斤集。歲莫空摧頽。三光無偏照。四氣有還迴。斲喪在須臾。成長何艱哉。孰知真宰意。悵望使心哀。
門有車馬客行

門有車馬客。云是故鄉人。執手前借問。鄉語知情真。自云別故鄉。觀光京國塵。經商涉代北。薄宦往西秦。繡鳳錦鴛鴦。金鞍紫麒麟。結交貴公卿。出入擁衆賓。劇孟氣方銳。郭解家不貧。但見三春花。寧思秋露晨。斷蓬失其根。風沙歟漂淪。前途寒虎狼。故里荒荆榛。昔爲橫海鯨。今爲涸轍鱗。話言未及竟。涕淚各盈巾。居家倚骨肉。出家倚交親。何當在異縣。見此舊里鄰。園蔬如蜜甘。市酒若醴醇。悲歡且棄置。生死同苦辛。知歌有深情。情深難具陳。

煌煌京洛行

齊謳且輟唱。吳趨亦停聲。請君傾耳聽。聽我歌洛京。京洛何煌煌。卜宅自周王。五服盡九州。茲爲土中央。用文四戰地。恃德不恃強。叔世道雖微。靈源瀉流長。漢祖殫秦項。定都由子房。馬上得天下。繼周焉敢當。光武起白水。龍飛掃撥槍。應天順民心。戡暴安痍傷。冤旒王宸極。圭組崇俊良。功臣列爵土。循吏勸畊桑。詔書報臧馬。玉關閉西羌。周嚴播高風。卓魯樹甘棠。廷無乳虎伏。邑有馴雉翔。涓涓醴泉液。燁燁朱草芳。

繼體更賢能。守成不踰常。南郊尊上帝。宗祀親明堂。辟雍養耆德。靈臺觀禋祥。南宮畫元勳。東觀昭文章。詩書母后訓。淫侈蕃封防。百年天再闢。四帝日重光。傾仄自滿盈。宴安生怠荒。刑官竊威柄。義士死道旁。豐積千里草。禍成一星黃。大命始不棼。餘暉尙悠揚。典午亦有初。言治稱太康。用人混哲否。孽芽出蕭牆。兄弟相啖食。同氣成豺狼。金墉豈不同。清談漫洋洋。妖星入太極。胡雛登御床。銅駝荆棘沒。寢廟狐狸藏。落日照西城。寒雲歸北邙。轆轤無人行。伊洛廣且長。衰榮若旦暮。道德信金湯。殷勤京洛篇。厥鑒不可忘。

升天行

太儀轉神樞。日月飛兩丸。榮華如電火。瞬息無留顏。誰能與螭蛄。爭鳴秋草間。中夜集五靈。步虛款天關。擺脫塵土累。廓落真境寬。玉髓充晚食。琉璃足晨餐。妙合五色光。化爲九轉丹。洞朗照無極。逍遙出人寰。象載六蒼虬。翼以雙紫鸞。濯足北河津。引節蓬萊山。伶倫歌九韶。眉連舞七盤。浮丘吹參差。宓妃鳴佩環。娛樂竟日夕。還歸玉宸班。

長安有狹邪行

大道坦蕩蕩。狹路能摧車。大道少人行。狹路爭走趨。狹路險以捷。大道平而迂。所以狹路間。疊足不憚劬。嶒嶮磨爲光。窳坳輾成渠。峻滑無澁踵。攀緣有牽裾。駟騶踣蹄蹠。僕從賴肩呼。清霜晨入袂。白露夜沾襦。擾擾極追奔。營營競須臾。窮通乃定命。得喪豈異途。君子遵義路。詭御非吾驅。滅趾禍難悔。素履戒勿踰。那能慟阮籍。何用泣楊朱。長安有狹邪。雖捷焉所如。

飛龍引

軒轅黃帝上天時。五龍垂髻下接之。後宮綵女咸相隨。雲輕龍健不可追。綵女化作黃金芝。千年一作花。花光五色明朝霞。扶踈蔭映玉皇家。沉精降液爲丹砂。鍊丹砂。成水銀。水銀流汞浴火輪。火輪照曜十二辰。黃龍歸來天帝噴。

春思

憶昔東風入芳草。柳綠花紅看總好。今日風吹陌上塵。鶯啼燕語俱傷神。憂來感人淚沾臆。未必春光不如昔。

靜夜思

靜夜思。一思腸百轉。啼螿當戶聽不聞。明月在庭看不見。方將入海刺猛蛟。復欲度嶺邀飛獠。胸中倏忽亂憂喜。得喪紛紛竟何是。靜夜思。思無窮。天雞一聲海日紅。滿頭白髮吹秋風。

華山畿

華山畿。勞勞洛。割棄父母恩。相隨黃泉去。男婚女嫁當及時。標梅不見周南詩。王風蕩蕩散荆棘。帷薄日夕生狂癡。當歌悵然有所思。華山畿。何足悲。

冬暖行

孟冬十月暖。桃李花盛開。胡蝶草間出。飛上花枝來。蝶知愛花爲花出。不知冬暖無多日。霜風一夕花作塵。墜粉飄黃愁殺人。

節婦吟

淒切復淒切。綠萍初生池水竭。蘭根壓霜芽不茁。春風冷冷逐秋月。蓼蟲食苦甘如酒。卷施雖生心已朽。楊州青鏡蝕土花。玉匣瓊臺復何有。君不見。人間日月如飛梭。地下相從應始多。

登高丘而望遠海

登高丘。望遠海。長風簸浪高於山。蓬萊宮闕無光采。雲霧翳陽谷。羲和安所之。鯨鯢作隊行。鱗鬣如朱旗。精衛啣石空有心。口角流血天不知。登高丘。望遠海。弱水浩蕩不可航。一望令人玄髮改。

江上曲

江上風吹沙石走。江中濤浪如牛吼。鄂君繡被寒無香。江水不如殘夜長。

北風行

城外蕭蕭北風起。城上健兒吹落耳。將軍玉帳貂鼠衣。手持酒盃看雪飛。

銅符臺

高臺突兀連蒼穹。中有艷質如花紅。君王已作西陵土。繡帷玉座空。秋風向陵舞罷寒。月白蒼狐夜啼松。淚滴家中枯骨寧有知。翠袖珠袍爲誰色。當其奮臂譙許間。手揮羣雄如刈菅。橫矛賦詩逞豪傑。猛氣可以移南山。寧知暮年壯心死。遺教但聞令賣履。唏噓涕泣兒女態。遺臭至今猶未已。君不見。永安宮中顧命時。天下英雄人得知。

薤露歌

蜀琴且勿彈。齊竽且莫吹。四筵並寂聽。聽我薤露詩。昨日七尺軀。今日爲死屍。親戚空滿堂。魂氣安所之。

金玉素所愛。棄捐篋笥中。佩服素所愛。淒涼掛悲風。妻妾素所愛。洒淚空房櫳。賓客素所愛。分散各西東。騷者自相快。親者自相悲。有耳不復聞。有目不復窺。譬彼燭上火。一滅無光輝。譬彼空中雲。散去絕餘姿。人生無百歲。百歲復如何。誰能將兩手。挽彼東逝波。古來英雄士。俱已歸山阿。有酒且盡歡。聽我薤露歌。

沐浴子

沐髮不如清神。浴身不如洗心。仁義非外鑠。治容防內淫。登山望漢京。樓觀蔚嶽岑。軒車擁衡禹。几杖尊雄歆。著書擬周孔。吐論躋鶯參。青衿來濟濟。白日去駸駸。驅車泗水曲。攬轡長淮陰。悠悠黃石略。杳杳天風吟。盛時不可再。感歎爲沾襟。

秋閨曲

天上傷心月。秋來情更親。那能照幽獨。不照遠行人。

蓮塘曲

落日下蓮塘。輕舟赴晚涼。偶然花片落。飛出兩鴛鴦。

蒿里曲三首

澗草萋萋泉汨汨。紫蘭香老棠梨發。山中無人松柏寒。臥聽狐狸嘯明月。白楊樹頭風惻惻。寡鳥悲啼山月黑。殯宮冷落清夜長。銀鴨金甌不堪食。山花冥冥啼子規。烏銜紙錢掛花枝。山中遊人莫相喚。君到此中當自知。

促織詞

草間小蟲名促織。夜夜隔窗鳴不息。小兒側足潛聽聲。雌籠銕柵閉爾形。金錢縱聞爭相妬。得勝轉多局轉固。高秋九月嚴霜飛。開籠卻放枯蔓歸。舊穴無蹤故帷去。生死淒涼向何處。

銜泥燕

銜泥燕。尾涎涎。銜泥點污几席間。更捉飛蟲撲人面。銜泥燕。人言爾巢長滿尺。主人倉廩多蓄積。借爾華屋好安居。年年壘巢生爾雛。

秋思二首

蕙草芳已歇。候蟲寒不鳴。相知惟白髮。日夜滿頭生。露出階苔光。風生庭樹冷。推窗掩明月。不忍見孤影。

寒夜曲

蟾車帆露迷圓景。金井幌幃僵素綆。孤鸞叫破海天雲。嫦娥淚滴方諸冷。十二樓開春醉醒。千年斷石生曾青。林霏散漫紫府曙。白莎黃葛空殘螢。

古鏡詞并序

金陵武生於勾曲野人。得古鏡中鏡。李桓先生辨其款製。燕石上有元康年字。定其爲漢時物。今雖不能灼見其非晉而漢。然其來之不近。則明矣。

百鍊青銅曾照膽。千年土蝕萍花鬢。想得玄宮初閉時。金精夜哭黃鳥悲。魚燈引魂開地府。夜夜晶光射幽戶。盤龍懸見自有神。神物豈肯長湮淪。願借蟾蜍騎人月。將與嫦娥照華髮。

琅琊王歌四首

駿馬須好鞍。彊弓須勁箭。將軍不知兵。健兒空自健。
香羅金縷衣。采花弄春暉。花高折不得。空步綠莎蹄。
出門無情親。大道行亦窄。寄與遠遊人。屈行勝爲客。
四通八達琅琊道。快馬如龍踏煙草。草淒淒。煙漠漠。陌頭風起桃花落。

長相思四首

長相思在瀛州。蓬萊之山忽沉浮。弱水無風亦倒流。鯨魚一吸吞九牛。旋淵呀呷鳴其喉。青鳥飛去天悠悠。嗟我欲往徒離憂。

長相思在蒼梧。九疑愁雲隔明都。湘神淚滴湘水枯。冥冥霧雨啼短狐。楓林沉陰天色晡。鳳皇不食鷓鴣呼。嗟我欲往空長吁。

長相思在昆侖。黃河怒浪訇天門。天開石裂龍駿奔。羲和縣車光未暎。岷峨雲埋蜀帝魂。流沙千仞沉轡轅。嗟我欲往難窮源。

長相思在玄冥。寒門六月天雨水。天關凍折天柱傾。女媧鍊石補未成。石鱗迸落如流星。龜蛇上訴愁帝青。嗟我欲往勞心形。

殘絲曲

玉樓十二春如綺。日暖清池躍魴鯉。空閨無處着柔情。夢逐殘絲撲天起。天南河漢天西流。豈知少年能

白頭便喚姮娥栽桂樹。花時相約月中遊。

拜新月

月生花始開。月圓花漸落。花開人少年。花落人可憐。女兒拜新月。望圓不望缺。未圓望不休。既圓應更愁。

自君之出矣

自君之出矣。雲鬢愁不綰。思君如轆轤。倏忽心百轉。

美人燒香詞

翡翠釵梁雲作葉。膩紅深暈桃花頰。玉奴纖手捲蝦鬚。繡羅襪小不勝扶。低頭背人整裙帶。神前獨自深深拜。翠袖輕迴香霧分。細語悠悠聽不聞。門外遊人空駐馬。冥冥白日西山下。

築城詞

君不見杭州無城賊直入。台州有城賊不入。重門擊柝自古來。而況四郊多警急。愚民莫可與慮始。見說築城俱不喜。一朝城成不可踰。挈家卻向城中居。寄語築城人。城高固自好。更須足食仍足兵。不然劍閣潼關且難保。獨不念至元延祐年。天下無城亦不盜。

畦桑詞

編竹爲籬更栽刺。高門大寫畦桑字。縣官要備六事忙。村村巷巷催畦桑。桑畦有增不可減。準備上司來計點。新官下馬舊官行。牌上卻改新官名。君不見古人樹桑在牆下。五十衣帛無凍者。今日路傍桑滿畦。茅屋苦寒中夜啼。

買馬詞

驛官亭鼓。擊打。驛使星馳。買官馬。府官奔走羣吏趨。呵叱縣官如使奴。一時立限限鄉役。馬價頓增無處覓。賣田買馬來納官。買時辛苦納時難。縣官定價府官減。驢驢也作駑駘看。歸來拊膺向隅泣。門前索錢風火急。

神祠曲

路傍古廟壁半斜。雨滴香案堆坭沙。槎牙死樹當道臥。樹上紙錢猶未化。春秋祭祀知幾時。烏鴉得食號相隨。人人歡喜得好琰。低昂拜跪山花飛。寧知禍發在旦夕。空村無煙唯瓦礫。廟傍烏鴉亦不來。獨留土偶眠蒼苔。

雨雪曲

北風吹塵沙。雨雪日夜深。三足之烏毛毳飛不遠。白晝慘淡成幽陰。青天冥冥不可覩。水有罔象路有虎。平民避亂入山谷。編蓬作屋無環堵。回看故里盡荆榛。野鳥爭食聲怒噴。盜賊官軍齊劫掠。去住無所容其身。嗚呼。彼蒼何日回春陽。北風雨雪斷人腸。

苦寒行

去年苦寒猶自可。今年苦寒愁殺我。去年苦寒凍裂唇。猶有草茅堪蔽身。今年苦寒凍入髓。妻啼子哭空山裏。空山日夜望官軍。燕頷虎頭聞不聞。

遠客歎雨

遠客暮年筋力寡。入門無家出無馬。冷風一夜雨瀟瀟。平明道上泥沒腰。竈下濕薪不生火。敲冰取水指
欲墮。僕夫怨怒呼不前。終日忍飢掩關坐。憂來傷心令髮白。人生百身莫爲客。

久別離

久別離。別時小兒未解語。今日踉蹌庭下來。向人問爺淚如雨。兒知有爺未曾識。爺有母在愁何極。明庭
不奏采薇詩。久別離。當語誰。

苦熱行二首

南風吹雲不成澤。朝霞暮霞山谷赤。赤松羽人潛大荒。火府朱陵氣相射。蜚廉翹跼不能奮。萍號眼枯口
流血。遠客魂銷畏絺綌。

憶昔伏波南伐時。穿岸爲宮避炎氣。青草茫茫起瘴煙。吹蟲含沙總堪畏。人生惜死非男兒。但有馬革可
裹屍。武陵之曲何傷悲。

梁甫吟送鄭希道入京

老翁生長平原里。但見平原路如砥。謂言路平無峻嶮。車輪不摧馬如飛。今日驅車上梁甫。回頭卻憶平
原路。梁甫吟。愁我心。

望遠行俟後舟不至作

望遠行。日日望來腸欲斷。數遍南風下水船。愁中白日偏難晚。順風順水不易得。欲去又愁來者遠。望遠
行。一望令人白髮生。

女兒割股詞爲徐勉之作

女兒少小幽閨裏。深掩重簾學針指。施朱傅粉有母憐。一朝無母將焉恃。青燈背壁月當戶。峴山之禽夜啼苦。丹元訴天天爲愁。淚洒長河作飛雨。嗟兒與母同爲身。母子分離何苦辛。抽刀割股股不血。一念自感皇穹仁。吾聞孝慈出天性。人心至誠天必聽。兒股有肉母所育。母生兒死兒亦足。

巴陵女子行

巴陵女子天下奇。石作心肝冰作脾。生平見義不見已。投淚恨殺襄陽兒。臨終裂素寫怨語。生氣猶能起風雨。君不見虎符繫頸東海橋。令人愧死巴陵女。

秦女休行

秦家女兒美且都。齒如編貝唇如朱。有生不幸遭亂世。弱肉強食官無誅。兄朝出門暮不返。家人悵望空倚闕。女休聞之肝膽裂。奮臂不惜千金軀。援矛一擲白日賊。仇血上濺天模糊。市人驚譟塵土沸。邏卒奔走馳金吾。有心殺人寧惜死。顧謂女吏何其恐。媪法長姦誰所致。舍生得義吾何道。精誠通天天爲惻。赦書一夕來宸極。路旁觀者咸歎嗟。女休出門無喜色。君不見景升本初之子空。是男亡家破國令人慙。

蠻中歌二首

小兒負薪早已歸。大兒采螺底不回。海上橋竿齊入浦。山頭雲起颶風來。祝融廟前稻欲齊。椰子如瓠壓枝低。烏鴉亂叫祭鬼罷。桄榔樹裏鷓鴣啼。

閩詞六首

戎馬關山隔。空閨鬢髮華。將何寄消息。江樹總無花。
昨夜三更夢。分明見所思。覺來驚枕席。心跡兩相疑。
塞鴈南還北。江湖西復東。佳人不可見。霜雪萬山空。
別卻燈花蕊。從教污翠鈿。幾回虛報喜。誤妾不成眠。
小小雕渠鳥。雙雙入畫樓。樓中人怨別。愛爾不知愁。
欲寄音書去。書成乏便郵。持書上樓望。淚洒鷓鴣裘。

烏啼曲

可怪烏鴉鳥。鳴聲不喜人。如何好彊聒。故博主人嗔。

五雜俎

五雜俎。原上翻。往復還。小販客。不得已。漚沓麥。
五雜俎。百衲衣。往復還。燕雙飛。不得已。賦式微。
五雜俎。市賣果。往復還。郵傳馬。不得已。死坡下。

春江曲

江上風帆日日歸。獨自狂夫音信稀。無因化作鷓鴣鳥。隨着郎舡到處飛。

公子行

玉勒金鞍照地光。駝裘珠帽繡文章。平明上馬歸來醉。他日清朝作棟梁。

仙人詞三首

玉府仙人水雪姿。生來卽遣侍瑤池。五雲隔斷塵凡路。說着人間總不知。
上帝宸居儼肅森。九關虎豹立崑崙。羣龍自有三珠樹。不見扶桑水淺深。
東海鯨鯢白晝游。南溟風浪湧吞舟。三山亦在滄波裏。自是神仙未解愁。

黃鵠曲

黃鵠雙飛中路分。關山風雪隴頭雲。雲深雪暗知何處。哀叫聲聲天上聞。

吳歌五首

儂做春花正少年。郎做白日在青天。白日在天光在地。百花誰不願郎憐。
承郎顧盼感郎憐。準擬歡娛到百年。明月比心花比面。花容美滿月團圓。
便道逢春花合開。誰知穠豔有人猜。山鷄不入家鷄侶。野果難同園果栽。
蛾眉二八不曾愁。有色無媒郎不留。月裏蟾蜍推落地。幾時再得廣寒遊。
栽花圖作看花人。誰料花開不及春。昨夜狂風今夜雨。爲花落得兩眉顰。

采蓮歌六首

十三女兒白似脂。向人學得做嬌癡。折得白蓮頭上插。苧羅山下賽西施。
十五女兒花正開。隨羣逐伴采花回。濃粧比似花嬌艷。引得黃蜂隊隊來。
采得紅蓮愛白蓮。雙橈快轉怕人先。爭知要緊翻成慢。菱葉中間絆卻船。

芍藥爭春銜彩霞。芙蓉秋盡卻榮華。有色有香兼有實。百花都不似蓮花。
女伴相隨出芰荷。並船比較采蓮多。擡頭忽見遊人過。權入菰蒲水拍波。
晚涼風定卻回船。望見新月在天邊。放下荷花深深拜。翻身忙整翠花鈿。

竹枝歌十二首

人間日月去如梭。快活無多辛苦多。欲識江南古來意。請君聽唱竹枝歌。
相思無益莫相思。贏得鬚髯換黑髭。明月自圓還自缺。蚌胎瘦減有誰知。
陽臺雲雨漫荒唐。巫峽啼猿枉斷腸。莫向蒼梧山下去。九疑愁色滿瀟湘。
瀟湘江水接天河。第一傷心是汨羅。斑竹岡頭蘭蕙死。黃茅壠上艾蒿多。
榮華未必是榮華。園裏甜瓜生苦瓜。記得水邊枯楠樹。也曾發葉吐鮮花。
若要開花須護持。花枝怕雨怕風吹。抽條結蕊千辛苦。糝土埋苔一霎時。
變變月子似簾鉤。掛在梧桐樹上頭。月裏姮娥知何處。人間離別未爲愁。
昨夜星光照濕泥。五更依舊雨淒淒。懊惱人心難測度。說道東方卻在西。
杜鵑花開不着忙。石蓮花落卻恹惶。壩頭酒盡休懸望。裁衣無尺莫思量。
莫見乾藤道是香。莫見白石道是羊。布帘賣酒齊誇好。甜辣須還到口嘗。
龍窟在水虎在山。登山入水早防閑。別有一般真叵耐。蝦蟇生在月中間。
望帝無端化羽毛。無朝無暮口嘈嘈。見說天高三萬里。吻乾舌出也徒勞。

江南曲七首

江北垂楊未爆芽。江南水綠萬重花。北人盡道江南好。江南纔到便爲家。
金陵好是帝王州。城下秦淮水北流。惆悵江南舊花月。女兒盡作北歌謳。
洞庭湖色碧於藍。瀟湘日融花欲酣。黃雀樓中留醉客。懶人天氣是江南。
錢唐勝地作南都。紈綺如雲隘廣途。想得燕山風雪夜。斷魂相語怨西湖。
桃葉渡頭春水平。莫教城上曉鶯聲。中原無限英雄淚。併入江南送別情。
無情白日去如梭。有限青春可奈何。江北風沙人住少。江南秔稻鴈來多。
生長吳儂不記春。鄉音旋改踏京塵。丫頭小妓相偎坐。衆裏矜誇是北人。

前溪曲

前溪送別溪水滿。石楠花落蒲芽短。春風無情看復秋。莫學落花隨水流。

長門怨

不學周南詠小星。空悲玉殿鎖娉婷。黃金漫買相如賦。猶勝無辜送掖庭。

山鷓鴣六首

女兒未始會穿針。將去高麗學語音。教得新番鷓鴣曲。一聲准擬直千金。
鷓鴣能言百鳥驚。鷓鴣叫噪阻人行。珊瑚軟語呈嬌媚。不似班鳩得拙名。
溪深不比海子深。一物從來有一心。野鳧趕魚溪上去。鷓鴣飛過野鳧沉。

黃茅壠上雨和泥。苦竹岡頭日色低。自是行人行不得。莫教空恨鷓鴣啼。
鷓鴣元是嶺南音。嶺北無人識此禽。南人唱歌過嶺去。北人相向淚沾襟。
山禽一處一般聲。不是鄉音使動情。多是江南子規鳥。天津橋上對人鳴。

浣紗女二首

嫋嫋腰肢玉一圍。妬紅嬌綠淡春暉。莫教名字傳宮掖。終遣詩人刺綠衣。
臥薪終夜泣孤臣。落月飛霜幾度春。能使姑蘇聚麋鹿。誰知卻是浣紗人。

雙帶子四首

嫁時雙帶綉麒麟。翠葉金花色色新。寧教塵匣蒙蛛網。不肯將來別贈人。
結得同心欲寄郎。還將雙帶刺鴛鴦。殷勤祝付西歸燕。一紙書緘淚兩行。
合歡雙帶繡蜻蜓。一度看來一淚零。雪裏芭蕉心長在。春來不改舊時青。
莫言長夜使無明。莫道離鸞不合并。天上星辰能化石。黃河千歲也還清。

鷄鳴曲二首

霜飛月落天峰嶽。啾啾喔喔鄰鷄鳴。龍蛇雜遝寰海沸。誰知此聲非惡聲。
莫厭晨鷄相應啼。中原千里絕晨雞。一匡自是無管仲。坐談不用誇曾西。

寒姑二首

苔沒行蹤草沒堤。滿簾紅日一鷺啼。天涯那得真消息。不敢逢人問磧西。

腸斷龍沙信不通。夢中長怕醒時空。夜來忽得榆關報。卻憶傳聞是夢中。滿篋衣裳手自裁。寄君親付與郎開。錦衾角枕期窵窵。遮莫無人莫寄回。

春曲二首

春天不雨亦不晴。楊花飄盡池萍生。庭烏雛成巢燕暝。惟有村鷓啼到明。春晴野煙生綠塘。春遊綵女鉛華光。碧雲日暮去何處。紅苧白蘋他自香。

楊柳枝詞九首

多事垂楊管送迎。長條折盡短條生。不知幾許東風裏。猶帶輕煙冒晚晴。滂將營中萬樹春。朱旗曉色動星辰。可憐煙雨章臺路。翠縷斜縈走馬塵。楊葉淒淒隱畫樓。楊枝嫋嫋弄輕柔。鳴鳩叫罷黃鸝語。肯信年華有素秋。憶昔春風白下亭。桃紅李白柳青青。繁華一夢今何在。露葉依稀似淚零。長干橋邊楊柳枝。千條萬縷鬱金絲。人來人去爭攀折。無復青青映酒旗。淮水春晴碧簾紋。楊花楊葉總成雲。錦帆零落美人盡。枝上流鶯誰獨聞。二月垂楊綠葉齊。無朝無暮子規啼。飛花袞袞向東去。卻被東風吹向西。枝上穠花吹漸稀。樓前楊柳正依依。春風解釋佳人恨。故卷繁陰放燕歸。長江春水去悠悠。亂絮輕花取次休。落日高樓怨橫笛。寒鴉飛盡暮蟬愁。

宮怨二首

沉沉煙雨掩孤闌。可怪東風到得遲。今日清明上樓望。不知花謝已多時。
何處春風拂苑牆。飛花片片入昭陽。多情尙有池邊柳。留得啼鶯伴日長。

女兒子

女兒二六月上弦。嬌羞長在阿婆邊。阿婆惜愛女兒子。女兒只愁阿婆死。

誠意伯文集卷之十一

歌行

送陳庭學之成都衛照磨任

君不見。岷山導江戒南紀。噴雨嘯雲九千里。瞿唐劍閣鍵重關。錦城花繞成都市。雄藩作屏鎮羗夷。列郡五十爪牙之。長夏雪山連太白。玄冬熱海蒸坤維。

聖皇握符御宸極。煙塵不起鯨波息。鳳凰麒麟在郊薮。川后嶽靈俱效職。籌邊樓上羅俊良。況子敏學年方將。將軍幕府曾試用。驩囑熟路宜騰驤。大船揚帆泝江水。東風漫漫吹蘭芷。綵衣鶴髮對晨昏。有酒盈尊甘且旨。吾聞嵯峨上與井絡通。風氣隔閩華與戎。九夷八蠻濡帝澤。廟堂已得攻心策。

爲王輔卿郎中題雪灘寒鴈圖

雲茫茫。水浪浪。林木脫葉無稻糧。烏啼鴈叫天蒼涼。歲云莫矣江山長。有竹有竹在高岡。三株凍折兩復儘。小禽悲飛不能揚。蒼梧悠悠隔沅湘。欲往從之川無梁。願披寒霄見朝陽。勿令嗷嗷傷我腸。

漁樵問答

樵問漁江湖風波惡。何似采薪人。無憂茹藜蕈。漁答樵。山中何所有。未若擢扁舟。得魚卽沽酒。

題王元章梅花圖

會稽老王拙且癡。能畫梅花稱絕奇。春牕走筆生古恠。中有窈窕傾城姿。人生得閑真是好。得閑不閑惟此老。布袍關茸髮不梳。一生只被梅花惱。天生梅實可和羹。爾梅有花結不成。世間花實總尤物。不如畫圖終古無枯榮。

琴歌贈劉元明

龍門獨樹水鹽弦。空林霜清鳴暗泉。姮娥抱桂寒不眠。離鸞怨啼風滿天。碧潭殷雷龍起蟄。月落太陰山鬼泣。湘江秋水一劍明。帝子歸來聞珮聲。扶桑浪翻碣石改。東海魚飛入西海。白雲去盡天茫茫。十二玉樓深夜涼。

二鬼

憶昔盤古初開天地時。以土爲肉石爲骨。水爲脈天爲皮。崑崙爲頭顱。江海爲胃腸。嵩岳爲背脊。其外四岳爲四肢。四肢百體咸定位。乃以日月爲兩眼。循環照燭三百六十骨節。八萬四千毛竅。勿使淫邪發洩。生瘡疔。兩眼相逐走不歇。天帝愍其勞逸不調。生病患。申命守以兩鬼。名曰結璘與鬱儀。鬱儀手提三足老鴉脚。脚踏火輪蟠九螭。咀嚼五色若木英。身上五色光陸離。朝發腸谷暮金樞。清晨還上扶桑枝。揚鞭驅龍扶海若。蒸霞沸浪煎魚龜。輝煌焜耀啓幽暗。燠煦草木生芳蕤。結璘坐在廣寒桂樹根。漱嚙桂露芬香菲。啖服白兔所擣之靈藥。跳上蟾蜍背脊騎。插光弄影蕩雲漢。閃奎燦壁葩花摘。手摘桂樹子。撒入大海中。散與蚌蛤爲珠璣。或落岩谷間。化作珣玕珙。人拾得喫者。胸臆生明帶。內外星官各職職。惟有兩

鬼兩眼晝夜長相追。有物來掩犯。兩鬼隨卽揮刀鉞。禁制蝦蟇與老鴉。低頭屏氣服役使。不敢起意爲奸欺。天帝恰兩鬼。暫放兩鬼人間嬉。一鬼乘白狗。走向織女黃姑磯。槌河鼓。襄兩旗。跳下皇初平牧羊羣。烹羊食肉口吻流膏脂。卻入天台山。呼龍喚虎聽指麾。東岩鑿石取金卯。西岩掘土求瓊葳。岩訇洞弄石梁折。驚起五百羅漢。半夜撥刺衝天飛。一鬼乘白豕。從以青羊青兔赤鼠兒。便從閣道出西清。入少微。浴咸池。身騎青田鶴。去探青田芝。仙都赤城三十六洞主。騎鸞翳鳳來陪隨。神魃清唱毛女和。長烟島島飄熊旂。蜚廉吹笙虎擊筑。罔象出舞奔馮夷。兩鬼自從天上別。別後道路阻隔不得相聞知。忽聞韓山子。往來說因依。兩鬼各借問。始知相去近不遠。何得不一相見。敘情詞。情詞不得敘。焉得不相思。相思人間五十年。未抵天上五十炊。忽然宇宙變差異。六月落雪水天達。蠶羅上山作窟穴。蛇頭生角角有岐。鱗魚掉尾。斫折巨鯨腳。蓬萊宮倒水沒棚。樅檜枉矢爭出逞妖恠。或大如甕盎。或長如蜃蚶。光燦燦。形躩躩。叫鹿豕。呼熊羆。煽吳回。翔魃魍。天帝左右無扶持。蚊蠹蚤蠹蠅蚋。嗜膚唾血圖飽肥。擾擾不可揮。筋節解折兩眼瞠。不辨妍與媿。兩鬼大惕傷身。如受榜笞。便欲相約討藥與天帝鑿。先去兩眼翳。使識青黃紅白黑。使下天潢天一水。洗滌盤古腸胃心。腎肝肺脾。卻取女媧所搏黃土塊。改換耳目口鼻牙舌眉。然後請軒轅。邀伏羲。風后力牧老龍。告泰山稽命魯般。詔工倕。使豐隆。役黔羸。礪斧鑿。具鑪鎚。取金藤收伐材尾箕。修理南極北極樞。幹運太陰太陽機。檄召皇地示部署。岳瀆神受約。天皇婢生鳥必鳳凰。勿生梟與鴟。牛獸必麒麟。勿生豺與狸。生麟必龍鯉。勿生蛇與蠃。生甲必龜貝。勿生蠃與蜚。生木必松楠。生草必薺葵。勿生鈎吻含毒斷人腸。勿生枳棘葶利傷人飢。螟蝗害禾稼。必絕其蠖蚶。虎狼妨畜牧。必遏其孕孳。啓迪天下。

蠢蠢氓。悉蹈禮義尊。父師奉事周。文公魯仲尼。曾子與孔子。思敬習書易。禮樂春秋詩。履正直。屏邪敬。引頑。入矩規。雍雍熙熙。不凍不飢。避刑遠罪。趨祥祺。謀之不能行。不意天帝錯怪恚。謂此是我所當爲。眇眇末兩鬼。何敢越分生。思惟嗚嗚向。瘖盲洩漏造化微。急詔飛天神王。與我捉此兩鬼。拘囚之。勿使在人寰。做出妖怪奇。飛天神王得天帝詔。立召五百夜叉。帶金繩。將鉄網。尋踪逐跡。莫放兩鬼走。逸入嶮巖。五百夜叉。箇箇口吐火。搜天刮地走不疲。吹風放火。烈山谷。不問杉柏。樗櫟。蘭艾。蒿芷。蘅茅。茨。燔焱。熨灼。無餘遺。搜到九萬九千九百九十九。切幽谷底。捉住兩鬼。眼睛光活如琉璃。養在銀絲鐵柵內。衣以文采。食以糜。莫教突出籠絡外。踏折地軸傾天維。兩鬼亦自相顧。唉。但得不寒不餒。長樂無憂。悲。自可等待天帝。息怒解猜惑。依舊天上作伴同遊戲。

寄江西黃伯善兄弟

我思美人乃在洞庭之陽。彭蠡之陰。衝波亘天三百里。離恨比之應更深。揚瀾咆哮左蠡怒。白日慘慘玄猿吟。欲往從之。惜余心。登巖躑躅。不可以駕風。撥撥兮。雨淫淫。望厭原之飛烟。邈匡廬之高岑。霞標日觀。矗南斗。石門雙闕。撐嶽嶽。虹旌兮翠羽。昌容兮鳳凰舞。菽衣兮藏襟。玉笙吹兮紫鸞音。望不見兮悲莫任。江水湛湛愁楓林。西來文魚曾到海。願寄筆札逾兼金。

題安仁余氏留餘堂

君不見石季倫。對案方丈皆八珍。珊瑚夜光視如土。寧知汨沒同埃塵。又不見李贖皇。平生鼎食滿萬羊。中廚煙火宵未冷。詔書趣使趨南荒。金谷名園委蔓草。平泉荆棘無人掃。榮華瞬息可奈何。空令過者傷。

懷抱。世人積金貽子孫。一朝金盡難復論。古來天道有好還。君看漢代干公門。

送胡季瑛平江監倉

君不見。棠谿沙中金。又不見。龍門山上桐。衝波蕩汨入坎宮。石溜漱嚙欲雷風。梓人桃氏不見顧。自分委棄蒿樛同。一朝清廟作雅樂。搜索絡繹奔垂工。飛廉鼓鑄王爾斷。熾炭利鑿相治礪。朱絃橫絳笏。簾立鎮圭袞。冕齊雍容。世間物理有消息。累土自可成穹隆。司倉雖微君莫棄。君不見。魯叟當年嘗委吏。

弋陽方氏壽康堂

先生築堂依林臯。繞屋杉松浮翠濤。烏皮靈壽扶鶴髮。項有千歲雙垂條。小孫踉蹌竹馬戲。大孫綵衣花底翔。有耳不聆闐闐音。有目不識簿領曹。鸞啼燕語日高起。羽觴沉沉浮春醪。君不見。非熊老人釣清渭。九十鷹揚亦勞瘁。

爲杭州鄭善止題蓬萊山圖

君不見。大瀛海中有神嶽如崑崙。周遭四城五十里。石骨纏繞扶桑根。琪華爛日珠炫夜。翠樓玉殿虎守關。鍾山燭龍在其北。兩眼燁煜如朝暎。仙人東王公。掌握天紀弼帝尊。長虹爲轅龍。作馬飄然乘風白日。在下弱水蕩蕩。無力可負芥。自從大禹刻石之後。來者寡。彼秦之皇。其貪如狼。而漢之武。其欲如虎。樓船萬斛空巍巍。欲到不到風掣之。徐市蜉蝣身。乃欲邀安期。文成五利小豎子。羊質彊使蒙貔皮。神仙大喚起。濤浪射魚海上夫何爲。

壽山福海圖歌

吾聞軒轅之國。乃在大海之中央。其不壽者八百歲。壽者乃與天地同久長。樓臺縹緲造雲漢。赤日繞戶。扶桑涼。玉泉之水清。以香瑤草之味如瓊漿。洪崖有時來。環佩聲琅琅。鳳凰自歌鸞。自語青蜺。連蜺白雲舞。淋漓豹髓浮。瑤觴。錯金盤。薦麟脯。耳聞楚水泣。皇英。眼見商郊葬。彭祖。琪華玉樹宵。有光東風入。律春茫茫。春茫茫。樂無極。青驪夜夜月中來。廣寒姮娥寄消息。

送人分題得鶴山

丁令威。乃在崑崙之墟。閔風之巔。羽衣誤作塵土夢。回首人世三千年。空中落日松柏冷。若霧慘慘含悲泉。夢隨回巖訪瓊田。紫雞青鴨還相憐。丁令威。將柰何。野有贈繳。隄有網羅。前飛烏鳶後駕鵝。啄腥爭腐聲。嘍囉。渺子懷兮隔煙蘿。杳冥冥兮倚長歌。丁令威。胡不歸。槐江之山連大隄。玉樓金嶂中天開。玲瓏碧樹。瓏瓏。瓏瓏。鳳凰有閣鸞有臺。君胡爲兮獨蒿萊。丁令威。歸去來。

寄宋景濂四首

我思美人。乃在仙華之山。山前夜半掛河漢。天津兩旗俯可攀。我欲從之阻河關。初平不來白羊死。瘦骨蝕盡莓苔頑。風沙蕭蕭隔人間。玄霜日夕凋玉顏。有鳥有鳥。丁令威。側身下上空孤飛。女媧石墜鼈腳折。海水散作雲霧霏。山中有奇樹。一華一千秋。美人何不折寄我。使我歎恨長凝眸。深沉洞谷山鬼集。陰氣六月水霜留。嗟哉美人誰與儔。明年定約赤松子。與爾羣峰頂上遊。有美一人兮。美且仁。自我不見兮。不知幾春。仰玄穹兮。睇參辰。爲合爲離兮。孰測其因。青冥無階兮。江海無津。風雨茫茫兮。蛟龍怒瞋。安得羽翼兮。致我與隣。

有美一人兮。美且都。霞爲衣兮。白雲爲裾。被秋蘭兮。佩珣玕。秦和與遊兮。中黃與居。瞻望弗及兮。芳歲其徂。山高水深兮。道阻且紆。安得羽翼兮。致我與俱。

有美一人兮。在山中。蒼眉黑鬚兮。玉雪其容。飲沆瀣兮。食紫虹。澡石泉兮。灑清風。邀初平兮。從赤松。超道遙兮。樂無窮。安得羽翼兮。致我與同。

題謝臯羽傳後

阮籍哭窮途。墨翟哭素絲。賈誼上書期。寤主卞和抱玉無人知。人生有情不可奪。謝生慟哭非狂癡。神奔鬼遁天地革。龍魚貓虎三辰黑。黼裳玄袞換毳裘。鞞唱羌歌滿中國。生也何辜逢此時。有才不用空男兒。伯益丘墟管仲沒。孤根弱植誰扶持。旣不能學申胥。頓首血沾臄。卻吳再建荆社稷。又不能學鄒衍。長號徹帝關。飛霜六月淒燕山。空將淚灑荒岡雨。添作秋濤撼江浦。君不見杞梁之妻善哭夫。哭得城崩又何補。夜猿叫罷天晦冥。哭聲搖動虛危星。瀟湘竹死鳳凰去。但見白波連洞庭。嗚呼此士今安在。金石可銷心不改。應將魂魄化精衛。銜取南山填北海。

松陽周處士冰壺歌

冰壺者。枯蒼周處士之所以自號也。夫冰。太陽寒水之凝。而壺者。器也。水凝爲冰。至柔而變爲剛。天下之剛。莫尙焉。壺之貴者。以玉爲之。雖粟而冰乎其腹。僕切異之。於是乎歌以詠焉。歌曰。

陰風吹空寒凜冽。玉壺夜半玄冰結。十二樓中瑣翠鸞。太微宮裏縣明月。明月流光照玉壺。珠飛上天滄海枯。青女鍊霜封貝闕。燧人燭犀龍泣血。銀河凌澌膠北斗。五色石裂媧皇走。相看一笑天茫然。回首人

間三萬年。

寶林同講師渴馬圖歌

天廐馬神龍。姿日如明星。耳如錐。拳花鬣。毛雲陸離。揚鬣掉尾。頰虹飛。天廐馬。閑且驕。墊以青絲勒。以鑣。渴不得飲。瑤池泉。飢不得食。瓊田苗。豆粟不實。中腸枵。口不能語。足屢蹠。天廐馬。壯且武。食主之食。須報主。莖秣失時。罪在牧圉。無如宋牼。怨不得嚼咀。喪厥元戎。殄師旅。天廐馬。爾不聞。趙國廉將軍。一飯斗米。肉十斤。被甲據鞍。走若雲。北斬粟腹。西拒秦。負荆謝蘭。不爲身。至今天下。稱良臣。又不聞。漢季劉荊州。有牛千斤。角曲觶。啖食十倍於常牛。負重不若一牝鹿。老瞞度江。俘楚囚。骨肉解剖。庖刃游。天廐馬。飽爾食。草間封狼道。誅殛威弧撥。刺矢不直。嗟爾神駿。須盡力。他年定遇田子方。櫪上優游終主德。

青羅山房歌寄宋景濂

若有人兮。乃在大江之南。瀨河之東。連山倚拔。瀛海上。上與河鼓天津通。憶昔四女下天來。遺鬢墮鬢根。龐鴻。仙華傑出。最恠異。望之如雲浮太空。嶽壑崩崖。麟鬣不可上。蒼蔚雜樹昏。臙臙。虎龍咆哮。號猿鶴。叫山鬼。呵歛生悲風。嗟哉若人兮。胡爲乎其中。梁檜枏兮。柱桂楓。結青蘿兮。以幘幘。不翦不伐兮。不鹽以攻。晨嵐暮藹。滴晴雨。煙條霧葉。相蒙籠。繆繆兮。纒纒。萃萃兮。蓬蓬。繚料要紹兮。若蒼龍。垂胡降玄穹。琴麗披離兮。若翠鸞。振迅飛。蕤氈。鷗黃和鳴。桑扈應。髣髴牙曠之絲桐。幽泉發竇。鏘玲瓏。六月赤日收蘊隆。陽凌陰。蒼春融融。巖花澗草。紛白紅。有時皇初平。清夜騎羊。朝帝君。瓊蕤羽蓋。冰玉珮。華月閃爍。光成虹。松吹笙兮。竹舞謠。影旆旆兮。聲颯颯。娛目悅耳兮。樂不可言。世間塵土。何夢夢。山有芝。隰有豐石。鑿鑿兮。水滢滢。

猶若人兮美目充。飢食倦息兮。可以保我躬。逍遙兮棲遲。又何必訪廣成子螭峒。

題仲山和尚羣魚圖

濠梁之樂誰能寫。袁蟻死後無畫者。上人安知身非魚。援毫貌出態更殊。刻藤素拂秋雲冷。眼前驚見滄江永。翠尾輕披水上萍。玉鱗倒漾空中影。前行十二相迴環。吹澇煦沫淵法間。最後羣趨儼成列。皎若寒霄舞流雪。卻思昨夜風雨來。赤鯉已去隨奔雷。鰕鱸不作霄漢夢。潛心泳暖何悠哉。贈言還畫重太息。芒鞋竹杖今何適。慎勿作海水洶湧龍嶂巖。空令素壁凝塵生。

爲本大師題唐臨晉帖

乾符天子萬機暇。宮中扈從多儒冠。玉堂開宴出晉帖。翠氣蕩搖山雪寒。侍臣模寫各臻妙。碧樹瓊柯相照耀。令汝嗟嘆至尊喜。內官拜舞宮娥咲。日斜宴罷歸內園。外門有事人不言。君不見關東夜飛赤白丸。昭陵玉匣秋風酸。

題老翁騎牛圖

白日上悠悠。竹梢霧已收。晴天不易得。及時當放牛。鄰家放牛多兒童。我家無兒只老翁。寒衣在機織未就。原上烈烈多高風。勿言衰老筋力簿。有牛可放殊不惡。但願天公不相惱。牛背閑眠飢亦好。

題也先進德祖母徐氏節義傳後進德之祖以戰死時其祖母年尙少

鳳乃鳳之匹。麒乃麟之儔。錦衾角枕期白髮。誰知不得同山丘。丈夫殉節殞烽矢。英靈在世何曾死。兩龍未合延平津。白日無光天色紫。君不見青松與兔絲。引蔓相纏紫松摧。絲蔓斷結根猶作千歲苓。洞房含

風霜露早。孤兒啞啞。在懷抱。皇天可憐兒長成。相見黃泉情亦好。

題金谷園圖

君不見石家名園擬黃屋。蜀錦作圍金作谷。暖香烘日浮紫霄。冰紈火布鮫人綃。燕釵十二歌白苧。珊瑚玲瓏綠珠舞。月榭吹笙引鳳凰。霧幄傳觴語鸚鵡。麝下蠟光宵未歇。樓上佳人碎瓊雪。空將遺恨寄丹青。留作千年覆車轍。

初夏卽景

前日大熱釋我裘。昨日一雨涼如秋。寒暄倏忽反覆手。冰炭着體何由瘳。今朝初晴又欲暖。園中草芽輒復抽。嗚呼安得伶倫吹嶰竹。四氣不愆同玉燭。

畫竹歌爲道士詹明德賦

我所思兮在瀟湘。蒼梧九疑渺無際。但見綠竹參天長。上有寒煙凝不飛。下有流水聲琅琅。中有萬古不盡離別淚。化作五色丹霞漿。穿岬貫石出厚地。風吹露漉宵有光。我欲因之邀鳳凰。天路修阻川無梁。孰知畫史解人意。能以造化歸毫芒。虛堂無人白日靜。使我顧盼增慨慷。玄霜慘烈歲將寔。鼯啼鼯叫天悲涼。我所思兮杳茫茫。山中紫筍春可茹。歸來無使遙相望。

題蘭花圖

幽蘭花。在空山。美人愛之不可見。裂素寫置明窗間。幽蘭花。何菲菲。世方被佩葢。藂藂。我欲紉之充佩褱。衆衆獨立衆所非。幽蘭花。爲誰好。露冷風清香自老。

送葛元哲歸江西

我昔策仕筠陽初。官事窘束情事疎。風塵奔走僅五稔。滿懷荆棘無人鋤。明堂大開壯梁棟。散木不遺椽。稅用豫章。汪上一逢君。矯矯雞羣一孤鳳。城頭月出明星稀。開門望月露沾衣。文章繡衣郎。談屑天葩飛。得句卽高歌。驚起烏鵲穿林霏。星流雲散隔吳楚。有時夢君詩上語。座中百谷含清輝。聽外飄風度疎雨。我住青山耕晚霞。君去蟾宮折桂華。別來入見秋雁過。忽然會合增長嗟。江南二月草未秀。雪陣如濤袞。清晝投壺命觴盡。文友此樂百年何日又。一朝復一朝。三歲如過電。四牡彭彭子獨賢。江東山水看一遍。人間事萬不齊。我馬向南君向西。海門日照漁浦白。驪歌欲斷吳雲低。枯蒼山臨川水。相思迢迢一千里。山高高兮水深深。極望不見愁人心。應將旅魂夢化鶴。永夜月明懷好音。

題釋騷圖

關中小兒勇而競。玉帳貔貅三百乘。馬知道上十二牛。皇天默佑周同姓。絳宮大厲吼如雷。墨車載甲光。照纓騰騰二陵間。劍鋒白體體壯士。百戰腦塗地。元帥束縛坐草萊。俘囚有血堪疊鼓。自分殘膏染齊斧。萬死一生直望外。豈意片言由內主。鴻鴈曾傷弓。尙爲空兮愁。犀兕脫匣出。開呼肯回頭。河邊解騷徒。讀謀。舟中稽首心悠悠。濟河封尸勿云晚。此事終作晉國羞。君不見夫差遠子胥。空灑姑蘇泣。丈夫深戒婦人仁。蒼虎遺患悔莫及。

題錢舜舉馬圖

吳興公子雅好奇。欲把丹青競天巧。花蜂柳鶯看已足。貌得驂騑圖更好。浪花滿身蹄削礮。兩耳抽出春

笏尖風鬢欲拂九霄霧。隅目似掛高秋蟾。昨者王良失鞿韉。封狼咆哮蛇豕闕。天閑乘黃越在野。出車未見歌南仲。嗚呼安得此馬背。負郭令公掃清四海歸。奏明光宮。

題王元章梅花圖

道人紅顏映髭雪。欲與梅花鬪清潔。夢魂化作梅花神。貌得梅花最奇絕。高軒落筆當晴曦。北風吹樹寒雲垂。九霄露洗珠玉蕊。野水影動龍蛇枝。勞生苦被煩熱惱。見此令人暢懷抱。虛堂夜半明月入。玄鶴一聲驚絕倒。西湖處士骨已槁。湖上淡煙迷蔓草。石增日夜長蒼苔。紫脫瑤英爲誰好。羅浮山在何處。聞道其間無散木。只有梅花三萬樹。黃初平在金華。山中白羊許借我。與爾並駕凌飛霞。

題縣峴蘭花圖

洞庭一夜西風起。沅湘美人隔秋水。翠蕤玉佩冷不收。怨人蒼梧九千里。蒼梧之山絕浮煙。上與女媧所鍊之石相牽連。瘦根迸雲石爲穿。紫葦瓊蕊涓飛泉。一開一落三千年。歲晏玄霜白日昃。南山桂枝化爲棘。我欲采之無羽翼。月宮青鸞呼不來。臥看月明空太息。

題雪汀圖

天迷迷地茫茫。雪垂日白江水黃。踰烏凍縮龍走藏。雪花如月開樽桑。被何人斯一葉航。手持釣竿詠滄浪。詠滄浪倚道遙。天風吹入瑤池去。素女素娥應見招。

爲董楚芳題山水圖

金庭接四明。會稽藏禹穴。半巖生白雲。如濤湧溟渤。我住城南隔天鏡。朝夕看山見山性。是誰模寫作畫

圖展向高堂。色相曠。天上寶書緘石室。翠柏蒼筠。曉蕭瑟。有蛟如龍。身九屈。林深嶂疊。不見日。龍氣吐爲
姻霧出。何處樓臺香。鷲中蓬萊。只在雲門東。陽崖不留。建木影。陰澗自起樵人風。賀知章。今已矣。湖邊酒
船爲誰艤。赤城霞標通。宛委陵茗花。開落松子。薰帶荷衣歸去來。清泉素石無泥滓。

寄陶中立郭秉心敘舊言懷

爲別未五載。恍如生死隔。有時長想愁欲狂。中夜感歎無羽翼。憶昔相逢俱壯年。錢唐柳綠花含煙。粉牆
繚繞子雲宅。華燈照幙自草玄。春城飛雪滿一月。立馬敲門馬蹄沒。銅壺驍箭三十六。易坐更投鏃相挖。
仰天大喚催命觴。酒多雪急天茫茫。論文握手到爾汝。知有膠漆無參商。君行卻向江東去。我亦棲遲廣
文署。震澤風驚白鴈秋。玉山露落青楓暮。井邑蕭條劫火餘。行人何處問緘書。傳聞那得辨真假。引領遙
望空嗟吁。今年飄泊越城裏。重見手書悲且喜。舊游雖在舊人非。獨立看雲淚如水。羨君絳帳開海濱。綵
衣堂上生陽春。艱危大幸適樂土。況有主翁賢且仁。嗟余數與時不偶。畫虎不成祇類狗。家鄉蕩析身轉
蓬。棄置田園事奔走。豺狼在郊蛇在藪。府縣官曹俱糊口。藩垣久厭邊鄙報。旄丘載馳徒疾首。郭公子。今
何如。璞中之玉可照車。委棄土壤慚碓硤。往事轉頭同過翼。猿鶴蟲沙豈終極。南山直榦劈雷電。般匠束
手無顏色。殷勤寄情素。會面未有期。願言努力各自慰。莫遣青鬢先成絲。

和吳以時秋夜長篇

秋夜長。今日何日此何鄉。流螢在砌苔在墻。明星滿天月照床。東西南北路渺茫。車何爲乎水中央。秋夜
長。今日何日此何鄉。

潛溪圖歌爲宋景濂賦

金華山水天下希。潛溪龍門尤絕奇。羣峰峻極河漢上。一峯獨立芙蓉陂。先生結廬在其下。文追班揚兼賈馬。遂令此山增壯觀。野有樸楸皆梧櫟。上清道士方壺乘輿。爲作潛溪圖。丹崖翠麓神仙居。東望日出樹如蘇。溪流穿林還度谷。十里一達五里伏。龍湫吐景生白虹。藤蘿振雨松呼風。卻憶往時清夜月。帝女乘雲下天闕。鍾鏞鏘鏘蕭鼓發。霓裳羽衣飄滅沒。初平騎羊前啓行。長髯鬚鬚飛玉霜。秦娥吹笙玄鶴舞。牽牛河鼓凝寒芒。相思迢遞頻入夢。夢駕雨鸞從一鳳。覺來毛髮猶爽淅。日送征鴻度空碧。山有蔬水有魚。幽澗有泉清可酌。何時上疏乞骸骨。寄聲先遣雙飛鳧。

題陸放翁賣花叟詩後

君不見。會稽山陰賣花叟。賣花得錢卽買酒。東方日出照紫陌。此叟已作醉鄉客。破屋含星席作門。濕螢生竈花滿園。五更風顛雨聲惡。不憂屋倒憂花落。賣花叟。但願四海無塵沙。有人賣酒仍賣花。

題柯敬仲墨竹花石

紅桃花天天。綠竹葉蘼蘼。水邊石上相依倚。恰似佳人配君子。奎章博士丹丘生。寶書鑑盡芸閣清。染朱澆翠歸墨筆。收入造化無逃形。煙濃風暖春如醉。竹有哀音花有淚。花枯竹死今幾年。空留手跡令人憐。爲包與直題太一真人圖。

太一真人龐眉須。不知所持何代書。既不學。姑星降精下輔隆準公。又不學。傅說請帝通夢寐。左右商王陳範謨。眇然一葉蓮花萼。清秋風吹落泥塗。紅凋粉擦不可扶。君何爲乎以爲椽。蕩灑九河凌五湖。誇耀

水伯驚天吳。坐令文成五利之輩。假借神聖欺庸愚。靈旗風翻壯荆符。麋鹿無鬼夫何辜。漢宮天祿連石渠。金釘銜壁麗綺疏。青藜有燄如芙蕖。何不分餉依光夜績之徐吾。高堂耽耽縣畫圖。作歌一啖駭里閭。

爲戴起之題猿鳥圖 牧齋畫

巴東之西巫山高。連峰插天關。健牢中有懷凌簸谷之波濤。藤蘿杳冥風怒號。人跡不到神鬼逃。但見野猿沙鳥羣相嘈。聳耳百竅搖巖壑。此景可聞不可遭。爾何爲乎。貌以毫毛。嗟哉用心無乃勞。江盤峽束雷雨昏。崩岷死樹纏古根。玄猿抱兒隨白猿。長臂嫵媚相攀援。絲談謠詭趁騰竊。縣柯攫石墜且掀。上有滿月如蘋盆。箕箒桃枝寒白蕃。嘉實不食鳳高翻。但見娥皇女英之淚痕。勢窮險盡原野闕。落日烏鴉繞雲黑。荻花茫茫蘆葉赤。前飛鷓鴣後鳧鷖。瀟湘洞庭煙水碧。騶虞鸞鷲無顏色。還君此畫長太息。獨立看天淚沾臆。

題界畫金山圖

岷山導江入海長。金山卻在江中央。下有地軸連扶桑。上有鳥道通九陽。白波繞之如雪霜。杳然浮空或低昂。但見危樓峻閣造牛斗。一似蓬萊之鏘鏘。撞金伐革殷朝夕。丹雘翠葩相焜煌。巖崖洞谷蛟龍堂。斑鱗錦紋頰頰張。隱鱗窈窕變噴涼。虎蹄豹跡萬古不可到。海若夜出煙霞香。摩尼之珠明月光。目連持來自西方。謂能驅遣毒沴消災殃。轉惡爲善回妖祥。嗟我欲往不能翔。畫中忽見心飛揚。涉水有窟野有狼。武陵桃花今渺茫。浩歌一曲增慨慷。

題界畫臥龍山樓閣圖

巍巍乎。大海之西。浙河之東。是曰會稽。夏后所封。吞雲吐雨。隔躔次。闔闢光景。調春冬。地平天成。五千載。職貢長與中華通。洞天石室。神仙宮。香爐紫氣。騰芙蓉。禹穴窈窕。潛蛟龍。玉書金簡。今無踪。但見蒼松翠柏。隴暖閉白日。猿狖叫嘯。生悲風。臥龍何蜿蜒。向之離立。如孩童。上有朱甍碧瓦。縹緲浮玄穹。流星穿窗。月掛戶。下視水木光玲瓏。多年不見。嘗膽處。野花自落。莓苔中。綠蘋香。飄楊柳濃。漁舟一葉。波溶溶。黃冠賀老。已寂寞。滄煙細雨。空青楓。雁山狂客。意匠工。能以翰墨。偷天功。對此使我心神融。便欲築室。依巖窟。短衣瘦策。尋葛洪。嚙服石髓。餐晴虹。翩然遠逐。浮丘公。不須懷古。意慘戚。伯夷綺季。俱蒿蓬。

陳彥德以畫見贈歌以酬之

君不見。昔者米南宮。又不見。今時趙學士。能將翰墨。爭鬼工。天下流傳。名父子。枯蒼處士。身姓陳。小郎英俊。尤可人。欲收大地。入掌握。筆意所到。如有神。曉携小幅。來贈我。紅日滿窗。花婀娜。開軒展視。心眼寬。如在岳陽樓上坐。湖波吹煙入。遠山君山。乃在湖中間。蒼梧九疑。隔湘浦。孤雲目斷。幽篔簹。漁舟一葉。來何處。巫峽雨昏。啼鳩暮。澤畔行人。久不歸。沙上輕鷗。自飛去。陳公子。聽我歌。深林大谷。龍蛇多。蓬萊三島。可避世。欲徃其奈風濤何。

長平戈頭歌

長平戰骨。煙塵飄。歲久遺。戈金不銷。野人耕地。初拾得。土花漬出。珊瑚色。邯鄲小兒。強解事。枉使泥沙埋。利器四十萬人。非少弱。勇怯賢愚。一朝棄。陰坑血冷。秋復春。朽壤食盡。蒼蛇鱗。湮淪長愧。杜郵劍。廢墜空憶。捨喉人。故壘中宵。鬼神入。雲愁月暗。戈應泣。嗚呼。當時豈無。牧與頗。戈乎不遇。可奈何。

涇縣東宋二編修長歌

浙東行人過江左。正值蕤賓之管吹輕葭。陰氣黯黯天地閉。仰面不見扶桑鴉。谷風哀鳴灌木應。雨脚四垂如亂麻。崩湍湧溜汨奔會。平地礮雷作白窪。便疑桑田變滄海。流水永焚眼無津涯。菅茅披猖黃竹拜。蛙黽狼籍助喧譁。滿路青泥雜隕籜。局縮畏觸蛇與蛇。破瓦荒畦舊市井。荆榛穢奧巢麀麀。翠眉蟬鬢轉蓬去。頽墻缺甃劫火煨。善淫禍福不可料。詔豔天閨令人嗟。叢祠佛殿總銷歇。但見木偶眠泥苴。前度長洲絕短澗。輿從沾濕水沒膺。寒颼瘁瑟透衣袖。雖有氈蓋那能遮。水邊老鶴學人立。鷺鷥侍傍如小嫖。廢田蔓草結旌旆。農夫盡化爲蟲沙。布穀不知時事異。勸耕終日聲查查。晚來雨歇到涇縣。只有蒿蕪無人家。縣官趨迎入公廡。筋攣骨解肉半麻。蕭條破窳冷灰地。飢童凍口張哈呀。淳沲麥飯那能致。新豐酒醪何處賒。古稱悲歌可當哭。莫恠喉誼同兒哇。夜深月出照庭樹。鬼燐一似青蓮華。驚魂遁魄稍歸舍。收入志慮無令邪。愁雲苦霧子規叫。起坐更盼羲和車。

爲張生題趙仲穆畫馬

天廡之馬高且肥。王孫貌出真絕奇。杜陵寒儒恆苦飢。枉使韓幹遭誚嗤。泥泔天馬龍象力。朝發太蒙暮西極。豆芻五石充一食。力由食生非外得。地黃苜蓿美如飴。嚙以甘泉清肺脾。神完氣定哦止時。素餐立仗馬。耻之高風吹鴈酸。棗紅狼煙夜半通。向中爲君長鳴起。子公斬取郅支歸。獻明光宮。

爲詹同文題浙江月夜觀潮圖

君不見四時平分成歲功。以秋繼夏獨不同。炎官挾長握天柄。七月赤日熺玄穹。虜收抱鉞蹲白水。野氣

赫赫攄頰虹。陽侯喘汗河。伯喝少昊。上訴愁天公。會須萬物長養遂。期以仲月虛宵中。此夜姮娥魄正滿。命駕四蟾驂兩馱。指揮馮強出玄洛。蕩滌敲竊清靈蒙。河漢發源牛斗下。曲江上與天津通。初看一髮起。溟微如曳組。練來於東漸。開殷麟趾鼓。發條忽。萬雷聲撼風。天吳掉尾出溟滓。馬銜揚鬣招海童。霓旌縞帳鷺羽幃。瑤臺十二浮空濛。藥珠仙人乘玉輅。騰駕鶴鷗飛氈毳。長庚歛霍揆光耀。電母扶龍嗥憂銅。宓妃起舞素女從。瓊珮絳繚雲帡幪。水綃霧縠紛颯纒。霜旂雪旆高翳空。鯨魚呀呷鮫鱗遁。浦宰哮吼馮夷宮。瞿唐巫峽起平地。灑灑若象塵回漲。先驅已過赤亭嶂。後從始發龜山嶺。商聲爽浙合羣籟。澤國凜凜寒欲凍。先生翫月坐樓上。夜氣澄寂神和沖。憑闌快觀煩暑退。呼兒命酒澆喉嚨。自舞自歌歌自作。月照白髮三千總。歌聲迤巖林。擊應竹樹憂擊絲。與桐淵魚躍波棲。鳥作紫桂繞屋清香融。君歌曲終響未終。我歌激烈留征鴻。瞻眸相視俱老矣。況有聚病來交攻。聖明天子御宇宙。威惠與天相比隆。首丘倘許謝韞紉。猶有古月光臙臙。行當唱和三百首。永與潮汐流無窮。

戲爲雪雞篇寄詹同文

我爲先生歌雪鶴。逸興翩翩入寥廓。先生爲我詠雪雞。扶桑晝景寒淒迷。雪鶴排雲舒六翮。長鳴遠逐浮丘伯。玄洲巨君張兩耳。聾人踉蹌走如蟻。雪雞欲上蟠桃枝。白光燦眼流瓊臈。騰身蹋折琅玕樹。片片琪華振鷗鷺。鶴飛撥刺向遼東。海涼揚波雪半空。縞衣纒襪丹頂素。九臯月黑猿嗥風。雞啼喔咻夜方永。驚起跋烏怨金井。羣仙環珮響玲瓏。十二玉樓煙霧冷。憶昔康回觸折天柱時。女媧扶天立天維。坤維太白作天骨。萬古至今長積雪。上有雪蛆大穀長如幘。水蛇雪鼠和蝻蛭。味如餠餠色如乳。入口清涼生肺腑。

炎埃蕩滌邪穢除。幽精爽雪游六虛。鶴也莫與烏鴉爭腐鼠。雞也莫向溝塍拾禾黍。雪寒可畏清可欲。洗髓伐毛天所玉。雪可嚙兮冰可鑿。誰其作友三青鸞。

題米元暉瀟湘圖

米家父子皆好奇。戲弄筆墨如小兒。三百年來傳幾手。坐見銷鑠同春澌。丹青馳譽士所耻。勉強徇物寧非癡。蒼梧之山鬱嶽巖。重華往矣空寒颺。猿啼鳳去竹迸淚。白日慘淡令人悲。瀟湘洞庭連鄂渚。江漢波濤動荆楚。不見軒轅張樂時。水妃怨泣鮫人語。問君此圖何處得。中有遠意衆莫識。君不見岐陽石鼓字泯滅。千載猶爲人愛惜。

題趙學士色竹圖

竹性本孤直。磬折良可憐。由來剛介有摧挫。歲寒然後知真堅。虛堂無人清氣會。日滿高林風影碎。漆園胡蝶去茫茫。今落蕭湘蒼玉佩。我思美人淇水隈。路永莫致增悲懷。雪霜紛糅嘉實晚。不知鳳皇來不來。送黃巖林生伯雲還鄉覲省

生兒須男不須女。二十辭家事明主。由來卿相出白屋。志士寧甘守環堵。天上鬢宮古庠序。濟濟衣冠鷺鷥羽。學業須兼文與武。濟川期奇旱期雨。懸髻看書困不眠。劬心問道飢忘咀。朝來忽覩林間鴉。雛飛哺母聲啞啞。慨想高堂缺溫清。稽首天關動天聽。春煙蒼茫春樹綠。水煖片芽白如玉。扁舟蕩漾駛歸風。綵服飄揚炫晴旭。盈門弱柳鶯黃絲。鶯鳴如絃花滿枝。開門見兒喜不定。問言執手仍牽衣。牽衣上堂拜嘉慶。籩豆既具殺且時。兒前勸酒還蹈舞。親戚滿筵謹咲語。朱顏婉婉映青松。鶴髮嬋娟照芳醕。爲子歌一

曲送子江之涘。到家早來旋。勿爲兒女慈。人生有親樂。莫樂況乃君恩重。山岳讀書不可迂。檢身不可踈。勸子慎勿學世儒。覺言耻行名爲愚。君不見良金鑄爲器。鼎烹亨飪于將利。才全德備稱大賢。報國榮親兩無愧。

送姚伯淵之清溪河泊所任

清溪之水通秋浦。石白水清魚可數。鱗鱗鯉鯉與鯿。小魚如鉞大如杵。侵晨漁艇浮空來。千夫撒網雲煙回。鳴榔擊楫聲如雷。水怪駭啄珠宮開。課魚使者矢魚急。馮夷嘯啼龍母泣。琴高赤鯉縱有神。何暇起騰作人立。吾觀大江之中有壯魚。名曰海豨頭如豨。羣行九十其朋徒。歡沫成雨條。歎旨風俱。旌陽仙人上天去已久。平地波濤隨處有。春淵潛鱗陟負水。時哉罔俾虞人後。小魚瑣碎鱗所捐。大魚多膏祗自煎。君不見振振鷺。白如玉。沙頭見魚飢不啄。一朝飛上瑤華池。紫鸞黃鶴相追隨。俯視禿鶴垂六羽。還共野鳥爭腐鼠。

雙鯉堂歌爲唐侍儀賦

君不見魯陽揮戈回白日。又不見耿恭拜井飛泉出。精誠自古格皇天。如響應聲非異術。長江鯉魚龍伯臣。三十六鱗紅錦勻。枕丁尾丙宮淵淪。乘駕湖汐扶桑津。天憐孝子孝不匱。特勅水官宣德意。玄水躍出雙赤鯉。頃刻寒谷生春溫。之子高堂髮如絮。每懷古人心是慕。中庭鑿池專種魚。魚行圍圍隨陶朱。晨昏膳羞不遠索。翠韭金橙鱸肥白。中婦奉殮少婦進。大兒登歌小兒拍。合歡花開庭草芳。忘憂花開池水光。凌晨上馬出門去。彩袖披拂金爐香。薄暮言歸拜堂所。何況有魚甘且旨。忠孝由來同一軌。努力揚名煥

青史

舊在杭時。爲冷起敬賦泉石歌。亂後失之。今起敬爲協律郎。邀予寫舊作。已忘而記其起三句。因更足之。

君不見吳山削成三百尺。上有流泉發蒼石。冷卿以之調七絃。龍出大陰風動天。初聞涓涓響林莽。悄若玄宵鬼神語。冷然穿岬達幽谷。竽籟颼颼振喬木。永懷帝子來瀟湘。瑤環瓊珮千鳴璫。女夷鼓歌交甫舞。月上九疑啼鳳凰。還思媧皇補穹碧。排扶銀河通積石。咸池瀉浪入重溟。玉井冰澌相憂擊。三門旣鑿龍池高。三十六鱗騰夜濤。豐隆咆哮震威怒。鯨魚捷尾驚蒲牢。倏然神怪歸寂寞。殷殷餘音在寥廓。鮫人淵客起相顧。江白山青煙漠漠。伯牙骨朽今幾年。叔夜廣陵無續絃。絕倫之藝不常有。得心應手非人傳。憶昔識子時。西州正繁華。箏笛沸晨暮。兜離傑爭矜誇。子獨倘伴泉石裏。長日松陰淨書几。取琴爲我彈一曲。似掬滄浪洗塵耳。否往泰來逢聖明。有虞製作超莖英。和聲協律子能事。罔俾夔摯專其名。

誠意伯文集卷之十二

四言古詩

有泉在山一首

有泉在山。爰注爲壑。膏火自煎。一室之燭。蔚彼茂林。有檀有松。有梓有桐。可以爲車。可以爲宮。有泉在山。爰注爲淵。膏火之燭。維以自煎。蔚彼茂林。有柞有栲。有栲有櫟。可以爲薪。可以爲杙。

東園之柳一首

東園之柳。萋其黃矣。瞻彼白日。煥其陽矣。瞻懷思曷其長矣。東園之柳。萋其青矣。瞻彼白日。煥其明矣。瞻懷思曷其平矣。東園之柳。冉冉其華。悠悠行人。玄髮卒華。瞻彼白日。維懷永嗟。黃鶯于飛。啾啾其音。惻惻行人。悠悠其心。瞻彼白日。維懷永吟。

維澤有蒲一首

維澤有蒲。爲陳生思禮作也。陳生生七歲而父沒。母石氏教育之。甫成人而母又沒。生哀痛不能勝。輒發狂欲自盡者四五。家人守救之。獲免。翰林學士金華宋先生爲敍其事。予聞而深悼焉。因賦詩代言其情。雖不足以附蓼莪之後。亦聊以見天理之在人心。昭昭乎不泯也。嗚乎。悲夫。

維澤有蒲。其葉濇濇。誰無父母。恫我獨孤。晏天不矜。鮮民卒瘁。我罪實訐。父母何辜。人有父母。如日如月。煦之照之。弗隕弗越。人有父母。如玄如黃。覆之載之。不遐有傷。陟彼崇丘。言采其葛。望父不見。憂心如割。陟彼重阜。于以望母。不見母兮。憂心如炙。相彼虎雌。亦各有從。矧伊人矣。罹此鞠凶。啼彼中林。爰有哺烏。恫我人斯。云何其瘖。父兮見兒。孩啖啾啾。晨興未炊。早念其飢。母兮見兒。孩啖歡歡。草蟲宵鳴。早念其寒。旣髻旣髮。綵衣有菱。父攜母將。如琬如瑛。出則睹之。入則撫之。行有陞。抗式趨負之。中園有橘。離離其實。人無父母。曷其有卒。中園有梨。其實離離。人無父母。生也何爲。川水東流。蒼天悠悠。恫我鮮民。不知其尤。空山宴宴。離禽夜鳴。恫我鮮民。曷爲其生。

雞鳴一首贈宗文姪

雞鳴朝暉。草露未晞。巢鳥于飛。雞鳴夕陰。草露淋淫。鳥歸于林。雞鳴匪司。時鳥舉匪有期。氓之蚩蚩。蓋亦何思。朝露白如玉。我不敢躅。恐濕我足。夕露光如珠。我不敢踰。恐濕我裾。誰謂河弗廣。可航可蕩。風波無期。不如勿往。誰謂林弗幽。可邀可游。豺虎無虞。不如勿由。中田有禾。園有樹麻。發石有泉。可以爲家。中田有麥。園有樹核。采山有蔬。可以爲宅。

送季德大之文登稅務官任

有客有客。駕言遠行。天路脩廣。鴻鴈冥冥。淒風吹衣。白日滿庭。有酒在樽。可以怡情。云胡不飲。使我心慄。歌以侑之。百祿具并。

芄芄者麥。在彼原隰。悠悠行人。旣舟旣楫。海邦孔遐。雲霧厭浥。勿謂政難。克敬則立。勿謂俗殊。克誠則輯。

贈言不多。聖企斯及。

有栢一章爲吳太常作

太常從善。七世祖諱安國。宣和中。以少卿使金。被拘。七年。不屈節。見宋史。

有栢有栢。霜露灌之。栢葉不萎。霜露何其。有栢有栢。維葉冥冥。歲暮堅冰。不渝其貞。莽彼北林。維榛維棘。玄雲四湧。白日晝匿。有狼有狐。有鴟有烏。長歲雖盱。漣腦飯膚。有颺其風。鼉捷于漠。五精相映。江河倒行。蛭矯于雲。龍羸于沙。哀此下民。亦孔之嗟。赤董之金。鑄爲干將。不剗犀兕。孰知其良。沙棠之舟。泛于廣津。不遑陽侯。孰知其神。踞彼周行。君子蹟之。猗彼葦竹。君子植之。顯允君子。邦家之紀。克崇厥履。施于孫子。嚴嚴君子。穆穆其猶。載其令德。貽厥孫謀。

黃華一首送葉師仁省兄還栢蒼

睨彼黃花。有燁其輝。驪駒在路。送子于歸。蔚彼柔桑。猗其條矣。心之悟矣。維其遼矣。翩翩者鷗。亦習其羽。悠悠者途。孔脩且阻。執子之手。酌子以酒。言念言懷。勞心如糾。子有兄弟。維曾維臆。嗟我之懷。曷云能極。瞻彼崇阿。維雲茫茫。之子之往。多我慨傷。鴻鴈于征。載號載飛。兄弟之遠。胡寧不悲。山川遐邈。日月逾邁。送子于歸。俾我心瘳。

春夜一首

春夜迢迢。微風不興。六合無氛。銀河欲水。月流素波。星回玉繩。孤坐不寐。憂思相仍。壯年已謝。昔非莫懲。如彼老馬。心念超騰。道路崎嶇。勸不可能。俯撥紅爐。仰剔青燈。欲與晤語。誰其我應。

青陽一首

青陽傲載。白日孔昭。草生于野。華發于條。隨氣成形。或榮或翹。眈眈與懷。中心飄搖。麥有雉雛。藻有魚跳。嚶鳴在樹。磬管簫韶。駕言出游。以猶以陶。皤不可髡。籟不可夭。自非松柏。不能後彫。來者弗畏。往者其消。

春日一首送吳浩叔大之饒州府通判任

春日載陽。鳥鳴于乘。與子爲別。思心洋洋。人生幾何。憂念苦多。仰睇浮雲。俯觀逝波。有役在簞。有酒在觴。無日不腆。物鮮意長。翺翺者鷄。飛鳴戾天。企賢則善。企聖斯賢。古人有言。立事惟勤。克敬勿懈。何適不臻。古人有言。顧畏民譽。綏溜摧山。患生不監。駕彼四牡。言陟太行。羊腸不價。傲在康莊。感以情生。憂由愛甚。有酒在尊。云胡不飲。春日熙熙。芳草菲菲。與子爲別。胡寧不悲。歡言悅耳。是謂疾疢。君子虞之。如矢如刃。忠言諤諤。是謂藥石。君子好之。如金如璧。相彼川水。孔淵其澄。風以撓之。黃濁山騰。有蘭有蘭。在彼幽畎。無日不顯。其芳維遠。春日遲遲。鳥鳴啾啾。與子爲別。胡寧不懷。

條風一首

正月載陽。二月條風。緜彼郊原。載青載紅。維麥拳拳。維桑兀兀。倉庚戾止。有睨其容。二月條風。吹彼平林。翹翹雜英。如盤如絞。維麥離離。維桑陰陰。倉庚戾止。啾啾其音。三月鳴鳩。爰拂其羽。玄鳥于翔。載庭載宇。有漂者萍。亦彼于渚。眈眈懷人。繁念斯聚。維淵有魚。悠悠其逝。維隰有葦。其葉泔泔。眈眈懷人。心焉如瘵。瞻言則惟。倦言則睨。維麥離離。宜其食矣。惟桑陰陰。將其撼矣。翎彼鷓鴣。如笙如簧。澤雉于雊。繡衣錦章。殷殷其雷。霏霏其雨。眈眈懷人。曷其有由。霏霏其雨。殷殷其雷。于以永言。于以寫懷。

題盧雀圖

有雀有雀。亦集于棘。無啄我蘭。空林多風。霜露其漙。婉彼孤芳。克貞以完。無俾荒蕪。以永歲寒。有雀有雀。亦集于枳。無啄我蕙。空林多風。雨雪有晻。婉彼孤芳。克貞弗替。無俾荒蕪。以永終歲。

秋懷八首

涼夜悠悠。華燈有輝。淒風動林。明月在帷。山川迢迢。游子無衣。瞻彼原隰。零露漙漙。靡草不凋。無木不稀。不覩逝波。焉知昨非。亭亭南山。有蕨有薇。黃華晚榮。紫芝秋肥。歲云莫矣。胡寧不歸。陟彼高原。望美中陵。玄商夕振。白露宵零。蔚彼茂草。化爲枯莖。我有素琴。玉軫朱繩。彈爲陽春。旭日滿庭。愴懷與懷。悲來填臍。子期逝矣。其誰汝聽。

嗷嗷草蟲。慄慄其股。歲莫如何。爾獨良苦。瞻望日月。綿綿我愁。如彼逝矢。一往不留。嗟爾小子。時不再得。匪緝曷魚。不藝胡稷。蕭蕭草蟲。烈烈其音。歲莫何爲。祗攪我心。

中庭有棗。纍纍其實。零露既降。歲事孔疾。循彼階軒。有鳴蟋蟀。豈其發發。而不栗烈。南山翠樅。松柏蕭瑟。彼蘭斯馨。彼枳斯橘。安得羽翼。載飛載鳴。汜濫八荒。以終永日。

有爝者螢。載飛載揚。有倬雲漢。載炳其章。白日易徂。玄夜何長。繁思交橫。浮念無方。慨懷古人。中心怛傷。離婁冥行。歷坎而低。循墻以趨。雖躄不偃。猛虎雷咆。班文在床。妖狐鬼潛。毳裘黃黃。悠悠多岐。蕩蕩周行。慎爾馳驅。天命有常。

夕簾既清。餅水既寒。浩歌臨風。憂來多端。懸崖而棲。簪以爲安。菅茅在門。蒙以爲蘭。黍稷弗膳。腐鮑是餐。下將掛壁。敝履加冠。宛其悲矣。能不永歎。

鬱彼晨煙。亦曼于楚。瑟彼枯楊。策策其語。良辰幾何。亦既徂暑。溥彼郊原。有禾有黍。淒風夕興。鴈鷺如雨。今日何日。歲聿其秋。候鴈北來。星火西流。懷我故鄉。道阻且脩。俯察淵潛。仰睇天游。孰翺匪鳶。孰躍匪虬。瞻望日月。中心如抽。豈無美酒。焉得良儔。矢詩不多。聊以解憂。

山有喬木一首贈王子章

山有喬木有條有柯。人無兄弟云如之何。寤寐懷思。憂心實多。翻翻者鴻。行彼幽草。人有兄弟。如城如堡。寤寐懷思。戰兢以保。惟彼兄弟。一本而枝。同氣殊心。則各有思。造次弗念。參商以離。莫矜匪父。莫哀匪母。豈羔之先。孰狩之後。憂飢悼疾。中心如灸。維此哲人。秉心不回。夙夜寢興。二人是懷。如彼駟螿。死生以借。維彼愚人。弗念厥紹。利火中焚。讒兵外挑。豆羹不平。干戈是橋。溫溫恭人。如桐如絲。宮鳴角應。羽振商隨。翁翁雍雍。融融怡怡。我曾既陳。我俎有踐。言念兄弟。中心弗殄。敬慎威儀。以謹孌婉。有鳥有鳥。喑喑其音。拂彼叢薄。揚于中林。宜爾子孫。式昭厥心。

有鳥一首贈袁尙志

有鳥有鳥。薄言繳之。君子至止。何以樂之。有酒滔滔。亦盈于觴。明月照帷。清風滿堂。我酒既旨。我儀有秩。言念君子。溫如其日。有鳥有鳥。載好其音。君子之洽。如瑟如琴。有棗有翼。有勗有飭。古訓是式。大猷是力。有粟者璧。瑕則磨之。有絳者絲。色以訛之。如彼織紉。君子維經。如彼鋒刃。君子爲礪。無爲夸毗。無爲戚施。伊我之債。亦子之疢。此令朋友。交相爲助。匪中式孚。俾好作惡。有酒在觴。有琴在堂。酌言鼓之。心焉孔臧。有鳥有鳥。載翺載飛。豈弟君子。式昭令儀。業不厭脩。學不厭多。既酌以酒。復相以歌。

擗彼喬松一首

擗彼喬松。在彼丘阿。歲莫淒風。飄爲枯柯。憂來傷心。云如之何。瞻彼昊天。曷其有宜。天降淫德。疇于下國。稻粱黍稷。譬于螟蟻。不稼不穡。寇攘以食。哀此下民。曷其有極。心之憂矣。如烹如煎。喪亂靡底。如淵如泉。如彼奧草。孔蔓以延。嗚呼昊天。伊誰之愆。有尉者置。曷施于宇。胡嘗于林。覬彼魴鱖。小人所慚。君子所與。弗詢弗猶。曷其有愈。君子不畏。亂日以熾。君子不憂。亂日以悠。正言謬謬。諂言諾諾。歡言孔怡。喪亂所基。邦家維車。庶民維輿。庶僚維服。大臣維御。慎爾驅馳。俾險作夷。無然汝汝。無俾車償。無曰予知。民各有思。無曰予聖。庶民孔競。無競維德。四方之則。無爲回逋。以縱枉慝。瞻彼高原。翳翳其雲。眇彼大水。浩矣無津。嗷嗷飛鴈。各念爾羣。哀我人斯。胡肯以淪。莫高匪天。莫明匪日。何纖勿冒。何昧勿晰。維此聖人。庶民是葵。維彼愚人。則各有謀。原隰之瘵。夫婦云之。閭巷之呻。君子聞之。弗聞弗惟。則各有思。式謗式罾。膺腸以離。穀斯之秕。農以爲殃。匪騰匪牟。曷云能翔。維天有船。不可以航。瞻言顧之心。焉惻傷。相彼茂草。飛鳥依之。滯彼深淵。魴鯉歸之。靡依靡歸。胡能勿悲。我有隱憂。人莫之知。中途有棘。庶民伐之。執訊弗篤。君子望之。不曠不斲。孰填爾聽。靡瞻靡顧。自貽伊幹。如彼沸鼎。無增爾薪。無從爾言。以逃遠人。邇人營營。遠人兢兢。弗訛爾心。曷其有懲。嗟爾君子。戒慎爾止。靡謙不光。靡盈不毀。維山有杞。維澤有芷。庶民所履。維君子使。陟彼高原。維風颺颺。靡草不凋。無木不剝。憂來傷心。如焚如抽。瞻仰昊天。曷其有瘳。

五言古詩

感懷三十一首

閑夜坐中庭。逍遙散煩襟。素月出高雲。清風來遠林。仰觀河漢流。俯聆鷓鴣吟。佇立起長歌。感歎一何深。驅車出門去。四顧不見人。迴風卷落葉。颯颯帶沙塵。平原曠千里。莽莽盡荆榛。繁華能幾何。憔悴及茲辰。所以芳桂枝。不爭桃李春。雲林耿幽獨。霜雪空相親。

誰云魯酒薄。邯鄲被戈矛。楚館困兩君。乃爲馬與裘。舉世共如此。太息復何尤。振衣箕山頂。引領望許由。終然不可見。涕淚交膺流。

古人盜天地。利源不可窮。今人盜農夫。歲莫山澤空。紛紛九衢內。連袖如長虹。其咲沮溺鄙。各事游冶雄。悠悠方自此。袞袞何時終。

啾啾草間雀。日隨黃鳥飛。爭先赴稻粱。寧顧野人機。使使善柔子。懷利近相依。但慕春莢好。不見秋霜霏。驅車逐走鹿。中路忘所歸。豈不愛其躬。天命與心違。古道今已矣。感寤空涕洟。

柔桑生中園。婀娜當陽春。下滋靈泉液。上承膏露津。美人望蠶月。傾筐競明晨。榮盛方及時。采捋一何頻。枯根不盈拱。何以禦霜辰。復聞芻蕘子。磨礪待爲薪。冥觀成感激。躑躅含酸辛。

無恤得尹鐸。晉陽以爲慰。馮諼勸市義。孟嘗能不危。戰國有如此。況乃商周時。漢武任桑羊。腹剝盡膏脂。向非輪臺詔。持斧空繡衣。悠悠復何道。咄咄令人悲。

伏枕候明發。夢遊滄海中。中有萬斛船。蕩漾隨天風。舵師兀昏睡。環視立衆工。波濤正洶湧。欲往迷西東。寤寐惕驚起。魂魄猶忡忡。

蘇秦佩六印。賓從何縱橫。當時機中婦。倩咲遠相迎。黃金生意氣。蠶蠟見人情。豈無帝瓢士。今爲時所輕。種樹當中庭。不識美與惡。微陰未盈戶。枝葉猶在弱。一朝根柢成。延蔓蔽樓閣。離披引刺。虵蒙昧。噴鳥雀。毀垣施斧斤。得喪亦相若。萬事不早謀。日暮徒駭愕。東園多桃李。擢幹何交加。春秋互遞代。衰榮競相夸。械械去故物。英英發新花。花謝葉復作。空令人歎嗟。翡翠翔江湖。亡身爲毛羽。不如道傍李。尙得滋味苦。驅車上太行。還顧望梁甫。高岡多烈風。茂林化爲岵。空餘澗底藤。蒙龍蔓煙雨。浮萍不依山。女蘿不移根。草木非有心。天道更何言。如何三春子。磬折隨涼溫。朝乘晉主車。暮集韓魏門。巧咲發容輝。馳騁矜愚昏。誰見陶彭澤。桑麻滿田園。上山采幽蘭。盡日未盈手。持贈故交人。長喚不回首。蘭花豈不芬。故情豈不厚。投之非所好。良意翻成醜。峩峩蓬萊山。渺渺大瀛水。神仙有窟宅。亦在玄黃裏。大壑多驚風。不辨龍與鯉。吹沙乘波出。洶若鯨鯢起。陽侯貫深淵。海若汨泥滓。馬銜恣饑食。罔象潛譎詭。誰能報千母。弱水不可履。羲和近虞淵。日暮空已矣。亭亭山上木。蔚蔚石底竹。諒非懷隱憂。胡爲自局促。振衣陟崇岡。高下眺原陸。鳳凰棲枯枝。稻粱肥鴈鴛。春陽悅衆目。風雨愁比屋。人主各有情。豈若麋與鹿。射于生魯岸。不識寒澗陰。池魚貫安流。寧知江海深。殷王相版築。垂名耀來今。後世重閔闕。田野多呻吟。鰕魚湧姑射。月暈滄海風。鯨鯢吐高浪。白日寒曛曛。神仙下天闕。左右翳玉虹。金盤薦鱗脯。翠蕤擁青童。酣歌般溟傲。魚鼈相噉啣。忽然乘雲去。寥落塞江空。

朝登會稽山。逍遙望南訛。禹穴已蕪沒。禹功長不磨。惆悵感往昔。沉吟發新歌。誰言專車骨。冠弁高嵯峨。爲虺且復爾。爲蛇當奈何。天門隔虎豹。空悲涕滂沱。

結髮事遠遊。逍遙觀四方。天地一何闊。山川杳茫茫。衆鳥各自飛。喬木空蒼涼。登高見萬里。懷古使心傷。佇立望浮雲。安得凌風翔。

芳樹生丹崖。綠葉如雲烟。上枝蔽光景。下根蟠九泉。朝涼聒衆鳥。夕陰萃鳴蟬。豈不盛容色。及此陽春年。西風吹白露。點綴庭塔前。繁華坐銷歇。枝葉空相捐。世情多反覆。天道有推遷。金屋擅嬌寵。長門閉神仙。獻賦亦已晚。徒悲淚如泉。

我有綠綺琴。其材出空桑。金徽嘆玉軫。音韻鏘琳琅。上絃感薰風。下弦來鳳皇。世耳不欲聞。子期今則亡。願持獻重華。路阻川無梁。

孟軻去齊魏。賈誼之長沙。聖賢良已矣。吾道空咨嗟。徒言青松枝。不如桃李花。太息安陵子。知時爲世誇。客有持六經。翩翩西入秦。衣冠獨異狀。談舌空輪囷。獻納竟何補。焚坑禍誰因。昂昂探之士。矯矯蹈海人。龍驤九淵外。豈復嘆獲麟。

白壁闕頑礪。淪晦同泥沙。朽壤生夜光。見者咸驚嗟。君子分寂寞。小人互矜誇。枯瘁若秋蓬。鮮豔如春華。狂風忽簸蕩。飄落歸誰家。

大道散草澤。呻吟在康衢。蔓葛自纏繞。蘭蕙日蕭疎。雞鳴出門去。薄暮還走趨。進則蚊蟻萃。退爲失羣鳥。君看拜塵友。逸氣凌東都。淒涼白首歎。千載爲嗟吁。

象以齒自伐。馬以能受羈。猛虎恃強力。而不衛其皮。世人任巧智。天道善盈虧。不見瑤臺死。永爲天下嗤。稿葉寒撼撼。羅帳秋風生。淒淒候蟲鳴。啾啾賓鴻驚。美人抱瑤瑟。仰視河漢明。絲桐豈殊音。古調非今聲。沉思空幽寂。歲月已徂征。晨登吳山上。四望長嘆嗟。借問胡嗟嗟。狹路險且邪。子胥竭忠諫。抉目爲夫差。宰嚭善逢迎。越刃復相加。守正累則多。從人禍亦沓。遭逢貴明良。不爾俱泥沙。壺公下天闕。聊以觀世紛。賣藥汝南市。時人俱不聞。顧此非我徒。飄然乘白雲。方駕雙虬龍。被服九霞文。但見北邙阪。岩嶢盡高墳。種苗甫田中。其葉可離離。上天降膏澤。溥博無偏私。人力苟不至。不如茅與茨。常恐嘉實晚。坐傷零露滋。徘徊感節序。太息秋風時。

詠史二十一首

凱風扇朱夏。草木生清涼。臥疾澹幽曠。白日悠且長。散帙觀古人。喟焉想虞唐。陽春能幾何。陰氣多繁霜。天道諒悠悠。人理亦茫茫。詠歌寄深情。歌能增慨慷。神樞斡元化。循環連陰陽。善惡隨氣異。禍福竟何常。朱均繼堯舜。時事已搶攘。至人妙轉移。靈暄回晶光。祥麟踏大野。君子徒慨慷。黃星照中原。天道遂披猖。汗漫千百年。流潦浩滂滂。否泰有傾覆。霖雨見朝陽。惜無風雨收。乘時佐羲皇。熙熙返大樸。濟濟垂衣裳。鼎湖去不復。歎息空哀傷。野馬不寥食。羶受組與羈。低頭衡軓下。各自東西馳。秦人任法令。斬艾尊君師。六合始一家。恩愛已乖離。

一旦山東客揭竿以爲旗。叫呼驪山徒。天下響應之。素車拜軹道。誰復爲嗟咨。

周昌勇庭諍。子房善奇謀。王陵抗高議。平勃終安劉。經權兩不廢。道立知亦周。煌煌東都士。節義明清秋。孰知讒佞巧。舉足觸戈矛。顧此悲世運。泣淚交流。

食毒偶不死。謂言董可餐。墮河偶不溺。謂是天所完。侈心不自顧。利欲紛多端。百勝困一躓。名滅軀體殘。君子戒微幸。小人樂災患。不見瑤與羽。千載遺悲酸。

燕昭志報復。金臺求俊賢。下齊如破竹。大恥雪九泉。六王死灰人。安可與比肩。奈何驕氣盈。妄想彼神仙。安期不可致。卽墨火已然。煌煌召公業。委棄如浮煙。

天狗吠梁野。七雄扇妖氛。吳徒二十萬。剽若狼虎羣。鼓行破棘壁。長驅似輕雲。漢將三十六。朱旗耀天根。救梁不奉詔。太尉真將軍。遂令千載下。知人稱孝文。哀哉潼關戰。百萬徒紛紜。

平居觀羣物。紛紛爭朵頤。口舌不能勝。兵戈遂相隨。古來豪傑士。于今安所之。大連一朝至。孰分賢與蚩。所以四老人。去采商山芝。清風扇六合。百世眞吾師。

景公返雀殼。晏子稱其仁。繆穿既有室。長年不負薪。焉知子玉節。遺禍逮天倫。推恩限日見。太息此君臣。田橫不事漢。刎頸送咸陽。二客旣穿冢。島中皆自戕。雖非中庸道。要亦有耿光。英雄久淪沒。世俗但涼涼。

嗟嗟翟廷尉。慷慨令人傷。

吾聞共工臺。乃在崑崙北。長蛇戴九頭。利吻錯戈戟。呿呀恣啖食。抵厥成溪澤。嗚呼三仞沮。可以警貪得。四七續炎連。漸臺殛狂新。建侯首褒德。拳拳念生民。富春有遺老。終竟不爲臣。遂令節義士。視身若埃塵。

前車屢折軸。後駕無迴輪。不有銅黨禁。何由起黃巾。爲邦貴知本。明主宜書紳。建光悖祖德。封爵逮閹豎。忠良坐荼毒。隕涕盈道路。南巡既不返。狡窟寧久固。功成十九侯。事已非細故。況聞用骨鯁。乃以浮陽疏。中官旣世襲。山陽更嬖妬。時事亦可知。君子獨未寤。美哉吳長史。衡門掩秋露。當途亂天紀。赤帝懸空名。寧知辟掾日。禍機已潛萌。晉主念私勞。荀馮巧相迎。撫床竟不寤。骨肉成鯢鯨。好還實天道。狙詐徒人情。

香餌獲死魚。重賞致死士。自古以爲訓。世俗寧知此。陳湯困刀筆。壯夫皆切齒。如何中興主。終竟惑慈母。隋帝易廣勇。天命以不長。唐宗昧治格。本文竟摧戕。聖人有達節。變通亦何常。禹湯不同跡。萬古皆明王。永嘉昔潰亂。南渡馳五馬。長江畫天幟。九廟扇灰燼。豈無運甓人。亦有誓江者。智池不揚波。靈物棲曠野。哀哀黍離淚。空向新亭灑。

華門翳蓬蒿。窮巷絕馬跡。中有抱膝人。疏糲不充食。榮華過浮埃。敝服無慍色。獻玉鄙卞和。扣角羞寧戚。天潢不垂雲。中夜起歎息。

吾愛閔仲叔。幽居翳菲茨。應辟思濟世。利祿豈其私。進當致堯舜。退則老蒿藝。馬能犬馬姿。以爲天下嗤。美人皎如玉。挾瑟升高堂。泠泠向長風。操作孤鳳凰。曲度未終竟。玄雲蔽穹蒼。走獸駭赴林。飛鳥號且翔。高山與流水。日莫空淒涼。

夫差臥薪日。勾踐嘗膽時。人生各有志。況乃身踐之。寧知姑蘇鹿。已與西施期。空令千載下。痛恨於鴟夷。

游仙九首

日月如過翼。瞬息春已秋。何不學神仙。縹緲凌虛游。雷霆以爲輿。虹蜺以爲輜。清晨登閭風。薄暮宿不周。長嘯層城巔。濯足翠水流。俯視八極內。擾擾飛蜉蝣。

今日何不樂。振策登高山。深林仰無見。蔚蔓陰以繁。鼪鼯繞樹啼。黃鶴空飛翻。攬轡向西北。思欲赴崑崙。瓊樓十二重。豹虎夾階闔。青鳥去何之。誰向王母言。徘徊歲華晚。感激生愁怨。

岐陽隱孤鳳。寰海騰蛟蛇。不食松栢實。而采日及花。翩翩柱下史。望望之流沙。麻姑何爲者。乃降蔡經家。神龍集滄澤。取啖於魚蝦。

費生市井兒。未嘗識神仙。偶然壺中去。謂是別有天。幻化且不解。眞訣安能傳。那將食色身。妄弄刑賞權。果然失符後。衆鬼不見憐。

天高河漢清。露白秋宵永。朝華炫紅芳。蠓蛄弔馳景。繁思靡志帥。內疚積心梗。涉江無方舟。汲井悲短綆。歲莫霜雪寒。泣涕沾項領。

秦皇煽虐燄。烈烈燔九州。平原曠如赭。鴻鵠安所投。所以避世士。慨想乘桴浮。樓船載僂子。去作汗漫游。何必蓬萊山。遠人卽瀛洲。虎視徒逐逐。竟死於沙丘。

娟娟姮娥女。灼灼芙蓉姿。一入月宮去。千秋閉蛾眉。涼風清玉除。碧雲生桂枝。鳳歌不可聽。長夜有餘悲。晨登女床山。西北望崑崙。樓臺似霄漢。金碧氣魂魂。素女三千人。灼若扶桑暎。鸞笙引鳳舞。雲旛隨霓旛。

老童發清歌。昌容戲紫繩。神荼獻丹桃。洪崖開玉尊。蜚廉漫崔嵬。建章空千門。大道久已晦。誰能識仙眞。如何賣藥翁。恠語驚市人。日月空明照。朝菌非大椿。已矣復何道。去去生愁辛。

感寓六首

暑退生夕涼。裹衣步微月。風來竹陰動。草暗螢光發。佇立忽懷人。江河渺難越。庭前金鳳花。向晚爭媚嫵。但見白露滋。豈知繁霜苦。芳時良可惜。此物何足數。白露下木葉。淒涼江海秋。江臯有鳴鴈。噉噉安所求。稻粱日蕭索。風雨徒離憂。一日復一夕。一夕復一朝。青燈向暗壁。光燄坐自消。鞞鷹鑿六翮。絕意於雲霄。嚴霜隕奧草。蛇虺去所依。可惜蕙蘭花。與之共頽萎。頽此悲世運。泫然涕交頤。淒淒素秋霜。苒苒高原草。運窮相值遇。黜顏就枯槁。浩歎采薇歌。慚愧商山老。

招隱五首

浮景無根株。逝川不可留。昨日瑤草春。今朝蓬梗秋。暴食豈不美。飮毒潛戈矛。華軒豈不貴。長路能摧輜。子胥乘吳江。屈原赴湘流。韓彭竟菹醢。蕭樊亦累囚。何如張子房。脫屣萬戶侯。深韜黃石略。去從赤松遊。秦皇火六籍。黃綺之商山。漢帝握乾符。羊裘竟不還。古來遯世士。冥心丘壑間。於時苟無用。安事空摧顏。石泉清以芳。白雲寒更閑。春蔬雜甘辛。秋果羅青殷。濁酒晚自酌。柴扉晝恆關。嘯歌陟崇岡。濯足臨潺湲。金馬我何榮。羊腸我何艱。鴻鵠翔九霄。邈然不可攀。

豫章長千仞。挺生崇崖陰。布葉連青雲。交柯蔽層岑。結根豈不固。斤斧將見尋。有栢生石間。屈曲叢灌林。古根鬻飛溜。電火焚中心。大不中梁柱。小不堪瑟琴。風霜自搖落。假壑獨至今。流水千百折。白雲三四峯。上有噴壑泉。下有凌霜松。中有一老人。坐嘯巖間風。素髮垂兩肩。朱顏暎青瞳。

年紀將百齡。容貌如孩童。長跪前致辭。子非列仙翁。咲謂汝孺子。語汝使心通。我生不偶俗。遺身在蒿蓬。結廬白水邊。采藥青林中。世語我不接。世士我不逢。簞瓢我不憂。軒蓋我不崇。自耕足我食。自息安我躬。冥冥絕思慮。默默全和冲。持此攝吾生。仰荷元化功。何必插羽翰。遠逐浮丘公。再拜受斯言。廓然如發蒙。投簪謝知己。一去無回蹤。

有客款我廬。身披紫雲袍。鳴騶列前後。從者皆俊髦。坐我蓬華下。向我談伊臯。手幹北斗魁。足踏東海鼉。高視六合內。泰山等毫毛。揮袂起謝客。且還飲我醪。醉臥不知曉。衡門塞蓬蒿。

雜詩四十一首

江籬生汀洲。香氣何清婉。欲采寄所思。不憚道路遠。疾風吹塵沙。山澤蛟蛇混。誰復惜芳菲。空悲歲年晚。小魚頭如針。大魚須如松。小大各生育。孰私天地功。坤靈發淫怒。溟海簸驚風。大魚食小魚。陂池爲之空。陂空水亦竭。小大相噉嚼。但見灌莽間。顛骨成螻蟻。殘膏餒螻蟻。孰辨鯨與鯢。僂婦厭貧夫。常懷相棄心。慨慕東家子。年少多黃金。輕身改西託。布被爛錦裘。寧憶秋風起。霜露凄繁林。葉落枝亦盡。愁聞蜻蛉吟。

雲月雖不明。精魄固長在。飛蛾亦何知。乘時妬光彩。天高多飄風。煙霧中鬢鬣。紛紛隨蒿棘。終竟爲何罪。人生如浮雲。飄搖無根蒂。昨暮青山阿。今朝滄海濶。風波無定時。淪蹟難爲計。是中苟不爽。曷問耿與黯。中宵存楚國。仲連卻秦帝。此士雖則亡。英名千萬世。

萬人常夢飲。飢人常夢餐。中宵羈旅夢。兩臂生羽翰。騰身入紫青。吹面天風寒。驚覺凜毛髮。感我涕洟瀾。

吾觀神龍變。天地爲晦冥。龍成宰元化。嘉澤浹四溟。出山不飄風。入水無震霆。枯萎仰沾溉。沃若生葱青。豈比螟與螽。裂石摧蠹脛。俾民舉疾首。抗神蹙眉顛。

鷹本是鷲鳥。爪利翮勁疾。胡爲化爲鳩。鈍拙無與匹。棲遲荆棘間。粒啄營口實。暮啼墻角雨。朝啼屋頭日。昔爲衆鳥畏。今爲衆鳥唾。運命苦不常。孰爲金石質。

愚公志移山。精衛思填海。山高海茫茫。心事金石在。松柏冒雪霜。秀色終不改。春陽熙幽林。卓立有光彩。急雨漲潢潦。溝池成五湖。青蛙與耿鼃。得意鳴相呼。自謂樂無似。至足不求餘。蓬萊有玄鶴。曾見東海枯。清夜蟬長風。哀音繞天衢。使我起太息。黑髯變霜鬚。

空庭生夕陰。高閣留返照。歸鴉集紛紛。棲雀鳴噉噉。冥思觀羣物。肆目展遐眺。草樹蔚參差。雲霞相輝耀。慷慨商山心。想像蘇門嘯。大鵬搏扶搖。斥鴳翳蓬蒿。悠悠共淪汨。潰潰堪一啜。

惟豺知祭獸。獺亦知祭魚。豺獺有報本。人道當何如。華堂飫玉食。盜賊塞中塗。那能不自媿。而以耀庸愚。吁嗟千載下。枯骨空專車。

雷藏蟄蟲伏。雷動蟄蟲起。蟲雷不相期。冥契非人使。英雄應有時。何異羶致蟻。神劍無風胡。銅花蝕泥滓。種荷淥池中。荷生葉猶紫。掠萍逐蛙蠃。恐畏傷荷蓋。荷心有露珠。的皪無泥滓。荷根有藕絲。纏綿誰得似。陰崖有喬樹。乾鵲巢其顛。朝食葉上露。暮食葉下蟬。巢成長衆雛。鳴飛一何嬾。但願本根固。風雨得安眠。如何就搖落。而不抱惜惜。

蒼蠅眼書明。蚊蟲眼夜明。明眼利口勞。晝夜無時停。拍死紛籍籍。飛來更營營。一旦霜風起。稜威肅天刑。

飛者不復飛。鳴者不復鳴。雖有太陽光。不能煦其生。乃知天勝人。智力徒鬪爭。

豺狼食人肉。蚊蟲食人血。食肉死須臾。食血死不輟。哀哀露筋女。肉盡惟皮骨。誰謂蚊蟲微。積鏞能銷鐵。蠱母羽蟲孽。與人無怨尤。胡爲含毒害。吐蚊吼如牛。紛紛散草澤。解解森戈矛。無辜受螫蓋。皮破腥血流。覆巢或有令。未應後鶴鷗。

黃鷹食鳥雀。山雞食蟲豸。蜂食花上蜜。蝦食苔間滓。兔食茅草根。鳳食梧桐子。所嗜由性成。易之則皆死。冥觀付一咲。誰與窮茲理。

魯陽仰揮戈。羲和爲紆轡。耿恭俯拜井。湧液出荒地。精誠所感格。高厚靡不至。人生亦良難。如何殄其類。蓬蒿滿六合。慚愧真宰意。

在昔信陵君。謙勞實弘度。好士天下稀。賓客遠傾慕。救趙奪兵符。掃清邯鄲霧。歸來存大梁。秦甲襲東顧。魏王木偶人。朽心自成蠹。讒言一以入。危石不可據。日落西河陰。歌鍾怨岑露。

天鷓巢蒿草。形軀纖且微。不知懷何事。直上聞天扉。啾啾終日鳴。天聽不可希。鍛羽口吻裂。落日空悲啼。雉死爲從雌。鷓死爲鬪力。蜜蜂死洩憤。鴈鳩死求食。象犀好齒角。麋豹美毛色。紛紛死相藉。殺身奉華飾。

自取夫豈過。外至良可憫。徧鏡合族烹。梟鷂宜卵殪。山林久穢菴。誰復繼禹益。天風觸萬竅。小大皆有聲。律呂與懸匏。嘈嘈同一鳴。人情有所鍾。聲氣爲之使。無知而強聒。則亦懸匏耳。

殊俗耳胸臆。比之芻牛腴。殷勤奉賓客。自謂敬有餘。鳴嚇雖異貫。赤惑誰能祛。靈陰蔽玄象。清渭混汙渠。誰能繼夏后。再分龍與魚。

大星出西方。睽睽如明月。兒童驚指示。草木見毫髮。夜久斗柄迴。人靜涼風發。徙倚步中庭。空烟散成雪。楚人將適蜀。揚帆信江水。江闊多西風。帆逸行不止。日暮入海濤。極目無涯涘。鯨魚吹高浪。舵折檣竿圯。頓足空號呼。烟波千萬里。

冲霄難爲羽。泛海難爲舟。縛羊駕戎輅。猛志空悠悠。農時失耕耨。何以望有秋。決藩盜菽粟。鷹隼不如鳩。韶華不我與。去若川水流。歲莫獨彷徨。凜凜懷百憂。

爰居避風翔。豈冀桑牲祀。臧孫強自用。取笑於君子。拾蟲養鳳凰。將以爲觀美。徒令輩覆畏。長逝深林裏。神仙不世出。螻蛄啖蜉蝣。嘉禾曠膏澤。稊稗矜有秋。驅馬將馬往。荆棘滿崇丘。玄陰結嚴冬。芳意坐自適。鴻鵠從何來。哀鳴聲啾啾。願欲適縣圃。路阻迷所投。況我孱懦成。引領空憂愁。

桓溫一老兵。豈識捫虱十。擁衆臨上流。竟作跋扈鬼。符堅氏羌堅。何能作天子。眈眈視中原。爲有景略耳。知人聖難之。求賢任虛已。袁曹豈力敵。生死一彈指。惆悵後來人。慷慨前車軌。

英英木槿花。振振蜉蝣羽。乘彼三秋露。及此六月雨。容好能幾時。生成亦良苦。十年構阿房。一日化爲土。染鬢作童顏。於身竟何補。不如順天命。保己良多祐。

天地若大甕。萬物生其腹。人猶腹中蟲。蠢蠢隨化育。鑽攻無時休。臟腑爲翻覆。帝青調元氣。豈不畏戎毒。幡然命滌蕩。汗下兼湧劬。蚩蚩自狂獺。消沸交殺戮。何當瞑眩定。風止水歸瀆。鑄鐵作鋤犁。春耕待秋熟。二儀播元氣。晝夜靡停機。有生卽有死。化工亦何私。彼狂牽所欲。冥行失康逵。無航思利涉。發此百禍機。賊人還自賊。擾擾竟何爲。

郭南有窮夫。黃髮對老妻。見人抱兒女。仰面看天啼。郭北有宕子。鮮服明春閨。累累倚門親。疏茹乏鹽醯。盛年異欣戚。薄暮空噉臍。達生貴知命。胡爲苦悲悽。咬咬水中鳧。谷谷墻下雞。良無返哺望。乳菹何棲棲。瞑目思此理。惆悵中自迷。

盜跖餓梁肉。原思餒窮閭。夷齊采薇蕨。儀秦駟高車。祥麟殪西狩。尼父空嘆吁。天道果福善。彼蒼竟何如。老眼昧昏夜。見螢以爲燈。燈螢何足辨。所悲老且瞢。瞢老復何用。甘心就無能。逍遙麋鹿顛。所得良已已。鬼神陰陽精。變化無定迹。如能禍福人。豈向人求食。而況天地心。坦坦甚正直。祭祀本人情。將以牲與稷。居歆豈在物。馨香薦明德。葛伯信不滅。虞公亦何益。前王有舊章。敬之在無射。海鯨乘扶搖。激水騰九旻。退潮觸泥沙。顛骨空鱗蚶。猛虎掉尾行。飲血不滿唇。跳哮逞雄攫。係首八尺緡。賦命雖在天。成之亦由人。嗟嗟燈上蛾。亦豈厭其身。

夷齊值明時。餓死西山陽。四老生亂世。采芝以徜徉。李業遇公孫。欲蓋反受殃。嚴陵辭故人。萬古清名揚。性也實有命。君子順其常。漫漫雲間鳥。冥冥隨風翔。海宇豈不寬。六翻有短長。浩歌向日月。曲盡意茫茫。

感懷

昊天厭秦德。瑞氣生芒碭。入關封府庫。約法唯三章。英雄不世出。智勇安可當。叔孫一豎儒。綿蕞興朝綱。遂令漢禮樂。遠魏周與商。逝者如飄風。盛時安得常。寤寐增永歎。感慨心內傷。四月陽用事。羣物咸長榮。靡草雖就死。王瓜亦復生。死生誰所致。時至莫能爭。聖人洞神理。守分無外營。脩身俟天命。萬古全其名。

自都回至通州寄普達世理原理二首

且辭文明門回首望宮闕。長雲擁蓬萊。烟霧中滄鬱。相去不崇朝。杳若隔溟渤。扁舟指吳雲。離夢縈燕月。雖懷歸鄉歎。復愴知己別。裁詩寄悠悠。感念深至骨。

西風吹青冥。征鴻暮蕭蕭。一辭都門去。便覺京國遙。輕霜入秋鬢。落英罄寒條。念我同年友。高誼薄九霄。恨我處遐遠。不得陪晨朝。綿綿久要心。萬里匪爲遼。鱸魴赴清澗。孔翠依蘭苕。飛潛各有適。分得無外微。佇立望闔闔。傾耳聆簫韶。

晚至草平驛

落日照阡陌。秫稻生清香。好風自西來。吹我征衣裳。但惜景物佳。不覺道路長。幽禽韻蒙茸。馬足響康莊。驛吏迎我前。拜跪進酒漿。要我入山館。左右華鏐光。解鞍待升月。星明樹蒼蒼。

送僧家奴參政赴河東宣慰使

晨登晉陽山。西北望雲中。大漠造瀚海。重關阻飛鴻。昔爲征戍場。今見車軌同。相公奉明詔。分符摠元戎。賦詩睇行雲。坐嘯生長風。霜濃曙角清。月出黃河空。細草臥牧馬。虎服韜弧弓。天子萬歲壽。垂拱明光宮。發安谿。至青田。戎事急。不得留有感。

雞鳴戒晨裝。掛席日尙早。風亂沙上雲。雨昏江中島。士生從王事。薄質非所寶。但懼筋力微。任重躋遠道。苦邁園柳青。今來江楓老。豺狼互滅沒。憂虞何時了。朝原思眷令。夜船夢萱草。寸步隔河山。怒焉傷懷抱。天壽節同諸寓臣拜于寶林教寺禮畢登槃翠軒分韻得稽字

宿雨霽初節。羣山綠如洗。流霞絢琳宇。旭日射丹堊。鳴鍾趨梵宮。焚香望天陴。遙遙蛩蠓忱。惓惓葵藿禮。萬年主壽長。百拜臣首稽。竣事陟華軒。敦情屬芳醴。太師祇園英。聰明實神啓。諸公俱俊髦。文藻壓班。肅雍周簞籩。古恠夏追蠡。鹿鳴歌萃蒿。魚麗詠魴鱧。劍氣星有輝。珠光海無底。嘉會非尋常。令德史豈弟。澄心映空曠。滌慮俯清泚。看竹風泠泠。折花露泥泥。紆徐睇溟瀛。緬邈想淮濟。巍巍世皇業。喬嶽深根柢。螻蟻亢齊斧。碎首堪立後。農郊卜甘歲。已喜先抽薺。厨樓盼北極。祥光應周帥。中山致麴蘗。東吳來秣米。宴醑定有期。玉釭浮盎醞。

題蘭花圖

亭亭石上竹。嫋嫋竹下蘭。歲晚各自媚。不知霜露寒。欲持贈君子。路永江海寬。空山日搖落。佇立起長歎。正月一日公宴分韻得恩字

青陽肇嘉歲。白日間春溫。起視天宇間。粲然生意存。高堂建華蓋。北面朝至尊。彤雲暎扶桑。條風吹我幡。鳴絃在兩楹。旨酒盈金罇。幃門號令肅。主將詩書敦。彬彬衆多士。矯矯鳳與鸞。廟算得其長。豺狼安足吞。揆予實賦砭。深慙廁瓊瑤。敢矜鉛刀割。所望安黎元。恢復舊十疆。以酬生育恩。

誠意伯文集卷之十三

五言古詩

種藿香

藿香體虛柔。本自南土出。毛芒散纖葉。旖旎怯朝日。芳菲挺衆卉。辛美更無匹。況能已疢瘵。兼理腸胃疾。種之近庭階。離離看新苗。驅童斬竹枝。扶植待秋實。常恐風雨患。摧折傷弱質。瘳藜生道傍。延蔓何綿密。豈無荷鋤人。夕薤旦已出。上天意何如。感嘆靡終畢。松柏多斧斤。山林日蕭瑟。

北上感懷

倦鳥思一枝。樞馬志千里。營營勞生心。出入靡定止。伊余朽鈍材。嬾拙更無比。才疎乏世用。嗜僻惟書史。雖非濟時具。頗識素餐耻。旣懷黎民憂。妄意古人企。寧知乖圓方。舉足輒傷趾。塵埃百病侵。貧窶萬感累。艱難幸息肩。遲莫竊所喜。明時登曠曠。駑馬但垂耳。自非冀北姿。莫羨追風駛。便欲解衣冠。躬耕向桑梓。終懷葵藿戀。不慕沮溺詭。潛陽動原隰。白日曖蘭芷。罍雞戒晨鳴。客子駕行李。縈紆越巘嶧。浩蕩涉風水。淹留具區北。信宿滄江汜。維時連年歉。道路多流徙。官司職撫字。黔首皆赤子。陳紅太倉米。豐年所儲備。爲民備乏困。朝廷豈私此。推餘補不足。茲實王政始。臣子宜奉承。天威不遠咫。奈何簿書曹。暴慢蔑至理。苟云出納吝。富閎穀觫死。嗚呼草莽露。慘惻溝瀆委。聞之猶鼻酸。見者宜顙泚。踰淮入大河。淒涼更難視。

黃沙渺茫茫。白骨積荒蕪。哀哉耕食場。盡作狐兔壘。太平戢干戈。景物未應爾。意者斯人徒。縱欲擾天紀。鬼神赫震怒。咎戾良有以。去年人食人。不識弟與姊。至今盜賊輩。嘯聚如蜂蟻。長戈耀白雪。健馬突封豕。豈惟橫山澤。已敢剽城市。途行絕稀少。空車但墻倚。身行須結集。一寐四五起。牧民豈無人。司寇亦有氏。陣車不驅馳。大田無耒耜。邦家祿食恩。豈爲臣奉已。山東古要地。燕趙猶辱齒。況茲南北衝。津梁通遠邇。屬當全盛時。四海同一軌。廟堂多稷契。振舉無遺弛。勿云疥癬微。不足成瘡疖。滔天起濫觴。炎岡發星炬。虞朝有分北。漢庭煩直指。農夫植嘉穀。所務誅根柢。耕耘苟失時。雨露空沾灑。威懷豈異任。守令職非庠。端能慎黜陟。此輩何足弭。故鄉隔山川。前途塞荆枳。青徐氣蕭索。河濟俱泥滓。痛哭賈生狂。長歎漆室裏。何當天門開。清問逮下俚。

送普顏子壽赴廣西憲幕

離維荆衡南。邐迤走蠻徼。民風雜徭蠻。地勢帶蒙詔。迢迢商周前。風水絕織窳。後王務廣土。懷柔倚攻剽。羈縻非本情。疲痾復誰療。大明侔日月。幽裔靡不照。化育之所加。欣榮及蓬藿。憲府繩百司。選擇自廊廟。偏方異習俗。賦性實同調。培養自殊途。激揚貴知要。淒涼溪上瀧。鰕魚困罾釣。高風吹霜鴉。縹緲集海嶼。願言崇令業。以繼南國召。

過東昌有感

夜發高唐灣。旦及東昌郭。喬樹拂疎星。霜飛月將落。仰觀天宇清。平見原野廓。白楊號悲風。蔓草杳漠漠。但見荆棘叢。白骨翳寒籥。聖道縣日月。斯人非虺蜮。教養旣迷方。欲熾性乃鑿。展季骨已朽。清風散藜藿。

絃歌滅遺音。繭絲盡籠絡。鳴嘯颯颯憑。蟲鳴草蟲躍。遂令一變委。化爲跼與躡。況聞太行東。水旱薦爲虐。飢氓與暴客。表裏相倚着。賑卹付羣吏。所務惟刻削。征討乏良謀。乃反恣剽掠。坐令參苓劑。翻成毒腸藥。今年秋租登。行止稍有託。餘波尙披摺。未敢開一噓。但恐習俗成。何由返初昨。藩宣有重寄。胡不慎遠略。往者諒難追。來者猶可作。歌詩附里謠。大猷希聖莫。

南陵崔氏思梅詩

昔來梅花下。綵服輝清簪。今來不見人。淚滴梅樹根。梅落風不回。落淚化爲石。冥冥人幽泉。一夜千萬尺。晨詣祥符寺。

上馬雞始鳴。人寺鐘未歇。草際起微風。林端淡斜月。僧房滿幽寂。假寐待明發。松徑斷無人。經聲在清樾。送鄭希道行省掾滿之泉州錄事

鄭君廊廟姿。才識天下冠。若華升朝霞。可望不可翫。胸中富文史。蔚蔚錦繡段。公餘但好客。高論幹雲漢。蓮風散秋幕。薇露收夕案。吳雲翼行轡。閩嶠入奇觀。撫字後深仁。剴繁讓明斷。嘉會復何時。悠悠仰飛翰。寄題僕世本東溪漁唱亭

落日去厓巒。清溪澹輕浪。嘔啞戢柔櫓。款乃發孤唱。初隨飄風起。復逐行雲颺。月色照未闌。灘聲雜逾壯。恐有濯纓人一聽。一惆悵。

發安仁驛

雞鳴發山驛。天黑路彌險。煙樹出猿聲。風枝落螢點。江秋氣轉炎。嶂濕雲難斂。佇立山雨來。客愁紛冉冉。

發龍游

微颺獻輕涼。客子中夜發。秋原曠無際。馬首掛高月。草虫自宮商。葉露光可掇。狹徑非我由。周行直如髮。揚鞭望南天。晴霞絢闕越。

早行衢州道中

草際生曙色。林端收暝煙。露花泣啼臉。風葉彈鳴絃。農家喜銜艾。行歌向東阡。大道無狹邪。平原多稻田。客行良不惡。敢曰從事賢。

鉛山龍泉

茲山近南服。勝迹冠朱方。石骨入海眼。地脈通混茫。金精孕清淑。水德融嘉祥。寒含六月冰。潤浹九里長。鯨顛狎獵起。虎口吐呀張。發竇既窈窕。流渠遂汪洋。洞徹瑩玉鑑。鏘鳴合宮商。靜舍玄機妙。動見大智藏。養德君子類。晉物農夫望。野僧向我言。其功殊匪常。飲之祛百邪。能使俗慮忘。漱嚙入靈府。喉舌生清香。爽淅動毛髮。飄忽凌風翔。何當揚淇冽。盡洗貪濁腸。

初食檳榔

檳榔紅白文。包以青扶留。驛吏勸我食。可已瘴癘憂。初驚刺生頰。漸若戟在喉。紛紛花滿眼。岑岑暈蒙頭。將疑誤腊毒。復想致無由。稍稍熱上面。輕汗如珠流。清涼徹肺腑。粗穢無纖留。信知殷王語。瞑眩疾乃瘳。三復增永歎。書之遺朋儔。

望武夷山作

飲馬九曲溪。遙望武夷峰。長林抱迴合。丹崖造空濛。浮暉澹寒翠。水木皆曼容。薄遊限塵務。促景尼奇蹤。緬懷紫陽子。千載誰與同。瓊佩遡煙霧。石函闕遺封。羈猿怨幽澗。飛蘿冒芳叢。瑤琴空流泉。桂枝徒秋風。悵望佳期阻。纏綿憂思重。殷勤尺素書。願奇雲間鴻。

發白沙至水口

夜發白沙驛。亭午至水口。中流鬱風霧。密雨蔽原阜。冥濛蛟龍過。隱憐怒雷吼。傾欹臥帆席。馮翼感前後。畏途生頃刻。顛倒亂足手。倉皇投山館。喜懼劇紛糾。攝身整衣帶。沾濕及肩肘。平生歷道路。艱險頗曾受。未能外形骸。豈敢輕衰朽。捐軀匪成仁。垂堂不宜狃。總轡登前嶺。煙雲尙昏黝。經阻有妨虞。姬文亦奔走。

早發建寧至興田驛

雞鳴戒晨裝。上馬見初日。露泫葉尙俯。霧重山未出。客途得霽景。緩步非縱佚。矧茲歲有秋。高下俱穎粟。牛羊散原野。鵝鴨滿阡陌。懷抱旣夷曠。神情自清謐。寒花蔓籬落。候蟲響蒙密。霞標青楓林。雪綻烏柏實。幽覽雖云遽。佳趣領已悉。我行固無期。況乃塵事畢。

題武夷圖

崇山奠朱維。實維羣山固。忽龍薄光景。隱顯變氣候。百泉縈虹蜺。萬谷蒸饋饈。深根入無底。峻表切星宿。嶒嶸削劍戟。窈窕錯綿繡。騎雲擘高堂。竇石室陰罨。金雞鳴未晨。玉女來自逗。琪樹縞玄宵。瑤花落清晝。美人遊不還。霜月怨猿狖。淒涼駕檣榭。薜沒白玉楸。蓬萊渺滄海。弱水浩溟溜。良辰不可掩。沉思令人瘦。安得凌風翰。飄飄逐飛鷺。尋源挹孤清。寒林摘三秀。逍遙觀物化。俛仰空宇宙。真詮倘可求。吾將解吾綬。

孔子充相送至鵝湖

憶昨過武夷。欲往無與儔。今茲逢故人。遂得鵝湖游。輕雲翼征蓋。翔風當鳴騶。古塔插蒼藹。寺門啓平嶽。陟徑旣紆鬱。馮軒亦樛流。雲旗曷香霧。金像明清秋。昔賢論道處。松柏深且幽。鴻飛渺滄海。龍去空靈湫。懷人已寂寞。對景空淹留。興闌成遠別。馬首山悠悠。

自衢州至蘭溪

秋郊歛微雨。霽色澄人心。振策率廣路。逍遙散煩襟。疎煙帶平原。薄雲去高岑。湛湛水凝碧。離離稻垂金。蕓麥霜始秀。玄蟬寒更吟。幽懷耿虛寂。好景自相尋。心契清川流。目翫嘉樹林。歌傳滄浪調。曲繼白雪音。仙山在咫尺。早晚期登臨。

九日舟行至桐廬

杪秋天氣佳。九日更可喜。衆人競登山。而我獨泛水。江明野色來。風淡汲鱗起。蒼翠觀遠峰。沈寥度清沚。沙禽泛悠颺。岸竹搖羅靡。湔湔懷謝公。臨瀨思嚴子。紫萸空俗佩。黃菊漫妖蕊。落帽非我達。虛壘非我恥。扣舷月絹娟。濯足石齒齒。澄心以逍遙。坻流任行止。

從軍詩五首送高則誠南征

少小慕曾閔。窮閭兀幽棲。丘園貴嘉命。通籍廁金閨。握筆事空言。塊馬愧梁鶴。不如屬壘驥。結束習鼓鼙。廟筭出帷幄。白日收虹蜺。劍光帖滄溟。旗尾縣鯨鯢。振旅還大藩。歌舞安旄倪。拂衣不受賞。長揖歸蒿藜。江鄉積陰氣。二月春風寒。壯士漫胡纓。伐鼓開洪濶。長風翼萬軸。撇若橫海翰。馬銜伏轅門。翊衛森牙官。

伏鉞指天狼。怒髮衝危冠。

按節肅徒旅。神劍宵有聲。揮揮大旗動。烈烈刁斗鳴。仰看太白高。俯視滄波平。王師古無戰。螻蟻安足烹。人言從軍惡。我言從軍好。用兵非聖意。伐罪乃天討。運籌中堅內。決勝千里道。雷霆馘蛟龍。雨露澤枯槁。懷柔首悛獨。延訪及黎老。牧羊必除狼。種穀當去草。凱歌奏大廷。天子長壽考。清晨絕長江。日夕次海濱。北風吹旆旌。軍動速若神。令嚴戎馬閑。九陌無驚塵。伐鼓震溟嶠。揚帆役鮫人。鯨鱗京觀築。鱗醢華筵春。啾啾布穀鳴。祁祁農鴈春。去子還故鄉。悲喜集里鄰。荷鍤啓瓦礫。再荷天地仁。撫綏屬有望。世世爲堯民。

蛟谿詩

蛟乃龍之徒。隱顯異凡質。屈蟠深變環。靈變不可悉。清溪灑百湍。漱滌見冽漈。寒飈黯離品。陰電煬幽室。超騰雲雷後。訶禁鬼神謐。應龍翔中天。渙汗濕箕畢。大江揚濁瀾。蠶蜃恣狂譎。閉藏當有待。保養慎無失。搜奇凜精魄。跼步迷故術。豁巖生長風。林木暮蕭瑟。

題林以仁平反詩卷

木伐豈再植。壁毀寧復完。議獄有緩死。聖言垂不刊。兩造旣偏聽。無辜遭凶殘。況復使其孥。流離播夷蠻。司牧盡瞻視。佐使獨悲酸。抗詞動鬼神。潤澤生枯乾。死者縱不生。魂魄亦獲安。孤兒雖不夭。且得依故山。聖人邁種德。惠及毛與翰。云胡任民寄。視之如草菅。爲君歌此曲。歌竟起長歎。

送僕世南參政分題得虎林

深林合蒙龍。仰視不見日。中有白額虎。哮吼恣狂獷。怒晴谷搖電。掉尾原簸颺。牛羊困攫取。樵牧萃憂恤。相公鎮方面。生捷影響疾。百靈肅號令。萬恠悚潛逸。昔出書需朋。今行夜辭匹。泰山絕悲啼。牛哀返初質。豈獨惠斯邦。四海望寧謐。

題山水小畫

谿上春始還。微波動芳煥。樹暖欲生煙。山明初過雨。美人期不來。桂楫怨蘭杜。佇立忽懷愁。漁歌起洲渚。送田生歸鄉。

少年客他鄉。還鄉反如客。莫驚新井里。乃是舊阡陌。歡笑集姻親。觴酌上班白。老翁愛英俊。慰問至日夕。應憐鄰舍兒。魚龍兩縣隔。

題李伯時畫淵明歸來圖

江左昔潰亂。桓盧遞相尋。劉裕起寒微。長驅掃氛祲。秋草雖未枯。霜雪已駸駸。陶公節義士。素食豈其心。我才非管葛。誰能起淪沉。所以歌去來。歸臥五柳陰。悠悠多感激。愴愴寄謳吟。哲人貴知幾。芳名留至今。展圖三歎息。懷古一何深。

題朱孟章虞學士送別圖後

秋郊一盃酒。握手念將離。落日照野水。涼風生樹枝。今朝重相憶。青山如舊時。鬢毛非松柏。爭得不成絲。題老翁騎馬圖。

少年遠征役。及歸鬢已霜。戰甲零落盡。空餘弓箭房。老馬同死生。蹴踏沙磧長。故鄉此何極。仰看鴻鴈行。

明齋詩爲湖廣陳進士賦

客從于闐來。遺我盈尺璧。晶光射雲漢。璀璨生五色。置之暗室中。鬼魅皆辟易。願持自照身。不用持照人。寄題江東蘭逸監司瑤芳亭

江籬悲楚佩。叢桂空秋霜。茲花特秀絕。得升君子堂。艷色非我貴。皎潔有餘光。仙人美良夜。鳴玉來琳琅。織雲淡華月色。曠青鳳凰飄飄白霓珮。左右參翺翔。衆卉不敢傍。瑤臺清且涼。聞有千歲實。其味如瓊漿。願持壽明主。天地同久長。

題揭伯洪山居圖

黃埃晦城市。赤日欺達道。榮華能幾何。未若山居好。啓扉對平林。闢徑入芳草。丹崖翠羅曠。青嶂白雲抱。世事幸見遺。幽趣堪獨討。新晴景物佳。緩步隨野老。倚巖聽鳴弦。息陰憩華葆。蜂亂覺春暄。鴻驚信秋早。無榮謝馳驅。有酒任傾倒。但願長兒童。稼穡以爲寶。

會稽張氏春暉堂

喬木生山阿。碩實秋離離。誰知茂育功。乃在陽春時。丈夫佩玉玦。壯氣東西馳。列鼎未酬歡。倚門已生悲。君看斷根草。引蔓復何爲。逝波不可駐。感激成吾詩。

張子英閑止齋三首

鳥飛止茂林。魚游止深淵。步止辭踏躑。語止絕悔愆。虓螭升高壁。朽殼消腥涎。夸父逐羲和。渴死大道邊。所以知止者。不爲物所牽。擺落塵網嬰。寂寞守自然。悠悠觀羣動。默默全吾年。

閑居安所止。自古有陶公。柴門蔭高柳。左右來清風。樅籬密復疎。下有黃菊叢。摘花泛濁醪。嘯歌撫孤松。駟馬耀長衢。視之如蒿蓬。

築室在城市。而無閤閤聲。非關遠人世。慮滌境自清。圖書堆几案。花竹當簷楹。釀酒香滿甕。賓至卽共傾。黜陟吾不知。寵辱吾不驚。百歲聊復爾。孰爲身後名。

耕雲詩三首爲堵無傲作

青山何逶迤。白雲自悠悠。數畝幸可耕。此外更何求。整耨候時雨。荷鋤適東疇。凱風拂蘭蕙。林薄鳴鴈鳩。我麥旣華華。我禾亦油油。食力分所安。但願歲有秋。王租及時足。尊酒聊相酬。八月白露零。九月築場圃。稻粱已映遠。梨棗亦盈塢。耕耘幸就畢。一飽諒可取。斗酒烹黃雞。殷勤會田父。但願守令賢。邑里得按堵。無事苟安居。明朝復相聚。

朝耕原上雲。暮宿雲間屋。雲來動丹青。雲去澄翠麓。坐看雲變化。臥見雲起伏。斯須不可期。飄忽鳥過目。灌足臨寒泉。息景蔭嘉木。飯蔬勿云惡。無憂勝梁肉。長歌招隱詩。清風滿空谷。

壬辰歲八月自台州之永嘉度蒼嶺

昨暮辭赤城。今朝度蒼嶺。山峻路屈盤。峽束迷暑景。豁筓出風門。坎窞入天井。冥行九地底。高闕羣木頂。瀑泉流其中。激若洩溟滓。哀猿嘯無外。去鳥飛更永。僕夫怨跋涉。瘦馬悲項領。盜賊道天誅。平人遭灾眚。佇立盼嶽岑。心亂難爲整。

夢草堂遣懷

卽事在自得。彊歌非正音。所以春草句。聲價重兼金。若人千載下。遺響邈難尋。淒涼一池塘。賴爾得至今。我來當杪秋。天淨潢潦沈。枯荷有餘馨。衰柳無殘陰。鼓鼙響未已。山水意徒深。感時念兄弟。惻愴傷我心。

在永嘉作

高屋集飛雨。蕭條生早寒。我來復幾時。明月缺已團。浮雲蔽青天。山川杳漫漫。狐狸嘯悲風。鯨鯢噴重瀾。孤鴈號南飛。音聲悽以酸。顧瞻望桑梓。慷慨起長歎。願欲凌風翔。惜哉無羽翰。中夜百感生。展轉不遑安。枯荷響西池。槁葉鳴林端。寥寥天宇空。冉冉時節闌。舉俗愛文身。誰識章甫冠。河流未到海。平陸皆驚湍。旗幟滿山澤。嗚呼行路難。

蟾室詩爲台州棲霞觀道士作

蟾是蝦蟆精。誰令居月宮。淒其羈旅身。竟作蝕月蟲。我心有靈丹。光與日月同。子能精鍊之。可發天地騰。照灼六合外。安事一室中。哀哉爬沙輩。局促棲樊籠。

癸巳正月在杭州作

春陽動萬物。衆草皆已抽。嚶鳴亦和悅。我何獨懷憂。鯨鯢未殄醢。豺狼滿山丘。鳳凰竄荆棘。烏鳶自相求。浮雲蔽蒼穹。天路阻且脩。風沙日暮起。鏃羽安所投。悲來但中懷。泣涕縱橫流。江城陰氣凝。積雨春淒涼。出門何所見。但見瓦礫場。新廬各有前。店舍亦已張。市人半荷戈。使客盡戎裝。回首舊遊地。慘淡寒煙黃。悵焉念所思。惻愴心中傷。徘徊西湖上。愴悵有所思。所思不可見。涕淚下沾衣。死生一瞬息。逝者安可追。狼曠信君子。李陵非男兒。

鍛鐵當用椎。析薪當用斧。拔蓼而植茶。去辛還得苦。峨峨九陽門。衛以豹與虎。微微螻蟻忱。鬱鬱不得吐。
登臥龍山寫懷二十八韻

暮春時雨餘。原野皆秀色。流雲曖芳甸。惠風暢輕翼。公崇岡低垂。崇岡緬登陟。山川糾紛錯。疆畷互紆直。淒涼神禹穴。偪仄句踐國。玉簡闕玄緘。銅牛啓雄德。霸氣浩江河。王風散荆棘。感今情軫鬱。懷古心愴惻。東溟尚波濤。中原未耕織。無能事蕭曹。妄意追契稷。蹇產魂屢遷。逶遲足猶側。良辰復幾何。白日忽中昃。周流睨圓方。俯仰觀動植。有水必趨東。無星不拱北。宗社固神靈。至尊實恭默。殷王伐鬼方。尙期三年克。苗頑負險阻。終竟膺竄殛。天戈向無前。況乃誅鬼蜮。竊聞海濱民。決背疾狂慝。荷戈思一奮。所懼官未識。朝廷鑿往轍。中道誅貪悞。主將敦書詩。志士願盡力。諸公總英俊。矯矯百夫特。愚生諒踈拙。千慮冀一得。農人奉壺漿。遲爾殄蠹賊。采薇戒懷歸。伐檀慙素食。白雲在青天。可望不可卽。浩歌梁甫吟。琴來憑胸臆。立夏日有感

朝且天宇清。逍遙步庭除。溫風自遠至。綠樹嘉有餘。登高展遐眺。萬象各以舒。念此客行久。感彼時節徂。退食恥尸素。進思愧庸鶯。仰視日月高。俯察川原紆。願欲凌風翔。周流觀六虛。天路脩且阻。惜無奇肱車。倚松翫懸蘿。藉茅想蓮茹。公叔實尙賢。寧武不能恐。何當脫塵鞅。歸臥園田居。

贈柯遂卿一首并序

今年夏四月。余至台。聞柯遂卿抗言釋誣囚事。甚異而偉之。夫天下之大。豈無慷慨激烈之士。見義而勇爲之者哉。其作也。非有私。其進也。非有求。觸于其心。形于其言。發于其言。信于其事。可不謂之大丈

夫哉。惜其晦而弗彰也。於是乎爲之詩曰。

雷霆蟄神威。妖蜮躍海濱。將軍戰敗死。玉帳空無人。腥涎之所被。蛇蠃皆蛇鱗。天弧不張弦。民情曷由申。縣講亦令典。奉行在明仁。誰令姦宄徒。並緣逞頑嚙。俄然齒髮軀。化作豺狼身。剽金旣無畏。況復枉平民。壯哉柯夫子。義氣衝九旻。曳裾公府門。抗論回星辰。坐令霜雪間。朽骨生陽春。睨視夸毗兒。精魂散飛塵。我忽耳聞之。肝膽張輪囷。安得似卿輩。落落千百人。出應休明時。翊贊臯陶臣。旌別鸞與梟。再使權衡均。上天意茫茫。感歎空悲辛。

贈周宗道六十四韻

天弓撥其弦。平地躍虎狼。腥風扇九澤。濁霧干太陽。瑣瑣蚊與蠹。亦沸如蜩螿。帝閣隔蓬萊。弱水不可航。螻蟻有微忱。抑寒無由揚。遙遙草茅臣。怒切忠憤腸。披衣款軍門。披腹陳舌臧。曰。走居海隅。詩書傳世芳。感荷帝王恩。祿食廟朝行。走身非已軀。安得緘其吭。走有日擊事。敢布之廟堂。永嘉浙名郡。有州曰平陽。面海負山林。實維甌閩疆。閩寇不到甌。倚茲爲保障。官司職防虞。富念懷善良。用民作手足。愛撫勿害陽。所以應衆心。卽此是仞墻。奈何縱毒淫。反肆其貪攘。破廩取菽粟。夷垣劫牛羊。朝出繫空囊。暮歸荷豐囊。丁男跳上山。妻女不得將。稍或違所求。便以賊見狀。負屈無處訴。哀號動穹蒼。斬木爲戈矛。染紅作巾裳。鳴鑼撼巖谷。聚衆守村鄉。官司大驚怕。乘鼓撤旗鎗。竄伏草莽間。股慄面玄黃。窺伺不見人。湍江走佞佞。可中得火伴。約束歸營場。順途劫寡弱。又各夸身強。將吏悉有獻。歡喜賜酒觴。殺賊不計數。縱橫書薦章。民情大不甘。怨氣結腎腸。遂令父子恩。化作靈與蝗。恨不斬官頭。剔骨取肉嘗。爨爨野田中。拜泣禱天皇。

願得賢宰相。飛牋奏巖廊。先封尙方劍。按法誅姦賊。擇用忠蓋臣。俾之提紀綱。綉弧落鳴臬。薤棘出鳳凰。尙可存子遺。耕稼納官倉。失今不早計。如水決隄防。而後事堙築。勞費何可當。足間疽初生。灼艾最爲良。歛成施剗割。所憂動膏肓。邊戎大重寄。得人則金湯。嬰遂到渤海。盜賊還農桑。張綱入廣陵。健兒跪如羊。苟能任仁智。勿使儉邪妨。孟門雖險艱。可使成康莊。走非慕爵賞。自嚮求薦揚。痛惜休明時。消患無其方。又不忍鄉里。鞠爲狐兔場。陳詞未及終。涕泣下滂滂。旁觀髮上指。側聽心中傷。天路阻且脩。不得羽翼翔。可憐涸轍魚。待汲西江長。況有蛟與蛇。磨牙塞川梁。旄丘靡與同。載馳徒慨慷。嚴冬積玄陰。天色慘以涼。衆鳥各自飛。孤鸞獨徬徨。冥冥麗山雲。木葉殷清霜。子去慎所適。我亦行歸藏。

遣懷

鴻鵠會高風。拂翼凌雲霓。蛟龍不得水。蒼鱗困塗泥。惟昔望諸君。一戰舉彊齊。秦穆伯西戎。能用百里奚。傳說築商巖。太公釣磻溪。韓信寄食飲。孔明躬耕犁。立賢苟無方。曷問鷲與鷺。驅車上太行。峻極不可躋。重雲蔽層岑。流潦絕荒蹊。豺狼當我嗥。魍魅向我啼。願瞻望九州。欲去惑東西。嘉穀委蔓草。良田養蒿藜。乘黃避跛鼈。狐貉驕虎貔。誰言縱壑魚。竟爲觸藩羝。長夜起嘯嘆。邪氣憑我臍。夢登舜蒼梧。遙望禹會稽。援琴奏將歸。日暮增慘悽。盲颯正滄勃。孤風將安棲。

三月八日偕徐成中楊澄源李子庚吳溥泉董朝宗黃中立程邦民湯仲謀王文明遊南鎮得

禽字

積雨霽芳甸。凱風來遠林。逍遙出郊郭。徙倚散煩襟。桂棹蕩清漣。長裙曳輕陰。肆覽夏王陵。流觀秦帝岑。

黃熊安所之。荒楚自蕭森。仰翫卉木榮。俯聆泉石音。洋洋潭底魚。啾啾枝上禽。昭融見天德。澗澗怡人心。況有文彥友。溫恭比瑤琳。獻酬禮不愆。詠歌思彌深。良辰豈易得。嘉會難屢尋。願作膠與漆。無爲商與參。殷勤屬此章。冀以代兼金。

送馬生遊京師

東山夜雨急。鑑湖春水深。之子遠于邁。祖帳清江潯。白日映蘭皋。青煙起松岑。豔舞激回風。長歌裊哀音。何以慰離懷。八珍盈釜鬻。何以將素情。贈言比瑤琳。京畿佳麗地。多士紛如林。構厦後檀栾。去疾須苓參。殷勤治安策。惘款大寶箴。敷陳草茅情。啓迪帝王心。斯人邈永矣。繼之在于今。勿羨蘇季子。自侈多黃金。

別峯和尚方丈題唐子華山陰圖

連山走陂陀。太谷入旃旒。屋藏深樹中。路出巨石背。煙雨時有無。澗谷互顯晦。輕盈曳飛綰。縹緲沃浮黛。雄梁矯脩羅。駢壁駁文璫。崢嶸紫霞高。屈曲白水匯。陰森神鬼宅。奮迅龍馬隊。風雲氣象寬。日月光烟碎。借問此何鄉。或有捐余佩。答云越山陰。信美無與對。自從永和來。燕遊推勝槩。佳人去不還。盛集嗟未再。唐令質好奇。撥拾歸畫繪。上人遠公徒。我亦淵明輩。會晤屬時艱。觀覽增感慨。故園沒灌莽。舉足蛇豕礙。放歌自太息。激烈驚厚載。

送孔世川赴江西儒學提舉

鏡湖荷花發。耶溪菱葉生。送君何所之。去作西江行。西江大藩地。卓犖多豪英。文能絢雲漢。武能壯干城。浩蕩吳楚間。頽波障東傾。鳳凰不妄集。梧桐匪空榮。行行勿憚遠。輿輿崇令名。

我辭西江歸。條忽十二秋。每望西江雲。思心悵悠悠。恨無排風翼。安能凌虛游。故人渺天末。可夢不可求。邂逅送子行。感我涕泗流。登山有脩蛇。涉水有長虬。逝者如零雨。一落誰能收。

爲竺西和尚題谿山茅屋圖

青山十畝餘。茅屋數間足。高樹結浮煙。脩篁茂深綠。孤松無鄰舍。生理不拘束。開田種禾稻。間以黍與粟。中歲幸西成。青黃被谿曲。鳧鷖與鴻鴈。亦各得所欲。清秋霖涼雨。欄底石如玉。野老時見過。杯酒聊與屬。但願官長廉。吏卒莫我毒。耕稼納王租。世世還相續。

春谷詩爲竺西和尚賦

條風自東來。雪消春谷暖。荒畦碧草短。清池細泉緩。谿花明錦繡。時禽響弦筦。道人閑無事。習慣牛頭嬾。過橋禪杖落。坐石架娑祖。日暮精舍歸。燈龕白雲滿。

四月二十二日郊外游得水字

草根螻蠅鳴。湖上蒹葭靡。繁林嫋深綠。清池散圓紫。離居昧節序。陶情賴佳士。泛舟出郊甸。緩涉信所履。壺觴展倡酬。及此晴日美。嘯歌望山川。慷慨集悲喜。豺狼未鼎鑊。郊野尙多壘。織衣掛儒冠。好爵建麻屣。吾儕幸味苦。得似道傍李。無思身外身。適意聊復爾。歸雲入禹穴。返照射宛委。烏啼樹有風。帆過煙生水。興盡各言還。月明城角起。

題枯木圖

松以直而伐。桂以芳而攻。嗟此屈曲形。擁腫又空中。身爲螻蠅家。根作蟬螻宮。蠹皮化土壤。朽腐不可烘。

輪困盤石間。幾歲經霜風。明堂構羣材。梯梁匪鏗鏘。斧斤獨不到。凋落還芘芘。知兵贖孫子。善射殲有窮。肯種伏知劍。韓彭歎良弓。豈如蚩蚩氓。負薪翳蒿蓬。飢食渴則飲。不識王與公。白髮死枕席。無事傷其躬。贈詩持書還。去尋黃綺翁。

五月三日會王氏南樓得激字

蹇步屬時艱。睽違苦多感。偶寄越城隅。頗喜得幽寂。炎夏天象明。翠山皎如滌。況有文獻友。同心不離迭。雖無鼎俎盛。斗酒聊相覓。登樓望禹穴。慷慨生感激。玄珠淪赤水。金簡不可覩。崩騰六合內。慘淡多羽檄。天弧弛虛殼。封豕逃磯鎖。惟見野田中。白骨雜瓦礫。夢來歌一曲。客淚再三滴。晚風吹晴霞。海色映石壁。展詩肆遐眺。嚴令困勅敵。諸公俱鳳麟。愧我獨樗櫟。危途知驥驂。勉旃樹功績。無然學兒女。愴恨山陽笛。

題西旅獻葵圖

鳴鳳啓至德。鎬京作王家。萬國戴元后。懷柔無邇遐。逝矣裔夷人。古風慕中華。毳服耳金鑲。翠毛眼窈淫。獻葵越重譯。辛苦涉流沙。歸仁自彼心。務廣匪予夸。饗饗大廷臣。忠告猶咨嗟。卜年盈八百。分得未爲奢。云胡叔世主。黷武生諠嘩。枸醬毒南徼。河源詫西槎。哀哀萬夫命。驅以易驅驅。暴蔑文祖訓。大貽天下瑕。畫圖漫寫形。索意良無涯。太康焚雉頭。宮闈苗妖芽。開元灰組繡。驪岫荒淫哇。夫豈不有初。蕩心生百邪。望美洛陽都。赤符炳流霞。玉關閉高門。軍資絕相加。鳩杖老貔貅。虎落藹桑麻。煌煌中興業。奕奕流芳葩。謙光信受益。知足復何差。感事重懷古。因書戒矜誇。

題錢舜舉折枝山茶

歲暮寒氣結。百卉無遺榮。懿此獨不凋。方冬燁紅英。有似節義士。特立不爽貞。幽居屏紛雜。丹鉛寄深情。葱龍翠雲翹。綴以流霞精。玄霜避晨豔。華月助宵明。坐令桃與李。無言愧微生。贈詩勿遐棄。貴之比瑤瓊。

遣興六首

避地適他鄉。息肩謝羈束。生事未有涯。暫止聊自足。南園實清曠。可以永幽獨。層樓面羣山。俯見湖水綠。雜英被郊甸。魚鳥得棲宿。登臨且慰意。未暇計遠躅。聖賢有遺訓。知命夫何辱。

積雨兼數旬。天氣涼有餘。青苔交戶庭。始覺人跡疎。地主多閑園。可以種我蔬。兒童四五人。蔓草相與鋤。既倦則歸休。臥閱床上書。無事且爲樂。何者爲名譽。

夏日苦太長。夜景良可愛。華月吐曾岑。遙天碧如黛。披衣更登樓。稽山正相對。澄湖品空明。浮雲去無礙。遺榮世何人。賀老今不在。涼風吹毛髮。坐久增感慨。

溽暑百體倦。曉涼正堪眠。飛蚊何營營。繞鬢鳴相煎。拍之不勝多。揮去還復前。世亂有骨肉。逃生幸完全。細微何足較。此意誰當傳。

綠樹何陰陰。良苗亦離離。開窗招遠風。赤鯉躍清池。雲日釀晴光。芰荷有餘姿。宴坐偶自得。悠然遂忘飢。富貴不可求。守分勿復疑。

迂疎乏世用。矯情非所安。投簪謝時輩。聊得心中寬。回首望故鄉。枳棘日以繁。譬彼水上萍。隨流且盤桓。樓頭好山色。晴雨皆可觀。未知明朝事。且盡今日歡。

久雨壞墻園蔬盡壓悵然成詩

晚歲逼豺狼。漂搖去鄉土。囊橐罄留儲。釜餽恆若窳。開畦種蔬菜。撥借荷地主。晨興率童稚。樹藝躬僂。瓠實正纍離。茄花亦爭吐。魚肉方絕交。恃此當醢脯。悲風吹江干。浩蕩十日雨。幽泉湧陰竇。高塘圻脩堵。蒼蔓壓泥沙。朱苞埋宿莽。淒涼紫芝英。乃與朝菌腐。數奇值時危。一飽不敢取。天地有窮愁。每望貧家聚。青苔滿頽墻。日暮空倚柱。

題鮮于伯機書杜工部詩後

少陵昔避亂。買屋西枝村。卜鄰得贊公。聊可與晤言。四郊鬪豺虎。煙塵塞乾坤。中宵望北辰。慘戚衰老魂。我今亦漂泊。不得歸本根。感此一太息。欲語聲復吞。

次韻和脫因宗道感興三首

索居守貞素。久已忘世機。晨興夕還寐。不知時節違。庭前有芳樹。宿昔容顏非。巢鳥去安之。寒蟬鳴亦稀。居人歌北風。客子歎無衣。浮雲結陰翳。白日少光輝。鴻鴈號南翔。蟋蟀在中闈。榮華如流水。一往何當歸。松柏守孤直。不爭桃李色。明星在青天。有時化爲石。春風車馬塵。竟日翳紫陌。寧知禾黍地。舊是王侯宅。蓬萊有仙藥。求之不可得。霜風吹林木。歲暮徒愴惻。鋌刀方用世。掛壁干將閒。剪松養荆棘。匠石空悲酸。驅車陟大行。日暮多險艱。玄水膠大谷。脫粟貴琅玕。魍魅攪人魂。豺狼食人肝。路遠無羽翼。何由得飛還。

題春江送別圖

春江水悠悠。行人上蘭舟。春雲散江樹。行人重回顧。嘉會未有期。離心渺千里。願作還山雲。莫作東流水。

琴清堂詩

亭亭嶧陽桐。斲爲綠綺琴。植之朱絲絃。彈我白雪音。虛堂夜迢迢。華月耿疎林。鳳凰天上來。虬龍水中吟。曲罷起太息。無人知此心。

田家

田家無所求。所求在衣食。丈夫事耕稼。婦女攻紡績。侵晨荷鋤出。暮夜不遑息。飽暖匪天降。賴爾筋與力。租稅所從來。官府宜愛惜。如何恣刻剝。滲漉盡涓滴。怪當休明時。狼藉多盜賊。豈無仁義矛。可以弭鋒鏑。安得廉循吏。與國共欣感。清心罷苞苴。養民瘳國脈。

渡江遣懷

東風吹滄江。白日照花柳。山川半顯晦。積雨晴未久。青陽好氣候。羣物競苞剖。農夫荷鋤犁。各自登隴畝。鳴鳩鳴相應。陂水光瀾瀾。天地起戈兵。荆榛塞原阜。茲邦特按堵。庶足憩奔走。故鄉有園田。委棄沒藁秀。老母年八十。頭童齒牙朽。癡兒始垂髫。出入寡朋友。衣衾雜絮毳。羹食乏葷菲。儼然多病身。全家倚糊口。那令更遠去。憂念成疾首。千金聘宿瘤。顧謂西施醜。驢車摧太行。驂騑不如狗。況我鴛鴦質。困踣畏培塿。濟河須巨舫。將焉用罌缶。朱弦絙琴瑟。曷中洪鐘紐。剡蒿射犀革。空貽養由咎。巍巍神祖烈。乾坤讓高厚。蠢茲蛇豕儔。乘間恣哮吼。非無熊羆臣。土產分左右。更張吾豈能。習慣彼已狃。鹿麋曾傷虎。宵邁禦狸虜。寤言亂心緒。忽若醉醇酒。疎賤等蚍蜉。捐軀復何有。夷吾匪每生。鞠育未宜負。愴恨憶松楸。淚濕蓬鬢垢。道途正難阻。進退維窳白。向風一陳情。何由達南斗。

題山水圖

江上何所有。高低千萬峰。結廬覆以茅。取足聊自容。綠樹旣蒼鬱。清溪亦溶溶。地僻無車馬。猿鳥得相從。日落沙際明。寒煙澹疎松。蒼茫雲霞外。隱見青芙蓉。悠然一舸還。好景時獨逢。歸來山月出。古刹鳴昏鐘。

若耶溪查郭深居精舍

上人好山居。入山惟恐淺。紆餘涉澗沚。結構依巖嶮。岡巒外挺拔。水木終隱顯。其前對鵝鼻。突兀正冠冕。其傍連木禾。積翠森假壑。後有獅子巖。習翠露饑飢。春花炫陽林。秋草馥陰岫。高通雲雨過。側見星斗轉。桃源不遠求。箕顛安足踐。我來三伏涼。歸懷忽如展。談經道心融。聽濩俗慮翦。踈窗夜深啓。孤月掛遙岫。空濛口毫光。閃爍動岬巘。何當此卜隣。永用辭澗澗。

大熱遣懷

盛夏火用事。長日不可堪。熱汗發我膚。如泉溢穹嶼。清晨登樓望。四野皆紅嵐。坡垆會稽山。縹緲浮鬱藍。何由作雨澤。一洗喝與酣。須臾玻瓈盤。湧出琉璃潭。雜氣若絳旂。飄飄散空岵。朱光斐九幽。天色熯以醴。樹木首咸俯。鳥獸聲盡縮。玄冥將禺彊。側身入控窟。淵蛇蒼短鱗。山龜灼枯臙。悍熊伏朝覲。困龍縮秋蠶。焦根裂地斷。斃鷓蚌肺含。水井爲湯池。冶容成病頰。渡水翅帖帖。守門口甜甜。蚬蜩蟬輕綃。翼依陰萃楓。漉漉沸渭泊。靜寂噪聒亂。語談蒼蠅丹。砂頭翠飛逐。烹脂拍之適。汚手驅之死。仍耽對食憚。下航引飲輒傾甌。撫几炎欲燎。披衣重猶函。慨彼征戍卒。荷戟忘寢寢。乘絕骨肉愛。不得同苦甘。但聞盜賊熾。未見工師戢。郊原虜掠遍。餽餉那能覃。況乃降暑節。蒸鬱非所諳。用兵貴拙速。將帥當懷慙。沈冥及暮鼓。兩目脂流涓。

拂袖招遠風。衆星爛天南。河漢上昭回。煙霞遠巖巖。且喜辰極明。願覩戎馬倭。雲門連鏡湖。林壑清且涵。豈惟隔埃壙。庶足憩負擔。惜無五畝宅。偃蹇投吾簪。

六月十八日自天章入城作

天淨山氣涼。溪渾夜來雨。籃輿度疎翠。初日照平楚。高林半長煙。好鳥時自語。煩襟得蕭散。似欲忘羈旅。何當盜賊息。比屋豐禾黍。逍遙丘壑間。鹿麋以爲伍。

晚同方舟上人登師子巖作

落日下前峰。輕煙生遠林。雲霞媚餘姿。松柏澹清陰。振策縱幽步。披榛陟層岑。槿花籬上明。莎雞中間吟。涼風自西來。颺颺吹我襟。榮華能幾時。搖落方自今。逝川無停波。急弦有哀音。顧瞻望四方。悵焉愁思深。七月四日自深谷之靈峰作

平旦出雲門。亭午至靈峰。山盤澗縈紆。谷深巖錯重。竹露滴皎皎。林霞散溶溶。度石苔蘚滑。披蘿煙靄濃。頗喜禾黍成。可以慰老農。野草各有花。照水似銜容。徐行恐觸熱。聊憩畦下松。時聞幽鳥鳴。亦足開心胸。慨懷陶隱居。丹竈今無蹤。干將與莫邪。俱已化爲龍。空餘遠山色。菡萏青芙蓉。

清脩院良上人浸月軒

華池浸皓月。高下共清瑩。爛如長明燈。飛入大圓鏡。又疑鉛汞爐。伏火發宵映。層軒開九秋。萬象出昏暝。月來池色動。月去池色定。窺臨足遊適。翫味見心性。珍重無生侶。於焉託清淨。宴坐六塵空。百魔從律令。

普濟寺用恭行已上人韻

偶從靈峰來。遂作雙峰遊。雙峰何峨峨。俯映耶溪流。炎天正埃鬱。欲往安所投。喜見農事成。秔稻滿中丘。步入古寺門。信美無與儔。綠池對徑路。水木自深幽。飛蘿冒松柏。上有猿與猴。登樓散煩熱。坐挹山綢繆。更愛山下泉。冷冷洩陰溝。青苔闔脩竹。竟日涼風留。披軒眺西岸。煥若丹霞浮。神劍去安之。起望空斗牛。沉思終永夜。月白銀潢秋。

題陸放翁晚興詩後

雄劍闔寶匣。中夜蛟龍吼。男兒抱志氣。寧肯甘衰朽。松栢在深谷。枝葉拂星斗。雖無般匠顧。勢自凌培塿。昂昂商山翁。矯矯渭濱叟。林泉不遐遺。軒冕亦固有。奈何劉伶輩。賤身若芻狗。徒生天地間。辜負髮與手。三復詠斯章。千載吾尙友。

題商學士寒林圖

昔聞商學士。水墨稱絕藝。今觀寒林圖。信美無與儷。淒涼霰雪餘。簸掃悉輕脆。玄冰刮老骨。衣被荷纖荔。龍鬚結瓔珞。虎爪出鋒銳。鱗皴蛟螭蛇。殼摧錯琅玕。帶下有不死石。藍汁沃鬢髻。前有赴海湍。漱濯沙土細。青煙曼遙渚。白日淡荒裔。蒼茫浮雲外。縹緲惑盼昧。梧桐早飄落。鳳鳥將焉逝。四序若循環。葳蕤在櫛鬣。衰榮各有時。至道惟冥契。

題雜畫卷子

山川出雲霓。谿谷藏虎豹。枯樹繒綾身。怪石魄鼻貌。竹枝如琅玕。煙雨昏暮罩。梅花雪中開。的礫珠磊砢。蘭獨稱國香。嬌麗最可樂。萋纖草堪籍。傷草棘能抓。宋公學元暉。駭獸見騰馳。老班性嗜酒。藻思發餘醅。

丹丘泣龍髯。零落江湖權。顛王食敗筆。得米動益筭。僧明本靜者。一藝起衆鬧。展卷見歷歷。聊足鮮喧噓。裁詩慕韓豪。瑣細非所較。

題宋子章效米元暉山水圖

昔時米南宮。父子同畫癖。油然煙雨態。千里入盈尺。近代宋尙書。筆意妙欲逼。置之几格間。新舊莫辨識。應是前後身。神會造化迹。鴻濛迷日月。涵洞飛霹靂。蒼畦晦中斷。天闕杳高隔。洪濤漲無倪。龍虎移窟宅。農夫怨昏墊。樵牧絕行跡。破屋兩三家。搖撼已傾側。得非杜少陵。無乃陶彭澤。蒼茅委泥寧。籬菊沒銀籍。空江乏舟楫。汗漫安所適。披圖瞻青冥。惆悵至終夕。

爲賈性之賦松石

老松不構度。潛跡歸后土。千年化爲石。詭怪驚地府。酆都壯輪奐。翦截就梁柱。嶙峋鏤鑿餘。棄置人得取。君家赤玻璃。光采奪朝暉。嶒嶸鐵心堅。璀璨霞色古。何當呼吳罌。匠以脩月斧。持獻女禍皇。天罅或可補。有客來款我。

有客來款我。自謂儒者儔。問我胡不出。乃來此淹留。我笑而不答。彼問方未休。彼我異所志。問答寧相投。青山屋外高。溝水山下流。隱几書一卷。寒簷雀啾啾。

題趙文敏公畫松

吳興昔王孫。能畫世莫及。觀其二松圖。矯若龍出蟄。蟠根破坤輿。拔萃滯原隰。交加各軒翥。崱嶭相倚立。巖鱗撐空青。豕鬣振颯飄。高歲日月氣。清滴雲霧汁。垂釣者何人。短棹非妄集。五湖多風濤。蛟蜃頭角鱗。

不如滂澤間。取足鱣與鱠。倦眠松影下。百竅清涼入。慎勿驚松枝。天寒衣袂濕。

題三香圖

梅是玉堂花。和羹有佳實。水仙如淑女。婉婉抱貞質。山礬直而勁。野處似隱逸。分類族雖三。論德性乃一。瓊臺耿清夜。涼月白勝日。霏霏芳氣交。粲粲華采溢。琪樹讓品榮。瑤草愧私暱。願言永其歡。歲莫保終吉。

感時述事十首

天王有萬國。撫治不能徧。百僚分所司。控制倚方面。旬宣貴浹洽。付託屬隆眷。易置苟無恆。勤怠朝夕變。自非穀氏儔。何官匪郵傳。矧茲世多故。軍府希閒宴。戎機一以失。蟻穴僨臺殿。公庭委舊事。書牘呈新選。來者且遲遲。在者同秋燕。偷安待日至。退託從私便。姦貪遂乘隙。民病孰與唁。大臣國柱石。憂喜相連纏。反躬既遺闕。何以率州縣。寄與要津人。有否末宜燕。十羊煩九牧。自古貽笑噓。任賢苟不武。焉用多人爲。帥行仰供給。州縣方告疲。差徭逮所歷。添官有權宜。柰何乘此勢。爭先植其私。百司並效尤。貨賄縱橫飛。列坐隘公堂。號令紛披離。名稱到輿隸。混雜無尊卑。正官反差出。道路不停馳。徇祿積日月。官吏之所希。此輩欲何求。駁剝圖身肥。世皇一字宙。四海均惠慈。盜賊乘間發。咎實由官司。云胡未悔禍。救焚用膏脂。姻婭遂連茹。公介棄草茨。農郊日增壘。良民死無期。天關深虎豹。欲語當因誰。先王制民產。曷分兵與農。三時事耕稼。閱武在嚴冬。亂略齊憤疾。戰伐厥有庸。那令異編籍。自使殊心胸。坐食不知恩。怙勢含威兇。將官用世襲。生長值時雍。豈惟昧韜略。且不習擊剗。悍卒等驕子。有令亦無從。

跳踴恣豪橫。鼓氣陵愚恣。所以喪紀律。安能當賊鋒。崩騰去部曲。蟻合尋歸蹤。時方務姑息。枉法稱寬容。寧知養豺虎。反噬中自鍾。國家立制度。特此爲垣墉。積弊有根源。終成腸肺癰。何由復古道。一視均堯封。篆狗不噬禦。星馳募民兵。民盡烏合何。以壯干城。百姓雖云庶。教養素無行。譬彼原上草。自死還自生。安知狗犬義。捐命爲父兄。利財來應召。早懷逃竄情。出門卽剽掠。所過沸如羹。總戎無節制。顛倒迷章程。威權付使嬖。賞罰昧公平。饑寒莫與恤。銳挫怨乃萌。見賊不須多。奔潰士瓦傾。旌旗委曲野。烏雀噪空營。將軍與左右。相顧目但瞠。此事已習慣。智巧莫能爭。廟堂忽遠筭。胸次猜疑并。豈乏計策士。用之非至誠。德威兩不立。何以御羣氓。慷慨思古人。惻愴淚沾纓。

古人有戰伐。誅暴以安民。今人尙殺戮。無問豹與麟。濫官舞國法。致亂有其因。何爲昧自反。一體含怒瞋。斬艾若草芥。虜掠無涯津。況乃多橫斂。殃禍動輒臻。人情各畏死。誰能坐捐身。所以生念慮。嘯聚依荆榛。暴寡憚強梁。官政惟因循。將帥各有心。邈若越與秦。遷延和顧望。退託文移頻。坐食挫戎機。養虺交蛇鱗。遂令耕桑子。盡化爲頑嚚。大權付非類。重以貽笑嚚。鼠璞方取貴。和璧非所珍。但恐肯及溺。是用懷悲辛。五谿舊三苗。蛇虺相雜處。其人近禽獸。巢穴依險阻。起居任情欲。鬪狠競爪距。況能識君臣。且不顧子父。所以稱爲凶。分北勞舜禹。先朝慎羈縻。罔俾來中土。胡爲倏而至。馳驟如風雨。見賊但趨赴。逢民輒俘虜。腰纏皆金銀。衣被俱繡組。所過惡少年。改服投其伍。農家劫掠盡。何人種禾黍。盜賊有根源。厥咎由官府。任將匪能賢。敗衄乃自取。奇材何代無。推誠卽心膂。誰哉倡此計。延寇入堂宇。割鼻救眼睛。於身竟奚補。浙西耕桑地。百載安生聚。自從甲兵興。徵斂空軸杵。疲氓真可憐。忍令飼豺虎。追憶至元年。憂來傷肺腑。

虞刑論小故。夏誓殄渠魁。好生雖大德。縱惡非聖裁。官吏逞貪婪。樹怨結禍胎。法當究其源。剪鋤去根荄。蒙龍曲全宥。駕患於後來。濫觴不壅塞。滔天谷陵頽。總戎用高官。沐猴戴母顛。玉帳飫酒肉。士卒食菜羹。未戰已離心。望風遂崩摧。招安乃倡議。和者聲如雷。天高豹關遠。日月照不該。俱曰賊有神。討之則蒙災。大臣恐及已。相視若銜枚。阿諛就姑息。華緩被死灰。姦宄爭效尤。無風自揚埃。嘯聚逞強力。謂是爵祿媒。黎民亦何辜。骨肉散草萊。傾家事守禦。反以結嫌猜。慟哭浮雲黑。悲風爲徘徊。赤子母不憐。不如絕其脉。養鳥逐鳳凰。此事天所哀。胡爲尙靡定。顛倒墜與頽。春秋戒肆告。念此良悠哉。八政首食貨。錢幣通有無。國朝幣用楮。流行比金珠。至今垂百年。轉布彌寰區。此物豈足貴。實由威令敷。廟堂喜新政。躁議違老夫。悠悠祖宗訓。變之在朝晡。瞿然駭羣目。疑恠仍挪揄。至寶惟艱得。韞櫝斯藏諸。假令多若土。賤棄復誰沽。錢幣相比較。好醜天然殊。譬彼絺與綌。長短價相如。互市從所取。孰肯要其物。此理實易解。無用論智愚。矧茲四海內。五載橫戈艾。赤子投枳棘。不知所歸途。一口當萬喙。唇縮舌亦瘖。導水必尋源。源遠流乃疏。藝木必培根。根固葉不枯。慎勿庸邇言。揚火自焚軀。尙克詰戎兵。不顯厥祖謨。惟民食爲命。王政之所先。海嶼實天物。厥利何可專。貪臣務聚財。張羅密於甍。厲禁及魚鰕。鹵水不得煎。出門卽陷阱。舉足遭纏牽。炁炁用鞭箠。冤痛聲相連。高牙開怨府。積貨重姦權。分攤筭戶口。滲漉盡微涓。官征勢旣迫。私販理則然。遂令無賴兒。睚眦操戈鋌。出沒山谷裏。陸梁江海邊。橫行荷篋籠。方駕列船舩。拒捕斥後懦。爭彊夸直前。盜賊由此起。狼藉成蔓延。先王務廣德。如川出深淵。外本而內末。民俗隨之遷。自從甲兵興。奄忽五六年。借籌討得喪。耗費倍萬千。回憶至元初。禁網踈且平。家家有衣食。畏刑思保全。

後來法轉細。百體皆拘攣。厚利入私家。官府任其愆。大哉乃祖訓。典章尙流傳。有舉斯可復。庶用康逋。邇奉皇縣九宇。三代法乃變。漢祖都咸陽。一統制荒甸。英雄旣鏖削。瘡痍獲休宴。文皇繼鴻業。垂拱未央殿。累歲減田租。頻年賜縑絹。太倉積陳紅。圓府朽貫線。是時江南粟。未盡輸赤縣。方今貢賦區。兩際日月窳。胡爲倚東吳。轉餉給豐饒。徑危昌不測。勢與蛟龍戰。遂令鯨與鯢。掉尾乘利使。扼吭要國寵。金紫被下賤。忠良怒切齒。姦宄競攀援。包羞屈政典。尾大不可轉。聖人別九州。田賦揚爲殿。中原一何賙。所務非所先。斷風重稼穡。王業丘山奠。夫征厲末習。孰敢事游燕。哀哉罔稽古。生齒徒蕃羨。一耕而十食。何以奉征繕。長歌寄愁思。涕淚如流霰。

丙申二月別紹興諸公

勞生屬時艱。將老萃憂戚。風塵隘九野。何士爲樂國。茲邦控吳越。名勝開自昔。湖山競奇麗。物產亦充斥。交遊尙質儉。而不事華飾。況有良友朋。時來慰岑寂。全家免寒餓。幾欲忘旅客。胡爲復舍此。僮僮就行役。軒車遠追送。酒至淚輒滴。還鄉人所樂。我獨愁苦劇。故山有松栢。摧折爲荆棘。豈無骨肉親。太半生死隔。此語不可聞。此景那堪覲。愁情如波濤。瀕洞胸與臆。佇立向穹蒼。一歎雙鬢白。

雨中雜詩四首

久晴思得雨。旣雨久復厭。廣庭屯陰氣。平陸就昏墊。淒風吹人寒。朱火黯無燄。水衣上高墉。泉溜發枯塹。青泥沒逶道。寸步不可覘。慷慨成感傷。纏綿積憂念。首夏涼風生。朝樹結晚色。濛濛細雨交。慘慘原野黑。衡門長藜莠。壞壁穿荆棘。念彼征戍兒。沾濕荷戈戟。

夢榮幣留費。菴菽難充食。供輸既乏絕。戰鬪何時息。巢居者誰子。鼠竄延晷刻。田疇沒蓬蒿。無處勤爾力。晏天高寥寥。仰視不可極。

多雨捐萬物。草爛麥生耳。青苔獨得時。延蔓及堂庑。晨興視天宇。滴瀝殊未已。君子懼陸沉。小人憂餓死。淒涼大將營。鼓縵弧弓弛。朝廷竟知否。盜賊如流水。

離居感時節。寤寐不遑安。青燈晦壁角。簪溜如崩湍。屈指計日月。殷憂集多端。蛙黽爾何知。叫噪喧草莞。中夜攬衾綯。淒淒陰氣寒。鳳凰鍛羽翼。卑飛避鳴鳶。撫几一長歎。聲出心已酸。

次胡元望郊行詩韻

誰言公館清。晨氣晚未散。豈乏樹葱芊。尚有花爛熳。美人隔巷陌。可念不可喚。溫溫夜光璧。幽草潛璀璨。鄙夫競喧譁。達士善大觀。世情如秋蓮。零落風中瓣。少年喜紛紜。談笑輕絳灌。進取務出奇。周慮非習慣。逝水難重迴。芳時愁坐換。元臣鎮方面。邊戎仰成筭。應憐四郊外。荆棘滿耕畔。悽悽憂葵女。惻惻撫床璫。興懷增感傷。展轉過夜半。起行視青天。星河色凌亂。安能作野馬。脫略謝羈絆。

秋夜感懷柬石末公申之

不寐知夜長。起視天宇闊。散漫草上風。朦朧雲間月。寒禽鳴疎樹。黃葉墮階闥。俛仰觀羣物。惆悵不敢發。誰云螻蟻壤。能使泰山飭。蒼鷹鑽六翮。狡兔營三窟。何當威弧正。王旅得肆伐。菌籥雖微材。尚可施羽管。豈意風浪舟。心猶隔胡越。士生非金玉。有足難自達。周發不恤緯。楚放常懷闕。平生葵藿情。忍與霜露歇。玄水膠坤軸。非君孰能幹。申章匪繁辭。悲憤不可遏。

次韻和石末公用元望韻遣興見寄

鶉鳩勸春耕。桴鼓帖宵邏。拊循餘暇日。珠玉生咳唾。時維青陽初。天子在左个。布德順木令。萬國罔不和。祿食自紛紜。撫字誰最課。幅員若金甌。絲髮無罍破。涓溜可摧山。機禍不在大。中夜登高樓。遙瞻太微座。乾坤澹寥落。日月飛鳥過。憤惋空有心。盛時嗟已蹉。

以野狸餉石末公因侑以詩

野狸性狡猾。夜動晝則潛。紮之籠檻中。耳弭口不哢。當其得意時。足爪長且鉅。跳踉逞俊捷。攫噬靡有礙。貧家養一鷄。冀用易米鹽。爾黠弗自食。尋聲竊窺覘。破柵舔肉血。淋漓汗毛髯。老幼起頓足。心如刺刀鎌。東鄰借筓蹄。西鄰呼獺獫。繫餌翳叢灌。設伏抽陰鈐。彼機歛已發。此欲方未飲。絲繩急纏繞。四體如臍黏。野人大喜慰。不敢私烹燂。持來請科斷。數罪施剝割。使君鎮方面。殘賊職所殲。械送致麾下。束縛仍如帶。腥膏忝污鉞。羶齒或可醃。萋芳和糟醬。頒賜警不廉。黃雀利螳螂。碎首泥塗害。烏鴉殉腐肉。噴墨身受淹。此物亦足戒。申章匪虛誣。

和石末公種棘用胡元望韻

力役困年侵。種棘代遮邏。豫防苟無失。有地孰敢唾。風條曲抽乙。雨葉細垂个。是時春載陽。土脈如膏和。分疆督藝植。勤惰各有課。揮鋤綠煙披。轉石蒼蘚破。稍看萌蘗長。漸覩根株大。結蔭冒長堤。開花映高座。猿公不敢窺。貉子那得過。慨慕陶公言。罔俾分陰蹉。

得令字

勾芒發陳根。北斗轉東柄。衆星各參差。威弧何時正。好生雖聖心。明刑亦王政。哲人慎謀始。斯焉獲終慶。徒昔兩階舞。可以懷逆命。不見三危山。萬里竄梟獍。世德異唐虞。民情好爭競。那無跼扁醫。而有膏盲病。波濤地軸顛。虎豹天關負。雨露當春滋。風霜及秋勁。誰能奉明主。順天行號令。

正月二十三日得台州黃元徽書有感三首

世亂網恢恢。斯人亦淪翳。數奇當何如。窮途難爲計。盲風振喬木。碩果失其蒂。虎豹落機檻。坐服輿阜制。玄珠迷罔象。白日慘陰暝。涉水水有蛟。入山山有豨。棄馬感須無。直道懷柳惠。青冥無羽翼。悲來夜迢遞。結交無疏戚。艱難見平生。金石苟不渝。萬里如兩楹。重山非云遠。邈若遼與荆。嫵婉豈不懷。蛇虺正驕瘳。手持故人書。心念故人情。開書問故人。淚下如雨傾。

客從何鄉來。遺我尺素書。道路險且艱。故人情有餘。妖氣晦斗極。黃濁混龍魚。何荃不爲猶。何鱗不爲羶。殷勤故人心。炯若明月珠。投之千丈泥。萬古光不渝。安得致閭闔。以照君王車。

次韻和石末公春雨見寄

愁陰沍陽景。孟春猶苦寒。騰雲湧巖岫。落雪蔽江干。街衢溢黃潦。井谷生狂瀾。誤疑蛙黽窟。中有蛟龍蟠。復憂扶桑日。坐爲黃濁漫。顧瞻望四郊。側足不遑安。卻秦慕魯連。存齊想田單。玄髮雖向改。壯心終靡殫。小人務苟且。君子慚素餐。高牙對多壘。肉食徒王官。周綱雖云弛。一匡賴齊桓。莫驚溝澮盈。雨息當自乾。

次韻和石末公春日感懷

下澤潢潦集。幽林光景遲。羈禽有哀響。槁葉無半姿。梁稊不同畝。世事久當遺。便欲駕扁舟。泛彼湖上澗。

慨懷祈招賦。愴惻感遐思。流光逐飄風。去若六馬馳。干戈尙雜選。舉日多可悲。步登西城樓。遠望東城陴。近悼春陵吟。遠傷鴻雁詩。未能已怨怒。矧暇防笑嗤。賴有賢大夫。直道人不欺。相期各努力。共濟艱難時。

紫虛周道士還俗多年而貧老如故元帥石末公憐其無依復令歸觀就養

白鶴棲青松。願與人世違。松高風露寒。卻向人間飛。江湖無稻粱。歲莫將疇依。稽首浮丘公。涕淚灑毛衣。浮丘憐老鶴。解悟旣往非。浴以丹池泉。照以若木暉。脩然骨髓清。遠向青松歸。松葉煙茸茸。松華霧菲菲。可棲復可食。其樂天下稀。如何從鴈鷺。喋呶圖身肥。

偶興

勞人怨長途。壯士悲老別。那將望鄉心。對此傷神月。淒涼寒風至。惆悵芳草歇。瑤琴無子期。絲弦爲君絕。

雜感

畸窮傷往事。晚莫悔前非。流光不相待。逝川那可追。佳期隔河漢。日夕千里思。鴻鴈西北來。安能從之飛。佇立望明月。天霜夜沾衣。

黃慎之自閩見訪夜坐對酌悵然有感

故人一爲別。七見秋夕月。今日見故人。故人鬚髮新。世情如鬚髮。故人當識察。車輪東北馳。車轂終不移。倦暑伏菅蒯。白汗如流瀉。開門見故人。謂是天上下。新人各自媚。故人何爲者。斧斤入山林。松柏化灰燼。寄語風胡子。莫恠金躡治。

煌煌華燭輝。扇扇飛蛾翼。羲和倚扶桑。恨無夸父力。大鵬雖有能。萬里亦一息。可憐千斤牛。坐受鼯鼠食。

故人髮猶黑。故人心尚赤。人生一世間。幾見駒過隙。南山有喬松。翠鷗鬪顏色。般僮不收錄。野火恣焚炙。枝枯榦亦折。雪霰交洒淅。中心有流液。入地化爲石。遺之五百年。猶堪補青天。

鄧同夫餞別圖詩

江上潮始白。林端霞半紫。微風颺歸帆。紅葉蹊行子。芳醪恥金樽。清歌猶在耳。馬鳴不見人。愁來若流水。

旅興五十首

初秋積雨過。衆綠光如濡。莎雞啼高樹。蟋蟀鳴塔除。時物已改故。芳年從此徂。榮名非我願。守分敢求餘。登樓眺遠郊。肆目望天衢。明月出雲中。照我華髮疎。還歸掩關臥。夢到園田居。

憶年二三十。笑人不能勤。誦書歛萬言。落筆飛煙雲。有朋自遠來。講論窮朝曛。一藝恥不知。高蹈躡前聞。寧知有衰老。耳聾目如熏。身世且未保。況敢言功勳。

老不與懶期。身老懶自至。懶不與傲期。力憊難強事。茫茫視天宇。忽忽心如醉。勞生諒何庸。顧爲形所累。弱水隔蓬萊。安得生兩翅。

秋風肅萬物。百蟲競號鳴。螻蛄最可憐。切切悲其生。屣履步庭除。素月圓且明。翫之不可掇。渺焉忽西傾。回身掩房闔。愴悅煩慮盈。太息以終宵。展轉難爲情。

傲福非所希。避禍敢不慎。富貴實禍樞。寡欲自鮮吝。疏食可以飽。肥甘乃鋒刃。探珠入龍堂。生死在一瞬。何如坐蓬華。默默觀大運。

紫燕來我簷。營巢養其雛。拾蟲撲我衣。銜泥污我書。雛成復生子。風雨同安居。一旦捨我去。瞻之起長吁。

死別不可追。生別那可思。悼往恨節促。待來悲時遲。

人生百歲間。苦樂相牽攀。念生復念死。何時一開顏。登高望八荒。日晡飛鳥還。有願不克遂。淚下空潺湲。秋氣雖可悲。秋色亦可悅。寥寥天宇曠。皎皎縣象晰。鴈來山葉紅。龍臥江潭潔。彼美黃金花。含英耀窮節。佳人不可期。明月圓復缺。空庭夕陰盡。露草白如雪。佇立望四方。彌使憂念結。

窮巷屏人跡。開門見青山。青山似故鄉。客子何當還。蠅蝓日夜鳴。綠樹亦已殷。白日駛西征。浮雲不可攀。安得生羽翼。奮飛出玄間。

雨來羣山暗。雨過羣山明。山明猿鳥喜。山暗猿鳥驚。歲暮陰風起。白日西南傾。寒蟬枝上號。夏蟲草間鳴。人生非草木。能無感中情。

赤霞變玄雲。風起煙霧塞。颺颺木葉響。曠曠原野黑。青泥沒委巷。關塞生咫尺。水深蛟龍恣。山濕鳥獸寂。留滯荷戈人。艱難去鄉客。翹首望太陽。夢思萃朝夕。

望舒乘罕車。潛輪躍重淵。二儀煙霧交。九澤風雲連。丘陵冒潢潦。溝澮成通川。鶴鶴失其巢。窮緩鳴可憐。蛙黽一何樂。喧呼聒宵眠。

西岑掛朝隴。東嶺垂日脚。啾啾垤鶴鳴。矯矯淵輪躍。淒風拂喬樹。密雨翳林薄。煌煌籬下花。粲粲黃金萼。含英不自衛。守分甘寂寞。願持獻美人。恐貽觀者愕。

晨景無暉暉。霜露淒已繁。松栢坐樞翳。桃李更何言。旦夕悲風起。黃沙蔽平原。萬物盡凋落。芳華誰獨存。我願化爲鶴。不願化爲猿。鶴鳴聲聞天。猿鳴煙雨昏。空林夜寥寂。踣躅傷精魂。

西風吹頽果。草茅思索綯。撼撼卉木零。唧唧寒蟲號。百川日夜流。泰山何其高。沉浮自有定。汲汲無乃勞。久雨得晚霽。豁然如醉醒。幽花銜餘紅。遠峰出孤青。獨坐無與娛。蜻蛉吟空庭。良辰能幾何。逝者忽如傾。歎歌欲自慰。歌竟還傷情。

微風振簷鐸。玲如環珮響。登高看秋色。俯見明月上。木落天地寬。雲散川原廣。來者不可期。逝者日已往。離居豈無懷。惻愴縈遠想。

日暮登高臺。流日盼雲間。雲間有明月。窈窕芙蓉顏。光輝被四表。萬古一往還。惜無騰化術。仰之不能攀。江上秋風急。天寒鴈南歸。客子晻長途。中心一何悲。顧瞻望四方。有懷當告誰。霜露日夜零。百卉厭其枝。衰謝不待期。榮盛安可追。太息復太息。愴恨涕沾衣。

薄雲斂微雨。返照涵空煙。黃葵間紅蓼。爛苦濯錦鮮。老病若無歡。坐爲憂所纏。自恨非松喬。不能還少年。援琴寫此曲。曲盡心茫然。

少別無慘容。老別有苦心。筋力已非故。憂思諒難任。春風吹郊原。雜英滿園林。物生無巨細。各以類相尋。含情曷能忘。矧乃衆病侵。勿言愁可量。滄溟未爲深。

翔鷗搏扶搖。九萬一奮翅。擘躡驟康莊。瞬息千里至。谷鮒穴坎窞。揚鷁集蓬蔚。備仄豈不憐。飲啄亦何忌。夸父空有勇。精衛良無智。翼折海未枯。身債杖徒棄。何如抱區區。保已遺世事。

倦鳥冀安巢。風林無靜柯。路長羽翼短。日暮當如何。登高望四方。但見山與河。寧知天上雨。去爲滄海波。慷慨對長風。坐感玄髮皤。弱水不可航。曾城岌嵯峨。淒涼華表鶴。太息成悲歌。

病身如朽木。螻蟻羣萃之。生意已無多。雨露空相滋。晨興步庭除。足弱幾不持。論年未應爾。胡爲遽如斯。大塊播萬形。一軀非我私。暫假終必還。但有速與遲。居易以俟命。聖言豈吾欺。

上古人一心。生榮死同哀。末世自爲心。骨肉多嫌猜。沉沉十日雨。漫漫百畝苔。苔深車輪沒。平路生蒿萊。嗚呼張仲蔚。衡門何由開。

踈庸厭人事。疲病畏交游。得閑願已愜。敢有分外求。開門對鍾山。山翠盈我眸。日中市聲遠。草綠空庭幽。登臨觀萬象。玄理足可搜。誰能走逐逐。自使生悔尤。

別離多苦懷。三年當百載。來者非所知。往者今安在。浮雲旦夕起。白日埋光彩。天地亦有形。豈能長不改。去去東園公。紫芝猶可采。

晨興梳短髮。庭樹生秋風。萬物有容色。與故各不同。碩實屬老成。天柔怨童蒙。英英黃金花。旒旒清露叢。歲暮等淪落。何異蒿與蓬。

庭前草華發。夜涼螢火流。有懷不能寐。起望女與牛。那無一葦航。繁念空悠悠。淚如宵露零。散漫不可收。四月陽用事。羣物咸長榮。靡草雖就死。王瓜亦復生。死生誰所致。時至莫能爭。達人洞神理。守分絕外營。脩身俟天命。萬古全其名。

忡忡坐虛室。暖暖日向暮。空煙斂曾岑。暝色半高樹。緬邈起遐思。逍遙散輕步。嬋娟天上月的。醜草間露。物情豈異昔。人事殊非故。芳歲不可淹。衰年況多慮。諒無彭鏗術。顏齡那能駐。

天天芙蓉花。向晚猶媚嫵。娟娟明月輝。粲粲當庭戶。寒衾耿長夜。夢寐空自語。勞生遭六極。老病在羈旅。

將思詎穹玄。恨無搏風羽。

大火沒西南。晝短宵已長。志士鬱慷慨。老年怨淒涼。蕭蕭草蟲鳴。肅肅蒼隼揚。物情各有定。人意苦不常。跼步陟崇丘。流目睇康莊。寧爲款段鷺。勿作騏驥良。款段駕鼓車。道里有限量。騏驥被重甲。力盡百戰場。死骨賣千金。雖貴亦何償。

人生如浮雲。聚散無定期。驚風一飄蕩。各自東西之。粲粲陵苕花。淒淒寒露時。浮雲不可駐。顧盼空齋空。青青瀟湘竹。猗猗被寒水。遊子如飛蓬。佳人曠千里。登高左右望。但見黃塵起。鳳凰翔不下。梧桐化爲枳。傷懷不可道。憂念何時已。

吾觀穹壤間。萬變皆有窮。何如順天道。原始以知終。清晨攬衣起。絺綌生秋風。雖雖鳴鴈來。灼灼酸棗紅。悵焉念所思。悲感集予衷。佳期在何許。瑤草成枯蓬。佇立望日月。勞心極蠹蟲。

少年不信老。恠聞老人言。忽忽老到眼。卻憶少年愆。逝川莫回流。烏兔日夜奔。憂思集方寸。鬱氣如雲屯。試爲少年道。聽之亦茫然。顧謂少年子。聆我爾汝篇。爾未及我耄。我曾猶爾妍。勸爾無我厭。勿令人爾憐。今日復明日。明日能幾何。壯心蕭索盡。思念恆苦多。引領望故鄉。川路猶且長。巢燕已北飛。賓鴻亦南翔。我獨無羽翼。慷慨中自傷。

烏鳴朝啞啞。鵲鳴暮啾啾。聞鵲既不喜。聞烏復何憂。世人務苟得。君子絕外求。滄浪迅風波。無風卽安流。胡爲自水炭。以貽達者羞。

嚴風萃萃有。蠅蚊亦無多。所憎雖去眼。若此歲晏何。中夜攬衣裳。起視星與河。出雲未還山。落葉早辭柯。

沉思不成寐。大息繼以歌。

寒燈耿幽幕。蟲鳴清夜闌。起行望清天。明月在雲端。美人隔千里。山河杳漫漫。玄雲翳崇岡。白露凋芳蘭。願以綠綺琴。寫作行路難。憂來無和聲。絃絕空長歎。

秋山青如煙。秋月白如水。登高俯空曠。咫尺見千里。悠悠孤雲行。娟娟涼風起。涼風吹客衣。客心隨風飛。願作滄海潮。朝來莫還歸。

泊舟嚴子灘。遙望仙華山。中有騎羊人。皓齒頰玉顏。餐霞飲沆瀣。坐石濯潺湲。長嘯起天風。落日爲之還。悠悠隔雲雨。杳杳不可扳。

日落天氣涼。逍遙步庭堦。蟋蟀已在宇。鴻鴈來何遲。少壯輕遠遊。衰老傷別離。念我親與友。各在天一涯。音容兩契闊。悲歡絕相知。鑿羽懷舊林。蒼鱗思故池。百年能幾何。逝者无還期。俛仰增感歎。有懷當語誰。殷勤託宵夢。聊用慰所思。

久旱草不生。一雨青滿地。新莢與舊枿。好醜各自媚。啾啾黃鶯吟。習習玄鳥至。閑庭人跡稀。白日澹清氣。平生孟公綽。庶足無妄說。但願長若斯。撥置身外事。

江城夜來雨。雷音亦何碎。今晨視郊原。草木皆發榮。雙雙布穀兒。來我牆上鳴。園蔬猶可藝。無忘及時耕。倦翮得安巢。感荷天地生。

浮雲西北起。飛雨東南去。微微若輕煙。靄靄如薄霧。臥疾少出門。不知春已暮。芳年復幾何。冉冉征鳥度。花落有再開。水流無回注。坐念入杳冥。明月在高樹。

秋高潦水涸。晏天亦淒清。枯籟響悲音。羈蟲振餘聲。時時落日暉。慘慘游子情。風林無定枝。馳車鮮安旌。自愧匪賢達。默默嗟其生。

山鬼處幽壑。自分不見天。寧知無私照。及此暗井泉。倦鳥思故林。窮魚思故淵。感荷實難忘。庶其保終年。鑿羽畏高風。疲馬厭長道。玄陰促暮節。何物能不老。自非松栢質。敢冀出衆草。登山臨流水。及此晴日好。春芳藹蕙薰。秋實粟稭稻。黃精肥可食。石泉清可澡。榮名何足言。息心以爲寶。

感春六首

種桃望食實。種柳期成陰。春風應時至。雜英滿園林。黃鳥多嘉聲。鳴鳩亦好音。勿言荏苒質。不如松與楸。託根信永固。豈乏歲寒心。

孤坐不自適。興言出行游。凱風吹衣袂。白日光悠悠。來牟秀彌野。荷芰葉已抽。行游豈不好。顧盼無與儔。回身掩門坐。隱几聞鳴鳩。

日暮東風起。滄江水微波。水深不可涉。路遠將奈何。靡蕪葉已齊。故鄉隔山河。盛年難再得。芳意其蹉蛇。朝采山上蕨。暮采澗底薇。雖無梁肉味。聊可以御飢。羔羊薦美酒。飽食同象犧。玄廬苟未閉。彼此誰是非。春風旣和柔。春日更皎潔。天桃紅如錦。繁李白勝雪。黃蜂與紫蝶。亦各競時節。人生有憂樂。譬彼天上月。願言畏其背。無使心自蕪。

人生多憂患。死去百患消。但恨不使得。無由脫鞿鑣。浮榮衆所貴。何異掠草焱。一生與一死。一夕復一朝。周器忌盈滿。老子戒矜驕。園林無恆芳。江海有回潮。委心從大化。庶幾永逍遙。

遠遊篇

三山六鼇背。翠水扶桑東。鷄鳴上海日。海面玻璃紅。仙人騎鸞鳳。呼我游雲中。雲中有金闕。謂是天帝宮。明星列雨藩。琪樹光玲瓏。太一坐端門。白髮映青瞳。授我玉篆文。赤蛇蟠九虹。出入元化先。壽命齊老童。因逢青鳥使。遂造東王公。素女如蓮華。歌喉絃管同。顧盼動環佩。振迅若輕鴻。化爲五色光。倏然隨長風。

秋夜聽冷協律彈琴分韻得夜字

秋清衆籟寂。華月耿遙夜。玉琴奏瑤席。逸響發高榭。微微風入林。稍稍泉出罅。關關黃鳥春。嘒嘒玄蟬夏。幽憂北艷語。赫怒西楚咤。初疑廣寒府。和響起仙駕。忽驚龍騰霄。雷電劈太華。淒涼漢宮女。萬里異國嫁。逍遙商山老。芝歌意閑暇。斯須變暄涼。要妙奪造化。終焉返淳朴。珊瑚墮在纜。藉鄭衛失其淫。儀秦失其詐。虎狼失其攫。烏鳶失其嚇。大音信希聲。餘美甘如蔗。持此滌塵心。永與箏笛謝。

雜詩 七首

趙女工妙舞。秦娥善清聲。同入楚王宮。各擅傾城名。宵陪綺席宴。夙侍金輿行。常恐他人至。得寵分恩榮。涕泣奉顏色。冶態隨風生。願爲松栢枝。莫作日夕英。開花不結實。坐傷秋露零。

白露出草根。顆顆如明珠。黃華炫金錢。亦復盈堦除。閑居無尤物。翫之聊可娛。衡門不必扃。此非衆所須。但恐成薏苡。千載令人吁。

服力徇穡事。屹屹望有秋。凌晨荷鋤出。日入且未休。中夜看星辰。早潦切所憂。西成告豐歲。珠璣滿田疇。飽食幸可期。喜色欲盈眸。寧知霜雪早。零落不得收。荒畦委滯穗。槿籬掛空篲。斜陽照白髮。短褐還飯牛。

天命固如此。汲汲復何永。

季世罕上壽。百歲爲長年。軒皇不可見。顏冉復誰憐。安期乘彩虹。羨門駕紫煙。朝游蓬萊島。夕宿曾城巔。常恐聲風枝。摧折滄海田。徒令驪山客。想望稱神仙。

月明棲鳥動。月暗棲鳥定。茅鷗潛枳枸。大眼掛宵鏡。皇天生萬物。一物畀一性。遂令蓋壤間。擾擾事爭競。噴嗽窮日夕。豈不悶天聽。化工雖云巧。爲法祗自病。沉思令人嗟。欲問誰與應。

蒼蒼山上松。濯濯庭前柳。亭亭拂雲起。矯矯含風久。佳人皎如玉。曠世難爲偶。長歌繼以歎。去鳥盡回首。昔爲瑤草華。今爲蠹餘朽。棄置勿復道。華容不如醜。

速成非良器。驟得難久好。桃李望春舒。亦復迎秋稿。薜英耀朝日。未夕委蔓草。飢農種植禾。自慶得食早。歲暮寒凜冽。衡門淨如掃。瀛洲對方壺。弱水爲池沼。不有千年花。安得如瓜棗。徐市駕樓船。輕帆迅如鳥。仙人倘可見。常恐三光老。寄書附文鯨。碧雲空縹緲。

旅夜四首

月光天上來。入戶清如水。游子忽思家。披衣中夜起。徙倚步回廊。烏啼夜未央。欲飛無羽翼。零淚濕衣裳。昨夜起觀星。月在楊枝上。今宵不見月。星影空搖漾。羽蟲飛拂戶。燈吐孤火壯。佇立掩衡門。愁來獨惆悵。客愁常突兀。今夜燈花生。雖知無喜報。愁亦暫時平。解襟成獨寢。留燈待天明。喜固不可求。客心恆畏愁。六街馬憧憧。鐘響聲暫歇。兩星光灼爍。中有如眉月。既見月如眉。還看月如鏡。月光自有恆。人心長不定。

遺興

春至日色好。白水生青煙。江梅已堪折。園柳亦可憐。鳥鳴山芳菲。魚躍波漪漣。人生覆載間。與物共推遷。守分絕外求。何者爲憂煎。但願有酒飲。無事驚晝眠。卽此是至樂。安用松喬年。

送葉景龍之通州同知任分韻得勳字

泛泛水上漚。飄飄空中雲。俱爲無根蒂。搖漾隨網縑。北風厲玄冥。霜雪下紛紛。送子陟長道。鴈聲不可聞。盛年復幾何。逝川去云云。朔方沙漠地。雜沓駝馬羣。居庸接太行。華貊所由分。陰山茹毛國。未嘗識耕耘。自古所懷斥。比之鹿與麀。汴京失其馭。冠裳倒玄纁。否極泰則來。天生聖明君。揚旗指大荒。旄頭落胡氛。玉帳萬貔虎。爪牙天將軍。子行勿歎勞。襲芳衣必薰。君恩重山岳。矧敢負以蚊。丈夫有壯志。曷問武與文。不見傅介子。盛烈光典墳。奉子一盃酒。別離安足云。時哉諒有會。勉旃樹功勳。

送張孟兼之山西按察司僉事任

平明集冠蓋。祖帳清江濱。天縣赫曦日。山湧崔嵬雲。大舶發中流。碧水龍鱗紋。宿雨霽初伏。川原無垢氛。脩楊翁深綠。禾黍氣如饋。蘆荻響微風。鶴鶴鳴相聞。市酒雖云薄。情至心自醺。贈詩雖不多。芳意同蘭薰。丈夫樹遠業。兒女徒紛紛。農夫務去草。穉穉職所耘。蒼鷹司鷲擊。梟鸞慎其分。利劍斷犀兕。不數雀與鼯。籌邊有廟筭。樽俎茂奇勳。巍巍太行山。蒼翠浮網縑。萬古戒華戎。峻極通天文。老熊當道臥。氣礮狼虎羣。引領望征旆。迢迢隔河汾。營平曜前烈。定遠揚後芬。制勝在兩楹。豈必疲三軍。功成早歸來。華衮昭玄纁。

送胡生之定遠教諭任 爲陶中立參政作

青陽獻嘉歲。萬物生華姿。柔桑羨綠英。新柳楊黃蕤。祖帳送行人。大舶艤江湄。管絃發清音。甘醴溢瓊卮。

歡情既已暢。繼繼申以詩。丈夫生世間。出身事明時。有材必有用。譬彼桐與椅。絀之朱絲絃。彈以格神祇。一奏獸率舞。再奏鳳來儀。校官職敷教。位小任匪卑。棟梁自勾芒。矞霄起陂池。仕學猶兩翅。對舉不可遺。努力慎保愛。勳名以爲期。

送駱起原之新城知縣任

憶在越王城。與子共翱翔。子實才俊士。舉止安且詳。溫如春雪消。日照璆琳琅。一別二十年。塵沙翳玄黃。淒風拉梧桐。霜露摧篔簹。浮雲變白黑。各在天一方。邂逅忽相逢。悲喜交肺腸。故情豈不懷。王事不敢違。條歛復爲別。安德不慨慷。西江富文彥。其俗淳以良。念我別來久。愴恨增感傷。英英江梅花。皎皎晞晴陽。折以贈子行。侑之以短章。萱草亦已生。鶴髮在高堂。征鴻漸于遠。擢翮陵八荒。行將儀大廷。鸞鳳參頡頏。陟遐必自邇。永矢莫相忘。

連江陳子晟師古齋詩二首

祥麟踏魯藪。王道遂湮淪。秦坑扇灰燼。六籍失其真。茫茫穹壤間。談舌紛輪囷。鵠鷄指爲鸞。杞梓斯爲薪。所以尙志士。慷慨思古人。造行擬淵鴛。吐辭追孟荀。不羨季氏富。而甘原憲貧。不榮桃李容。而效西施顰。臨川翫清瀾。味道劇淳珍。誰云秦岱高。布武期必臻。誰謂江漢永。利涉由通津。有爲亦若是。此語非徒申。衛武陳抑戒。曆聖垂芳名。呂公著丹書。君臣同顯榮。伯玉願寡過。使者知其情。柳惠志直道。身賈德乃盈。古人如良金。百煉彌剛貞。悠悠萬載下。日月同昭明。聖人有遺訓。可畏在後生。服膺慎勿替。竊比於老彭。西風振枯柯。涼月澹光景。門前馬蹄歇。室虛心獨靜。焚香對六籍。茗味知雋永。懷人若在目。酌潦何必洞。

尼父訓九思。子輿明三省。康莊無他岐。車馬日馳騁。捷徑善摧輪。此意當默領。

題李太白觀瀑圖

憶昔李謫仙。泛舟彭湖東。遂登廬山頂。直上香爐峯。遙望瀑布水。自天垂白虹。大聲回九地。浮光散虛空。萬木震辟易。千崖殷鍾鏞。清涼入肌骨。如歸廣寒宮。賦詩留人間。至今響淪淪。丹青極摹寫。欲代玄造功。逸駕不可追。舉頭睇飛鴻。倚歌無人和。引袖乘長風。

劉宗文菜窩遺興

歲暮寒氣冽。今晨頗和緩。登高眺原陸。陡覺生意滿。日色照地黃。墻影看漸短。草抽識土膏。魚出知泉暖。吾生亦天物。安得不樂衍。且復擷其蔬。獨酌慰衰晚。

新春

昨夜東風來。吹我庭前柳。柳芽黃未全。草根青已有。鶉鳩屋上鳴。勸我嘗春酒。我髮日已白。我顏日已醜。開樽聊怡情。誰能計身後。

送醫戴原禮歸金華

崑崙金華山。上屬匏瓜星。紆餘帶江海。窈窕儲仙靈。陰谷泉夏冽。陽崖草冬榮。帝女降清夜。龍鸞夾雲輶。旭呈五色光。天葩播芳馨。初平剽元氣。騎羊遊玉京。宗公秉節鉞。稜威憺邊庭。呂子傳聖學。出辭樊六經。陳生挾英才。雄辯摧五兵。至今文彥士。綿綿若連城。子兮抱奇術。爲人駐危齡。連鍼號二豎。養齊泣三彭。歲晚趣歸裝。日照千山明。澗阿多石芝。玉色味如飴。可以實肌腸。化骨爲瑤瓊。或可分餉否。相從翺紫清。

怨詩

屈原沉汨羅。不忍棄其宗。葺弘志存周。寧爲一己容。申生顧父愛。殺身以爲恭。子車守明信。殉死安所從。之人豈不賢。揆道猶過中。卞和獨奚爲。抱玉傳替弊。朋足實自取。怨泣情何鍾。文狸處幽林。無人識其蹤。誰令貪雞鶩。以觸弋與罟。糜身獻厥皮。爲人作妍容。娟娟芳蘭花。託根千仞峰。下有孤飛泉。上有灌木叢。歲晏不改色。霜清香更濃。韜光遠人禍。委命安天窮。道得復何怨。老子其猶龍。

秋懷八首

東風吹晨霞。初日垂白足。濕煙屯簷棟。飛雨鳴樸檝。厭厭葉就黃。萋萋草還綠。索居謝喧囂。庭絕車馬躅。念來多所懷。追往不可復。嬾隨老共至。病與年相促。省躬慚寡尤。守分無望福。鴛鴦立皂櫪。敢慕騏驎逐。秋熱喜稍退。秋雨又成霖。涓涓屋溜瀉。汨汨街泥深。清寒中筋骨。濕氣薄衣襟。晤言靡與同。孤坐難爲心。俯視青苔積。仰睇玄雲陰。弱質昧聞道。乃爲憂所侵。冥冥至終夕。悄悄成孤吟。

空塔走穴蟻。荒塚唳巢鶴。陰氛方騰達。密雨已彌漫。沉沉翳光景。昧昧感昏旦。林鴉濕休飛。簷雀饑相喚。跬步隔關河。四望空慨歎。悽悽衣裳單。戚戚歲年晏。微生如石火。徒勞暫時煥。永寤爛柯人。萬事一夢幻。清晨啓扉坐。微風動游龍。離離牆上花。切切砌下蛩。嚶嚶自成音。灼灼各有容。四序迭推移。衰病情所鍾。身羸足已弱。有願不得從。愧負天地生。愴恨填心胸。

蟋蟀已在宇。鴻鴈方來賓。天秋風露寒。陰谷何時春。欲爲商聲歌。恐驚梁上塵。衡門掩仲蔚。庶用存吾真。飽食無一事。一日復一夕。倚門望圓穹。白雲在空碧。來鴻與去燕。歲晚各有適。萋萋黃金花。粲粲好顏色。

采擷貴及時。霜露已盈積。掩門還獨坐。浩然懷往昔。惟有故鄉夢。可以慰岑寂。

雨息殘暑退。涼氣何淒而。鞿人倦遙夜。明月光在帷。展轉不成寐。披衣步前扉。春芳不再穠。夕露空華滋。泯默對青燈。悵焉心自思。

薄雲散高風。天色青如染。盈庭露輝輝。當窗星簇簇。寒來愛蘭釭。暑往卻筠簟。憂思浩無際。起坐數更點。晦明相代謝。避盈乃無歎。未嘗陟孟門。誰識行路險。賈害豈無因。戒之在懷琰。冥豫何可長。用之以自檢。

誠意伯文集卷之十四

七言古詩

爲祝彥中題山水圖

高軒玲瓏不受暑，半幅輕綃宿烟雨。白屋素壁生空明，似聞水聲繞庭宇。松髯拂天藤蔓垂，枯根瘦石相因依。寒濤不驚虎兕臥，嵐翠欲與蛟虬飛。空江悠悠一漁艇，渚白沙明萬魚靜。武陵桃花何處尋，落日微風片帆影。

徐資深華山圖

華嶽插天七千丈，丹崖翠壁開仙掌。壁間壁出黃河流，大禹以之分九州。河流袞袞赴溟漲，華岳拔出天河上。雲宮霧窟疑本無，石室金臺儼相向。玉泉高通玉井津，中有蓮實如車輪。世人肉食未羽化，可望不得聊相親。高堂晚晴圖畫展，眼明一見心自遠。世間塵土今紛紛，吾當拂衣臥山雲。

永康胡元鼎白雲樓

少年辭家往京國，蓬根一斷無消息。有時長想白雲飛，江海茫茫淚霑臆。歸來拜母悲且喜，悔作他鄉遠遊子。卻起高樓對白雲，綵服翩翩足甘旨。昔時望雲煎百慮，今日看雲美無度。卻憶天涯望雲日，平生心事從此畢。

贈醫士黃元之

先生軒轅之子孫。手提萬物生死根。神功微妙不可狀。能使元氣回遊魂。篋中永芽抽粟粒。丹光照耀三彭泣。銜珠不受脩蛇報。采藥常令白猿拾。結廬幾歲吳山阿。赤松玄俗時相過。更向蓬萊下神水。併與人世清煩痾。

中峯永先和尚醉墨圖

老先行腳遍天下。五湖七澤胸中吞。淋漓醉墨落人世。恍惚日擊瀟湘存。蒼梧飛龍去不還。洞庭赤沙流水渾。九疑竹枝餘淚痕。澗蘭沅芷化蕭艾。古木雨炫寒烟昏。雲帆縹緲向何處。波浪瀕洞驕魚龍。我生胡爲羈旅間。感時覩物生愁怨。還君此畫歌一曲。悲風慘淡來崑崙。

夜聽張道士彈琴 道士字君度

白澗含光月照席。梅花入簷珠的皪。蕊宮道士彈七弦。明星在樹霜滿天。鏘如暗泉發幽竇。悄若空山叫哀猿。霧雨寒吹松柏響。波濤怒激蛟龍鬪。神奔鬼恠人杳冥。鸞孤鶴寡風冷冷。湘娥宵攀竹枝泣。紫鳳曉啄梧桐鳴。悽悽欲斷還復續。啼鶯一聲春草綠。若然清商行素秋。落葉灑地蟲啾啾。擁衾聽之消百慮。夢逐行雲自來去。九疑連天洞庭遠。海關煙深不知處。蕊宮道士聽我語。世無子期誰識女。桑間濮上方施行。白雪陽春棄如土。

辛卯仲冬雨中作二首

江城積陰愁玄冬。千家萬家雲水中。烏啼黃昏鴈叫夜。鼓角慘澹愁悲風。青燈無光掩關坐。飢鼠相嚼啼

過我讀罷殘書有所思。凍雨霏霏淚交墮。
歲暮矣。風蕭蕭。木葉脫落。惟空條。雲濃雨細。白日短。慘慘不辨昏與朝。雨中行人足斛觥。去與公家製
戎服。中原豺虎正橫戈。天寒風急奈爾何。

悲杭城

觀音渡頭天狗落。北關門外塵沙惡。健兒披髮走如風。女哭男啼撼城郭。憶昔江南十五州。錢塘富庶稱
第一。高門畫戟擁雄藩。豔舞清歌樂終日。割膽進酒皆俊郎。呵叱閩人氣驕逸。一朝奔逆各西東。玉帛金
杯散蓬華。清都太微天聽高。虎略龍韜絨石室。長夜風吹血腥入。吳山浙河慘蕭瑟。城上陣雲凝不飛。獨
客無聲淚交溢。

夏夜台州城中作

江上火雲蒸熱風。欲雨不雨天萋萋。良田半作鵝兆坵。秔稻日夕成蒿蓬。去年海賊殺元帥。黎民星散劫
火紅。耕牛剝皮作戰具。鋤犁化盡刀劍鋒。農夫有田不得種。白日慘淡衡茅空。將軍虎毛深玉帳。野哭不
入轅門中。健兒鬪死烏自食。何人幕下矜奇功。今年大軍蕩淮甸。分命上宰壓元戎。舞干再見有苗格。山
川鬼神當效忠。胡爲旱魃還肆虐。坐令毒沴傷和冲。傳聞逆黨尙攻剽。所過丘壠皆成童。關司恐畏破和
議。斥堠悉罷雲邊烽。殺降共說有大禁。無人更敢彎弧弓。山中悲啼海中笑。蜃氣繞日生長虹。古時東海
辟孝婦。草木枯瘁連三冬。六月降霜良有以。天公未必長瘖聵。只今幅員廣無外。東至日出西太蒙。一民
一物吾肺腑。仁者自是哀鰥恫。養梟殞鳳天所厭。誰能抗疏回宸衷。夜涼木末掛河漢。海嶠月出光玲瓏。

仰視皇天轉北斗。嗚呼愁歎何時終。

老病歎

我身衰朽百病加。年未六十眼已花。筋牽肉顫骨髓竭。膚腠剝錯瘡與癩。人皆愛我饋我藥。暫止信宿還萌芽。肺肝上氣若潮湧。舊癘再發猶淋沙。有眼不視非我目。有齒不齧非我牙。三黃苦心徒自療。五毒澆胃空矛戈。因思造物生我日。脩短已定無舛差。瑠瓊不能使之少。盧秦焉能使之加。攻屎鹽朽各有分。鳧悲鶴悼何繆耶。不如閉戶謝客去。有酒且飲辭諠譁。

題松下道士攜琴圖

道士抱琴松下行。松風入耳清涼生。石梁苔滑不可上。潭水泠泠學琴響。琴有意兮水無心。水中有龍能聽琴。琴聲淒斷水流咽。月滿空山落松雪。

錢王箭頭篇

鳴夷遺魂拗餘怒。欲取吳山入江去。雷霆劈地水羣飛。海門扶胥沒氛霧。英雄一怒天可回。肯使赤子隨鮫鮪。指揮五丁發神弩。鬼物辟易腥風開。三百年來人事改。濤落沙平箭空在。石梁飲羽未足誇。蜀國三犀漫賤給。近聞黃河水亂流。青徐一半悲魚頭。安得壯士斡地軸。爲拯斯民塗炭憂。

次韻和石末公七月十五夜月蝕詩

招搖指坤月望日。大月如盤海中出。不知妖怪從何來。恟恍初驚天眼眊。兒童走報開戶看。城角啾鳴聲未卒。蟾逃兔遁漠無蹤。壁隕珠沉一何疾。丈夫愕視隘街巷。婦女喧呼動圭筆。輝輝稍辨河漢沫。耿耿漸

明荒冢。潦百官。袍笏羣吏超。伐鼓撞鉦仍設鞀。赤水難令罔象求。澠池莫效相如叱。并簷變閣到空曠。瑤
掩氛。侵殊靡畢。廣寒桂樹劫火燼。借問嫦娥有何術。今年下土困炎沴。草木焦枯野蕭瑟。萍號喝死龍甲
焮。赤標當衢掛萍實。光芒照灼玄武爛。誰復瑣瑣憐蚌鵲。今夜慙作最差異。天道幽微孰能詰。太陰配日
宰臣象。無乃常刑多縱軼。近來營壘徧宇內。羽林慘澹空鐵鎖。荒郊廢市何所見。夔罔蛟蛇兼蚤蠹。此皆
在地不在天。未若蝦蟆狡而獠。黃文結鄰上訴帝。賜以小戎驂牡隲。剖墓洗魄還月光。再起咎繇明典秩。
返蟾歸兔復織阿。萬古游塵避清蹕。

再用前韻

虞淵豁豁納歸日。金樞吐月相承出。初離積水看若飛。稍映微雲盼猶眖。是時虜收肇視政。沙雞振羽鳴
蝟卒。姮娥靚粧覲玉帝。坎軻中途嬰禍疾。旅人苦熱愛清涼。快觀光輝滿蓬華。願開寶鑑照覆盆。豈擬瘴
塵昏點漆。隋珠慙固重革櫃。和璧嗟蒙韎韞鞞。吳罌樹折不自謀。織阿馬弱無人叱。三足蟾驚入坎窞。八
竅兔走罹置畢。圍灰破暈謾傳方。屑玉補凹空著術。雷公駭懼罷靈鼓。湘女幽憂舍鳴瑟。故老謂是蝦蟇
精。潛伏姦妖營口實。羲和尸位罔聞知。可以人而不如鷗。往歲威弧弛其殼。蛇豕陸梁誰復詰。高牙大纛
擁藩垣。腸斷吞聲受陵軼。江淮洶湧湖浙沸。骸骨成山連鬼鎖。萬姓喁喁釜裏魚。百官蠢蠢禪中蟲。黃茅
白葦棄賢良。赤綬玄裳寵獐獍。吳穹示變盍警畏。惟德動天天有隲。況今旱魃又爲厲。東作西成不平秩。
安得絨辭伏閭闔。聖主如聞應駐蹕。

聽蛙

繞舍荒池底。且鮒蟄蛙齊。候鳴鳴雷社。已知地氣上如炊。更覺石泉流若瀉。舉頭玉燭煥陽明。跼足汙泥悲
士苴。半夜條風入綺牕。清晨細雨霏簷瓦。梁間紫燕舞參差。枝上黃鸝語悲姪。播形肖貌均有生。感氣傷
情孰瘖瘖。初聆衙衙雜更鼓。漸聽嘈嘈成侈多。猶持擊白較同異。似坐狙丘談稷下。村童叫噪髯學究。悍
婦勃礫喧姊姐。西域胡僧彈般若。齊東老生矜炙輅。逸帆觸岸靡兼葭。醉客罵筵投蓋帶。叻咬誰辨驪兒
哇。虢秦乍開寶叟囁。怒牙嚼鬻怪羅吞。寤言詰屈驚宜樹。徒夸楚使能言齊。未讓秦坐上。詛羊兜離僭侏
紛觀縷。帝樂虛張洞庭野。虞夔奚暇調笙聲。周韓曷由分鄭雅。旅人懷憂實無寐。遭此強聒胡爲者。得非
作姦謀蝕月。無柰聚訟騰譴設。昔聞周公立典教。蚘氏專司鞠灰灑。常疑聖人茂育物。獨向微蟲少寬假。
乃今知其非瑣屑。欲問官司乞餘地。鳳皇鸞鶯聲苦希。白雪陽春和偏寡。蚊蠅蚤蝨多於沙。鑽啞暗鳴紛
醜醜。蝦蟇幸不含毒螫。何苦嘷號爭跼跼。烏鳶逐響蛇聽音。寧顧入腹生癢癢。賦詩卻笑柳州。忍使腥
臊辱殞鮮。

贈道士蔣玉壺長歌

先生清如玉壺冰。神閑志一精粹凝。玄黃健順六子承。和氣塊圮籠穢澄。冲虛澹澹廓以弘。冥茫沕穆情
無能。火鳥入海陰液升。鴉蛇受約不敢騰。束縛龍虎如寒蠅。虛無黃帝所憑。四方上下齊鉤繩。北幽羅
艷對朱陵。女夷鼓歌王母應。瓊宮夜半張華燈。金葩碧葉紅氍毹。素霞鬱滃玄雲烝。沆瀣厭浥淪泉興。牽
牛織女來相仍。用之不滅亦不增。地官錫福天官徵。老蚌逆殼驪珠升。太一象輿驂八鵬。翼以六蜺前五
騰。風輪蕭蕭生夏凌。參旗九旂葭緄滕。二八青蛾美日鑿。翠蕤交翟翔腰撥。尉車九九如連繩。最後雷輶

子所乘。流蘇勃窣垂。鏤膺。編爛駁馬。駟駱駘。躡霞踏霧。碎綺綾。天津閣道。轡鞢較。歸來瑤臺十二層。月光照耀。玻瓈棚。下視瀛海波濤。龍宮蜃窟。寒兢兢。歸塘鳴谷。清可憑。鱗甲鏡瑩。鱗與鯨。湘妃鼓瑟。冰絲絙。捲金憂玉。萬穴灑。琅玕風吹。殷峻嶒。琉璃雲母。龜貝朋。琳房壁甃。階陞素鸞。振迅霜女。扔璇題。瑣臚蕭蕭。菌洞晃。曠明眩。遙瞪瘁。肌乞髓。魂欲殞。忽然浮空。墮杏蒂。鸞馳電耀。羽脫肱。天衢阻。遐世網。昏昏日月。皎炎蒸。句曲之山。峯硯礧。楓杉檜柏。櫨桂杓。蘅蘭杜若。薰苒琴。緣岡被嶺。羃羃騰。大地浪井。瀑練湍。湍瀨繡。繪芙蓉。淺。龍虬蚪。千年藤。纏絡。薜荔。鬚鬢。敷芳發。馥菲芬。其猶獼。獼。鷓鴣。蒼鷹。攀援。欵。去巖。嶽。崩。寒。蟹。蟪。蛄。蟻。犯。蠶。鼠。餐。爲。飲。噴。岷。恒。先生。皮冠。衣絳。繒。桃。枝。七尺。穿。臄。三。茅。真。君。共。嗟。稱。星。根。絕。頂。時。同。登。黃。斑。黑。虎。陟。降。凭。石。罅。甘。漿。溢。若。澗。神。芝。吐。燄。如。貧。簋。食。時。動。機。保。不。薨。驅。斥。踞。瓊。除。瘴。癘。辟。光。照。座。生。紫。稜。舉。觴。引。滿。鯨。喉。漿。解。后。見。之。喜。莫。勝。揚。眉。抵。掌。開。蒙。顛。人。生。嘉。會。安。得。恆。靖。恭。正。直。天。所。杓。作詩持贈匪妄詭。

古歌三首

紅葵高花高以妍。清晨方開夕就焉。美人迢迢隔山水。可望不見心茫然。花開花落日復夜。惟覺新年非故年。人生百歲花一度。何不作樂令人憐。舊花欲落新花好。新人少年舊人老。佳人見此心相憐。舉觴勸我學神仙。我聞神仙亦有死。但我與子不見耳。祇言老彭壽最多。八百歲後還如何。雙燕雙飛入我堂。銜泥養雛何太忙。養得雛成卻飛去。雙燕雙飛復如故。東園桃李春萋萋。日華烘露生。

紫雲一朝實熟付人採。葉枯枝折空成蹊。

道士周玄初鶴林行

鶴林道士軒輳徒。以鷗爲輪雷爲輿。開山養鶴作騏驎。上下二儀周六虛。雖成洗髓扶桑窟。縞練羽毛鏐鐵骨。聲飄碧落玉清揚。影拂太微雲滅沒。永夜月明風滿林。竹柏戛擊笙簫音。云是旌陽許縣令。躡蹻佩劍來相尋。靡萍西枝搖倒景。借去林間兩丹頂。伐蛟北海奠玄冥。斬蜃南訛封浪井。上窮列缺旁九闔。卻過度湖山中歸。歸來贈我桃樹枝。朱衣赤郭手持持。令我鞭龍扶虓虎。攝縛臊麋如奴虜。授我堯時松子訣。轉晴出電嘯成雨。鍾山秀色連冶城。百花繞屋風泠泠。焚香獨坐誦真誥。墜露點滴流華星。士伯駿奔從號令。鶴鳴聞天空谷應。寥陽寶殿歌步虛。河漢當窗回斗柄。嗟子衰朽雜病攻。盈顛素髮吹秋蓬。空餘硬骨如瘦鶴。因子致意浮丘公。

送李叔允脩撰致仕歸鉤州

憶昔西京祖二疎。都門世帳羅長衢。金張許史集軒蓋。彈琴鼓瑟吹笙竽。頽顏鶴髮映霄漢。蒼松翠柏紅珊瑚。道傍觀者皆慨歎。此士足爲天下模。先生胸蟠五車書。雍容進退安且徐。披香朝侍紫宸案。珥筆畫入承明廡。引經論奏動天聽。天語親授非臚句。老年謝事歸里閭。召見特許兒童扶。臨軒賜膳侑金幣。尙食供奉黃門趨。夜來微雨清郊墟。細黃瀉柳鷺相呼。風吹暖烟逗白日。露濕芳草留驪駒。雖無旨酒嘉薇蔬。短歌一曲聊踟蹰。浮雲流水無根蒂。人生何者爲驢虜。嵩高少室衆美奧。素石如玉泉如酥。時清四野樂耕稼。雉鳴麥秀千華敷。親朋會合各慰意。況有令子知勞劬。揮金買酒泳聖澤。怡情之外吾何須。西飛

鴻鴈東飛魚相思。迢迢天一隅。贈言有盡意不盡。努力善保千金軀。

松葉酒歌寄梁安宅

道人贈我松葉酒。味似瓊漿色瓊玖。嚙之骨爽神魂清。令我壽同金石久。我生踈懶無所能。瘦皮黏骨危。峻嶒病來啖藥猶啖水。夢寐恍惚風中燈。常聞徂徠有嘉木。玄醴滌濯黃露沐。上有兔絲揚翠旂。下有茯苓蹲白鹿。咀華嚼葉燕以津。歲久定化腸爲筋。便從僂佺覲黃帝。身騎肉角青騏驎。我欲求之百憂集。滿眼蚊蠅隨出入。跋鳥箭逝纖阿急。日暮空瞻鄧林泣。道人此酒還有方。我欲與子同徜徉。世上神仙亦何限。留俟辟穀應未晚。

枯樹圖

道傍古樹半身枯。白蟻穴根蟲穴膚。風摧雨撼霜雪凍。斷石巖脆無人扶。憶昔勾芒肇初政。百卉騰達隨呵噓。新柯作葍舊柯壯。霧露膏沐光如濡。黃鸝翡翠語嬌滑。乘扈戴勝鳴相呼。白鶴來巢鹿止蔭。匠石愕睨爭歎譽。寧知憂患生且夕。野火倏忽起不虞。燎原烈焰難嚮邇。孰問柞櫟杉與櫛。枝燔葉燼根半赤。朽腐槩液非時須。山林搖落歲方晏。聊以薜荔爲衣袵。嗚呼廣厦棟梁具。委棄草莽同新芻。皇天未必替生意。更盼玉燭回陽烏。

正月十五夜燈花大開作

燈花如瑩紅且綠。燈花有意憐幽獨。夜寒衾冷漏聲遲。臥看瓊枝綻金粟。涼蟾入戶四壁空。地爐宿火天無風。祥煙抱日麗碧落。驪龍吐珠歛紫虹。人言此花專報喜。勞生知髮絲垂耳。无望之福非所希。無事惱

懷吾足矣。呼童添油引良夜。九衢燈月光相射。漫沾濁酒餉離魂。豈必忘憂惟樹萱。

爲韓克銘題畫石鼎聯句圖

軒轅道士軒轅孫。昔隨飛龍陟崑崙。乘騎六氣遨乾坤。上窮混沌無涯門。下抉若木扶桑根。旋雷舞電訛
晨昏。批蹴虎豹號帝閭。搥擊河鼓牛騰鴛。攜虹織輝絢澤原。三足老烏不敢瞰。迷離缺免駭且奔。羲和籲
號訴至尊。謫降下土營丘樊。結喉長頸古貌存。如鶴如鵠如龍蜿。詰屈不作人間言。涕唾落地生蘭蓀。驅
叱碣石歸河源。蜚廉屏翳雙挾轡。警振象齒怒育賁。山玄水蒼琮璫璫。離羅璀璨錯輝燦。笙鏞琴瑟篪與
壎。五音翁繹珠瀉盆。吹爲栗烈呵爲暄。扑扶罔象答崑崙。饑鱗辟易徒厥屯。束縛豢魑魍魎魂。乘昇亦郭
充朝殮。妙用歛忽無留痕。嗟哉二子爾曷寃。如井谷鮒當化鯤。嚶嚶草蟲呼阜攀。欲與螻蛄語涼溫。不知
風霆掣懸藩。江騰海躍喬嶽翻。鬼物喘汗相濡歎。爽靈漂搖失所蹲。傲芻夢寐精魄昏。低頭拜代襲再論。
陽春二月花滿園。掩關獨坐辭諄諄。按圖索意聊滌煩。羨君軒轅之後昆。浩歌一曲期勿諼。

寄贈懷渭上人

老僧懷渭字清遠。胸蟠文史三千卷。雪晴太白玉爲峰。月出藍田金作嶽。少年挾策走四方。要看蓬萊水
清淺。燕山帝京龍象會。瑤臺寶林發關鍵。橫空鷗鷺撇高秋。縱轡騅騶逸長坂。龐眉老宿皆震驚。觀者解
頤陪者赧。奎章學士虞邵菴。暗惜稱誇枯舌本。連床笑語到晨雞。走筆贈言何款悞。轉頭霜雨四十年。萬
事茫茫不堪村。江湖簸浪客舟寒。地爐宿火僧房煖。我來邂逅一見之。憶曾相識嗟成誤。世士如公良所
希。方外只今還有限。我如野馬貫藪澤。絡以羈鞵知必晚。老來耗老百事違。况俾三盧宅愁眼。甚欲歸依

白蓮宇。其素餐非力墾。寄言聊復寫中懷。白石清泉猶未晚。

金碧山水圖

武陵桃源今有無。展畫渾如夢中見。青螺作山綃作雲。白日蒼茫暖芳甸。雄梁跨壑矯脩虹。走瀑懸崖激飛電。紫鳳霄鳴梧樹枝。青雛曉啄桃花片。鳥啼長是豔陽時。草色寧隨霜雪變。衣冠尙存周典則。租稅不輸秦郡縣。山中肉芝美堪食。澗底石泉清可嚙。安得此地結茅屋。寄書漫託雙飛燕。

雪晴偶興因以成篇

玄雲四垂天黯黮。大野蒼茫飛雪糝。北風刮面利如刀。海氣昏昏迷遠覽。若華東光封密霧。比屋無烟色悽慘。天姥沈陰禹穴閉。扶胥海濤渾不撼。愁埋朱鳳入杳冥。凍縮赤蛟深坎罅。猿狖哀號咽巖谷。鴻鴈驚啼亂葭葦。壯士金戈鏖鏗凌。將軍玉帳旌旗豔。師徒百萬盡熊羆。幕下從官皆燕頤。馬蹄蹴蹋坤軸震。夜半入蔡何人敢。蒼山野客拙且懶。旅舍蕭條坐無毯。頑童汲井十指直。稚子敲冰兩髻髮。今朝出日照梁棟。樓外遠山皆菌萑。初驚急溜瀉源泉。漸看縣澗掛旒旒。那無美酒洗胸臆。容有新詩吐肝膽。先人敝廬松柏在。牆角早梅應可擊。蝮蛇張鱗虎掉尾。平地倏忽成窟壑。藩閩官曹厚祿食。忍以黔黎爲醢醢。天民日望天愛憐。破瓦頽垣最悲憫。農家齊仰二麥成。且喜土膏滋九坎。清晨樹上啼布穀。柳下碧波漪澹澹。安得扁舟泛五湖。莫使中心攢百感。

題羣龍圖

世間萬類皆可觀。茫昧獨有鬼與龍。此圖畫龍二十四。狀貌詭譎各不同。得非物產有異種。或曰神變無

常蹤一龍搵尾欲上木。足爪猶在齋法中。一龍出穴飲澗底。頭上飛瀑瀉白虹。前有一龍已在雲。顧視厥子揚雙瞳。浪波魚鱗香饀籩。日車塊瓦天無風。中庭兩龍忽相逢。須眉能髣如老翁。使欲角觝爭雌雄。西望積石接崆峒。白龍壁石窺流澗。河伯遠遁虛其宮。屈蟠睡者何龍鍾。老物用充時當終。峽外六龍擗以兇。矜牙舞爪起戰攻。蛟鱗嚼甲含劍鋒。陷胸折尾波血紅。之死弗悟人誰恫。一龍引肱將欲從。迴環睚眦未敢通。最後一龍藏於堦。睥睨勝敗非愚蒙。無乃有意收全功。雲中美珠勞爾躬。不如臥沙之從容。龍子學飛力未充。母在下視心憧憧。何物一角額準降。鯨然出洞若蛇蟲。有龍接之自龍從。恐是羣穴王鮪公。皮骨始蛻形猶蒙。兩龍歸來倦不狎。癡龍攀石身已癩。蝸蚪假塞斂騰衝。蜚螻攪躍鬢髮茸。哇呀奔拏曲如弓。百熊並作何紛靡。是耶非耶孰能窮。畫師昔有僧繇工。能令真龍下虛空。安得伶倫截竹筒。吹之呼龍出石罅。使我一見開昏聩。

爲丘彥良題牧谿和尚千鴈圖

往時惠崇畫鴈對之如在江湖游。只今此圖又精妙。中有千里瀟湘秋。乃知浮屠性多巧。意匠不與凡夫儔。吳松江長具區闊。天日虎丘青一髮。西風九月秔稻黃。朔鴈飛來翼相戛。農夫苦飢鴈獨飽。此意畫師應識察。近者分明辨羽毛。遠者縹緲瞻秋毫。或乘飄風入烟霄。或翳落日沉陸濠。起如武侯布八陣。集如萬舞回旌旄。眠沙臥草鳴且翔。喋喋藻荇亂蓬蒿。禾空穗盡卻歸去。紫塞漠漠春雲高。我家南山山限蒼。嶺鴈飛不到川路。水深林大谷蛇豕。盛愁向他鄉撫虛景。人言鴻鴈比弟兄。我有兄弟隔兩城。題詩卷盡謝客去。無使感愴傷中情。

雨中寄用章上人

月盈復魄已過五。不見白日長見雨。美人娟娟隔巷陌。會面不得徒延佇。若邪當門泉湧礎。仲蔚蓬蒿塞環堵。陰風向人作秋氣。芳草日夕成宿莽。玄圭上天禹穴閉。倉水使者今何許。玉京羣仙翳煙霧。弱水西流隔玄圃。女夷鼓歌不自覺。朱鳳翅濕那能舉。自從干戈起淮甸。天下無處無豺虎。微斂頻煩轉輸急。更有何鄉爲樂土。鬻桑餓人誰復數。思家遠客懷楚。半生身世付浮雲。獨立看雲百髮聚。晚來天南橫絳虹。雨勢未已愁雷公。井蛙谷鮒俱得意。汜濫潢潦登穹隆。方外文章誰最好。後有嬾公前笑老。裁詩忽漫寄中情。萬事茫茫聽蒼昊。

玉澗和尚西湖圖

大江之南風景殊。杭州西湖天下無。浮光吐景十里外。疊嶂湧出青芙蕖。百年王氣散荆棘。惟有歌舞留歡娛。重樓峻閣競鉛黛。媚柳嬌花使人愛。老僧不善兒女情。故作物豪見真態。想其泚筆欲畫時。高視盡工如小兒。千巖萬壑吾意匠。夸娥巨靈吾指麾。卻憶往年秋雨夕。畫舫衝烟度空碧。蒼茫不辨雲與山。但覺微風響蘆荻。須臾冷月迸深霧。時見松杉半昏黑。開尊命客彈焦桐。扣舷大喚驚海童。鮫人唱歌魚鼈應。水底影動雙高峯。只今倏忽成老翁。可憐此樂難再逢。愁來看畫欲自適。誰知感生愁轉劇。

顧周道山水圖

憶昔晉時顧虎頭。能畫聲名塞穹昊。千載而下繼者誰。君之耳孫字周道。江南山連滄海島。水遠山長愁絕倒。興來走筆如有神。濃抹淡粧無不好。前峯倚天自太古。知是天姥烟開浪波搖。浦溆草滿江

洲樹如羽。山迴兩岸夾幽谷。小橋俯暎菰蒲綠。扁舟何處覓鱸魚。滄浪水寒空濯足。柳邊碧石明素沙。茅廬似是陶公家。衡門晝掩雞犬寂。誰人共采黃金花。我屋雙溪松柏裏。清泉皎潔無泥滓。鳳皇不來鷹隼逝。白日鷓鴣啼桑梓。華表柱頭丁令威。風塵瀕洞何當歸。感時對景重回首。不知人民今是非。

題富好禮所畜村樂圖

我昔住在南山頭。連山下帶清溪幽。山巔出泉宜種稻。繞屋盡是良田疇。家家種田恥商販。有足懶踏縣與州。西風八月淋潦盡。稻穗櫛比無蝗蝻。黃雞長大白鴨重。瓦甃琥珀香新筠。芋魁如拳栗殼赤。獻罷地主還相酬。東鄰西舍迭賓主。老幼合坐意綢繆。山野葉插巾帽。竹筴漆椀兼瓷甌。酒酣大笑雜語話。跪拜交錯禮數稠。或起頓足舞侏儒。或坐拍手歌甌篋。傾盆倒榼混醅醬。爛熳沾漬方未休。兒童跳躍助諠譟。執遁逐走同俘囚。出門不記舍前路。顛倒扶掖迷去留。朝陽照屋且熟睡。官府亦簡少所求。寧知宴安舍酖毒。耒耜一變成戈矛。高門大宅化灰燼。蓬蒿瓦礫塞道周。春燕營巢在林木。深山露宿隨猿猴。三年避亂客異縣。側身天地如浮漚。親朋阻隔童僕散。疏食水飲不自謀。有時恹恍夢閭里。驚覺五內攢百憂。君家畫圖稱絕妙。鑒別曾遇柯丹丘。想應臨榻出秘府。筆意精到世罕儔。村歌社舞自真率。何用廣樂張公侯。太平氣象忽在眼。令我感愴涕淚流。近者鄉人來報喜。今歲高下俱有秋。豺狼食飽臥窟穴。軍師已運招安籌。人情自古共懷土。況乃霜雨淒松楸。神龜且被豫且困。予所弗念天我尤。積薪厝火非遠計。誰能獻納陳嘉猷。長江波浪接淮泗。白日慘澹騰蛟虬。天下農夫總供給。隴畝不得安鋤耰。市中食物貴百倍。一豕之價過於牛。魚鹽菜菓悉賣米。官幣束閣若贅瘤。朝餐僅了愁夕膳。誰復有酒澆其喉。循環天運

往必復。邪氣整。至不遠。瘳。此生此景須再覩。引領悵望心悠悠。

題湘湖圖

君山洞庭隔江水。彭蠡無風波浪起。明窗曉晴圖畫開。興入湘湖三百里。湘江兩岸山縱橫。湘湖碧繞越王城。越王城荒陵谷在。古樹落日長煙平。游子天寒孤棹遠。七十二谿飛雪滿。浩歌不見濯纓人。沙鶴野猿相對晚。湖東雲氣通蓬萊。我欲從之歸去來。蛟龍寒川陸有虎。兩臂無翼令心哀。

爲啓初門和尚題山水圖

天下名山隨處有。畫圖流傳亦良久。祇園道人展橫幅。觀者稱誇同一口。蒼梧九疑高插天。卷而懷之不足手。巨靈驚呼盤古怒。地軸塊瓦昆命剖。太陽出海開杳冥。蟠家岷峨大如斗。華軒無人清書閑。恍然置我匡廬間。金輪迥出牛女上。遠近羅列千雲鬢。江花野竹青錦斑。嵌巖斷石蛟龍顏。岡盤谷轉絕徑路。但見湖水迴瓊環。白沙洲暖春風起。南船掛帆北船艤。吳波不盡芳草外。楚岫半入長烟裏。夜深小龍行雨歸。宮亭月落彭郎磯。旌陽步虛盧老和雜佩。散作虹蜺飛百年。塵世真夢寐。回首旌旗寒天地。舊游何處成渺茫。一曲狂歌數行淚。青丘弱水迷方壺。武陵桃源今有無。瑤臺三島消息斷。安得羽翼啼清都。

題趙學士松圖 白塔

趙公拈筆作古松。平地躍出三青龍。蜿蜒不上霄漢去。爽颯長留烟雨濃。前朝美人鬪草處。猶有當時數株樹。江亭六月涼如秋。應與此圖相對愁。

題李陵見蘇武圖

中原無書。羝不乳。狐裘蒙茸。奈何許。老身漢節。死生俱。地角天涯。見明主。金鞍駿馬。空故人。相看一笑。增悲幸。悲來風沙。吹上馬。河水東流。日西下。空一作奇

雪鶴篇贈詹同文

有鶴有鶴。丁令威。碧玉爲骨。玄霜衣。層城十二。身所依。千年伐毛。一度歸。洗髓織女。黃姑磯。瑤臺雪花。大十圍。食之神爽。肉不肥。乘風振羽。芳菲非。丹砂結頂。燁有輝。咳唾璀璨。生珠璣。朝遊明星。夕大隗。騰光蹕景。超巍巍。滕六驂。乘虹蜺。駢蓋宮。仙娥頊。帝妃。鎔雲鍊雨。成瓊葦。眩晃書。奪扶桑。輝離眸。閃爍不可。回森攢。櫛翼。縞旂。白虎。殼棘。良厥。腓鸞。鷄鳥。鴻鶉。鵠帶。鸞鸞。鸛鷺。與鶴。局促。縮胸。潛嶸。崎。惟有。借鶴。從之。飛。竦。翻。夜。過。東。皇。纒。玲瓏。琪樹。戛。金。徽。書。然。長。鳴。驚。海。圻。海波。噴。作。煙。霧。霏。馬。銜。凶。象。蹲。若。鞭。鯤。鯨。天。矯。和。噓。唏。銀。河。腹。堅。膠。蜃。豨。王。母。桃。花。凍。不。緋。五。色。石。裂。女。媯。臆。祝。融。上。訴。開。九。扉。帝。命。養。之。青。鎖。闌。賜。以。沆。瀣。憐。其。饑。朝。朝。暮。暮。朝。太。微。翅。翎。披。拂。天。香。穠。北。斗。粲。爛。星。依。稀。翠。椀。抱。日。露。未。晞。圓。肌。脩。趾。逸。且。頎。踏。踏。踏。舞。雀。以。揮。散。仙。引。領。空。相。希。嗟。哉。清。峻。天。下。稀。勿。歎。遼。東。城。郭。非。桂。華。宵。淫。甘。露。澆。味。美。遠。勝。商。山。薇。擷。英。爲。羞。堪。咀。噉。比。之。琅。玕。亦。庶。幾。盤。空。硬。語。去。脂。韋。歌。以。贈。君。君。莫。譏。

贈杜安道

憶昔天兵伐荆楚。舳艫蔽江齊萬楹。謹聲激烈似雷霆。猛氣焦然震貔虎。拔柵皖城猶俯拾。探穴九江無險阻。明年大戰康郎下。日月塊圮相吞吐。馮夷蹋浪羣水飛。巨鼉掉首三山舞。雲隨太乙擁鋒旗。崑崙爲豐隆。作靈鼓。將軍金甲箭攢蝟。戰士鐵衣汗流雨。火龍燻燄絳天衢。燧象懸煙煎地府。鯨鯢既翦。機槍落草。

木熙陽魚出谷。當時從臣皆俊良。近侍共推徐與杜。或操陳子之刀鏹。或負伊公之鼎俎。艱難出入矢石下。鞠躬盡力無摧阻。夙興夜寐事一人。小心不忒帝臨女。只今四海同車軌。葑菲罔遺遵往古。瓊裾赤芾。躋鵷行。鞍馬祿食光門戶。天雞一聲金闕啓。龍顏有喜常先覩。顧我愚疎憂患集。病骨峻嶒蒸溽暑。興來懷舊倚長歌。星星兩鬢絲千縷。

誠意伯文集卷之十五

五言律詩

旱天多雨意五首呈石末公

旱天多雨意。雲日氣恆陰。草木焦枯盡。蛟龍伏匿深。
移家愁地蹙。經國恨年侵。已矣商巖叟。無人解作霖。
旱天多雨意。炎夏已清秋。虛牝空蒸鬱。高圓迥獨浮。
下田應脯蚌。深樹且鳴鳩。向夕星河影。稀踈恰近樓。
旱天多雨意。散漫起重陰。漸變峯巒狀。還攜錦繡文。
龍應愁病渴。鳥亦念將焚。碧落高無極。人間叫不聞。
旱天多雨意。炎燎發洪爐。事急徒號梗。謀窮漫曝巫。
干征愆節制。民望失來蘇。原籍看如赭。哀今鹵掠無。
旱天多雨意。雲起旋隨風。澤氣沉沙白。山嵐過野紅。
乾坤愁夢裏。日月戰塵中。漫說生生理。如何亦有窮。

次韻和石末公旱天多雨意五首

旱天多雨意。雲合又還晴。苦熱連三伏。微涼入五更。
青山黃葉遍。白水紫煙生。旦夕霞標起。依稀對赤城。
旱天多雨意。霞起衆山光。日月躡陽道。雷霆伏大荒。
躍淵無黑蜃。在牧有夷羊。萬室俱如燬。何人尙閔厓。
旱天多雨意。一望百憂侵。海沸羲和日。山藏傅說霖。
南河那可決。北斗不能斟。歎息還搔首。清商已滿林。
旱天多雨意。悽惻望鉤陳。哀籲何時達。愁眉盡日顰。
乾坤三島浪。歲月兩淮塵。莫問和調事。嗚呼賦畝人。
旱天多雨意。陰電繞空湫。暴客馮高壘。良農死瘠丘。
干戈猶未息。災沴復何尤。軫望成衰疾。那堪數倚樓。

憂懷

傷離驚歲晏。引望起愁端。落日煙中小。孤雲雪外寒。浮生無限恨。垂老異鄉看。掩淚觀梅蕊。中心分外酸。

感歎

聞說蘇州破。倉皇問故人。死生俱可悼。吾道一何屯。北去應無路。南藩自此貧。淒涼轉蓬客。淚盡浙江濱。

題鑑湖送別圖

曲岸扁舟艤。澄湖祖帳開。雲生秦帝碣。雨暎越王臺。荷氣清瑤席。波光灑玉盃。情深不忍別。欲去更徘徊。

次韻和王文明雨中雜興四首

積雨累十日。平湖添半篙。風連箕畢動。雲傍斗牛高。水鶴巢林木。池魚上野蒿。農人愁餓學。採擷到溪毛。
白日迷陰陸。濃雲沒大荒。雨深筠箬潤。風度葛衣涼。虎豹歸林濕。魚龍赴壑長。波濤渺清落。悽惻解鳴璫。
濕雲看欲薄。陰氣未全收。日月昏昏見。龜鼈額額浮。虛簷騰疥蠶。壞壁湧蜉蝣。幽獨無人問。含情謾上樓。
青冥不可見。朱夏已無多。雲木光浮沒。川原氣盪磨。荒蕪一將略。浩汗五湖波。去去滄浪水。君聽鼓枻歌。

題太公釣渭圖

璇室翠酣夜。璜溪獨釣時。浮雲看富貴。流水澹鬚眉。偶應非熊兆。尊爲帝者師。軒裳如固有。千載起人思。

稽句嶺

白日隱巖壑。千崕氣勢豪。溪流嫠女闕。山入少微高。危石天欹側。長風谷怒號。干戈方自此。行役敢辭勞。

淳安舟中遇雨遣悶二首

一夜青山雨。平明黃濁喧。亂流翻地軸。高響落雲根。鍛羽投林鳥。啼飢抱樹猿。羈懷正愁絕。感物重銷魂。溪雨細如霧。北風長夏寒。汙池不赴壑。井谷自成湍。蘭茝馨香盡。魚龍世界寬。斜陽在林樹。時復捲篷看。

丙戌歲將赴京師途中送徐明德歸鎮江

疲馬懷空櫪。征衣怯路塵。那堪遠遊子。復送欲歸人。月滿西津夜。花明北固春。論文應有日。話別莫悲辛。過南望時守剛不得行。

發景州

客路三千里。舟行二月餘。壯顏隨日減。衰鬢受風疎。蔓草須句國。浮雲少吳墟。愁心如汶水。蕩漾逐青徐。澹澹夕風作。蕭蕭蘆葉鳴。林間衆鳥息。河上一舟行。海近雲常濕。天虛月更清。神京看漸近。且緩望鄉情。

泛海詠霧

海上苦多霧。北風吹更長。纒交積水氣。已翳太陽光。淺亂洲渚色。深迷鴻鴈行。神姦馮出入。君子慎周防。殺氣

殺氣乾坤黑。陰氛日月黃。已成心曲亂。不復鬢毛蒼。夜哭城笳裏。朝烟野戍傍。扶傾無郭李。何地尙耕桑。

遣興二首

白日下西岑。空庭生夕陰。郊原過雨色。鍾梵隔牆音。有感憂思積。無能老病深。露從河漢落。不覺滿衣襟。月是今宵滿。花從昨夜開。看花嗟寂寞。對月且徘徊。白髮添無數。青春去不回。莫思人隔世。聊樂酒盈盃。

四月十二日發揚州

幾見明月滿。猶嗟行路難。時平恥無用。身賤敢偷安。天地山河闊。風沙道路寒。旅人元有淚。不必雍門彈。
濟州太白樓

小巡迂行客。危樓舍酒星。河分洗水碧。天倚嶧山青。昭代空文藻。斯人竟斷萍。登臨無賀老。誰與共忘形。
送僧家奴參政赴河東宣慰使二首

雲中形勝地。關塞接天長。白草連沙漠。黃河入晉陽。老臣持節鉞。大闢壯金湯。昭代思賢佐。須公在廟堂。
大闢諸藩上。元戎朔漠間。天低馬邑塞。河入鴈門關。落日旌旗靜。高風保障閑。旬宣推碩望。喜色動龍顏。
送人赴德清稅

鏡湖木葉落。震澤水波生。鳧鴈衝人起。笙歌送客行。鹽津魚罟集。桑屋繭絲明。王稅隨時足。吟哦待太平。
題釣雪圖

雪暗洲渚白。江清蒲柳寒。悠揚雙短棹。汗漫一魚竿。忽憶滄浪曲。因悲行路難。蛟鼉正驕恣。還爲爾長歎。
將曉

愁夢不更續。寒天將欲明。雪風吹海樹。霜月凜江城。衰病丹心在。艱虞素髮盈。殷勤東注水。渺渺若爲情。
不寐

不寐月當戶。起行風滿天。山河青靄裏。刁斗白雲邊。避世慙商綺。匡時愧魯連。徘徊懷往事。惻愴感衰年。
秋感

老病偏多感。宵長晝亦長。衣冠方謝暑。枕席已驚涼。往事鏞心在。新知過眼忘。籬邊舊栽菊。歲晚爲誰黃。

秋興

天淨山月出。水寒沙鳥鳴。孤燈秋後思。短笛夜深情。江海空衰鬢。乾坤未弭兵。清都隔河漢。訶禁有開明。

晚思

返照吳山外。歸雲越水頭。寧捐白羽扇。卻著黑貂裘。草暖鳧鷖渚。波香杜若洲。艱難愧生事。汗漫想扁舟。

望孤山作

曉日千山赤。寒烟一鳥青。羈心霜下草。生處水中萍。黃屋迷襄野。蒼梧隔洞庭。空將垂老淚。灑恨到滄溟。

青絲馬

蹀躞青絲馬。艱難赤伏符。窮陰歲欲暮。落日鬼相呼。見鴈愁心裂。看天淚眼枯。殷勤夜深月。還照旅魂孤。

十二月一日

耿耿夜不寐。源源憂思來。歲餘三十日。腸定九千回。江響風初發。天昏月未開。白頭真合得。非是楚猿哀。

古戍

古戍連山火。新城殷地笳。九州猶虎豹。四海未桑麻。天迴雲垂草。江空雪覆沙。野梅燒不盡。時見兩三花。

客路

客路秋風裏。扁舟夕照時。洛鴻魚復陣。江樹井陘旗。衰朽嗟誰與。愚蒙荷帝慈。山中牧羊子。歲暮爾相期。

逢熊文彥二首

相離已隔世。相會豈忘情。識面非觀貌。知心只記名。夕陽荒野闕。秋水大江平。往事無勞問。空令萬感生。

憶昔相逢處。湖山錦繡春。筦絃喧夾巷。花柳隘通津。離別人非故。推移物自新。愁來重回首。涕淚下霑巾。

五言長律

錢唐懷古得吳字

澤國繁華地。前朝舊此都。青山彌百粵。白水入三吳。長嶽銷王氣。坤靈肇帝圖。兩宮千里恨。九子一身孤。設險馮天塹。偷安負海隅。雲霞行殿起。荆棘寢園蕪。幣帛敦和議。弓刀抑武夫。但聞當宁奏。不見立庭呼。鬼蜮昭華袞。忠良賜鬪鏹。何勞問社稷。且自作歡娛。秔稻來吳會。魚鼈出具區。至尊巍北闕。多士樂西湖。鶴首馳文舫。龍鱗舞繡襦。暖波搖壁積。涼月浸艸。紫桂秋風老。紅蓮曉露濡。巨螯擎擁劍。香飯漉雕胡。蝸角乾坤大。鬻頭氣勢殊。秦庭迷指鹿。周室嘆瞻烏。玉馬遠京輦。銅駝擲路衢。含容天地廣。養育羽毛俱。橘柚馳包貢。塗泥賦上腴。斷崖埋越棘。照乘走隋珠。吊古江山在。懷今歲月逾。鯨鯢空渤海。歌詠已唐虞。鷗革愁何極。羊裘釣不迂。征鴻暮南去。回首憶尊鱸。

誠意伯文集卷之十六

七言律詩

寄題昇元觀綠筠軒

帶郭軒楹曠綠筠。八牕瀟灑總宜人。風生密葉蛟龍舞。露下寒梢翡翠勻。不待剪裁調律呂。若爲惆悵憶伶倫。五城雙闕煙塵隔。且傍林巒寄此身。

送李子庚之金陵

舍下微波湧碧鱗。湖邊草色可憐人。也知使者徵書急。莫厭輕舟出郭頻。春酒盈缸清似水。時魚帶子白於銀。山桃野杏能紅紫。醉眼相看意自真。

欣懷亭二首爲脫因宗道賦

欣懷亭子湖山上。山色湖光八面開。恰似崑崙積石圃。湧出王母閭風臺。驪龍夜靜擎珠上。神女天寒委佩來。何日扁舟一繫纜。高躋絕頂望蓬萊。

愛子山亭湖水中。雜花脩竹合蒙籠。三春錦繡花迎日。十里笙簫竹度風。菰飯炊來勝雪白。鯉魚釣得出波紅。浮生無事當爲樂。應許閑人一醉同。

送趙元舉之奉化州學王

東風吹雪作春波。送客中流發棹歌。酒至莫辭狼籍醉。情深無柰別離何。天童山杏嵐光暝。佛手江長海氣多。泫水紫芹香可攬。倚看待佩樂善莪。

次韻退和音上人

絕頂浮雲鎖石關。曲途危磴阻躋攀。他年甲楯孤臣泣。此日齋鍾老衲閑。夜永星河低半樹。天清猿鶴響空山。干戈未定歸無處。擬結茅廬積翠間。

題王起宗御史江山煙靄圖

繡衣御史乘驄暇。貌得江山煙靄圖。日落風雲連紫極。天寒波浪隔蒼梧。魚龍縱壑深無底。猿鳥歸巢暝不呼。羈旅傷心緣百感。可堪回首憶吾廬。

二月二日登樓作

薄寒踈雨集春愁。愁極難禁獨上樓。何處山中堪採藥。幾時湖上好乘舟。銜泥客燕聊相傍。泛水浮萍可自由。見說蘭亭依舊在。於今王謝少風流。

感興

赤城霞氣接天台。上界仙宮此地開。滄海有波容蜃鱗。石梁無路入莓苔。當時玉帳耽羅綺。今日絲綸到草萊。傳語疲氓聊忍待。王師早晚日邊來。

發岷縣至上虞道中作

磴滑泥深去馬遲。雪殘青嶂不多時。荒煙蔓草中郎宅。素石清谿烈婦祠。日落風生臨水樹。野寒雲濕渡

江旗。宣光事業存書史。北望淒涼有所思。

次韻和謙上人秋興一首

山雲滿地起秋濤。涼葉驚風下九臯。藥籠空聞收馬勃。弦歌豈復用牛刀。草間狐兔營三窟。天上龍鷹昧六韜。周漢中興還有日。載歌亦伏詠嵩高。

聞高郵納款漫成口號

聞道高郵已撤圍。卻愁淮甸未全歸。聖朝雅重懷柔策。諸將當知虜掠非。堯帝封疆元蕩蕩。世皇功業甚巍巍。忠臣義士同休戚。縱欲偷安總禍機。

春興

近聞丹詔出天闈。聖主鳴謙下士知。豈意豺狼猶桀黠。未隨千羽格庭墀。四郊多壘忠臣恥。百戰無前壯士規。寄語總戎熊虎將。莫教長媿伐檀詩。

再用韻答嚴衍二上人

負郭無田生事踈。微官已謝不須除。散愁漫入高僧舍。乘興還過野老居。草冷蟲聲悲杼軸。霜餘蕉葉碎緘書。黃花素髮相將暮。獨立淒涼憶往初。

又用韻答嚴上人

中夜登樓望紫微。北辰不動衆星依。由來赤日行黃道。多事玄雲變白衣。雪下蓬萊三島隔。濤翻滄海萬魚飛。聖君宵旰惟恭已。早晚陽和斡化機。

次韻和孟伯真感興詩

避難移家適遠鄉。憂時一夜百回腸。徒聞鐵甲連戎壘。未覩鉤車跨賊隍。不共班超爭食肉。欲尋木羽學休糧。磨崖可勒中興頌。努力諸公佐有唐。

妙成觀用何逸林通判韻

我訪仙家溽暑前。青楓綠柳暗晴川。竹根露濕登山屐。沙際鷗迎渡水船。雲氣長留虛白室。丹光直上蔚藍天。純陽道士重來日。爲問蓬萊是那邊。

得胡仲淵書歡喜成詩奉呈石末公兼簡三益軍諮

故人忽寄一封書。愁眼還明病亦無。風滿高林歸猛虎。月涼古塚散妖狐。大廷職貢當邁復。戎馬資糧不再輸。更喜元侯契天意。良苗得雨應時蘇。

次韻和石末公秋日感懷見寄二首

郊原如赭已無秋。況復干戈未肯休。肉食不知田野事。布衣深爲廟廊憂。典章淪落悲芻狗。餽餉倭遲想木牛。禮樂將軍今卻殺。豺狼滿地待處劉。秋陰竟日似黃昏。夏旱良苗不半存。敢望魚雞充醢醢。尙期菘菲作饔飧。煙塵慘澹黃公石。雲氣蒼茫紫極垣。作檄濟川須傳說。九關虎豹向誰論。

重陽日使者持詔用韻柬石末公

中元悲斷羲和報。九日歡迎詔使來。紫禁羽林分壘壁。清秋辰極照中臺。願從黃石明三略。莫使詩人賦

七哀。蟻垤牛涔。休沸蕩。泰山喬嶽甚崔嵬。

夜坐有懷呈石末公

西風白露下清寥。岸柳江蒲取次凋。諸將旌麾非一統。大藩衣服變三苗。雄豪竊據皆屠狗。功業輿臺總續貂。棄馬獨知懷故櫪。天涯涕淚北辰遙。

次韻蒼石末公傷用三苗之作

周用羌髻功有赫。唐通回鶻禍無營。幽歌鄭曲非同調。楚服秦驂實背馳。安得着鞭先祖逖。趨陪前蹕學姚期。扶持聖主中興業。整頓乾坤去詭隨。

石末公家人自台州來以詩問之

委羽山前海水飛。赤城霞色亂斜暉。過庭且喜諸郎至。懷土休嗟舊業違。李晟孤軍終獨捷。杜曾百戰竟安歸。丈夫事主心如石。去殺勝殘自有機。

次韻歲菊

風霜搖落愈傷神。黃菊於予意自親。遲莫長存君子操。淒涼不厭主人貧。天虛沆瀣流清氣。月過青冥動細淪。此夜空庭耿相對。春花夏葉總埃塵。

次韻和石末公歲除送窮之作

五夜雪霜清沴氣。三陽玉燭照芳春。願聞馴象來林邑。復覩封牛至鬪賓。川后山祇爭效職。淮夷海獠悉歸臣。君王垂拱明光殿。聖敬如湯日日新。

次韻和石末公春晴詩

幽禽嘖嘖語朝陽。細綠駸駸入女乘。天上深宮調玉燭。人間和氣應勾芒。赤眉青犢終何在。白馬黃巾莫漫狂。將帥如林須發蹤。太平功業望肅張。

次韻石末公題桃源卷

桃花逐水縈紆人。不覺清溪路淺深。執手問名驚見面。論新話舊各傷心。壺漿餽餉殮加璧。館穀溫存贈有金。似此情懷良匪惡。何嗟歲月去駸尋。

再次韻時問九月九日菊

秋來有菊卽重陽。曷問他鄉與故鄉。愁見飛蓬垂雪領。笑寒落蕊入霞觴。陶時莫訝逢餘閏。遣興聊圖不末傷。歲晚移根深記取。勿令紅紫間中黃。

再用前韻頌菊

天遣幽花駐獨陽。移根應自白雲鄉。釀成甘谷千年液。滿泛瑤臺百寶觴。人老容顏猶可返。歲寒霜雪復何傷。得時無用空妖冶。愧死姚家宮樣黃。

次韻和石末公間有詔使不至

祈招旦夕動遐心。疾首西歸望好音。鳳下丹霄雲杳杳。魚飛碧海霧沉沉。徒言雨露無私潤。誰謂陽和未溥臨。何日六師能電掃。周原依舊載馳駸。

和石末公冬暖

總謂浮雲解作霖。豈期雲氣漫成陰。何人奠璧頻瞻仰。有客悲歌歎毒淫。項帝權移天曷定。神龍用亢海徒深。掩身未服先賢訓。向日空懷寸草心。

望江亭

柳拂江亭舊畫欄。望潮人去地應閑。寢園寂寞秋風裏。行殿荒涼野草間。白塔盡銷龍虎氣。荒城空鎖鳳凰山。興亡莫問前朝事。江水東流去不還。

發紹興至蕭山

落日牛羊下綠坡。微風短檝拂晴莎。窮愁白髮真相得。悲感青春最苦多。水暖菰蒲沙鶉集。月明洲渚傍人歌。此時忽漫思身世。柰爾桃花滿眼何。

宿蠟燭菴俊上人房

城外春江動客愁。江邊細草綠悠悠。還將短髮臨岐路。畏向東風憶舊游。斜日遠天歸鴈急。薄寒孤館落花稠。青燈不放還鄉夢。一夜腸回一萬周。

二月七日夜泊許村遇雨

漫喜晴天出北門。還愁急雨送黃昏。山風度水喧林麓。野樹翻雲動石根。宿麥已隨江草爛。新泉休共井泥渾。魚龍浩漫滄溟闊。澤畔誰招楚客魂。

嘉興寄王昌言學正

去年相別鴈來初。今日相思柳拂渠。對酒放歌難再得。登高作賦近何如。黃華燁燁輕煙裏。碧草油油小

雨餘欲棹扁舟尋逸少。爲愁妨寫換鵝書。

感懷二首

新晴楊柳散春絲。長路行人有所思。愁上容顏青鏡識。寒生亭館落花知。高雲送雨來無定。獨鳥驚風去自遲。悶對亭前紫荊樹。同根那得卻相離。不到西州又十年。青山白水獨依然。徒聞雞狗供輪盡。無那干戈迤邐延。天上九霄空玉燭。人間萬井共貪泉。草中攫取雲中送。坐待連茹紫閣邊。

寄臺郎張質夫

春愁忽得故人書。喜極成悲淚滿裾。冀野驚駘虛伯樂。魯門鐘鼓駭爰居。全家蕩析飢寒切。病骨支離志慮踈。敢以浮名誤知己。緘辭寫意愧何如。

水西寺東樓曉起聞鶯

日上高城柳影齊。風軒臨水看鶯啼。初來木杪鳴相應。稍入花間聽卻迷。芳草自深勾踐國。行人猶隔禦兒溪。思家每恨無輕翼。可對鶯華不慳悽。

茶園別朱伯言郭公葵

細水吹煙送客舟。離情恰似水東流。此時對酒難爲樂。何處尋春可縱游。去雨來雲天渺渺。輕蜂亂蝶日悠悠。絕憐短髮無聊賴。一夜如絲白滿頭。

二月二十三日自黃岡還杭途中作

日照江邊春樹林。繁花亂葉感人心。花間蛺蝶漫多事。葉底杜鵑非好音。舉目山川成皓首。側身天地一沾襟。解憂惟有尊中酒。疾病年來已厭斟。

晚泊海寧州舟中作

春霧今宵氣稍清。空江一舸客心驚。東流濁浪衝山動。西望長庚似月明。不有饑黃爲郡縣。徒令耒耜化戈兵。溥天何處非王土。無地安身愧此生。

感懷

羣盜縱橫半九州。干戈滿目幾時休。官曹各有營身計。將帥何曾爲國謀。猛虎封狼安荐食。農夫田父困誅求。抑強扶弱須天討。可惟無人借箸籌。

春興七首

柳暖花融草滿汀。日酣煙淡麥青青。枝間好鳥鳴求友。水底寒魚陟負萍。異縣光陰空在苒。故鄉蛇豕向羶腥。感時對景情何極。悼往悲來總涕零。

忽聽屋角鬧晨鳩。起看園林綠漸稠。小雨霏霏涵日過。新泉細細入河流。殘花斷柳虛歸計。遠水他山聚客愁。鴻鴈南飛限各嶺。傷心何處問松楸。

於越山城控海壖。春風回首忽經年。憂時望月青青迥。懷土登樓白髮鮮。江上波濤來渺渺。雲中鴻鵠去翩翩。暮寒細雨餘花落。夢遶天涯到日邊。

會稽南鎮夏王封。蔽日騰空紫翠重。陰洞煙霞輝草木。古祠風雨出蛟龍。玄夷此日歸何處。玉簡他年豈

再逢安得普天休戰伐。不令竹箭困輸供。
臥龍山奠越王都。羣水南來入鏡湖。苦恠桑田非舊跡。還驚雉堞是新圖。白波翠靄浮天際。綠樹青莎到海隅。便欲投身歸釣艇。不知何處有尊鱸。
深春積雨感年芳。暮館輕寒透客裳。翠柳條柔先改色。紫蘭花冷不飄香。山中虎豹人煙少。海上樓臺感氣長。燕子新來畏沾濕。一雙相對立空梁。
憶昔江南未起兵。吳山越水共知名。蘋萍日暖遊魚出。桃李風和乳燕鳴。紫陌塵埃嘶步景。畫船歌管列傾城。于今征戍誅求盡。翻對鶯花百感生。

雨中遣懷

青春苦寒雨太多。野水極目似秋波。湖上芳草生已遍。山中美人愁奈何。思家無計鏹荆棘。避地只恐觸蛟鼉。落花零亂晚風起。坐看城頭烏尾訛。

送岳季堅入計籌山

陽羨先生故將孫。拂衣高蹈入玄門。甕盈五粒松花酒。食有千年枸杞根。自得詩篇留客誦。頻來猿鳥識人言。浮雲富貴非吾愿。此意陶公可與論。

爲賈性之題山水圖

不見唐朝王右丞。世間畫史少知名。何人貌得煙雨意。靜聽如聞風水聲。遠岫帶雲纔隱約。斜陽照樹卻分明。清泉素石堪乘興。欲買扁舟過此生。

題雪竹圖

雪壓江邊脩竹林。沅湘晚色起愁陰。川光蕩漾空清闊。山氣玲瓏太白深。未得梢雲邀鳳宿。可能映水學龍吟。無人谷裏吹春律。直節虛中恐不禁。

題脩竹圖

九疑山下湘江畔。多少篔簹覆碧湍。自有清陰堪解愠。也能結實待棲鸞。濃濃暖翠晨煙合。顆顆明珠夕露溥。長日焚香對圖畫。青冥風雨共淒寒。

題畫蒲萄卷子

西域蒲萄也自奇。畫圖驚見墨淋漓。迎風翠羽慄慄動。帶露玄珠纂纂垂。此日散愁思釀酒。幾回病渴想如飴。春牕隱几成幽夢。應共張騫到邛支。

蕭山山行

積雨今朝天氣佳。山亭曉色上林花。未須汗漫思身世。且可逍遙翫物華。偶值斷橋妨去路。卻隨脩竹到隣家。籬邊野鴨驚人過。撥刺飛鳴落遠沙。

蕭山任氏山堂

新堂結構倚巖阿。地僻無譁樂事多。日上黃鸝鳴翠竹。雨餘紅鯉躍清波。消除暑氣憑松栢。舒卷煙嵐任薜蘿。珍重主人能愛客。衰顏聊復爲君酡。

以紈扇贈奎上人並寄以詩

新裁純扇如圓月。寄與靈峯奎上人。不共青蒲爭巧拙。好將白氎伴清新。薰心炎暑誰能敵。應手涼風自有神。莫怨秋來藏篋笥。明年朱夏更相親。

靈峯寺棲雲樓

靈峯之中樓倚山。山雲日夕棲其間。九霄雨露隨高下。六月風雷送往還。青嶂曉光浮藻梲。銀河夜氣濕松關。天臺向上無多路。鷲嶺煙霞此可攀。

題瑞上人山水圖

上人性僻耽山水。應是王維第二身。蘭渚流觴新到越。藍田別業舊通秦。驅馳翰墨迴龍虎。簸弄風雷感鬼神。羈旅相逢聊自慰。莫思天地有煙塵。

普濟寺遺懷

江上西風一葉黃。莎雞絡緯滿叢篁。物華乘興看都好。時序逢愁速不妨。露下星河光瀲灩。月明巖谷氣清涼。願聞四海銷兵甲。早種梧桐待鳳凰。

崇福寺儔上人看山樓

爲愛山中世事疎。看山終日坐茅廬。林花澗草香無際。翠壁丹崖錦不如。禹穴風雷翻石鶴。耶溪波浪動金魚。此時應寤幽棲樂。底用凌雲獻子虛。

宗上人溪山亭

湖上清溪溪上山。山亭結構俯人寰。窗中樹色宜晴雨。門外灘聲自往還。鍊藥井寒玄鶴逝。采蓮舟去碧

波闊春蘭秋桂年年好。憔悴風塵漫厚顏。

題水墨蓼花草蟲

爲愛江頭紅蓼花。秋來獨作草蟲家。尋香粉蝶應隨夢。采蜜黃蜂不趁衙。絡緯語殘涼露滴。蜻蜓立困晚風斜。畫圖水墨驚初見。卻似扁舟過赤沙。

題山水圖爲寶林上人作

雨過秋山日欲曛。白雲如雪擁山根。高松灑露和煙冷。迸水穿沙出谷渾。擬向蘿陰緣石徑。卻尋花片入桃源。畫圖應有通神處。他日相從子細論。

次韻和新羅嚴上人秋日見寄二首

露冷風清木葉疎。蓼花莎草沒階除。子雲詞賦空投閣。仲蔚蓬蒿漫索居。羣盜只今齊得意。故鄉從此遂無書。鏡中短髮非松栢。歲晚看看不似初。愛汝精藍抱翠微。青松綠竹共依依。龜臺落日明霞綺。鰻井寒潮長石衣。銀杏子成邊鴈到。木犀花發野鶯飛。鍾殘永夜禪心定。一任秋蟲促杼機。

重用韻答嚴上人

坐見風霜百草疎。卻憐光景漸消除。萍蓬飄蕩三年客。松菊荒涼五畝居。陋巷蒼苔封蟻垤。空庭黃葉帶蟲書。江楓恰似知人意。強學芳菲二月初。

江水東流西日微。閒身不繫獨何依。塵埃爽颯枯蓬鬢。霜露淒涼破衲衣。百粵雨餘山翠合。三韓雲淨海

青飛滄溟自古通天漢。夢繞黃姑織女機。

再用韻答嚴衍二上人

厚祿故人音問踈。天官不擬介推除。莫思浮世塵埃事。好共深山木石居。月滿高樓留客話。燈明寒榻課兒書。城頭鼓角沉沉夜。腸斷鄉關入夢初。蔓草萋迷野色微。嗷嗷鳴鴈欲誰依。殘花露淡胭脂鬢。落木霜凋薜荔衣。萬國舊聞車軌一。九州今見劫塵飛。總戎安得英雄將。不放龍蛇起殺機。

復用韻答嚴上人

閉門無事往來踈。窗外從他草不除。食肉已忘三月味。謀身欲去九夷居。人情自古懷鄉土。天下何時罷羽書。莫向西風苦惆悵。白雲流水只如初。西風吹樹夕陽微。斥鷃鷓鴣各有依。幕府三年雙短鬢。鄉關千里一沾衣。江淮渺渺人煙少。梁楚茫茫鬼燐飛。誅暴保民黃石略。將軍莫自失戎機。

仍用韻酬衍上人

多愁祗覺世情踈。愁極憑誰與破除。江海煙塵羈客淚。雲山桑梓別人居。高風斷鴈惟將恨。衰草殘螢不照書。世亂弓刀方有用。休誇新句逼黃初。歲莫天寒生意微。空林烏雀自相依。有情霜葉欺花貌。無用風荷象客衣。西塞鼓鞞山岳震。東郊羽檄海波飛。傳聞有詔頒南服。早晚陽和幹化機。

又用前韻

樹頭寒月影扶疎。天上清霜下玉除。紫塞風高鴻失路。碧梧枝冷鵲移居。虎頭曠日糜倉粟。牛腹中霄詫帛書。見說抱關堪避世。稗官猶可學虞初。

西風吹面雨霏微。片片浮雲水上依。鴻鴈羣翔營口實。鳧鷖對立惜毛衣。關河慘烈時將晚。原野蕭條葉自飛。慚愧江湖一萍梗。厭聽咿札響隣機。

題寒林圖

搖落江邊秋樹林。淒涼久客二毛侵。藤蘿歲晚龍蛇死。叢薄天寒虎豹深。流水斜陽人遠近。青煙白草鳥飛沉。桂花自在山中發。悵望西風起夕陰。

題訪隱圖

忽憶山中陶隱居。杖藜衝曉謁茅廬。林花滄露紅無比。澗草含煙綠有餘。金鼎丹光纏日月。銀河流水到塔除。松間白鶴通人語。長向瑤臺寄遠書。

宿賈性之市隱

今年冬雨不作雪。屋頭鳥聲渾似春。絕憐草色綠鋪地。可愛梅花白照人。時物已迎新歲換。交情空向異鄉親。忽思昨夜殘燈裏。錯認還家夢是真。

題陸放翁湖上詩後

放浪江湖一老翁。若耶溪上幾春風。門前流水斜還直。籬外閑花白復紅。甚欲賦詩追杜子。也能縱酒學

陶公細看墨蹟成懷古。歎息他鄉類斷蓬。

次韻和孟伯真感興四首

五載江淮百戰場。乾坤舉目總堪傷。已聞盜賊多於蟻。無奈官軍暴似狼。綠水青山人寂寂。長煙蔓草日荒荒。弟兄零落音書絕。腸斷春風一鴈行。無用文章豈療飢。勞生筋骨已支離。窮愁杜甫家何在。落魄陳平計未奇。草澤狐狸三窟固。江湖波浪一帆危。故園春色年年到。綠葉紅花好爲誰。平時盜賊起成雲。厚祿能忘愧庶民。樽俎自高廊廟策。經綸不用草茅人。思家遠道風塵惡。爭食空山虎豹噴。莫怪洛陽年少客。持書痛哭向楓宸。多事繁花白暎紅。無愁細草綠浮空。春秋迭代人先老。天地生成意不窮。鳳鳥長辭西嶺樹。鯨魚自起北溟風。幾時學得玄真子。箬笠蓑衣一短篷。

次韻張德平見寄

漠漠長煙野色昏。霏霏細雨濕衡門。乾坤象緯尋常轉。江海波濤日夜翻。賈誼奏書哀自哭。屈原心事苦誰論。近逢使者徵遺逸。說道巖廊納讜言。

題承天觀

吳山頂上承天觀。玉牒金符鎮地靈。百尺樓臺依斗極。九霄風露出牕櫺。江聲洶湧蛟龍闕。雲氣虛無翡翠屏。見說蓬萊恰相對。仙凡只在隔滄溟。

感興三首

病骨愁寒憶見春。及觀春色卻愁人。轉添細草當門徑。不惜穠華委路塵。去國杜鵑紅淚盡。傷時庾信白頭新。風波滿地鷓鴣鳥。相趁噉魚飽一身。

二月江南雪片飛。吳山寒色動征衣。莫尋花徑防泥滑。且掩衡門待日晞。弱柳先舒應自損。蟄蟲已出更安歸。乾坤處處旌旗滿。肉食何人問采薇。

春院微風栢葉垂。朝寒坐看雀爭枝。娟娟墜雨拋蒼蘚。點點輕花赴綠池。景物關情悲自老。江山滿目惜時危。長生應有真仙訣。漫把黃金駐黑髭。

可歎

風雨瀟瀟聽曉雞。忽思世事一悲悽。當時重禁藏矛戟。今日呼令學鼓鞀。未見爭鋒曾奏捷。徒聞卻走不先迷。劫灰日夜飛相逐。隨處空林有燕棲。

柯橋靈秘寺卽景贈基上人

盡日陰陰風墜花。樓前溝水發芹芽。青春院宇僧房好。白晝豺狼客路賒。對坐蝦鬚迴舞燕。出門鷓尾立飢鴉。相期握手何時再。五月芙蓉隘若耶。

次韻和石末元帥見贈二首

雨過前溪曉色新。山城草木靜埃塵。殊方負固猶蝸角。此地偷安賴虎臣。高閣綠蘿相對晚。畫闌紅藥不勝春。誰憐衰病兼踈拙。漂泊東西一旅人。

元戎玉帳擁旌麾。武略文韜並出奇。構廈可堪無大匠。安邦曾見活危基。此時山斗歸民望。他日龍鵬簡帝思。我輩迂狂乖世務。趁風執御更何疑。

雨中寄季山甫二首

山雨隨風去復來。南明晚色動樓臺。猶憐仗節中郎在。不見乘槎使者迴。感興詩成聊自遣。忘憂花好爲誰開。偏嫌近水多螻蝻。永夜喧呼聒夢回。長夜雨多泥沒車。白日閉門人跡踈。階下水衣看上壁。庭前簷溜欲成渠。閑花自發無勞種。蔓草從生不遣鋤。想見幽棲張仲蔚。蓬蒿如樹寒園廬。

五月二十九日喜雨奉賀石末元帥

使君設醮天皇格。道士陳章玉女開。遂遣赤松來作雨。更教玄武下乘雷。涼飈細拂花間入。潤色新從草際回。豈但農夫堪一飽。野人亦有酒盈盃。

用前喜雨韻寄呈石末元帥時戍卒有不軌謀蓄而未發公治之以意卒遂返正故發之以言且并志祈雨有應也

將軍渡水流澌合。太守彎弧巨石開。但覺誠心通日月。不知生意在風雷。思尊未許歸張翰。結草終當獲杜回。可恠踈狂謫仙子。兼旬浪飲六千杯。

題紫虛觀用周伯溫韻

少微山直太微宮。山下樓臺起半空。丹井石床纏地絡。瓊牕翠戶出天風。傳聞仙子常時到。應是神霄有

路通會待九秋明月夜。高吹鐵笛上青葱。

題紫虛道士晚翠樓

晚翠樓子好溪南。溪山四圍開蔚藍。微陰草色盡平地。落日木杪生浮嵐。巖畔竹柏密先暝。池中菱荷香欲酣。聞說仙人徐泰定。騎鸞到此每停驂。

葉叔安南溪草堂卽事

溪上草堂盈十尋。踈楊密竹各成陰。綠煙繞舍乘畦靜。白水當門稻遂深。過雨忽翻金碧影。涼颿亂發管絃音。此時不省愁何在。坐到鴉棲月滿林。

妙成觀北亭用何逸林韻

最愛雲山滿目前。更憐亭榭俯清川。草深林藹迷樵徑。花落巖霏點客船。碧澗金芝新出地。丹崖石穴舊通天。神仙應在樓頭上。翠羽霓旌下日邊。

以黎餉石末公侑之以詩

山人見餉含消質。青紫相排箇箇圓。共道解煩同絳雪。也知止渴勝甘泉。種從漢武樊川得。名並張公大谷傳。珍重使君方閣雨。急須走送滌熬煎。

遣悶柬石末公

綠楊落盡白楊枯。坐石徒令歲月徂。尙想藩臣知患盜。豈期驛使似投巫。當時秔稻通遼海。今日風濤隔具區。豺獮可堪專節鉞。衣冠何以拔泥塗。

次韻和石末公中秋不見月詩

一年明月中秋好。萬里長空此夜陰。雨暈青燈昏遠思。蟲鳴黃葉亂鄉心。見愁盜賊氛猶惡。莫恠乾坤氣尚淫。便欲捫蘿上天柱。九霄風露恐難禁。

次韻和石末公七夕詩

天上傳聞會兩星。清秋夜色湛玄冥。蚌胎隱見銀蟾窟。鵲翼高低玉女輶。一水經年纔邂逅。七襄終日豈神靈。勞生厭事惟思睡。獨臥無心覲帝青。

再和倒用前韻

天官垂象煥空青。會合徒聞帝子靈。三武夜開千石簾。兩旗晨轡七香輿。房帷瓜果紛祠祀。霄漢雲霓隔晦冥。惆悵多憂江海客。登樓獨自看臺星。

病足戲呈石末公

晏天容我作支離。病瘡纔除足就羸。跬步不妨猶似鼈。蹕行那得更憐癡。抱珍獻楚何堪再。斫樹收龐亦未遲。寒叟于今知匪禍。周雞從此免爲犧。

遣悶呈石末公

公庭春樹秋重綠。但見鴈鳩日日鳴。不雨正當三伏熱。看雲無奈百髮生。草間羣盜俱糜爵。天下何人尙力耕。漢法幾時還再復。白頭猶得詠昇平。

庭前萱草花落已久至秋復開感而作詩柬石末公

露下蛩鳴寒氣催。蒹葭葉響鴈歸來。鬢毛已爲髮生白。護草何須晚更開。嫋嫋悲風吹落木。炎炎赤日走黃埃。干戈未了仍飢饉。人事天時總可哀。

次韻和石末公閔雨詩

騰雲降雨指龍功。況復山川祭秩隆。豈意愆陽爲沴氣。忽過炎夏到秋風。祈年勞洒儀徒備。登穀嘗新望已空。享祀未應無報稱。可堪不殺待時豐。

再用韻

旱魃爲妖殄歲功。田疇龜坼徧汗隆。無多過雨纔鳴葉。不定行雲又逐風。蔓草荒煙秋社迥。黃沙白葦暮江空。愁來漫憶淳于祝。卻愧靈祇享祀豐。

妙成觀道士劉雲心挽詩

少微星下萃神仙。白玉樓中迓翠幘。弟子焚香玄鶴逝。天官肅駕紫鸞翩。金丹縹緲空山月。鉄笛淒涼遠樹煙。溪上故人如見問。碧桃花裏過年年。

次韻和石末公聞海上使命之作因念西州愴然有感二首

巫閭析木天空闊。桐柏終南水亂流。邑里蕭條無吠狗。田疇蕪穢少耕牛。萋萋蔓草隨人遠。淡淡殘陽向客留。遲莫飄零偏感舊。幾迴垂淚睇神州。弟子輿尸漫有師。見橋誰共老人期。龍魚並出應難識。枵櫟無庸幸見遺。每上樓臺瞻北極。頗聞波浪帖南陲。吳山越水元相接。莫更中流下鐵椎。

驛傳杭台消息石末公有詩見寄次韻奉和并寓悲感二首

被讒去國終思楚。厚貌深情漫劇秦。未識龐萌真老賊。安期侯景作忠臣。池魚幕燕依棲淺。軒鶴冠猴寵渥新。何處荃蘭不蕭艾。種蔬猶得養閑身。

喪亂如川未有涯。悲風滿地是蟲沙。衰遲兩臂從生柳。疾病雙眸但隕花。暗蠶寒蟬秋色老。丹楓紫菊夕陽斜。頗聞四國思郇伯。尙想詩人賦木瓜。

再次韻二首

南州昔日稱三楚。西國今聞又一秦。有爵與糜亡命賊。無才深媿具官臣。青冥鸞鳳風塵隔。畫省貔貅服色新。悵望令人憶李郭。誰能匡濟想捐身。

深秋蔓草接天涯。極目飛鴻沒遠沙。綠水青山長送目。汀蘭岸蓼各生花。風來西塞雲陰合。濤落東溟蜃氣斜。歎息笙歌舊亭館。壞垣叢棘老王瓜。

次韻和石末公感興見寄

使君學術似文翁。奕世流芳緝武功。亦帶青衿來燕喜。黃童白叟望車攻。筆端波浪翻三峽。旗尾龍蛇動八風。慚愧譚才多謬誤。憂時獨有此心同。

次韻和石末公無題之作

秋風孀婦作商音。落葉枯蓂日夜深。已爲抵鳥投白壁。徒勞點鐵冀黃金。軒轅未必迷襄野。夸父終當死鄧林。笑撚東籬菊花蕊。天寒歲晚耐知心。

次韻和石末公九日見寄

去年見鴈思鄉里。今歲還鄉鴈不來。此地淒涼逢九日。何時清切視三台。莞茅夜冷蛩螢急。禾黍秋空鳥雀哀。辟難無勞效桓景。巢居隨處壓崔嵬。

陳太初充兵應點作詩戲之

無僕無臺一老儒。數間茅屋近通衢。忽聞巷長呼排甲。急換戎裝出荷戈。就列敢辭長拱立。隨羣獨作沒塔趨。西風鼓角秋宵永。明日青髯是白鬚。

次韻和石末公開讀有感

百年萬國奉王正。相業臺綱屬老成。山海若時共職貢。郊原何處有戈兵。廟謨可使歸權倖。祖訓由來重變更。欲叫天關無羽翼。拊心長嘆不勝情。

秋夕有感柬石末公

獨立西風聞莫蟬。起看時物愴流年。星臨野樹輝輝動。露出庭莎的的圓。無柰素絲侵綠鬢。卻嫌黃菊似金錢。煙塵滿眼難回首。惆悵高堂坐細氈。

次韻和石末公自訟之作

綠駟驂驅不服騶。王良造父亦難堪。羨君名重中台上。勲業終光北斗南。露井淒風殘綠少。霜林落日亂紅酣。侯封職在同藩屏。班爵無勞阿伯男。

立冬日作

忽見桃花出小紅。因驚十月起溫風。歲功不得歸顛項。冬令何堪付祝融。未有星辰能好雨。轉添雲氣漫成虹。蝦蟆蛭蝶偏如意。且夕蜚鳴白露叢。

丙申歲十月還鄉作七首

溪上寒山淡落暉。溪邊風送客帆歸。故家文物今何在。平世人民半已非。華髮老翁啼進酒。蓬頭稚子笑牽衣。自嗟薄質行衰朽。未覩朝廷賦采薇。

風急霜飛天地寒。草黃木落水泉乾。千村亂後荒榛滿。孤客歸來杖淚看。野宿狐狸鳴戶外。巢居煙火出雲端。黍苗處處思陰雨。王粲詩成損肺肝。

故園梅蓋依時發。異縣歸人見卻悲。花自別來難獨立。人今老去復何之。未能荷鍤除叢棘。且可隨方着短籬。等待薰風暄暖後。枝間看取實離離。

手種庭前安石榴。開花結子到深秋。可憐枝葉從人折。尚有根株爲客留。枳枸悲風吹白日。若華高影隔青丘。壤垣蟋蟀知離恨。長夜淒涼弔獨愁。

舍北草池寒已枯。草中時復見孤蒲。濫泉潑沸無留鮒。弱藻蒙茸不繫鳧。綠葉紅花空代謝。春蛙秋蚓任喧呼。窺臨最憶琴高鯉。騰駕風雷定有無。

小舟衝雨清溪上。雨密溪深宿霧昏。游子到家無舊物。故人留客歎空尊。荒畦蔓草纏蒿草。落日青猿叫白猿。語罷不須還秉燭。耳聞目見總銷魂。

五載辭家未卜歸。歸來如客鬢成絲。親知過眼還成夢。事勢傷心不可思。且喜松楸仍舊日。莫嗟閭井異

前時。修文假武君。王意鑄甲銷戈會有期。

冬至日泊舟戈溪

日薄雲陰雪在山。野寒溪靜客舟還。乾坤簸蕩逾三載。風俗乖張似百蠻。廢井衰蕪霜後白。空村喬木曉餘殷。獨憐節序逢冬至。不得安棲學閉關。

次韻和石末公紅樹詩

紅樹漫山駐歲華。玄冬驚見眼生花。井陘旗幟軍容盛。汴水帆檣御氣賒。春草淒迷金谷障。夕陽照灼赤城霞。靡蕪丹木扶桑裏。惆悵誰乘博望槎。

次韻和石末公元夜之作

八表流雲澄夜色。九霄華月動春城。條風細細吹旗影。香藹微微引漏聲。河漢虹橋應斷絕。滄溟鼉足漫崢嶸。愁來更聽漁陽操。獨倚闌干坐到明。

石末公再賦元夕見寄用韻酬之

東方月出魚龍窟。北極雲開虎豹關。渤海青丘金作水。崑崙赤岸玉爲山。風光豈減常時好。燈火嗟逢此夜慳。聽盡殘鐘成不寐。那無飛羽入玄間。

丁酉七月十四夜望月仍蝕且旣而司天報亦不至因感去年作此寄石末公

山城望月中元夜。天運循環四序周。顧兔又從銀漢滅。磔蟆空抱玉川憂。清臺視祲宮箕尾。仙使乘槎隔斗牛。安得寄書憑去燕。爲言桂樹不勝秋。

題煙波泛舟圖

舊遊憶鼓湘湖櫂。日淨風微江練平。小艇曲穿花底出。遊魚相伴鏡中行。別來漫想心徒切。畫裏重看眼亦明。素石蒼松是何處。願從巢父濯冠纓。

爲王彥和賦槐堂

晉公庭上三槐樹。千載流傳是德符。今日耳孫思繼述。昔年手澤歎荒蕪。當窗欲看屯雲葉。夾徑先栽帶雨株。會見枝頭金粟蕊。秋風吹送上天衢。

社日偶成奉呈石末公

昔聞同社燕雞豚。今見操戈競一殮。松栢空壇飢鼠出。枌榆落日亂鴉喧。地連吳會嗟何蹙。民是周餘不半存。疎懶渾愁聞世事。治髣有酒漫盈尊。

次韻和林彥文劉山驛作詩

青泥九折度危峯。翠木千章集遠風。欲爲流離安堡障。寧辭辛苦涉蒿蓬。梧桐葉落無棲鳳。荆棘枝寒有怨鴻。旦夕升虛聊望楚。何時重賦定方中。

次韻和余嘉賓御史見寄

二紀相思欲奮飛。百年心事苦相違。風塵跋涉容顏改。豺虎縱橫信使稀。忽枉緘書如見面。不勝悲喜卻沾衣。有懷欲語無由寫。驄馬天涯幾日歸。

次韻和石末公月蝕見寄

涼氣開秋桂。未花。青天見月漫咨嗟。玉毫撲擲此中兔。金背熒煌何處墓。百鍊精銅纔照膽。連城白壁底生瑕。誰能鼓劍披氛祲。莫遣東郊馬蹶沙。

卽事有感呈石末公

葵藿傾心嚮大明。參商瑣瑣只尋兵。蛾眉欲擅三千寵。魚翼難通九萬程。貝錦笙簧鳴鳥瑞。明珠瓊玉泰山輕。兩階干羽開來格。分北猶勞聖主情。

次韻和石末公感懷之作

風去深林鷺在庭。西風回首故山青。杞人岌岌憂將殞。楚國茫茫醉不醒。自覺艱虞多錯午。誰憐耗斲祝寧丁。金芝玉蕨甘如蜜。歲晚吾從董五經。

聞盜過界首季君山甫亦蒙訪及以詩唁之

妖星何故犯奎躔。鶴上雲霄鯉入淵。寇退喜聞曾子反。書焚尙賴伏生傳。蠶酸併與青氈去。瓜苦空餘綠蔓牽。慚愧杜郊湯博士。白鹽赤米數相憐。

次韻和石末公中秋翫月

一年二六團圓月。此夜光輝獨耐看。銀漢波濤三鳥接。玉京風露九霄寒。方欣酷暑隨時去。只恐清商促歲闌。更上南樓瞻北極。那無鴻鴈報平安。

次韻和十六夜月

纔圓又缺中天月。猶自寒光媚老蟾。承露仙人珠落掌。別風樓觀雪生簷。玉階桂影駸駸薄。金井苔花漸

漸添坐久城頭聞夜柝。牢愁清興苦相兼。

再次韻

永夜涼風吹碧落。深秋白露洗明蟾。金波灑灑將流瓦。玉磔熒熒恰近簷。貝闕寒生魚腦滅。龍宮氣肅蚌胎添。從軍不廢篇章事。倚賴元侯智勇兼。

次韻和劉宗保秋懷二首

眼見賓鴻去復回。可堪雲霧隔瑤臺。黃花自在山中發。青鳥何由海上來。墻角蟲號瓜蔓索。樹頭禽嚇栗房開。涼蟾照幙還清夜。慚愧千村野哭哀。蛩螿啼露作悲愁。鷓鴣搏風樂素秋。莫訝繫匏長不食。亦知神劍解相求。翰林白髮三千丈。吏部回腸一萬周。借問何如青白眼。酣歌竟日爲身謀。

次韻和石末公九月無菊詩

籬菊無花冷夕陽。西風空送鴈還鄉。已妨少昊頒時令。更阻淵明泛酒觴。生意循環深自識。年華逝水去誰傷。愁來最愛霜中葉。滿眼殷紅間淺黃。

野行偶見紅樹悵然有感呈石末公

紅樹傷心夕照前。漫山暎水爲誰妍。樹當搖落人尤惜。人自憂愁樹不憐。九譯未通青鳥使。四郊猶漲綠林煙。野夫病足思休息。藉草棲檜擬晏眠。

次韻和石末公紅樹詩

岸柳江蒲總戚施。柏林辛苦擢金支。虞人詫見炎官舉。候騎訛傳漢將旗。照水焚煌空銜貌。因風飄落竟從誰。應慙若木生暘谷。長駐踰烏燭。蠅。

次韻和石末公悲紅樹二首

乾坤何處非王土。稜莠誰令滿大田。未掃綠林千嶂裏。還看紅樹九秋前。吳宮露冷蟬何在。漢苑風悲鶴自憐。卻羨魯陽功德盛。揮戈回日至今傳。霜與秋林作錦幃。一朝霜重卻全稀。坐看絕豔成塵土。應寤浮華是禍機。驚鵲月明難自定。窮猿歲暮欲何歸。猶憐有客期歡賞。太息斯須志願違。

詔書到日喜雨呈石末公

將軍鐵馬高秋出。使者樓船渤海來。甘雨恰隨天詔下。凍雲應與地圖開。枯黃昔日紛紛落。細綠迎春萋萋回。悵望山中多病客。坐看烏鵲遶庭梅。

感事呈石末公

前飛鶴鵠後駕鵝。天闊風高奈汝何。不羨焦頭居上客。空憐舐痔得車多。深山虎豹來城市。落日麒麟出薜蘿。微巖可羨魚可脰。白雲長自在岩阿。

贈西岩道元和尙

西岩寺裏雲巢子。不到人間幾十年。杖錫野猿迎路側。談經山鬼拜燈前。塵飛劫火青春夢。雪滿長松白日眠。近得淵明入蓮社。興來時復有詩篇。

題王伯衡縣尹桑陰圖

漁陽太守之官後。種得桑陰比召棠。麥隴風微雲委甸。茅簷日暖雪盈筐。倉庚過去青枝動。戴勝飛來紫
棋香。千載先生同此意。爲君重賦兩岐章。

次韻和石末公漫興見寄二首

王侯古有興屠狗。郎吏今無善牧羊。青海風波騰罔象。紫霄氛祲翳搖光。江寒逝水東流急。天遠冥鴻北
去長。莫笑烏鳶惡毛羽。翻飛齊得籓鄉行。

濟世何人希管樂。隱居無處覓求羊。扶桑未換暘烏彩。腐草猶爭爝火光。百載承平戎馬佚。七年戰伐艾
菅長。長沙遷客能流涕。一日須垂一萬行。

聞鳩鳴有感呈石末公

郊原過雨東作始。枝上鶉鳩鳴可憐。此地巢居猶舊壘。他鄉去子望歸田。匡時勢異民思漢。憂國心隨鴈
到燕。逝水自流入自老。倚檻長憶至元年。

戲和石末公催太初畫山水之作

春蠶吐絲作成繭。辛苦爲人身上衣。畫史等閑揮彩筆。女工顛傾倚空機。高堂素壁峯巒出。暮雨朝雲夢
寐歸。可惟唐朝杜陵老。瘦妻短褐有光輝。

和石末公冬暖

世亂干戈日夜尋。可堪災沴又相侵。煙霞出地皆成禊。雷電飛時肯作霖。祝錫漫勞遵故事。問牛誰復軫

憂心小蟲未寤年光晚。猶抱枯蓼學苦吟。

雨中呈石末公

去年三冬暖不雨。今年孟春寒有餘。大雲垂垂壓宇宙。密雪袞袞飄庭除。安排白水與泛舸。醞釀青泥容沒車。辛苦陌頭楊柳樹。含顰等待太陽舒。

和石末公見示盲字韻

長想天涯皆內地。忍看關外卽他鄉。扶生可惜豎無緩。救死寧堪鬼在盲。郡縣誅求應到骨。乾坤戰伐徧成瘡。遼東華表雲間鶴。相見相思總斷腸。

次李子庚韻

風落餘花春事非。愁心煙雨共霏霏。溪雲不作從龍起。山石何須學燕飛。籬下舊存彭澤菊。林間新長首陽薇。夜闌忽漫聞啼鳥。腸斷天涯信使稀。

早春遣懷

正月餘寒未放春。漫空飛雪舞隨人。新年對客情何限。濁酒於予意獨親。澗底流泉渾似玉。門前細草總成茵。鶴歸自愛山能靜。豹隱方知霧有神。

雨中遣悶

雨漬愁雲重不飛。山蒸冷霧襲人衣。亦知屏翳空多事。只恐羲和失所歸。歲晏波濤東逝急。天寒鴻鴈北來稀。殘燈永夜清無焰。坐聽飢猿響翠微。

聞猿有感

猿響秋山夜向闌。白雲如雪擁林端。鍾儀楚奏難成調。蔡琰胡笳欲罷彈。澤畔離騷餘怨恨。巴東涕淚想
洑瀾。唯應華表歸來鶴。明月清風共歲寒。

漫成

老去知心更有誰。愁將短髮對花枝。花殘更發新春葉。髮白空垂滿面絲。縱酒放歌憐往日。倚闌聽鴈立
多時。若爲化得搏風翮。汗漫東西信所之。

感興

百年強半已無能。愁入膏肓病自增。千里江山雙白髮。五更風雨一青燈。繁弦急管誰家宅。廢圃荒窻昔
代陵。不寐坐聽雞唱盡。素光穿牖日華升。

夜坐

殘釭背壁翳還明。坐擁衾裯閱五更。雲捲星河垂永夜。霜飛鼓角靜嚴城。飄搖莫計餘生事。老病都非舊
日情。想像故園憑夢到。愁來轉使夢難成。

蔣山寺十月桃花

王母桃花此地栽。風霜搖落爲誰開。琳宮玉座同黃土。絳蕊丹跗自綠苔。度朔煙霞違夢想。武陵雲水怨
歸來。殘蜂剩蝶相逢淺。黃菊芙蓉莫浪猜。

寒夜

月上前山夜寂寥。江城鼓角殷寒宵。魚龍水落滄溟靜。鴻鴈聲來紫塞遙。風物自應隨律轉。霜鬢爭得見春消。青釭冷暗愁眠怯。樓外頻移北斗杓。

漫成

愁將短髮逢搖落。漫把殘燈照寂寥。兩地身心悲夜鷓。五更鍾鼓夢春潮。驚寒栢葉垂垂靜。向日霜華泫泫消。悵望煙塵滿長路。紫芝空長故山苗。

題秋江獨釣圖

秋風江上垂綸客。知是嚴陵是太公。細水浮嵐天與碧。斜陽炙面臉生紅。形容想像丹青在。歲月荒涼草澤空。日暮忽然聞欸乃。蓼花楓葉忘西東。

題墨竹

蒼梧山下無窮竹。盡是湘妃淚種成。煙雨不銷千古恨。珮環虛度九秋聲。見愁牧豎乘時伐。可待伶倫學鳳鳴。獨立淒涼對圖畫。爲君惆悵一沾纓。

雪中懷章三益葉景淵

歲莫懷人雪滿天。飢烏病客對淒然。地爐無火同誰坐。石硯生冰盡日眠。栗里何時歸白髮。茅簷幾處起青煙。稻畦麥隴看春及。土膏泉滋識有年。

白髮

白髮應同春草莖。風吹一夜滿頭生。欲收浮豔歸根柢。故遣芳菲定老成。碧瓦曉霜憐變滅。紙窗宵月妬

分明據鞍上馬非吾事。賴爾粧嚴意不輕。

愁感代哭

燕鴻北去又南來。斷蘆荒岡幾劫灰。慈母磯寒風落木。望夫石老雨添苔。江流定與天河合。客淚還經地底回。未必春光便銷歇。白華猶發燒殘梅。

冬至

冬至微陽斡化機。閉關獨坐正相宜。白楊風掃經霜葉。翠柏冰凝泣露枝。日轉天南林影覺。春生地底水泉知。物華過眼成今古。愁絕看雲有所思。

黃州團湖董氏鏡心樓

團湖四面開明鏡。中有高樓接泰清。絳氣往來蟾影入。碧光浮動日華生。雲間威鳳孤飛下。空裏遊魚作隊行。安得翠輶呼弄玉。金銀臺上臥吹笙。

寄黃仲美

二十年前別故人。乾坤何處不風塵。玉缸阻對簪花夕。素髮羞同野草春。紫極星辰空有象。青冥波浪杳無津。歡華過眼成今昔。苦憶元方淚滿巾。

春城

春盡江城不見花。似知白髮畏韶華。戰爭故習俱無賴。喪亂餘生未有涯。三島虹蜺昏日月。二儀風雨化龍蛇。何年百谷歸滄海。尋取河源泛客槎。

舟中

雨翳青燈靜客舟。輕寒只戀敝貂裘。漫山薄霧穿牕濕。漱石鳴泉拍枕流。身在壺中天萬里。夢驚華表鶴千秋。愁來滴淚都成血。直到滄溟水盡頭。

至婺州聞官軍自溫處之江東所過皆空遂從間道還鄉

聞道人家總避軍。我亦獨穿豺虎羣。莫思身外路多棘。且喜雨晴山出雲。林端石磴鶴自古。澗底風松猿共聞。他年想象或夢到。兩鬢白雪應紛紛。

遣興

白露如珠滴素秋。啼螿絡緯寂然收。煙開碧水浮天遠。月帶銀河入海流。艷艷霜林張綺纈。瑤瑤風葉落鳴球。此時旅客篝燈坐。無柰黃昏一餉愁。

搖落

搖落江天氣慘淒。野黃雲白感東西。可憐飢鼠當人立。無柰寒鴉向客啼。杳杳夕陽葭浦闊。茫茫秋水稻田低。銷魂何地歸衰疾。觸處煙塵沸鼓鼙。

秋夕

柏葉蕭疎柳葉黃。露華如玉綴空廊。丹心欲共燈花結。白髮偏隨漏水長。月色故園同窈窕。蟲聲此夜獨淒涼。寒鴉莫更啼金井。衰病能堪幾斷腸。

感興七首

昭代仁聲浹九夷。野無矛戟有鋌基。誰言潢海操兵燬。卻產宮庭制禮時。廣路駢駢周四牡。陰風肅肅漢靈旗。弔民伐罪元戎事。盱食宵衣上聖思。

清時不樂道干戈。鼯鼠其如虎豹何。淮海風雲連鼓角。湖山花木怨笙歌。紫微畫省青煙入。細柳空營白骨多。惆悵無人奏丹扆。側身長望涕滂沱。

衣冠共喜際雍熙。豈意豺狼負盛時。禮樂百年忘戰久。風雲八陣得才遲。神謀不是閭閻識。廟筭誰聞黼屨思。慚愧鰕生懶無用。江湖愁望鬢成絲。

將軍意氣薄丹霄。欲把孤航截海潮。蘇武節來無忌死。岑彭營惡子陽驕。鳴鴉詩奏忠誰白。松柏歌成恨豈銷。悵望天涯一灑淚。鯨鯢罔象雜三苗。

落日悲風雲滿川。家家閉戶少炊煙。也知渤海無龔遂。漫憶邯鄲有魯連。三尺青萍思出匣。數莖白髮望歸田。請看如鏡南樓月。此夜清光最可憐。

天弧不解射封狼。戰骨縱橫滿路傍。古戍有狐鳴夜月。高岡無鳳集朝陽。瑤戈畫戟空文物。廢井頽垣自雪霜。漫說漢庭思李牧。未聞郎署遣馮唐。

天上九關森虎豹。人間七澤起龍蛇。塵埃不辨風雲色。雨露全歸枳棘花。秦國有人迷鹿馬。周郊無土載蟲沙。淮濱何日歌常武。腸斷嚴城戍鼓颯。

越山亭晚望

越絕孤城枕海湄。越王亭下景遲遲。雲埋夏后藏書穴。草沒秦皇頽德碑。鑿齒未馴虞禮樂。戈船猶駐漢

旌旗春風淡蕩吹楊柳。笑看吳鉤有所思。

謁夏王廟有感

一片宮垣粉牋新。前王陵廟在松筠。玉書金簡歸天地。貝葉曇花詫鬼神。滄海波濤紆職貢。山川草木望時巡。苗頑未狎虞階舞。空使忠良淚滿巾。

寒夜忽然有懷周紫巖先生遂成口號奉寄且以酬黃柑之惠

柱下先生住紫巖。倚天愁嶺氣巉巖。客來每託青猿報。書寄還憑白鳳銜。日上寒光生水石。月明晴翠落松杉。旅人珍重黃柑贈。愧乏瓊瑤答素緘。

冬暖

今年南國天氣暖。十月赤城桃有花。江楓未肯換故色。汀草強欲抽新芽。野畦落日舞殘蝶。小池過雨喧鳴蛙。城上幾時罷擊柝。愁見海雲蒸晚霞。

漫成

春雨日日送愁來。雨中百花渾未開。青山不見神禹穴。碧草已滿越王臺。魚兒弄水浮還沒。燕子尋巢去卻回。頭白楊雄懶獻賦。衡門從此掩蒿萊。

夏日雜興七首

眼見青苔上短垣。忽看碧草翳衡門。西來急雨寒聲壯。東望扶桑曉氣昏。征戍誅求三載外。詩書禮樂幾家存。天涯地角風塵滿。極目雲霄漫斷魂。

愛此南園僻有餘。依稀景物似郊居。風軒自舞蒼筤竹。蓮沼雙遊赤鯉魚。釀酒剩收元亮秫。換鵝時寫右軍書。人生縱意惟踈嬾。莫遣門多長者車。

聞道中原沸似糜。倚楹長嘯不勝悲。百年城郭連烽火。千里桑麻委蒺藜。南國久紆方叔旆。東郊未返魯侯旗。五湖何處堪垂釣。腸斷松楸入夢思。

故里無書問遠遊。他鄉萍梗漫淹留。盲風恠雨蚊龍喜。荒楚寒蕪燕雀愁。天上古今星北拱。人間日夜水東流。誰能走報西王母。乞與還丹駐黑頭。

層樓迢遞俯清郊。天際羣山檻外交。日暖水禽鳴哺子。風輕沙燕語尋巢。綠荷雨洗藏龜葉。翠竹煙寒集鳳梢。可嘆仲宣歸未得。苦吟終日倚衡茅。

夏至陰生景漸催。百年已半亦堪哀。葇鱗不入龍鰲夢。鑊羽何勞燕雀猜。雨砌蟬花粘碧草。風簷螢火出蒼苔。細觀景物宜消遣。寥落兼無濁酒杯。

菱葉荷花漸滿池。紅榴綠篠正相宜。天邊日出園葵覺。地底雲生柱礎知。長夏未應炎暑過。薄寒恰似晚秋時。朝來苦恠雙青鬢。輒向風前學素絲。

夏日訪王友文留飲贈詩

長夏園林白晝閑。高軒留客雨漫山。傾壺竹葉沉沉綠。落樹楊梅顆顆殷。檻外新荷搖水佩。簷前弱柳舞風鬟。醉來帶月浮舟去。忘卻塵埃世路艱。

題江村風雨圖

日落千山風雨來。野昏林黑鳥飛迴。風吹煙霧連天起。雨送雷霆入地回。龍母蛟綃雲半濕。巫娥具闕夜深開。暮寒燕子歸華屋。愁絕餘花委碧苔。

次韻和岳季堅見寄

塵埃不見望諸君。江海誰憐鄭廣文。雪裏一筇穿虎出。竹間半榻與僧分。無人問字朝眠穩。有客論詩夜坐勤。豹褻羊裘等黃土。金章紫綬漫浮雲。

次韻和天童良上人見寄

不辭塵匣掩青萍。願見天邊隕盜星。白日有時容黑子。紫微終古照玄冥。輕風淪雪歸蘭汜。細雨涵春入草亭。但得此身強健在。江山相見眼長青。

靈峯寺松風閣

靈峯寺閣倚松風。風細松高閣更空。何處流泉生石上。有人鳴玉下雲中。花飄霧露春香滿。影動龍蛇曉日融。安得身如列禦寇。翩翩高舉出冥鴻。

次韻高則誠雨中三首

短棹孤蓬訪昔遊。冷風淅雨不勝愁。江湖滿地蛟螭浪。秔稻連天鼠雀秋。莫恠賈生偏善哭。從來杞國最多憂。絕憐窗外如珪月。只爲離人照白頭。

霖雨蕭蕭泥客途。歲華冉冉隙中徂。不知燕趙車千乘。何似嵩邛飯一盂。露冷芙蓉捐玉佩。天寒薏苡結明珠。東鄰艇子如堪借。去釣松江巨口魚。

吳苑西風禾黍黃。越鄉倦客葛衣涼。楸梧夜冷烏驚樹。霜露秋清蜂閉房。天上出車無召虎。人間賣卜有王郎。干戈滿目難回首。夢到空山月滿堂。

次韻和謙上人秋興七首

一自中原萬馬奔。江淮今有幾州存。龍韜豹略癡兒戲。糗李天桃猛士門。廢壘秋風銷戰骨。荒郊夜雨泣冤魂。江湖愁絕無家客。佇立看天淚眼昏。

東海波濤激迅飈。西風氛霧虎狼驕。高牙畫戟尊方伯。繡段黃封出內朝。無客金戈椿鑿齒。有人玉帳舞弓腰。武陵日暮桃花盡。何處林泉可採樵。

霜飛大野氣淒清。日落荒村少客行。投筆班超空食肉。登樓王粲獨傷情。海壖雨鬣旌旗影。淮甸雲埋鼓角聲。中夜起瞻天北極。鬢毛蕭颯憶神京。

浙江流水繞東吳。佳麗猶傳故國都。紅錦漫山春雨後。黃雲壓樹曉霜餘。嬌鶯逐暖歸牙帳。征鴈衝寒送羽書。惆悵南園釣舟子。蒺藜滿地不勝鋤。

繡幕香幃隱日華。金鞍玉轡巧矜誇。深山霧雨龜生虎。大海波濤虺作蛇。樛櫨有枝寒集鵲。梧桐無葉夜啼鴉。涼風嫋嫋吹游子。何處松楸是汝家。

故鄉知已不曾逢。滿目雲山恨萬重。斥堠霜清寒夜柝。譙樓風急曉城鐘。此時遶樹憐烏鵲。異縣携家想駉蛩。獨向晴簷問梅蘂。數枝和雪爲誰容。

江上悲風起白波。山中芳草奈愁何。紫菱青苻鮫人舞。翠藟蒼藤木客歌。曠野煙塵迷虎兕。長亭泥濘沒

鸞鷟濁河日夜東流去。腸斷電旌影駸婆。

法華山弘上人

可愛寒潭似鏡清。清光寒氣襲軒楹。草根流水泠泠出。石上潛魚箇箇橫。翠藹驚風和露滴。白沙得雨照人明。故鄉近報猶豺虎。愁對滄浪詠濯纓。

自天衣還城贈伯言

城上餘寒曉氣凝。湖邊春樹綠層層。一山獨表秦王望。衆水皆朝夏后陵。白眼嗣宗終嗜酒。青鞋子美謾尋僧。仙都石室煙霞裏。早晚相携策瘦藤。

爲黃元徽題畫松

黃子宅邊松十尋。兩株相倚自成林。半空鸞鳳翻清影。長日笙竽奏好音。豈但茯苓能卻老。更有琥珀可安心。風塵瀕洞還相憶。寫掛高軒恨最深。

秋感

日白天青木葉凋。雲山漫漫故鄉遙。石床墜露珠光動。碧砌幽花玉色銷。十載故人俱土壤。五更歸夢負漁樵。懷來憶往成惆悵。蔓草羈蟲對寂寥。

悼廢圃殘菊

舊菊將蕪尚有根。高秋相顧耿無言。芳心不共青莎死。生態猶欺白露繁。要待靈均餐落蕊。從教元亮耻空尊。何人解識淒涼意。分付寒螿仔細論。

侍宴鍾山應制

時蘭州方奏捷

清和天氣雨晴時。翠麥黃花夾路岐。萬里玉關馳露布。九霄金闕絢雲旗。龍文騶駟騰鸞輅。馬乳蒲萄入羽卮。衰老自慚無補報。叨陪儀鳳侍瑤池。

題李息齋墨竹

李侯貌出蒼筤竹。葉上湘妃淚未乾。煙雨晝迷丹鷺鷥。霜風秋勁碧琅玕。脩莖擬截伶倫管。和氣潛驅嶰谷寒。此意祇令誰賞識。高堂素壁靜時看。

雲門寺作

若耶溪頭過新雨。雲門寺前芳草長。好將薜荔綴衣帶。更取辛夷結佩纓。綠鬢朱顏非昔日。茂林修竹是他鄉。東風且莫吹花盡。遠客傷春易斷腸。

次韻和朱伯言自雲門之天衣途中作

卽看梅蕊發江南。漸見柔桑可浴蠶。日鑄雨餘峯似髻。雲門煙合樹如藍。青猿不避游人過。碧澗能消宿酒酣。況有山僧頗解事。何妨聊駐使君驂。

送陳子晟省親歸連江

連江此去三千里。綵服趨庭及早春。闔嶺白雲迎馬首。建溪碧水浹龍鱗。題橋免穎留南徼。戀闕丹心照北辰。鶴髮正須三釜養。鳳城雨露四時新。

送黃生洩祀福建

九重發政懷川嶽。使者承宣下紫宸。玉璫黃流敷帝澤。碧雞金馬出神珍。風清五嶺煙霞肅。春到三山雨露勻。歸路武夷溪九曲。棠梨花映綠楊津。

卽事

春半餘寒似暮秋。掩門高坐日悠悠。樹頭獨立知風鵲。屋角雙鳴喚雨鳩。芳意自隨流水逝。華年不爲老人留。浮花冶葉休相笑。自古英雄總一漚。

遣興

江上潮來風捲沙。城頭畢逋鳥尾訛。燕泥半濕昨夜雨。蛛網忽粘何處花。孤坐日月自閑暇。出門岐路空交加。漫將白髮對芳草。目送去鴻天一涯。

乙卯歲首早朝奉天殿柬翰林大本堂諸友

枝上鳴嚶報早春。御溝波滄碧龍鱗。旂常影動千官肅。環珮聲來萬國賓。若乳露從霄漢落。非煙雲抱翠華新。從臣才俊俱楊馬。白首無能媿老身。

元夜

玉漏遲遲出苑牆。星河踈淡月輝煌。送寒梅蕊清香細。報喜燈花紫燄光。金闕曉霞來若木。瑤池春色滿長楊。君王注意防驕佚。萬歲千秋樂未央。

次韻和劉彥箕憶山中篇

句曲峯高倚太陽。不風巖谷自清涼。四時嵐彩霏瓊雪。百道泉流湛玉霜。雅稱采芝追綺季。尤宜散髮學

稽康龍鱗躍錯松當徑。鳳尾離襪竹過牆。月上海門蟾早覺。露寒天宇鶴先嘗。仙人卓劍降魑魅。道士書符禁瑤狂。寶氣丹光生夜寂。黃精白朮引年長。茅君虎臥瑤壇上。蕭史鸞棲碧殿旁。桂樹寒山遠。謝客桃花流水憶。劉郎猿狖任占青蘿帳。薛荔從生綠石床。世難有身空自累。詩成無鴈倩誰將。欲憑錦瑟傳幽思。才理朱絃意已忘。

彭澤阻風

風急雲飛江倒流。請君聊且駐蘭舟。浪翻彭蠡蛟螭橫。雲壓匡廬虎豹幽。懷古謾尋元亮菊。望鄉空倚仲宣樓。五更歸夢三千里。一日迴腸九萬周。嘯侶山棲憐野鹿。伴人水宿感沙鷗。中元都府神官會。上界星辰積氣浮。地軸西南連少昊。天關東北鎮陽侯。兩峯對擁青螺髻。孤月初生白玉鉤。龍甲冷欺寧蜃市。蚌胎光奪睡龍眸。春撞急杵濤驚枕。滴瀝眞珠散酒糊。枯樹掛崖眠復起。老藤牽石墜還留。宮商調合靈鐘夕。鏘鏘稜高峭壁秋。繡被焚香寒悄悄。金環扣瑟夜悠悠。竹枝寫恨傳巴女。木客長吟答楚囚。不寐殘缸猶閃滅。動情鳴櫓數啾啾。蒼梧鳳逐重華去。赤水珠無罔象求。大宅高門荒町疇。頽垣敗塚鬧鶻鷗。塵埃漠漠城笳怨。蘆荻蕭蕭戍鼓愁。鬼火碧穿燈火去。狼煙黃入燒煙道。紫芝可茹林多蟻。紅鯉堪嘗澤有虬。萬國鋤犁俱劍戟。八陵松柏讓戈矛。哀哀野哭乾坤慘。踽踽途行面目醜。水憶盧敖翔汗漫。願隨慧遠學清修。瑤臺青鳥歸何處。玄圃琪華爛莫收。滄海未容精衛塞。蓬萊定許僊僊遊。故園梅蕊相將發。倚賴春陽慰白頭。

誠意伯文集卷之十七

五言絕句

題梅屏二絕

樹杪過流星，輕霜落半庭。
踈花與孤客，相對一青燈。
獨酌梅花下，憐花與鬢同。
折花還插髻，顛倒笑東風。

題小畫

庭前綠荷葉，香氣濃於酒。
踈雨忽飛來，的皜明珠走。

春晚

踈雨隨風過，輕寒薄暮歸。
猶憐數花朵，辛苦駐春輝。

遣興

於越三年客，思家一百句。
如何今夜月，卻憶鏡湖春。

歲晏

歲晏悲風急，空江白晝陰。
黃蘆與紅蓼，無處不傷心。

途中見去鴈

昔與鴈同歸。今來鴈北飛。殷勤祝過鴈。來往莫相違。

漫成 九首

春曉正堪睡。嫌他曉上明。無端雙楚雀。又向屋頭鳴。
明月圓復缺。春風去不來。淚隨花雨落。點點在蒼苔。
昨夜三更裏。還鄉夢卻成。朦朧半驚覺。連喚小兒名。
日暮庭陰合。斜陽復照簷。不禁風絮亂。寂寞掩重簾。
病身勞應接。長日掩雙扉。燕子來何晚。春歸寒未歸。
炎赫迎新節。綈袍洗未乾。那知一夜雨。更作九秋寒。
萱草花空發。丁香子又生。浮雲無處所。孤月不須明。
淚爲看花落。愁因對酒多。良辰不再得。衰莫欲如何。
望帝千年魄。聲聲是淚流。空庭無竹樹。省得一春愁。

題墨竹

風梢舞空烟。露葉涵晴月。折取寄情人。感此歲寒節。

六言絕句

題山水小畫二首

鄂渚輕舟未發。瀟湘倦客多愁。可恨一江春水無情。日夜東流。碧草桃源路斷。紫芝商嶺雲深。高樹月明啼鴉。一聲一度傷心。

題畫竹

葉間重露猶滴。林表寒烟未開。想見沅湘江上。月明環佩歸來。

七言絕句

題畫梅

天桃能紫杏能紅。滿面塵埃怯晚風。爭似羅浮山礪底。一枝清冷月明中。

讀史有感

千古懷沙恨逐臣。章臺遺事最酸辛。可憐日暮高唐夢。繞盡行雲不到秦。

分賦臺

突兀高臺壘土成。人言暴客此分羸。飲泉清節今寥落。可但梁山獨擅名。

漫成

階下青苔砌上莎。春深烟雨自相和。幽蘭生在空山裏。縱有清香柰爾何。

春雨三絕句

春雨和風細細來。園林取次發枯荄。古墻芳草無生處。一滴還成一點苔。

翠麥黃花爛熳春。蒼顏皓首別離人。相看一笑渾成夢。又見汀洲老白蘋。
一雨如膏五日泥。長烟不散草萋萋。殷勤分付墻邊柳。爲挽流鶯自在啼。

秋興二首

娟娟西風起白蘋。妖紅媚綠看成塵。九衢車馬如流水。盡是邯鄲夢裏人。
梁間燕子去悠悠。絡緯寒蛩管領秋。誰遣莊周化胡蝶。不勝憔悴爲花愁。

題梧桐折枝翎毛圖

瓊柯碧葉兩參差。又是西風白露時。鳳鳥不來嘉實晚。小禽啣上最高枝。

題竹根小禽圖

竹露無聲墜碧柯。小禽相對啄秋莎。江湖鴈鷺肥梁稻。罨繖連天雨霧多。

題畫貓

碧眼烏圓食有魚。仰看胡蝶坐階除。春風漾漾吹花影。一任東郊鼠化鴽。

過閩關

天上絲綸啓玉封。歡聲雷動八州同。閩江渺渺通炎海。添作恩波到日東。

題竹木石圖二首

凌霜傲雪無人問。拂水梢雲意自閑。願就姮娥借明月。臥看鸞鳳舞空山。
古木蕭森傍水隈。鳳凰飛去不飛回。披煙細看蒼葦葉。知是湘君淚濕來。

題蟹二首

殼闔犀角手鬪兵。沙堤潮落可橫行。稻根香軟蘆根美。未覺江山酒興生。
擁劍橫行氣象豪。渾疑縑素是波濤。能令吻角流饑沫。莫向牕前咤老饕。

題枯木圖

幹排風雨三千尺。根老冰泉八百年。不用江頭喚元緒。何妨湖上識神仙。

題陳太初畫扇

炎天玉燦水銀流。琴上薰風可解憂。不負吾皇麟趾意。只今誰是富民侯。

詠史

姦雄盜竊幸傾危。只道冥冥便可欺。想得民心思漢日。正當楊子劇秦時。

遣興

一炷清香一卷書。此身安處是吾廬。綠槐翠柏宜長日。門外何須長者車。

題明皇幸蜀圖

斜陽慘淡照霓旌。石棧縈紆僕馬羸。想得林間子規鳥。斷崖青壁亦相隨。
裂帛聲中發禍機。白華歌斷草萋萋。可憐蜀道三軍恨。不記他年武惠妃。

題柯敬仲墨竹

蒼龍倒掛不入地。回首卻攀雲上天。夜深雲散明月出。化作脩篁舞翠烟。

移梅亭

貫石梢雲一樹梅。誰教移向畫堂栽。月涼夜色清如水。其那樓頭玉笛哀。

題趙仲穆畫眉圖

有美清揚婉且閑。橫雲吐月鬪彎環。平生不識張京兆。卻對粧臺寫遠山。含簧茹管細相和。語困春風意更多。驚起佳人應有恨。雙蛾蹙損不成歌。

題畫山水

澹澹輕煙窳半林。涓涓飛瀑瀉遙岑。偶然坐石觀流水。不記還山路淺深。

題石末元帥扇上有陳太初畫松

老松根幹如鐵石。般匠不知空谷深。水夜高風吹萬竅。商聲滿地作龍吟。

題渭橋圖

百戰平城憤未銷。武皇赫怒屬天驕。可憐陵樹秋風後。貂帽駝裘拜渭橋。

皆春亭

草色青青日色黃。暖煙烘露百花香。曉窗夢入桃園去。驚覺啼鶯在綠楊。

題小景

江頭日日起西風。江樹驚寒葉變紅。天澹雲低何處鴈。一行飛下荻花中。

題梅花小禽圖

三鳥翻翻海上來。一雙飛去入瑤臺。可憐鍛羽空山裏。獨立寒枝怨野梅。

題湖山煙雨圖

湖上青山煙雨寒。湖中一棹欲歸難。白蘋自老東風裏。腸斷黃昏獨倚闌。若耶溪上雨聲來。秦望山前霧不開。欲渡鏡湖尋禹穴。蒼藤翠木斷猿哀。

次韻和王文明絕句漫興十八首

芙蓉湖上夕陽低。楊柳枝頭一鳥棲。獨倚闌干看山色。白雲飛過若耶溪。年華如水去堂堂。何處無愁不斷腸。天上羣僊風雨外。人間明月夜淒涼。解印澗明柳映門。床頭酒盡臥空尊。牕風吹破羲皇夢。閑看山雲起石根。竹根草葉垂書帶。苔面蝸涎學篆文。坐到博山香燼歇。不知新月出微雲。眼見繁花開滿林。卽看嫩葉綠成陰。村鷓啼落西山月。一夜相思萬里心。澹澹輕風冷透衣。冥冥細雨客思歸。若爲化得遼東鶴。遠逐浮雲汗漫飛。天邊雲氣來須女。湖上輕雷起少男。一陣微涼疎雨過。滿池蓮蕊綠如簪。風翻竹擗空林響。雨絕蛛絲落蕊懸。長日掩關無客到。一眉山水對嬋娟。江北江南幾驛亭。可憐強半草青青。夜涼月白西湖水。坐看三台上將星。舊游何處渺煙蘿。幾度相思夢玉珂。莫向天涯苦回首。野猿木客恣經過。東海鯨鯢倒百川。西江波浪阻征舡。誰能散髮空山裏。學取希夷石上眠。

夢裏分明到廣寒。夢回月落斗闌干。碧桃吹盡無人覺。滿袖西風涕泗漣。
曉晴何處一黃鸝。飛上花枝款款啼。獨坐小窗歌伐木。偶然懷古憶祈奚。
釣得槎頭縮頸魚。隔牆有酒貫錢沽。近來酒價如珠玉。獨飲千錢不要扶。
樓頭新月鬪弓彎。樓外青山對客閑。深夜忽然思往事。夢隨孤鶴遶雲間。
一自江淮作戰場。城池無處不金湯。轅門須識黃公略。莫與蕭娘競粉粧。
草廬不枉達官車。長日惟消滿架書。睡足北牕清似水。數聲殘角起城烏。
故鄉蛇豕滿柴荆。異域風塵嘆此生。至竟迂狂成濩落。可憐天地一浮萍。

題美人書紅葉圖

紅葉隨波豈自由。綵毫空復寫綢繆。無人解識詩中意。天上塵間總是愁。

送鮑生之閩中

青青芳草夾長堤。漠漠輕煙送馬蹄。他日相思建溪上。棠梨花發鷓鴣啼。

題米氏小景二首

陌上春風紫翠重。煙含汀樹淡還濃。夜來水漲溪橋斷。應是雷霆起蟄龍。
春霧昏昏雨散絲。溪流拍岸小橋危。猿啼鳥叫山鬼出。正是行人腸斷時。

題安石蒲葵圖

東山導騎出巖阿。能使枯蒲貴綺羅。卻恨卞和無祿位。中宵抱玉淚成河。

題滄江獨釣圖

山繞滄江一釣舡。又隨斜日下長川。小魚不食大魚去。風定遠林生白煙。

題二喬圖

江上桃花紅粉腮。偶然吹入玉堂來。東風日暮和煙雨。多少飄零委綠苔。

題小畫

夕陽山下水鱗鱗。一葉輕舟釣白蘋。謾道江湖堪浪跡。荻花風雨更愁人。

惆悵二首

紫薇花樹小樓東。日炙霞蒸似錦紅。過了春風到秋露。可堪零落碧苔中。與君爲別幾清秋。鴻鴈來時輒上樓。今日倚樓無鴈過。斷腸風水隔瀛洲。

次韻和石末公見寄五絕

榷楠割截爲椽杙。歲暮搜材到柞薪。悵望無因見夏后。再平水土敍彝倫。廟略能回十萬夫。詩書卻穀近來無。何由入奏明光殿。指點山河一統圖。春滿郊原樂意融。野花庭草競纖穠。惟餘陵上青青柏。不向東風改舊容。越溪清水淬干將。鬼魅驚啼畏夜光。不共鉛刀爭利鈍。何妨玉匣且深藏。漢殿千門錦繡開。不堪一夜柏梁災。魯般骨朽蕭何死。腸斷無人爲取材。

過蘇州九首

姑蘇臺下垂楊柳。曾爲張王護禁城。今日淡煙芳草裏。暮蟬猶作管絃聲。
姑蘇臺下垂楊柳。落葉蕭蕭日暮風。天地山河有真主。迎來送往總成空。
憶昔吳宮無事時。滿城楊柳舞西施。如今柳盡西施死。恨殺當年陌上兒。
陌上清歌最可聽。誰知此是斷腸聲。就中更有楊枝曲。恨殺昏鴉及曉鶯。
虎丘山下月朦朧。閨闔門前動地風。子夜一聲琴一闋。杜鵑聲在碧雲中。
燈映前牕紙不鳴。四隣無語犬號聲。南陽已起爲霖了。何用人間更得名。
滿地寒風滿面塵。荒煙白草舊通津。晏安酖毒俱亡國。可但西施解悞人。
成敗由天衆所知。烏江拔劍更何疑。誰言碧海刺蛟手。也學臨春井底兒。
小雨如膏漬陌塵。一溝寒碧曉生鱗。餘年已自無多子。更向途中見早春。

題畫菜戲呈石末公

列鼎羔羊厭膾肥。園官菜把莫嫌微。年來騎士工墜突。此物人間亦見稀。

漢世祖

白水龍飛紹赤精。鷓鴣盡入太官羹。三驅只貸樊崇死。侯印應慙不義名。

涼夜

瀟瀟涼雨瀉簷瀧。聒聒鳴蛙似吠龐。惟有露螢憐寂寞。卻將光景到書牕。

五月十九日大雨

風驅急雨灑高城。雲壓輕雷殷地聲。雨過不知龍去處。一池草色萬蛙鳴。
次韻和石末公二絕

囊裏金多嫂自迎。殼中珠滿蚌能明。文犀亦有通靈角。天上龍鰲盡可撈。
徒聞彈鋏怨無魚。未見兼程貢蠟書。四海城池總完壁。只今誰是闕相如。

白塔寺

物換星移事已迷。從來此地惑東西。可憐如鏡中天月。獨照城烏夜夜啼。

題風中水仙花圖

凝妬封家十八姨。不爭好惡故相欺。沅湘日暮波濤起。翠薄瑤翻欲渡遲。

送醫士賈思誠還浙東二首

西風嫋嫋水鱗鱗。一曲離歌淚滿巾。殘柳數株鷗數點。夕陽江上送歸人。

落木長亭獨客回。塞驢聊可當驚駘。還山須種千株杏。等待仙華道士來。

絕句漫興七首

一歲三春好景光。紛紛紅紫競芬芳。芙蓉亦有傾城色。不見東風卻拒霜。
風散螢光夜未分。隔窗涼雨落紛紛。秋衾不與還鄉夢。征鴈南來獨自聞。
碧瓦涼生月欲流。露蛩楓葉共啼秋。城烏半夜驚飛起。只爲離人白盡頭。
多事池邊促織兒。聲聲哀怨旅魂知。干戈滿地無機杼。長夜辛勤說與誰。

伐木丁丁谷響傳。樵櫟樸其成煙。扶桑不是人間樹。因見滄溟變稻田。
愁極每將歌當哭。歸來不覺笑成狂。蓬山縹緲鯨鯢外。一夕相思九斷腸。
永夜西風嫋嫋來。露華如玉委蒼苔。碧雞啼落山頭月。腸斷槐根夢不回。

憶昔二首

憶昔上林花發時。黃蜂撩亂蝶參差。如今花落枯枝在。付與秋蟲掛網絲。
憶昔揚州看月華。滿城絃管滿人家。可憐今夜中秋月。獨照寒蛩泣細沙。
呼燈

溽暑蒸人百體柔。中宵揮汗想清秋。西風一夜吹庭樹。驚起呼燈問敝裘。

磨石岡作

磨石岡頭雲濕衣。謝公墩上雨霏霏。西風忽捲殘陽出。臨水登山忘卻歸。

夜坐二首

露泣寒螢暗斷魂。風驚簷鐸語黃昏。羈愁悄悄成危坐。看盡空牆上月痕。
蟲響莓苔葉響廊。月光如雪露如霜。銅壺管領催華髮。一夜應添百刻長。
送別

送別江頭日欲沉。落潮風急鳥歸林。秋雲恰似人情薄。秋水還同客恨深。

無寐

夜長無寐待鳴雞。及至雞鳴夢卻迷。驚起朝陽斜照屋。一眉殘月在天西。
棲鳥

歸鴈將秋入楚天。薄雲開月伴愁眠。露寒葉動棲鳥起。一叫千聲落枕邊。

羲和

斷梗枯莖付野蒿。冷風涼雨剝征袍。羲和只在嵎夷宿。自是金烏未發毛。

紈扇

樹頭風露咽玄蟬。錦褥新張竹簟捐。紈扇團團霜雪色。好藏篋笥待明年。

漫成二首

沉水香銷金博山。月滿樓臺深夜寒。瑤琴弦絕不可彈。葉落烏啼尋夢難。
江水如天月如水。落葉蕭蕭夜風起。一寸愁心千萬里。不見行人應未已。

詠史

六雄糜沸擾天綱。天下嗷嗷望禹湯。多事秦皇能一統。卻教人憶楚懷王。
天與聰明作大君。應天在實豈虛文。重瞳若解行仁義。不枉芒碭五色雲。

有感七首

物換星移事已迷。重來舊處感東西。可憐如鏡天邊月。獨照棲烏半夜啼。
焚書千古訝嬴秦。逃難茫茫走縉紳。尚憶商山近京洛。白頭容得採芝人。

甲楯孤棲死不疑。那將宗社換西施。想應宵膽秋風夜。恰似無忘構李時。
鴻鴈來時月滿天。客途僮僕自相憐。荒村觸眼惟茅屋。榆柳蕭疎起暮煙。
黍穗高低菊有華。塵居恰似野人家。夕陽日向西牆過。只爲微生換鬢華。
魚鹽充物稻梁肥。誰寤繁華是禍機。日暮無人嗔亡國。寒雅猶帶夕陽飛。
漫漫陽春不見秋。人生得意總忘愁。茱萸謝盡芙蓉發。清夜吹笙月滿樓。

送金華何生還鄉觀省 五首

金華山色翠亭亭。會駐仙人白玉幘。羨汝結廬松柏裏。臥看鸞鶴下青冥。
尙想高人何北山。談經論道此山間。故家文物依然在。似汝須歸玉笏班。
漫漫東風吹綠繁。行人江上發歸軒。想應今夜春山月。華髮蕭蕭正倚門。
樓外桃花紅錦披。當花把酒映花枝。慈親飲酒看兒笑。記摘桃花洗面時。
送兒出去望兒歸。石盡雛鴉弄夕暉。清曉開門兒卻到。蠨蛸飛上老萊衣。

春日雜興 八首

采石磯頭春水平。長干橋下暮潮生。誰能載酒尋芳草。楊柳堤邊信馬行。
過雨柔桑纒綬新。涵風細麥碧波勻。鳴鳩語燕聲相應。又是人間一度春。
春霧冥冥木葉稠。蒼鷹拂羽化爲鳩。莫將松桂夸桃李。柱下先生早白頭。
日自西馳水自東。落花飛絮總隨風。舊巢燕子今何處。煙雨庭臺似夢中。

花競嬌嬈草競芳。縱橫只是爲春忙。天桃穠李先飄落。不及薔薇與海棠。
細雨冥冥晝掩扉。更無芳草有垣衣。人生一世邯鄲夢。老病無眠夢亦稀。
雨隱滄江霧隱山。鄉關迢遞寄書難。病來只盼春風到。不擬春風曉更寒。
日出江空曉氣柔。白蘋風起渚煙收。夜來一餉三更雨。送盡飛花入海流。

題陳大初畫扇三絕

一道滄江隔戰塵。白蘋風起浪鱗鱗。新亭滿眼神州淚。未識中流擊楫人。
泛湖浮海兩如何。滿地悲風起白波。爭似乘槎隨博望。玉繩光裏看山河。
水淨沙明一葉舡。釣絲牽月過長川。五湖何地宜生理。我欲從之問計然。

七月七日

百年佳會幾今宵。脉脉相看一水遙。漫道天孫解專巧。卻教烏鵲爲成橋。

夜泊桐江驛

伯夷清節太公功。出處非邪豈必同。不是雲臺興帝業。桐江無用一絲風。

卽景二首

江城五月冷脩脩。細雨微風拂面愁。汀蓼不知猶是夏。競開丹粟滿枝頭。
薄寒輕雨細如絲。風滿長川棹去遲。漠漠野田將暝色。纖纖汀草欲青時。

御柳二首

御柳青青陰綠池。迎春擢秀不違時。皇恩天地同生育。雨露無私爾最知。漫漫春風入舜韶。綠楊舒葉乳鶯調。君王不爲娛聲色。無用辛勤學舞腰。

苕溪皇甫秀才幽居二首

玄晏先生一草廬。萬竿脩竹五車書。日高無客來驚夢。自謂公侯總不如。天日山前苕水流。野華啼鳥自春秋。滄浪清濁吾何預。坐聽松風笑許由。

遺興

萋萋芳草掩重門。幾樹斜陽照斷魂。坐愛微風起蘋末。月明簷鐸語黃昏。

梅花七絕句

風林凋盡碧琅玕。的皜梅花好自看。霜白月明殘雪夜。一枝危拂斗杓寒。羣山積雪慘晴曦。石裂玄冰萬木披。不是孤芳貞不撓。陽和爭得上枯枝。紫府仙人夢綠華。暫拋瓊苑到天涯。斷魂應化爲蝴蝶。夜夜歸來阿母家。稀疎寒玉小樓東。骨冷魂清五夜風。惟有翠禽憐寂寞。一雙相倚月明中。蕊宮仙子魏雲鬢。姑射神人薄鍊顏。借問高標誰得似。白頭蘇武在天山。瓊跗玉葉兩依依。搖落空山物色微。青女不知幽獨意。忍寒猶自妬芳菲。微陽穉綠未能還。四海昆蟲總閉關。只有梅花見天意。先將春色到人間。

雪中三首

竈下孤煙鬱曉炊。簷前寒鳥啄枯籬。瓊瑤滿地無行跡。正是袁安獨臥時。
一夜雪深一尺餘。平明烏雀噪塔除。移床漫向明牕下。圖得清光好照書。
漠漠隨風結遠埃。輕輕糝地集枯荄。春前有意呈三白。知是陽和次第來。

雪後遣興

朝寒布穀應時鳴。起向回廊獨自行。殘雪未消簷影寂。滿庭幽草看春生。

絕句二首立春夜聞蛙鳴作

鬼門竹管動輕灰。春色先從地底來。月落江城聞畫角。五更殘夢一時回。
輕輕細雪點枯池。嫋嫋東風拂樹枝。春到草根人未覺。夜來先有蟄蛙知。

絕句九首

異鄉風景不知春。滿地蒼苔一病身。睡起無人問幽獨。杜鵑聲在綠楊津。
花自飄零草自榮。何須惆悵獨關情。高軒日永成危坐。隔水風來聞鍛聲。
雨餘煙柳約青絲。風過芹塘澹碧漪。正是愁來無着處。綠陰庭館暮寒時。
一樹穠華半夜風。平明枝上十分空。黃蜂紫蝶紛紛去。留得蒼苔藉碎紅。
槐葉陰陰覆短牆。微風細雨麥秋涼。如何一歲三春景。不及閑牕午夢長。
淮水東邊舊六朝。瓊樓翠館白雲銷。于今只有垂楊柳。猶似當時舞細腰。
花落江皋宿雨晴。野煙消盡見蕪城。鳳簫一去無回日。不及年年綠草生。

天暫長江似海深。江頭山鬼笑埋金。東家釀酒西家醉。世上英雄各有心。
暖風吹帳日光遲。恰似清和四月時。黃鳥不知人嬾起。未明啼上綠楊枝。

半山寺二首

王家廢寺舊聞名。荆棘花開鳥自鳴。深夜狐狸穿破塚。佛燈爭似鬼燈明。
奸邪變法事多端。氣煞興妖膽自寒。漫道諂諛堪媚佛。竟將佛作麼人看。

絕句漫興十一首

風光何故惱閑人。我欲乘槎一問津。滿地綠陰迷斷夢。五更啼鳥不勝春。
殍葵燕麥舊人家。曾唱南朝玉樹花。寒暑又隨風日轉。東陵誰種邵平瓜。
莫道花開便是春。莫言沙漲卽成津。南風過了東風起。愁殺江頭待渡人。
新鷺枝上語如絲。似與羈魂話所思。不用登樓看草色。白蘋香散已多時。
相思舉目萬重雲。燕去鴻來杳不聞。漫說黃金能得士。只今誰是望諸君。
五湖風雨夜垂綸。一葉扁舟一粟身。至竟雲濤歸大壑。煙波還屬釣魚人。
病客無錢試藥方。出門聊復信行藏。爭知頭上蕭蕭髮。卻與遊絲較短長。
池面新荷貼小錢。荷心點點露珠圓。開花結子應堪待。亂荇空萍正可憐。
娟娟江風轉白蘋。輕花亂葢看成塵。誰能燕取生犀角。采石磯頭照水神。
日落羣山返照餘。槐陰夢覺夕陽初。夜閑不畏更籌短。收取流螢映讀書。

白鷺洲邊白鷺鷺。一雙相對立灘褰。日斜隔水分明見。不分人間有別離。
漫成三首

八駿茫茫去不回。白雲歌曲使人哀。鯪魚風起鯨鯢湧。青鳥何由海上來。
瞿塘怒水激天風。回首童顏變老翁。落日長年鳴櫓過。白鷗飛出浪花中。
微涼生袂一登樓。落照歸鴉點點愁。誰似孤雲獨無事。隨風直到海西頭。

不雨遣悶二首

朝霞不作黃昏雨。暝靄徒爲白晝風。日上高林啼布穀。聲聲只在短牆東。
池上芹泥卽漸乾。梁間燕子拾蟲難。綠窗無限傷春意。看盡斜陽更倚闌。
雨餘

枯池得雨鬧羣蛙。蟹螯含漿總有家。爲愛微涼宜曉夢。不知晴日滿庭沙。
無題絕句二首

花自飄零水自流。無情有恨月如鉤。十年一枕三更夢。贏得風煙滿地愁。
後夜蛾眉約淺黃。河邊猶翳玉繩光。不知何處藤蘿上。全見姮娥一面粧。
春蠶

可笑春蠶獨苦辛。爲誰成繭卻焚身。不如無用蜘蛛網。網盡蜚蟲不畏人。

晚興

麝草餘光滅又明。微風不起夕涼生。絕憐一餉池塘雨。只得青蛙半夜聲。
睡起

濃綠當軒日上遲。病身只與睡相宜。覺來卻恠莊周蝶。繞盡殘枝過別枝。

喜雨寄夏允中五絕

好雨知時五月零。豆苗瓜蔓一時青。老夫亦起中庭立。兩眼看天似醉醒。
隱隱輕雷不起風。濛濛密雨遍長空。枯根發秀新莖長。小草那知造化功。
渙汗如蒸被體流。日高強起倦梳頭。多情一夜千山雨。消盡人間萬斛愁。
水鶴長鳴應九陵。山雲處處上如蒸。定知谷鮒從今後。不向西江乞斗升。
江暗天低雨腳垂。屋鳴簷瀉入枯池。卻憐似鏡新荷葉。不見魚跳鷺浴時。
無題

槐映高樓柳映墀。風來唯有鵲先知。長應別殿黃昏後。記得金宮妬寵時。
將曉

月落牕餘白練光。滿天清露結爲霜。東風可是無情思。吹出新楊一樹黃。

江行雜詩九首

采石江頭山插天。江泉激石鳴湘絃。十年戰血汚江水。水中鬼神應醉眠。
三生磯上星滿灘。白煙如雪浮林端。水妃夜解玉佩去。清淚滴成紅木難。

馬當之山中江中。其下乃是馮夷宮。良宵月出江水底。行人喜甚天無風。
九龍山西日沉。江雲壓地生層陰。汀洲無人蘆葉響。咆哮一聲風滿林。
皖口孤城江水傍。城上猶有愁雲黃。豺狼魑魅相食盡。忠魂白日長垂光。
桑落洲邊春草生。宜城九醞空傳名。百年世事同醉夢。愁聽野猿啼到明。
江盤峽束雷彭浪。孤山如筆江中央。坤靈不放厚地裂。應有潮汐通扶桑。
長江水濁湖水清。石鍾濤擊鯨魚鳴。山頭出雲山下雨。揚瀾左蠡何時平。
江州太守文儒宗。罵賊就死真從容。天翻地覆元氣在。斯人萬古其猶龍。

鍾山作十二首

紫桂吹香媚小山。月華的皪滿林間。坐來涼氣生虛室。知是山雲作雨還。
松露滴塔星在天。草蟲相弔響如絃。寶公塔上西風急。半夜林鴉不得眠。
九月江南葉未黃。空山松栢夜深涼。玄蟬且莫催徂景。留取幽蘭作晚香。
玄武湖中草自秋。石頭城下水長流。繁華過眼成今古。更與牛羊競一丘。
春去秋來榮復衰。花殘葉落總堪悲。誰能句句曲山中去。乞取茅君一虎騎。
北斗闌干夜未央。鐘殘虛牖出天香。佛燈相對坐宵寂。墜露滿林生白光。
一炷清香一卷經。世間無事是山僧。何須更卓飛空錫。長使時人恨不能。
月落山空霧未開。風生咆哮虎響如雷。樹頭驚鵲相呼起。欲下還飛一百迴。

白鴈蕭蕭柿葉紅。野花開盡六王宮。空餘一道秦淮水。著意西流竟向東。
策杖登山信早涼。山花澗草總能香。捫蘿抱水歸來倦。不掃蒼苔臥石床。
嬾婦西風散白蘋。冥冥落日起黃塵。青娥不分秋容寂。故染楓林似老人。
槁葉含風彈夜絃。螻蛄淒唳答寒蟬。雞鳴埭上繁華子。莫向秋霜惜盛年。

有感

浪動江淮戰血紅。羽書應不達宸聰。紫微門下逢宣使。新向湖州召畫工。

題畫魚二首

爲愛濠梁樂有餘。故拈兔穎寫成圖。秋風忽憶銀絲鱸。腸斷松江隔具區。
九跋無人詠鱗魴。河墳有客歎牂羊。不知生意能多少。爭得鯤鱣滿尺長。

無題三首

一片浮雲萬里心。海波無底未爲深。虞淵險迫羲和疾。空使傍人詫鄧林。
玉樹沉沉結夜愁。金陵蔓草沒荒丘。誰言錦纜江都去。不見金陵蔓草秋。
黃鶴高飛雲路遐。野鳧謀食但泥沙。山中樗櫟年年在。看盡西風木槿花。

題墨菊

粲粲金英美可餐。九秋風露與清寒。墨君莫妬天然色。終遣靈均怨子蘭。

題沙溪驛

澗水彎彎繞郡城。老蟬鳴作車輪聲。西風吹客上馬去。夕陽滿川紅葉明。
過關九首

關頭霧露白濛濛。關下斜陽照樹紅。過了秋風渾未覺。滿山秔稻八閩中。
峻嶺如弓驛路賒。清溪一帶抱山斜。高秋八月崇安道。時見棠梨三兩花。
建溪激箭向南流。石齒如鋒鬪客舟。篙子踏歌渾不畏。行人遙望替生愁。
驛路高低度嶺關。攙離人語雜夷蠻。江花巧似駝茸白。山果渾如碼碯般。
飯浙香瓊酒激霞。驛亭到處只如家。征夫但恐咨詢闕。莫向天涯怨路賒。
漠漠輕雲結晚陰。依依斜日掛遙岑。炊煙忽起桑榆上。散作鮫綃抹半林。
道上黃埃撲馬鞍。汗流如水透中單。忽驚踈雨林梢過。急換羅衣更怯寒。
劍水悠悠南去深。黃茅苦竹自成林。日烘溪霧生秋瘴。風攪山霏作晝陰。
嶺上高秋生火雲。狂雷送雨忽紛紛。鷓鴣更叫空山裏。縱是無愁亦厭聞。

題畫紅梅

水晶宮裏玉真妃。宴罷瑤臺步月歸。行到赤城天未曉。冷霞飛上綠銖衣。

題扇面牡丹花

沉香亭畔月華流。掌上孤鸞鏡裏愁。舞罷春風卻回首。六宮紅粉總包羞。

題扇面荷花

玉井芙蓉紅粉腮。何人移向月中栽。高軒忽漫看圖畫。疑是昭陽曉鏡開。

秋日卽事十五首

秋風吹雨冷脩脩。塔下金錢爛漫愁。鴻鴈不來巢燕去。草蟲辛苦獨知秋。
楊柳新栽半出籬。夜深烏鵲自驚枝。露涼月淡空煙暝。啼到金雞報曉時。
九月東風露不寒。蟬蛄相慶語簷端。野人便擬開荒徑。剩種忘憂與合歡。
搖落江皋草滿煙。秋光何處不堪憐。夜涼銀漢低城闕。臥聽蛩聲似箎絃。
春華秋草兩悠悠。素髮多情卻滿頭。落葉自隨流水去。遠山空帶夕陽愁。
垂垂密雨鞞脩楊。點點青苔繪短牆。不是鴈聲天畔過。爭知今日是重陽。
秋氣蕭條宋玉悲。西風唯有鴈相宜。秦淮岸上青青草。想見繁霜未落時。
寒星無數月如鉤。槁葉呼風入敝裘。人世可憐唯有老。鏡中憔悴夢中愁。
掛壁青釭照不眠。相看到此亦堪憐。露寒霜重殘螢盡。腸斷秋風憶往年。
病眼昏昏四顧迷。獨行渾似雪中雞。花開葉落真成夢。愁聽門前過馬蹄。
權華數樹夕陽時。收拾秋光在短籬。白紫自紅還自碧。祇應獨有暮蟬知。
滿天星月一庭煙。坐掩衡門思悄然。漫想明珠成薏苡。卻嫌黃菊似金錢。
踈雨鳴簷月在雲。馬蹄初歇夜將分。鴈行卻向城頭過。何處砧聲隱隱聞。
江上秋高暑未歸。照書猶有數螢飛。東風可是憐游子。不遣看天憶授衣。

北風吹鴈過蕭蕭。旅館青燈共寂寥。蓬髮一時成白雪。老來禁得幾秋宵。
題水墨海棠鸚鵡

隴山鸚鵡白霓衣。欲語誰聽只自知。漫漫東風吹不起。海棠花上立多時。

誠意伯文集卷之十八

詩餘

河傳 江上作

江上風過水生紋。煙裏斜陽半暝。雨聲不堪客耳聞。紛紛夢魂迷斷雲。夢斷天涯歸路杳。天欲曉。殘月窺牕小。木蘭舟。蘆葦秋。汀洲藕花相伴愁。

滿庭芳 詠荷花

楊柳煙銷。梨花雲散。瑤臺別是風光。翠霞深處。誰舞白霓裳。三十六宮向曉。鳳綃擁。紅粉成行。珠簾外。風翻瑞葆。驚起紫鴛鴦。含情空悵望。衾寒鄂渚。佩冷瀟湘。怨凌波塵襪。不度銀潢。只恐青娥嬌妬。相將見。葦白芹黃。淒涼也。一天墜露。明月在池塘。

玲瓏四犯 台州作

白露點珠。明河生浪。秋光看又一半。翠衾知夜永。清夢冷孤館。南樓數聲過雁。西池桂花零亂。歲序如何。江山若此。贏得鬢霜滿。傷心謾回愁眼。見蛩吟蔓草。螢度荒曠。淚隨黃葉下。事逐浮雲散。滄波袞袞東流去。問誰是。登樓王粲。菊綻籬邊。賦歸來恐晚。

江神子

霏霏輕雨弄秋光。野煙蒼。晚風揚。征雁將愁分付與寒蟄。聽外聲啼到曉。人不寐。夜何長。滄江波浪去茫茫。莫思量。使心傷。離外黃花只作舊時香。歌罷歸來深對酒。今古事。總淒涼。

浪淘沙 秋感

江上晚來風。煙藹濛濛。白蘋吹盡到丹楓。流水落霞衰草外。離恨無窮。極目楚雲東。愁見歸鴻。拒霜相倚夕陽中。露重月寒芳意歇。知爲誰紅。

浪淘沙 感事

天際草離離。鴻鴈南歸。冷煙凝恨鎖斜暉。胡蝶不知身是夢。飛上寒枝。惆悵倚闌時。總是傷悲。絕憐紅葉似芳菲。清露自凋楓自落。沒個人知。

淡黃柳 台城秋夜

江城夜寂。何處吹羌笛。城上月高風淅淅。翻動林梢敗葉。一片琅玕下空碧。倦遊客。鄉關暮雲隔。謾回首。盼歸翼。想柴門流水依然在。白髮參軍。青衫司馬。休向天涯淚滴。

調笑令四首

秋雨。秋雨。窗外白楊自語。夢回月在空廊。燈影朦朧。夜涼。涼夜。涼夜。露冷芙蓉花謝。沙燕沙燕。別去幾時重見。汀洲芳草纖纖。細雨微風捲簾。簾捲。簾捲。人與碧梧俱晚。白露。白露。點我庭前芳樹。樹中有箇棲鴉。啼到銀蟾影斜。斜影。斜影。照見羅幃夢冷。紅樹。紅樹。粧點天涯秋暮。淡煙衰草黃昏。露冷啼螿斷魂。魂斷。魂斷。明日玉臺霜滿。

菩薩蠻 越城晚眺

西風吹散雲頭雨。斜陽卻照天邊樹。樹色蕩湖波。波光豔綺羅。征鴻何處起。點點殘霞裏。月上海門山。山河莽蒼間。

漁家傲

江上秋來惟有雨。江城九月猶炎暑。泉湧中庭苔上柱。深閉戶。莎籬露泣寒蟬語。征戍誅求空軸杵。千村萬落無砧杵。玉帳悠悠閑白羽。愁正聚。亂鴉啼破樓頭鼓。

小重山

城上高樓接海椒。疎林藏不盡。欲棲鴉。回廊曲檻別人家。征鴻外。風冷夕陽斜。燈暗鼓三擲。望中煙隱。樹。月籠莎。白雲如夢繞天涯。梧桐雨。和淚滴寒沙。

虞美人 有感

秋來日日煙含雨。不肯收殘暑。小桃錯認是春回。盡把枝頭紅綠向人開。白雲流水青山遠。門掩蒼苔晚。草間蜂蝶未須忙。後夜雲英和月結成霜。

喜遷鶯 殘夜

書角嘶。篆香清。斜月淡。疎櫺露寒。霜冷鵲頻驚。歸夢不曾成。湖上數聲沙鳥。河漢漸低。木杪起看北斗。待天明。雲白日華生。

水龍吟 次韻和陳均從吹簫曲

秦臺人去無踪。空餘綠樹連天表。瑤京路遠。巖山夜永。離愁縈繞。露咽秋蟬。霜棲白鶴。月寒煙裊。想孤鸞舞罷。碧桃花盡。長是怨多歡少。夢裏駟車過處。見蒼梧九峯青小。脩篁染淚。滄江流恨。年年不了。廣莫風悲。昭華玉冷。聲沉雲杪。又扶桑日上。靡萍光散。蓬池春曉。

水龍吟

雞鳴風雨瀟瀟。側身天地無劉表。啼鴉迸淚。落花飄恨。斷魂飛繞。月暗雲霄。星沉煙水。角聲清裊。問登樓王粲。鏡中白髮。今宵又添多少。極目鄉關何處。渺青山。髣髴低小。幾回好夢。隨風歸去。被渠遮了。寶瑟絃低。玉笙簧冷。冥鴻天杪。但侵階莎草。滿庭綠樹。不知昏曉。

浣溪沙

處州葉叔安溪南草堂

細草垂楊村巷幽。白沙素石引溪流。青苔磯上有扁舟。門外好山開罨畫。屋頭新月學簾鉤。窻風一榻似清秋。

長相思

晚興

晚風清。晚雲輕。雨意將成又不成。斷檝天際明。舊恨盈。新恨生。立到樓頭河漢傾。無人知此情。

踏莎行

瓶水知秋。池荷怨晚。有人樓上吹清管。月明夜寂卻堪聽。可憐剛被風驚斷。楚澤吟悲。槐根夢短。江山處處傷愁眼。欲憑青鳥寄殷勤。波濤無地蓬萊遠。

江神子

西風吹樹簾涼初露如珠。月如梳。鴻雁無情不帶半行書。謾倚闌干成小立。人老也。倩誰扶。中庭梧葉待霜踈。有棲鳥。夜相呼。門外一池寒水落芙蓉。爲問閑愁還幾許。多似草。不勝鋤。

青杏兒

獨自倚闌干。西風起。玉宇清寒。夜深月轉長河曲。踈螢度竹。啼螿依草。涼露溥溥。莫把素琴彈。冰弦上。商冷宮殘。萬牛不挽東流水。悠悠碧落。茫茫雲海。疊疊髮端。

摸魚兒 傷春

問春光。尙餘幾許。傷心前夜風雨。天桃豔杏都吹盡。蘭蕙變成荒楚。春欲去。但渺渺青煙白水。迷津渚。多情杜宇。有恨血滋宵。哀音破曉。千叫一延佇。蓬萊路。還是鯨濤間阻。神仙縹緲何處。瓊樓玉殿深留景。不見下方塵土。誰最苦。暝色滯雙飛燕子。歸無主。那堪訴與。又暗壁殘燈。重門轉漏。嗚咽夢中語。

虞美人

桃花半折臘脂蕊。鶯語東風裏。坐來簷日轉牆陰。時見黃蜂帶粉出花心。長煙不散萋萋草。人與春俱老。知人老去願春遲。無奈滿庭風絮促春歸。

沁園春

白芷生香。綠萍抽葉。還是清明。有殘絲絆雨。危芳怯露。梨雲困蝶。絮雪迷鶯。髮短心長。時殊事異。視物如何不動情。愁來也。怕東風無賴。鷓鴣先鳴。莫思身外虛名。綿綿荒田草樹平。任龍蛇歌怨。桑榆煙盡。山枯石死。畢竟何成。富貴浮雲。窮通定命。守分安常百慮輕。和誰說。又鴉棲高柳。月照層城。

惜分飛

蝶醉蜂迷。鶯不語。門掩一庭花雨。春事無多許。野雲江樹誰爲主。縱有垂楊千萬縷。難綰教春莫。去愁到傷心處。數聲杜宇。青山暮。

沁園春 和鄭德章暮春感懷呈石末元帥

萬里封侯。八珍鼎食。何如故鄉。奈狐狸夜嘯。腥風滿地。蛟螭晝舞。平陸成江。中澤號鴻。苞荊集鴟。輓盡平生鐵石腸。凭闌看。但雲霓明滅。煙草蒼茫。不須踽踽涼涼。蓋世功名。百戰場。笑楊雄寂寞。劉伶沈湎。稽生縱誕。賀老清狂。江左夷吾。關中宰相。濟弱扶傾。計甚長。桑榆外。有輕陰乍起。未是斜陽。

憶秦娥 次石末公韻

陽春月。蜂喧蝶競芳菲節。芳菲節。風狂雨橫。魂消心折。鳳凰臺上簫聲絕。長洲苑裏光陰別。有人愁歎。淚珠成血。

暮山溪 晚春

清明過了。簾幙餘寒淺。芳樹不勝風。任流水。飄紅去遠。煙昏雨暝。天裊海雲低。鷺意懶。蝶魂銷。花盡成秋苑。遊絲落絮。特地相縈絆。無計網春暉。漫贏得。遮人望眼。登高凝睇。欲寄一封書。鴻路阻。豹關深。日暮空腸斷。

憶秦娥

春雨欲庭花。掠亂飄紅雪。飄紅雪。一川芳草。數聲鷓鴣。長煙渺渺青冥闕。江湖波浪行人絕。行人絕。雲

山迢遞。夢魂飛越。

念奴嬌 詠蛙

池塘過雨。有許多蛙。爲誰強聒。乍寂還喧。如聚訟。觀縷宮商爭發。嘔啞蠻歌。兜離鞞唱。頰齒相敲。敲可人幽夢。驚回天水空闊。最好白石清泉。被渠翻倒。作蹄涔。丘垤。蚯蚓螻蛄無智識。相趁草根嘈噴。坐井持頤。當車怒目。幾欲吞明月。子陽安在。至今莫辨優劣。

八聲甘州 詠蛙

問青蛙。有底不平鳴。真个爲公私。向污泥曳足。蹄涔接腋。缺甃持頤。斷續儀同歌吹。羹沸綠萍池。鐘鼓難成響。而況塌甃。曾記江湖煙雨。被枕邊。譁噪刺耳如錐。擁輕衾。孤坐。愁到曉雞時。道巴援聲聲是淚。細看來。不似此聲悲。應知得。灑灰著令。千載無疑。

倦尋芳慢 詠雨

翠霞曠日。柱礎生雲。衣袂先冷。石燕飛時。天與亂山俱暝。稍見如絲。隨風細。漸看密灑滄江迥。倚闌干。恁昏忪過了。清和光景。小樓外。榴花間竹。可恨紅英。飄墜苔徑。霧罩陽臺。悵惻夢魂難醒。階下決明。憂爛死。草根得意。惟蛙也。正蕭條。又沉沉。戍鼓夜涼人靜。

渡江雲 初夏卽景

麥秋晨氣潤。嫩涼院落。細雨乍晴時。定巢新燕子。睡起雕梁。對立整烏衣。庭空晝寂。但盡日。簾幙低垂。歸去來。不堪重賦。兩鬢漫成絲。傷悲。斜陽難繫。逝水無回。想佳期。應未愁正濃。如何消遣。惟有心知。瑤琴

調苦弦先絕。任冷落。玉軫金徽。凝望處。啼鴉飛上高枝。

阮郎歸

曉寒楊柳綠如濡。園林新雨餘。紫苔成暈上階除。日高庭院虛。官況懶。世情疎。斷腸芳歲徂。暮雲不見北飛魚。路遙難寄書。

蘇幕遮

次韻和劉宗保

日斜時。山盡處。綠水朱霞。隱映雲間樹。鴻鵠冥冥烏鵲暮。海闊天高。翼短迷征路。路多岐。情沒緒。想極生悲。欲語難成句。忽憶登樓懷士賦。愁着心頭。淚落如零雨。

八六子

晚思

到黃昏。悄無情緒。淒涼又掩重門。盼草際殘陽易盡。雲中征鴈難憑。漫勞夢魂。淵明三徑猶存。白鶴不歸華表。烏鴉自滿荒村。念過眼芳菲。總埋泥土。縱然回首。可堪凝睇。傷心處處。蓬蒿廢井。時時煙雨啼猿。更何言。蒼苔漸深淚痕。

攤破浣溪沙

次劉宗保韻

燕子巢成倦不飛。綠陰鳴蜩靜頻嘶。拄杖獨穿芳草徑。立多時。池面紫錢荷點點。枝頭青彈杏離離。更愛葵花紅粉豔。似崔徽。

江神子

同前

沅湘煙雨夏生寒。怕江干。有離魂。蕙圃蘅蘭。無穢有誰看。愁絕洞庭雙帝子。風颯颯。颯珊瑚。鈞天虎豹

守重關。隔人間。寄音難。腸斷春光正美，卻凋殘。聞說桃源今不見，何處好，把漁竿。

燭影搖紅 重五

筠粉初銷。海榴花外，絲絲雨。青槐綠柳，又新蟬。淒咽黃鸝語。煙草蒼茫何處。想當年三閩故楚。薰蘭蕭艾，蘼蕪蓬蒿，叢施無數。細葛香羅，有人衣袂隨風舉。游鼻不作太官羹。玉燕空雕虎。永晝庭陰自午。一時間，愁情萬緒。寸腸柔脆，未了傷今，那堪懷古。

生查子

槐雲蟬噪鬢。柳露酣啼眼。深院有佳人，坐惜芳菲晚。素手理瑤琴，曲罷空長歎。佇立望青霄，愁水青霄短。

長相思

山悠悠。水悠悠。水遠山長處處愁。那堪獨倚樓。憶歸休。怎歸休。細雨微風冷似秋。綠陰啼栗留。

蔦山溪 詠螢

晚晴池館。月淡燴籠水。草際卻燐微。漸游揚。隨風四起。拂雲穿霧。搖亂玉繩光。高又下。滅還明。點綴林梢。蕪。漢宮遙夜。鏡影深羅綺。莫近繡簾飛。滿階苔。無人有淚。蓬牕凄冷。留取照韋編。天祿閣。校書時。藜杖清暉似。

滿江紅 次韻和石末元帥

華表孤雲。還應是當初相識。回望處。煙塵滿地。燕鴻南北。過眼浮榮胡蝶夢。縈身薄宦猩猩屐。笑村童不認主人翁。呼爲客。鯨鯢起。滄溟圻。藩籬外。生仇敵。恨高門廣廈。鹿場麋跡。大澤猶纏蛇豕氣。賜烏未放。

乾坤白。細看來。還自有青山。長如昔。

阮郎歸 題畫扇

白蘋風起夕陽微。小舟衝浪歸。江潮卻落釣魚磯。天寒紅葉飛。彭澤菊。首陽薇。不知今是非。山林朝市事相違。紫芝強肉肥。

怨王孫

漏悄人靜。星稀雲淡。煙柳成眠。露蓮半頷。何處月色飛來。滿樓臺。微風入袂仍吹領。愁都醒。好个清涼境。紅塵自迥。河漢應有仙槎。待還家。

鷓鴣天 題梅花圖

玉竹冰肌。萼綠華。騎龍飛下太清家。衣飄碧落星芒動。珮拂玄冥月影斜。江水闊。嶺雲奢。香魂散作歲寒葩。畫圖驚見春風面。陡覺精神冷不邪。

醉花陰 夏日

溽暑炊人肌骨軟。夢繞南柯遠。驚起卻依然。碧樹連天。風雨溪山晚。人閑已自成疎懶。事往誰能挽。去紫芝翁。白石清泉。日夜青苔滿。

滿庭芳 二月十一日壽石末公

嶽氣鍾嵩。星精降昴。五雲光燭麟書。綠明紅媚。風暖日長初。金闕斜開洞府。羣仙擁。翠佩瓊裾。收拾盡。乾坤清淑。爲瑞在扶輿。文韜兼武略。南陽諸葛。東海穰苴。有貔虎龍蛇。深護儲胥。制勝不妨談笑。鸞聲裏。

旗影徐徐。行看取。非熊應兆。沙路輾高車。

醉花陰

樓外斜陽低半樹。雖好難留住。樹裏有鳴蟬。似訴中情。哽咽風前語。碧雲不見蓬萊路。青鳥今何處。莫更倚闌干。愁上心頭。無計推他去。

如夢令 題畫

草際斜陽紅委。林表晴嵐綠靡。何許一漁舟。搖動半江秋水。風起。風起。擢入白蘋花裏。

南鄉子 八詠樓作

鳴雨過庭除。病骨峻嶒不自扶。強倚闌干成小立。蕭疎。立困依然作宰予。驚覺失華胥。樓外青山落照餘。誰似莊周能化蝶。蘧蘧。心上閑愁一點無。

踏莎行

冷雨籠晨。淒風催晚。杜鵑哀怨黃鸝懶。蛛絲柳絮總輕狂。可憐春去無人管。碧草連天。青山遮眼。側身四望腸千斷。愁如溪水暫時平。雨聲一夜依然滿。

摸魚兒 金陵秋以

正淒涼。月明孤館。那堪征鴈嘹唳。不知衰髮能多少。還共柳絲同臆。朱戶閉。有瑟瑟蕭蕭。落葉鳴莎砌。斷魂不繫。又何必殷勤。啼螿絡緯。相伴夜迢遞。樵漁事。天也和人較計。虛名枉誤身世。流年滾滾長江逝。回首碧雲無際。空引睇。但滿眼芙蓉黃菊。傷心麗。風吹露洗。寂寞舊南朝。憑闌懷古。零淚在衣袂。

點絳脣

雲淡秋霄。夜寒月過軒窗。雁聲相應。人語長廊靜。欲寄離情。夢短天涯永。休臨鏡。舞鸞孤影。怕見菱花冷。

眼兒媚

煙草萋萋小樓西。雲壓鴈聲低。兩行疎柳，一絲殘照，數點鴉棲。春山碧樹秋重綠。人在武陵溪。無情明月有情歸夢。同到幽閨。

更漏子

詠雁

寒門雲。湘浦樹。畢竟故鄉何處。楓葉落。蓼花殘。水深鰲繳稀。蓬萊闕。扶桑島。極目茫茫煙草。蘆荻老。稻粱空。月明江上風。

怨王孫

翠被夜冷。碧梧風勁。蛩語將闌。鴉棲不定。開戶月在枝頭。恰如鉤。煙波縹緲瑤臺路。人何處。黃葉連天雨。夢魂此際。繞盡越水吳山。白雲間。

謁金門

風嫋嫋。吹綠一庭秋草。天際夕陽無限好。斷腸芳樹老。塵世茫茫難料。有酒使須傾倒。落葉滿階從不掃。醒來新月皎。

鷓鴣天

冬燠

窗外羣蛙久不鳴。夜來忽聽滿池聲。客心且喜逢冬暖。天意猶當放晚晴。塵勞事。莫關情。清風皓月共忘形。天桃應妬芙蓉色。故發鮮花照眼明。

蕙山溪

簷鈴風過。呢呢閨中語。月上海東峯。冷光浸。澄清玉宇。幽人此際。輕步繞回廊。蛙鳴沼。鴉翻樹。露滴松梢雨。蘆花粗老也。學楊花絮。袞袞趁流塵。半沾泥。半飄陌路。不須看覷。且自買芳尊。巴渝曲。婆娑舞。醉飲朝還暮。

長相思

霜華清。月華清。清逼衾綯冷似冰。那堪砧杵聲。雞已鳴。鐘又鳴。天若於人還有情。如何不肯明。

長相思

鴈南歸。人未歸。寒信先來家信遲。容顏只鏡知。曉風微。曉星稀。正是愁闌欲睡時。隣雞莫要啼。

臨江仙

予在江西時。與李燦以莊善。以莊嘗賦詩。有日。淚如霜後葉。撼撼下庭柯。鄭君希道深愛賞之。今鄭君已卒。以莊與予別亦二十年。夢中相見道舊好。覺而憶其人。不知今存與亡。因記其詩。屬爲詞。以寫其悲焉。

街鼓無聲更漏咽。不知殘夜如何。玉繩歷落耿銀河。鵲驚穿暗樹。露墜滴寒莎。夢裏相逢還共說。五湖煙水漁簑。鏡中綠髮漸無多。淚如霜後葉。撼撼下庭柯。

憶秦娥

風淅淅月明何處吹長笛。吹長笛。拂雲來鴈。連天蘆荻。繁華過眼成今昔。滄波浩渺空潮汐。空潮汐。淡煙衰草。六朝陳迹。

蘇幕遮

白雲山。紅葉樹。閑盡興亡。一似朝還暮。多事夕陽芳草渡。潮落潮生。還送人來去。阮公途。楊子路。九折羊腸。曾把車輪。記得寒蕪嘶馬處。翠管銀箏。夜夜歌樓曙。

蝶戀花

蔣山寺十月桃花

度湖移來天上種。絳蕊丹跗。王母親曾弄。青女素娥爲侍從。嬋娟獨擅三千寵。回首歡娛誰與共。荒草殘煙。冷落秦源洞。圓苑風高迷彩鳳。斷魂飛入韓憑夢。

過秦樓

暖日蒸紅。濃煙烘黛。又過一年春半。鸞啼鏡掩。桂老蟾孤。芳草爲誰如剪。何處燕子飛來。人暮穿簾。似曾相見。問前朝。王謝風流安在。雪消冰泮。還記得翠幄籠花。瓊闌搭柳。鳴佩響和清管。圓光易缺。急景難追。回首夢迷天遠。綠蔣青蘋。是他玉樹亭臺。金蓮宮苑。且高歌對酒。趁取韶華未晚。

踏莎行

雨過山明。煙生川媚。佳人初把羅衫試。玉驄嘶入柳陰中。濛濛淡日蒸花氣。籠幕低垂。闌上獨倚。一池春浪魚鱗起。暮寒寂寞掩重門。怕人問道歸期未。

隔浦蓮

朱簾不捲。晝雨。弱柳愁千縷。事與孤鴻去。空相憶。同誰語。雲水迷翠羽。人何許。玉佩沉湘浦。悄凝竚。春風到處。白蘋香滿洲渚。淚篋自老。日盡野田平楚。未用天涯悵間阻。回顧斜陽。猶在高樹。

生查子 惜花

東風爲愛花。着意吹原野。穠豔正堪憐。何忍輕吹謝。悶損玉樓人。獨立花枝下。微睇歛雙蛾。紅淚和花灑。

江神子

春晴楊柳鬱金絲。有黃鸝。在高枝。正是佳人無語倚闌時。不理雲鬢尋斷夢。消瘦損。雪膚肌。海棠飄玉燕交飛。草芳菲。水淪漪。怕見輕蜂小尾撲香歸。滿鏡容顏憑酒染。還慘淡。對斜暉。

滿江紅

風淡寒輕。又還是清明時節。幾處處。莓苔鋪繡。碎紅堆纈。滿樹綠陰堪止渴。漫山黃霧松花發。背畫闌。獨立檢韶華。聞啼鴉。懷往事。空淒切。思不斷。腸千結。想繁華。一瞬夕陽明滅。玄武湖邊楊柳。月雞鳴。塢上棠梨雪。到如今何處覓遺踪。泉聲咽。

江神子

絲絲纖雨纖黃昏。掩衡門。黯消魂。贏得滿頭華髮照乾坤。天上神仙三島外。空虎豹。守重關。河林落日隱崑崙。望中原。杳漫漫。白葦青蒿無處着啼猿。鳳去不來簫管咽。心裏事。共誰論。

長相思

桃花開。李花開。小白長紅越女腮。春風巧剪裁。蜂徘徊。蝶徘徊。飲遍清香未肯回。莫教飄綠苔。

憶王孫十二首 集句

花明柳暗繞天愁。趙女乘春上畫樓。樓上黃昏欲望休。月如鉤。檻外長江空自流。
亂山凝黛色高低。江雨霏霏江草齊。三戶無人自鳥啼。綠楊堤。笑殺山翁醉似泥。
遠書歸夢兩悠悠。閑倚南窗盡日愁。手捲蝦須上玉鉤。淚難收。紅葉相隨何處流。
盧家少婦鬱金堂。日日春光鬪日光。勾引花枝笑凭墻。暎垂楊。不是愁人亦斷腸。
當時我醉美人家。肯信流年鬢有華。海燕西飛白日斜。對殘花。莫怨春風當自嗟。
情愁無意整花鈿。萬事傷心在目前。錦瑟無端五十絃。月明天。繡被焚香獨自眠。
濕雲如夢雨如塵。客舍青青柳色新。一片花飛減卻春。勸行人。莫向天涯金縷身。
郎心如妾妾如郎。一度相思一斷腸。塵滿金爐不炷香。向斜陽。離恨空隨江水長。
爲誰零落爲誰開。小白長紅越女腮。漸老逢春能幾迴。看花回。一日須傾三百杯。
水紋如縠燕差池。斜日悠揚在柳絲。故國平居有所思。倚闌時。卻是同袍不得知。
鬱金蘇合及都梁。不是金爐舊日香。懶對菱花暈曉粧。細思量。欲話因緣恐斷腸。
滿庭芳草易黃昏。摘索花枝料峭寒。坐見新池落舊痕。憶王孫。深院無人獨倚門。

浣溪沙 集句

花壓闌干春晝長。碧樓紅樹倚斜陽。人門惟覺一庭香。絕壁過雲開錦繡。水絲彈月夢清涼。鸞歌鳳舞

斷人腸。

浣溪沙 集句

沙渚煙銷翠羽空。楚歌重疊怨蘭叢。樹頭樹低覓殘紅。三百年間同曉夢。幾家臺榭鳳城東。露桃猶自笑春風。

青玉案 春思

昨朝出日今朝雨。望不見。愁來路。徑滑泥深妨縱步。美人何處。花謝誰爲主。離絃不繫鳴箏柱。但滿眼。相思淚如縷。關塞迢迢音信阻。千重雲水。萬重煙樹。心逐征鴻去。

長相思

煙茫茫。草茫茫。人去人來來去忙。滄江空夕陽。鳧飛翔。鴈飛翔。天路冥冥川路長。月明蘆葦涼。

生查子 集句

他鄉別故人。拭淚攀楊柳。此物最相思。皎皎當窗牖。留取作秋香。出入君懷袖。萬里故園心。天地同長久。

生查子 集句

青山欲暮時。暝色生寒樹。不那客愁多。復送王孫去。澗戶寂無人。暗谷疑風雨。耿耿夜何長。月落聞津鼓。

生查子 集句

閒籬滿地花。風起春城暮。悲妾似花身。暫向花間語。落葉不歸林。驚鳥從橫去。獨立傍銀床。點點回塘雨。

生查子 集句

春風能幾時。柳色看猶淺。胡蝶夢中飛。跡與孤雲遠。明月照花枝。入夜愁難遣。形影自相憐。不及銜泥燕。

生查子 集句

新年舊燕歸。似與羈魂語。不見帳中人。空見相思樹。水上覓紅雲。片片隨風去。薄暮欲如何。背泣西窗雨。

生查子 集句

思君君未歸。向夕千愁起。兩淚忽成行。滴滴空階裏。垂柳覆金堤。蕙草生閑地。少壯莫輕年。白日如流水。

生查子 集句

愁多夢不成。坐對銀缸曉。輕袖拂花粧。驚起雙棲鳥。出戶獨彷徨。煙裏看鴻小。日下四山陰。轉轉傷懷抱。

浣溪沙 卽景

語燕鳴鳩白晝長。黃蜂紫蝶草花香。滄江依舊繞斜陽。泛水浮萍隨處滿。舞風輕絮霎時狂。清和院宇

麥秋涼。

青門引 晚春

數點松梢雨。還被晚風吹住。兔葵燕麥幾家春。殘花斷柳。難記舊游處。斜陽滿日空凝竚。鬢影三千縷。

是他枝上。蜂蝶紛紛。帶取韶華去。

漁父詞五首

采石磯頭煮酒香。長干橋畔柳陰涼。歌歎乃。濯滄浪。來往煙波送夕陽。白鷺洲邊好月明。賞心亭下暮潮平。紅米飯。紫葍羹。自是無愁過一生。

江花江草兩悠悠。隨意東西懶卽休。黃犬恨。綠珠愁。定應不上釣魚舟。
釣得鱖魚不賣錢。鱖甌引滿看青天。芳樹下。夕陽邊。睡覺蘆花雪滿船。
朝辭蓼渚暮蘆汀。自有沙鷗伴醉醒。塵世裏。一浮萍。不着羊裘動客星。

賀新郎 愁思

碧秀天涯草。怨王孫。雕輪去遠。玉驄嘶老。風雨餘春無尋處。絮亂花飛夢杳。斷魂與。行雲縈繞。赤水珠沉。迷象罔。暗塵深。不見長安道。今夜月。爲誰好。他鄉事事傷懷抱。更那堪。荒煙暝靄。晚虹斜照。千里關山。勞回首。苔徑殘紅未掃。又恐怕。梧桐秋早。王母宮中青鳥使。想歸來。已近蓬萊島。竹葉酒。且傾倒。

如夢令

鶯啄垂圓黃透。蜂抱碎芳紅皺。睡起北窻風。濃綠滿庭如酒。回首。回首。想見那人消瘦。

眼兒媚

芳草簾櫳夕。陽紅鴛語綠。陰中王孫何處。碧雲千里。青鳥無蹤。玉笙吹落天邊月。離恨滿西風。忍將清淚。化爲零雨。滴在蘭叢。

虞美人

紅榴花下宜男草。色與人俱好。佳人重色愛新花。只恐東風漸急夕陽斜。豈知浮豔難長久。看見花枝瘦。瑣牕晨啓怨花空。不覺玉顏憔悴減春紅。

玉漏遲 初夏

海榴花似火。看看又見麥秋時候。枝上鳴蜩。斷續一庭金奏。翠沼風漪未定。看葉底、明珠圓溜。苔徑黝。蝦
須掛處。有人消瘦。緬想那日歡娛。是鴻鴈來初。芙蓉開後。蔓草青蕪。但覺暗愁依舊。欲把相思寄與霧
煙慘。不堪回首。凝望久。寒鴉自啼疎柳。

踏莎行

破暖輕風。做寒細雨。冥冥飛過空江去。客中無物可消愁。綠陰滿院黃鶯語。琴斷朱絃。香銷翠縷。連天
碧草人何處。欲乘斜日望長安。傷心煙浪迷南浦。

菩薩蠻七首 集句

洞房昨夜秋風起。江清露白芙蓉死。豈是遠行時。與君生別離。千山鳥飛絕。遙想彌年月。思婦夜鳴砧。
君聽空外音。

東風吹綠瀛洲草。去年人到今年老。老去願春遲。凋傷感所思。攀枝長太息。倚樹疑無力。正是憶山時。
愁容鏡獨知。

文牕繡戶垂羅幙。江南綠水通朱閣。花髻玉瓏璵。單衫杏子紅。高樓悲獨守。日色濃於酒。不敢怨春風。
屏幃向月空。

珠簾暮捲西山雨。離魂不散煙郊樹。暝色赴春愁。行藏獨倚樓。玉繩迴斷絕。臥見雲間月。悄悄夜寒生。
月高風滿城。

東流江水西飛燕。黃姑織女時相見。見少別離多。浮生能幾何。梧桐相待老。常恐秋風早。萬恨在蛾眉。

傍人那得知。

東邊日出西邊雨，孤帆夜發瀟湘渚。雨浪細無聲，煙斜月轉明。清猿不可聽，楓落吳江冷。更欲向芳洲，水深難急流。

孤雲日斷蒼梧野，無邊落木蕭蕭下。茲歲已蹉跎，其如芳草何。玉階生白露，病骨傷幽素。夢好更尋難，相思錦帳寒。

浣溪沙

卽景

雲壓斜暉照樹黃，風生水榭綠陰涼。渴蛙得雨鬧池塘。紅焰射人榴火炫，青絲窳地柳條長。捲簾明月滿迴廊。

菩薩蠻

與句贈野人

林中獨酌鄰家酒，門前學種先生柳。灌木自悲吟，風泉清道心。獨行潭底影，蟬噪林逾靜。渡口欲黃昏，殘陽歸掩門。

浣溪沙

布谷催耕最可憐，聲聲只在綠楊邊。夕陽江上雨餘天。滿地蓬蒿無舊陌，幾家桑柘有新煙。戰場開盡是何年。

卜筮子

春去蝶先知，花落蜂難綴。草綠庭空不見人，愁共天無際。鑿沼種荷石，水淺荷錢細。惟有青苔最可憐。

欲上人衣袂。

金盞子 五月五日作

雲淡風微。江雨欲來還去。倚闌干。髮霜千縷。白水青蕪。是征鴻歸處。望盡天涯。夕陽猶在深深樹。艾葉榴花。又上阿誰門戶。悄空梁。燕雛自語。王謝亭臺。杳不知何許。獨立蒼茫。亂鴉啼。滿城鐘鼓。

梁州令

雨過羣山翠。楊柳含煙如醉。畫簷雙燕引雛飛。風動榴花。點點猩紅碎。對花莫把闌干倚。心頓難爲理。夕陽江上。滿眼清波。總是愁人淚。

最高樓

今宵月。還照別離愁。愁上最高樓。九霄無路青冥闕。玉京風露冷於秋。寶刀裁不斷。水東流。誰知道黃梁炊未熟。早過了洞天三十六。塵土事。幾時休。廣寒桂樹清香好。圓光恰滿又成鉤。笑階前。萱草浪語忘憂。

花犯 秋夜

夜何其。星移漏轉。涼蟾照無睡。寶箏絃斷。金鴈與青釭。相對憔悴。寒鴻過盡人千里。餘香怨繡被。但滿眼。碧雲紅樹。闌干空自倚。階前暗蛩最殷勤。悽悽似向我。說他情意。莎露冷。相將到曉霜開。蓋惟應有素娥未老。曾幾見。桑田成海水。任浪語。愁來堪遣。君看明鏡裏。

西江月

紅葉無風自落。黃花過雨猶香。床頭麈尾恥空觴。添了愁城萬丈。閱世身如萍梗。懷人夢繞瀟湘。應知此恨不尋常。豈在眉間日上。

卜筮子 詠雨

撼撼度蓮池。漠漠昏松隴。卻過西園拂紫塵。柳媚花矜寵。泥潤燕衣沾。粉膩蜂須重。極目滄江不見人。波浪兼天湧。

蝶戀花

春夢岑岑呼不起。草綠庭空。日抱嬌鶯睡。暖吹飄香三萬里。殘絲骨斷天沉水。寶瑟絃僵誰復理。梅子青青。苦在心兒裏。滿徑蒼苔花糝地。杜鵑口血閨中淚。

摸魚兒 晚春

悄寒生。沉沉院宇。不知春在何處。逢春漸老能多少。惟有暗愁無數。春又暮。但碧草和煙。綠葉漫飛絮。畫梁燕語。還是舊音聲。烏衣巷陌。轉盼幾今古。天涯路。流水青山如故。離魂長在郊樹。夜深月暗蒼梧遠。化作杜鵑歸去。人不見。桃花自落空階上。東風未許。吹夢過藍橋。關河滿目。波浪渺南浦。

玉樓春

春來觸處化成綺。春去可憐花委地。催耕布穀彊知時。去國杜鵑空有淚。雙魚不見人千里。落絮牽愁和夢起。芭蕉多事惹東風。故作雨聲驚客耳。

惜餘春慢 詠子規

隴水沉沙。巴猿咽雨。淚盡瀟湘竹死。多情怨魄。何處飛來。聲在萬重雲裏。腸斷行吟。放臣去國。佳人地遙。天邇。悄空山。月冷風清。惟見野棠如綺。記向日。瓊戶珠簾。櫻唇簧舌。吹商呵徵。朱顏尙在。十二闌干。回首不堪重倚。滄海桑田。有時海若。未枯愁應無已。到明朝。贏得浮花滿樹。錦般霞碎。

金人捧露盤

水如藍。山如黛。草如絲。正去年。雙燕來時。衡門晝掩。日長惟有睡相宜。午風吹破。北窻夢。簷影參差。李花開。梅花謝。榴花放。杏花稀。枉教人兩鬢霜垂。憑闌竚立。空將愁眼盼斜暉。斷雲迢遞。趁征鴈。直到天涯。

水調歌頭

雨過百花盡。綠葉自成帷。翛然驚破殘夢。何許一黃鸝。獨上高樓凝望。不見陽春去處。惟見草離離。且喜畫梁燕。還傍舊巢歸。理紈扇。清竹簟。試單衣。莫思身外閑事。有酒便須揮。螻蟻王侯同盡。何用名標竹帛。留與後人疑。坐久暮天碧。月在綠楊枝。

玉樓春

江城雨熟黃梅後。樓閣清高虛永晝。階前夕露寶珠呈。葉底夜蟬金石奏。蒼苔不受殘紅覆。市徑沿牆欺組綬。老來於物總忘情。漫爲青山開北牖。

歸朝歡

紫燕成雛辭舊宇。紅日滿庭雞唱午。披襟起迥北窻風。綠楊葉底聞鶯語。故人音信阻。白蘋吹盡滄江雨。倚闌干。悠然獨笑。暝色下平楚。浮生百歲真羈旅。富貴繁華萍梗聚。重瞳隆準等丘墟。紫髯桑蓋俱塵。

土坐來天欲暮。烏鴉立遍城頭樹。看雲頭。金盤湧出。身在廣寒府。

傳言玉女詠蝶

爲問韓憑何事化。爲胡蝶。妬風羞雨。一身輕似葉。園苑晝未。麗日晴煙相接。舞回柳眼。拍翻花頰。帶粉迷香。困酣猶自未愜。錦雲深處。更愁濃露浥。何況素秋枝上。曉霜披鬢。祇應無奈。翠銷紅厭。

好事近

雨過卻斜陽。虹外遠山猶濕。獨據槁梧高坐。待北窗風入。可人嘉樹有清陰。蟬噪一何急。倦暑盼秋來。又恐芳時輕戢。

虞美人

東風過了。南風起。節去如流水。日長門掩燕交加。可惜紅葵落盡雨中花。人閑只願花長好。花謝人催老。老來空有愛花心。無奈斜陽不爲駐光陰。

訴衷情

相思日日上高樓。還是去年秋。無情梁上雙燕。葉我忽如讐。蟲嘖嘖。葉颼颼。夜悠悠。闌干謾倚。塞北江南。何地無愁。

御街行 秋夕

梧桐滴露鳴金井。夜耿耿。如年永。月明棲鳥數移柯。有似佳期不定。華年迅速。碧霄迢遞。別恨空心領。青鸞怕見單棲影。任網遍。盤龍鏡。盈盈一水隔雙星。腸斷羽迷鱗暝。消愁憑酒。惟應無奈。酒與愁同醒。

浣溪沙 槿花

可恠西園木槿花。強將孤豔鬪輕霞。不知門外夕陽斜。應有斷魂隨蛺蝶。豈無悠恨寄寒鴉。那堪橫被綠苔遮。

玉漏遲 詠鷹

渺長空萬里。西風動地。鴈來無數。早發榆關。暮入楚江煙雨。逝水浮花去遠。但滿眼。黃蘆飛絮。腸斷處。雲深夢澤。月寒湘浦。樓上有個佳人。悶倚遍闌干。翠眉雙聚。淚濕鴉鬢。化成素絲千縷。一望一回惆悵。又燈暗。網蟲垂戶。天路阻。誰知此情愁苦。

滿庭芳 重九

雨歇涼生。天高氣爽。又是一歲重陽。鴈聲來處。雲白草茫茫。黃菊知人無酒。也不惜。槭死幽芳。龍山上。西風暝鶴。落日下牛羊。登樓何限興。一齊分付。絡緯寒螿。把古今閑事。莫更思量。坐到銀河案戶。城角盡。月轉空墻。凝眸久。驚烏蜚起。零露濕衣裳。

花心動

墻下紅葵向斜陽。猶開那時顏色。半捲繡簾。獨倚雕闌。淚眼爲誰長滴。九疑煙霧連蓬島。蜚魚去。渾無蹤跡。舊游處。空餘滿地綠苔堆積。百歲真如過客。待落蕊重榮。不知何夕。鏡掩素塵。香歇羅衣。此恨怎生消得。夜涼月轉。梧桐影。青燈共。踈螢寥寂。正憔悴。饑蟲又啼暗壁。

小重山 詠月

始暎西軒似玉鉤。想應容不得一些愁。娟娟斜倚鳳凰樓。窺朱戶。應自半含羞。今夜正悠悠。玉池金岸。總是瀛州。人間天上一般秋。銀潢水何事獨西流。

一剪梅

機杼無聲絡緯多。天淨雲收。月在銀河。相思迢遞隔關山。雁短人遙可奈何。身世悠悠似逝波。夢裏嗟咨鏡裏婆娑。欲回西日掛扶桑。惆悵陽公不解揮戈。

南柯子 詠梨花

汀苕青絲盡。江蓮白羽空。翠蕤丹粟炫芳叢。總把秋光管領屬西風。豔敵秦川錦。鮮欺楚岸楓。鯉魚卻下水仙宮。肯放斜陽更向若華東。

如夢令

昨夜五更風雨。吹盡一汀紅樹。曠野寂無人。漠漠淡煙荒楚。日暮。日暮。誰與暝鴉爲主。

六么令

詠露

淡雲收盡。月在蒼龍角。霏霏似煙非霧。空裏無聲落。漢殿仙人掌冷。桂影篩高閣。玄蟬皓鶴。相呼相喚。嗽嗽華滋笑丹藥。寒蟬不分命薄。永夜驚離索。絡緯也共莎雞。吟盡傷心曲。只恐韶年易晚。辜負蓬萊約。秋容寂寞。憑君着意。染取楓林峇紅萼。

憶舊遊

詠燈花

正良宵過雨。玉漏傳聲。羅幌無風。夢覺青釭裏。有金葩璀璨。瓊蕊瓏璵。翠翹隱暎。丹鳳搖曳碧雲中。似瑞

寓舍星。輕霞暈月。霽景攜虹。離人最多感。況四壁蕭條。惟有吟蟲。相像長門殿。怨佳期。冰泮芳意。煙空強將片影相對。清淚濕鉛紅。但暗自灰心。朱顏判卻成老翁。

聲聲慢 詠愁

無蹤無跡。難語難言。依依只在心曲。雨冷雲昏。日暮海涯天角。輕衾夢回酒醒。夜悠悠。蟲響燈綠。事去也。縱相憐。不是那時金屋。鏡裏清揚婉婉。凭朱檻。知他爲誰顰蹙。鳳老桐枯。慘淡九峯青矗。湘江淚痕未盡。有哀猿相伴幽獨。向此際。更那堪。懷古送日。

念奴嬌 紅樹

霜風弄巧。把秋林一夜。吹成春苑。炎帝騎龍來絳闕。紫鳳三千乘輦。電幟揮雲。火旗蒸雨。椒佩隨瓊幃。碧山流水。竄然迷卻芻阮。堪笑舊日陪園。綺羅虛剪。蝶與蜂俱怨。對此令人心耿耿。如在鬱華宮殿。若木重暉。歷萍四照。日漾驅珠暖。憑高凝睇。赤城相去不遠。

採桑子

鴈來不帶天邊信。莫上高樓。新月如鉤。一度看來一度愁。人間無限傷心事。覆水難收。風葉颼颼。只是商量斷送秋。

夜飛鵲

中天舊時月。還照元宵。山疊疊。水遙遙。碧雲日暮去無際。玉人何處吹簫。東風尙憐故苑。儘鴛鴦含脆管。柳舞纖腰。憑高望斷。旋添清淚。作春潮。欲問廣寒音信。鯨浪湧。魚蜚不到層霄。芳徑蒼苔漸滿。瓊軒珠綴。

空掩蟾蜍。幾時再得。海棠花底。候鳴鏹。但長煙綠樹。青蕪暝。鴛鴦相對魂消。

賣花聲

門外綠楊堤。有个鶯啼。聲聲傳恨入幽閨。閨裏佳人驚睡起。淚濕眉低。莫把此情題。天也悲悽。滄江東下夕陽西。華髮不知人別苦。隨意萋萋。

阮郎歸 怨情

河梁攜手愴離分。悲嘶聲入雲。長門踈雨滴黃昏。昭陽歌吹聞。懷故國。叫愁魂。淚花紅欲焚。蒼梧苦霧壓湘筠。猿啼不見君。

搗練子

煙漠漠。日陰陰。山色蒼茫草色深。客裏不知春又半。倚闌無語聽鳴禽。

阮郎歸

寥寥庭館暮寒時。四簷鳴雨垂。博山沉水吐遊絲。玉釭花燼微。蟾影淺。漏聲遲。愁多成夢稀。客行雖好不如歸。有懷當語誰。

賣花聲

樓上倚闌干。月在雲端。輕煙盡盡碧綃寒。腸斷夕陽芳草外。山海漫漫。柳嫩不堪攀。欲寄應難。盤龍塵匣怨孤鸞。可惜嬋娟今夜月。好共誰看。

長相思

風颺颺。雨颺颺。風雨凄寒似九秋。釀成千斛愁。花事休。春事休。漫把花枝插滿頭。勸春須少留。

玉樓春

東風白下橋邊道。不見百花惟見草。陰雲結暝燕來難。宿雨留寒春去早。落浦汀苕無煩惱。舞葉吹香隨處好。相思一夜楚江空。滿地綠苔蜂蝶老。

醉落魄

東風太惡。夜來盡把花吹落。餘寒燕子烏衣薄。對語空梁似歎人離索。江山滿眼今非昨。無情芳草年年綠。霧雲不見遼東鶴。野鳥聲。只叫思歸樂。

解語花 詠柳

依依旖旎。娟娟媚媚。生態真無比。細腰宮裏和煙重。組繪滿園桃李。佳人睡起。畫未了。橫雲嫵媚。輕步還憐。掌中身。不自勝。絢綺。長想渭城雨後。恨繁絲難縮。陌上征騎。陽關歌罷香塵遠。枉把翠柔折寄。鴉啼向晚。羅幕掩。數行清淚。一任他。化作浮萍。漂蕩隨流水。

暮山溪 詠鷺

夜闌人靜。鳴玉傳聲小。歷歷透紗窻。悄空閨。衾寒夢杳。淒淒切切。如共旅魂言。流水咽。過雲停。一日腸千繞。金莖月轉。烏尾詎將曉。欲斷又還連。渺煙霄。鷺鴻相吊。憑誰細寫。此意入朱絲。呼郢客。招湘靈。添作江南調。

梅花引

晚雲凝。晚煙橫。煙草茫茫雲樹平。杜鵑聲。不堪聽。別淚暗傾。良宵空月明。冰蠶絲斷琅玕折。湘妃竹死。青冥裂。短長亭。幾千程。歸計未成。愁隨江水生。

浣溪沙 秋思

細雨斜風拂面來。草黃雲白鴈聲哀。滄江東去幾時回。楓葉有霜纔可愛。菊花無酒不須開。百年多病莫登臺。

憶舊遊 聞砧

掩重門。夜靜庭戶幽幽。蕩地聞砧。杳不知何處。是雲間過響。空外傳音。故鄉未卜歸日。悽薄愧飛沉。漫對月興懷。臨風起歎。惻愴傷心。登高盼來鴈。想此際孤幃。幾度停針。想帶圍寬減。向誰人借問。無計追尋。但將數點清淚。滴在紫羅襟。更倚遍朱闌。滿頭素絲應自今。

浪淘沙 聞怨

白日墮林端。庭宇生寒。黃蘆風急鴈來難。階下露珠眉下淚。相賽丸瀾。寂寞掩重關。坐到更闌。月華雖好不堪看。舊恨新愁都有幾。地窄天寬。

望江南

黃昏雨。滴瀝四簷聲。陡爲衾綯添宿潤。都來肺腑作愁城。惟覺寐難成。單棲鳥。幾度繞枝鳴。金獸有煙飛不起。玉蟲無燄翳還明。誰識此時情。

擣練子

人寂寂。夜沉沉。風滿中庭。月滿林。欲挽銀河滿淚眼。銀河清淺淚痕深。

臨江仙

閨怨

織女機邊如鏡月。夜深長照空幃。玉笙簧冷鳳孤飛。苔階行遍。霜露剝裳衣。華表柱頭雙白鶴。不知何日來歸。故山今在故人稀。沉思似夢。垂涕掩朱扉。

尉遲盃

水曲花

凌波步。怨赤鯉不與傳。棧素空將淚滴珠璣。脈脈含情無語。瑤臺路永。環佩冷。江皋荻花雨。把清魂。化作孤英。滿懷幽恨誰訴。長夜送月迎風。多應被形闌紫殿人妬。三島鯨濤迷天地。歡會處。都成間阻。淒涼對冰壺玉井。又還怕。祁寒凋翠羽。盼瀟湘。風杳篴枯。賞心惟有青女。

滿路花

山煙掠草低。江月披雲濕。鬪聲宵未了。鐘聲急。寒鴉何事。獨在枝頭立。老來諸病集。客裏光陰。駛如馳馬難執。懷新思故。記一長遺。十頽墉闌廢宇。憑誰葺。階前冷露。似向離人泣。歲暮蛟龍熱。干將掛壁。任他苔鏽生澀。

喜遷鶯

梅花

凍雲初啓。看的皦梅花。俯窺清泚。膏澤無加。鉛華不御。應與素娥爭麗。艷絕蘂宮露冷。香引瑤池風細。夜耿耿。想飛瓊欲下。縞衣搖曳。驚慨猶記得。月榭春宵。錦障開芳砌。倚樹聯詩。擷英浮酒。左右翠翹珠幌。今日故人何在。腸斷白波東逝。向此際。但含情獨立。爲伊凝睇。

水龍吟 夜聞銅絃湯作

玉缸開盡丹葩。畫簷深宿。蟾蜍影。門掩清宵。聲來何處。堂空人靜。如竹梳風。如荷過雨。如泉發井。向羅幃細細。如歌如語。還如暗盡相命。繡被沉薰。正暖夢雲車。紫鸞雙竝。洞庭曠野。九韶齊奏。殷天笙磬。別有蛾眉。鼓琴彈瑟。江鳴山應。待儵然睡覺。爐存餘燼。雞啼窗間。

雨中花

月入踈松光的。燼淡煙瑣。江城夜寂。問何處無愁。人間今古。莫作他鄉客。月裏青鸞空有翼。杳不見。姮娥消息。但北斗從橫。銀河清淺。重露成涓滴。

菩薩蠻

冰澌着樹成雲朵。林梢白月欲將墮。戶下有啼鳥。如悲良夜徂。蘭芳銷翠被。淒惻驚眠起。起坐待天明。飛霜入鬢清。

怨王孫

鱗羽路阻。佳人何處。木落山寒。江空歲暮。明鏡飛上青天。照無眠。海風裂地鯨魚死。三萬里。水擊蓬萊。徒不禁清淚。暗裏灑向孤燈。結成冰。

錦堂春

墻角含霜樹靜。樓頭作雪雲垂。鈎簾鵲噪空庭晚。坐看月來時。異域書迷雁足。幽閨鏡掩蟲絲。一宵兩地腸千轉。惟有夢魂知。

浣溪沙

煙慘雲黃天雨沙。葉疎枝冷叫棲鴉。峭風凝霧作琪花。澧浦空捐遊子佩，河源不返客星槎。夜冷坐聽

鼓三槌。

玉燭新夢歸

羈魂悲別久。但悶曉髮昏。感新懷舊。任他萬壑千峯。阻徑度。不勞回首。樓臺側畔。記向日。新栽花柳。斜照裏。一帶青山。山前翠浮瓊溜。佳人倩笑來迎。有野舞村歌。亂垂鮐叟。故池半甃。風葉動。攪亂數升科斗。周章未了。早畫角吹殘更漏。翻惹起。無限愁端。中心自受。

臨江僊

樓外西風將雨過。重門又掩黃昏。金甌香息被無溫。繁思牽宿恨。愕夢愴離魂。往事都隨流水去。傷心欲共誰論。故家耆舊幾人存。相思芳歲盡。霜雪滿乾坤。

清平樂

春風欲到。小草先知道。黃入新莢顏色好。圖遣玉孫歸早。興來策杖微行。枝間布穀初鳴。喜見兒童相報。墻根薺菜先生。

錦堂春

鶻噪輕陰乍霽。鳩鳴冷雨還來。不知春到多時了。渾未見花開。老景夕陽有限。華年逝水無回。相思一夜闌膏歇。清淚滴瓊瑰。

蘇幕遮

雨瀟瀟。風嫋嫋。柔夢相牽。不覺春窻曉。鴈到衡陽回去了。鏡裏離鸞。獨對琴臺老。楚天長。秦樹杳。山蹙愁眉。江學回腸繞。滿地蒼煙連碧草。弱水三千人隔蓬萊島。

蝶戀花

白水茫茫煙渺渺。原野高低。觸處生芳草。草綠花紅人自老。有情爭似無情好。喪亂餘身歡意少。腸斷江山。不肯留殘照。門掩黃昏寒料峭。角聲吹起雙棲鳥。

洞仙歌 春夢

濃濃漠漠。杳不知根蒂。蕩漾春光去無際。盼神仙縹緲。煙藹蒼茫。身到處。惟有天風引袂。故人千萬里。驀地相逢。忘了關山路迢遞。聚散未分明。雨眩雲酣。空回首。已迷塵世。但擁被追尋恍如遺。慳不覺雞鳴。若華東啓。

風入松

一天煙靄醞愁陰。庭宇沉沉。畫梁燕子來何晚。薄寒猶戀羅衾。但道青春未謝。不知芳徑苔深。少年歡笑夢中尋。落得傷心。蒼梧鳳去幽篁死。斷絃空繫瑤琴。莫更登高望遠。杜鵑聲在雲林。

祝英臺近

問青青河畔草。能得幾時好。春去難留。鏡掩鸞空老。淒涼深院黃昏。新愁陳恨。恁風雨。一齊來到。霧雲杳。漫有千丈遊絲。那堪繫殘照。羅幙寒生。哽咽子規叫。斷腸只是綠愁。柔腸數寸。怎禁得許多煩惱。

摸魚兒

斷腸花已隨流水。青苔空鎖深院。知人不似花重好。莫性爲花留戀。花不管。任啼鴉悲鳴。霞錦成霜霰。水遙山遠。淚滴翠綃寒。滿天風雨。寂寞送書鴈。傷心事。縱是生來見慣。那堪芳歲先晚。孤雲日盡蒼梧野。留得竹枝歌怨。簾莫捲。斜照裏。荒煙白草愁何限。情長意短。蟲響又黃昏。沈沈夜永。惟有月華滿。

小重山

月滿江城秋夜長。西風吹不斷。桂花香。碧天如水露華涼。人不見。有淚在羅裳。何許鴈南翔。堪憐一片影。落孤房。百年浮世事難量。空回首。天闊海茫茫。

點絳脣

昨夜三更。井梧葉上聞鳴雨。夢魂空去。不到思量處。爲問燈花底。向愁人吐。花無語。星河滿樹。白髮三千縷。

菩薩蠻

月華泛灩秋塘草。羈蟲露泣芙蓉老。空館夜聞砧。難爲客子心。故鄉何處在。雲白天黏海。天海共蒼茫。何時還故鄉。

一萼紅 送別

白蘋洲。有蘆花似雪。人在木蘭舟。祖帳方開。驪歌未闋。斜照半入江樓。話不了。纏綿意緒。早歸鴻相喚落沙頭。紅蓼丹楓。青煙碧草。總爲供愁。此去幾時重見。悵穠華易謝。零雨難收。洛浦波空。渭城柳盡。欲飲

還又回眸。恨只恨無情海水。趁歸風輒向西流。畢竟難留。一宵長似三秋。

生查子

蜘蛛網。畫簷一日絲千轉。紅燼落寒釭。心死無由見。湖上采蓮歸。苦意知何限。引領望佳期。征旆天邊遠。

霜葉飛

簾涼宵永。紗窻外。琅玕飄墜金井。欲眠深恐寐難成。強起看星影。悄不覺天回斗柄。封狼弧矢相輝映。對此默消魂。又露落青冥。漸漸濕透衣領。河漢有客乘槎。清都非遠。可惜魚羽無定。桂花吹散廣寒風。免老蟾餘冷。但唧唧。飢蟲啼暝。中心撩亂誰能整。坐待雄雞三唱。颯颯霜髭。怕臨青鏡。

浣溪沙

半畝荒園自看鋤。雨中時復搗新蔬。不須彈鋏歎無魚。早息機心勞役少。懶聞世事往來疎。清風明月

總贏餘。

擣練子

雲淡淡。月娟娟。雲月朦朧照不眠。寧是不眠休作夢。夢時歡喜覺時憐。

擣練子

吳苑樹。楚江楓。一樣秋光兩不同。莫道衰榮長定在。落花終古怨東風。

江神子

城頭吹角夜沉沉。有棲禽。出疎林。衝落滿庭珠露滴衣襟。身在吳江家在越。南北事。兩關心。人生莫遣

二毛侵病相尋。老駸駸。謾好青山綠水，懶登臨。千古鍾期今已矣。空慘愴。對瑤琴。

南柯子 送別

送別滄江永。傷心落日曛。寶箏絃斷鴈離羣。最苦愁濃酒淡不成醺。黃葉淒涼月。丹楓索漠雲。重來此地卻思君。但覺驪歌猶在耳中間。

桃源憶故人

淵明籬下黃金蕤。還共空尊憔悴。今古這般滋味。想得都相似。牛山落日悲風起。回首舊歡無幾。長夜清涼如水。獨立星河裏。

六么令

杪秋遙夜。人臥羣喧息。明河漸低庭戶。戶有蠟蛸織。何許飛來鴈陣。衝入寒煙碧。相思何急。悲來空自目。斷雲霄羨歸翼。青鏡獨照暗壁。脈脈羈魂寂。堪恨冷夢難長。欲見無由得。年少不知過了。老去徒嗟惜。追尋疇昔。愁如流水。渺渺茫茫趁潮汐。

一剪梅

征鴈來時木葉紅。淡淡秋光。嫋嫋西風。江南江北短長亭。煙草低迷。落照中。浮世生涯一轉蓬。今日韶顏明日衰翁。五丁難挽逝川回。千古英雄。此恨都同。

蝶戀花

冷雨淒風昏白晝。庭院幽幽。秋草沿墻秀。何處無愁仍有酒。可憐彭澤門前柳。老去情懷難似舊。貌殊

言異轉使人看醜。漫摘黃金花在手。寒煙滿眼空回首。

浣溪沙 詠雞冠花

絳幘雞人紫綺裘。形輝欲報五更籌。不勝嬌冶立清秋。日影卻穿雲氣入。虹光猶帶露華流。三千紅粉總凝眸。

風流子 詠草

雪盡水平津。萋萋處。風景最愁人。想金勒未歸。繡幃深閉。玉顏自老。芳意徒新。送日挽煙千萬里。迤邐際蒼晏。蜀魄叫迷。楚魂思殢。碧雲如夢。眉黛空翠。淒涼長門殿。飛花與清淚。共滴華茵。惟有亂螢時來。夕砌相親。恨此身不化。柔條弱蔓。暗隨靈雨。得到楓宸。窻掩黃昏。一生幾度青春。

蘭陵王

問明月。何苦纒圓便缺。青冥裏。風慘露淒。長向人間照離別。玄陰凋暮節。瑤井冰澌暗結。闌干外。河漢漸低。星影輝輝動城闕。重裘冷如鐵。看頭上春雲。都作飛雪。銀釭花落銅壺咽。傷懷已無奈。暝鴉多事。啼遍寒枝未肯歇。寸心自摧折。切怛望天末。恨正抵滄江。煙浪空闊。文魚翼知沉書札。淚滴在衣袂。盡成清血。羈愁恰似庭草。枯了又更茁。

踏莎行 詠遊絲

弱不勝煙。嬌難着雨。如何縮得春光住。甫能振迅入雲霄。又還旖旎隨風去。高拂樓臺。低黏花絮。如狂似醉無歸處。黃蜂粉蝶漫輕盈。也應未敢窺芳樹。

青門引

采采黃金蘂。遙見晚山橫翠。重門深掩。一庭風。沾來淡酒。能得幾回醉。草黃雲白。鴻千里。落日寒煙起。相憐自有明月照人。肺腑清如水。

浣溪沙

不寐淒寒剝瘦肌。聞鐘驚起攬裳衣。恰如久戍得歸時。斜漢隔山牽月落。小禽出樹掠霜飛。濛濛輕蕩暈朝暉。

浪淘沙

門外幾多春。特地愁人。紅英都作馬蹄塵。只有青青河畔草。一似相親。極目楚江濱。流水無津。野狼山鳥怨芳辰。叫雨呼雲昏復曉。天也傷神。

疎影 分韻詠荷花得實字

琴薰應律。有細煙冒雨。濃露晞日。洛浦波生。湘渚風交。霓裳水珮爭出。姮娥欲共青鸞舞。颺錦幕。香霏紈質。喚海童。齊捧驪珠。豔色蕩搖鮫室。遙想麻姑壇上。翠霞興綺袂。相伴蕭瑟。妖冶珊瑚。柔媚昌宗。敢污天然清謐。西峯玉井。秋河近。看葉底。蜂房成蜜。爲君摘向金尊壓倒。楚江萍實。

花心動

煙雨池塘。盼花枝垂垂。向人如泣。燕子乍歸。簾幕餘寒。語困畫梁雙立。曉光搖帳。驚眠起。鶯簧猶澁。斷腸處。絲繁絮亂。子規聲急。只恐芳時易戢。便不待秋風。粉銷香泯。半掩綺窓。深鎖重門。天靜月華將入。素

琴彈盡離鳳調。淒風與愁雲交集。夜迢遞。羅襟舊痕又濕。

卜筮子

白日下層岑。青靄生寒水。水遠山長不見人。月上風微起。何許一孤鴻。飛去瀟湘泚。欲採蘋花寄所思。無處尋雙鯉。

瑞龍吟

秋光好。無奈錦帳香銷。綉幃寒早。鈎籠人立。西風送書過鴈。依然又到。故鄉杳。空把淚隨江水。夢縈池草。何時賦得歸來。倚松對柳。閒尊醉倒。衰鬢不堪臨鏡。鏡中愁見。蓬飛絲繞。門外遠山。青青長帶斜照。石泉澗月。辜負夜猿嘯。傷心處。楓凋露落。荷枯煙沼。燕去玄蟬老。滿天細雨。鳴鷓鴣。花蔓富將。葛。庭院靜。遙聞清砧聲擣。擁衾背壁。一燈紅小。

渡江雲

西風吹楚甸。四山淨綠。萬籟起秋聲。捲簾宮晚。倚遍闌干。慘惻望鄉情。柴桑舊菊。爲誰曾擢金英。愁對他一江流水。滾滾向東傾。淒清。天邊孤鷓。甚處飛來。到中庭。落影雲路遙。歸程難計。離恨空縈。斜陽冉冉低喬木。但暝色搖動簷楹。遠又見。花間露滴瑤瓊。

帝臺春

涼雨新沐。秋花遍墻角。門對遠山。山帶斜陽。忽龍相屬。明月今宵已自滿。又爭奈。素娥幽獨。向天涯。望月興懷愁多如簇。年歲促。歡去速。意易足。事難續。鏡掩懶重開。縱春風也不解。染黃成綠。隴首孤雲去無

際。草上露華白如玉。且深下紅簾。倒金樽醺醺。

浣溪沙

娟娟西風吹草黃。踈踈零雨泣花粧。驚寒鸚鵡喚人忙。
鴈影兩行衝月落。蟲聲一部和更長。博山煙冷
思茫茫。

千秋歲 送別

淡煙平楚。又送王孫去。花有淚。鶯無語。芭蕉心一寸。楊柳絲千縷。今夜雨。定應化作相思樹。憶昔歡游
處。觸目成前古。良會知何許。百盃桑落酒。三疊陽關句。情未了。月明潮上迷津渚。

驀山溪

三更鳴雨濕透桃花臉。珠箔未登鉤。早飄落。猩紅數點。碧雲如夢。人去已無踪。金泥鳳。玉蟠龍。寂寞蛛絲
檢。玄華柔軟。總被秋霜染。夜擁寒衾。耿青鐙。管凝帶閃。銅壺漏水。應是接天河。一聲去。一聲來。空把重
門掩。

長相思 嘉興道中

草青青。麥青青。草穗高低麥穗平。黃花相間明。山禽鳴。水禽鳴。禽鳥與人同有情。不堪聞此聲。

浣溪沙

春半江城不見花。也無楊柳可藏鴉。青煙碧草到天涯。過雨郊原啼布穀。始雷池沼出鳴蛙。清明寒食
客思家。

摸魚兒

酒軒窻數聲疎雨。霎時驅退殘暑。碧江風過龍鱗起。天際白雲如絮。人去。但說道秋來。先自傷心緒。故鄉何處。望不見淵明。菊荒三徑。盡日漫凝佇。新涼夜。魚影澄清漢。洛寥寥鴻鴈飛度。沙雞絡緯。閑相妬。催得鬢絲千縷。芳草渡。還是蒼煙綠水。連紅樹。榮名幾許。隨分莫求多。五湖有路。波浪未應阻。

祝英臺近

翠煙收。珠露下。星漢共滿。洒。桂影徘徊。白雪粲。簷瓦。故鄉渺渺。青山茫茫。綠水又爭奈。流年如瀉。嫩涼夜。尚有萱草餘花。芳菲臺榭。銅篆香殘。絳蠟散。輕燧。謾說花解忘憂。憂多花少。更不分。被風吹謝。

怨王孫

兔魄又滿。天長鴈短。露槿驚寒。夜蟬怨晚。知有多少閑愁。在心頭。白雲飛盡秋無際。花滿砌。鐘鼓重門閉。前年舊事。轉盼已逐東流水悠悠。

二郎神

捲簾邀月。漸夜永涼生。珍簟看露出。青紗煙凝碧樹的。磔殘螢數點。老景逢秋。兼多病。怎免得長懷短念。辜負卻故園。千山松桂。一池菱芡。門掩寂寥滿地。餘花紅糝。睡翠被香收。玉觴塵洗。背壁蘭釭自閃。馬角不生。烏頭難素。心似風旌長颺。休惟他敗葉寒蟬。相應替人悽慘。

霜葉飛 七夕

鯉魚風起。津梁斷。盈盈一水難渡。藕花相向自成蓮。誰道中心苦。又不覺明星在戶。鵲橋橫跨黃姑渚。怕

喜極悲生似那日匆匆。再把歡笑辜負。堪恨桂闕姮娥。乘雲驂霧。便踏龍尾先去。碧雞啼罷。鳳樓寒。早漏聲催鼓。盼油壁香車駕了。踟躕欲上。頻回顧。但暗滴真珠。教向人間散成飛雨。

少年遊

清風收雨。輕雲漏月。涼氣入幽意。亂葉吟朝。飢蟲啼夜。各自奏新腔。孤鴻又向天邊落。歸夢阻。蒼江百結愁腸。兩行絲鬢。寂寞對清缸。

小重山

說道多憂解瘦人。眼中雙別淚。怕沾巾。白蘋紅蓼滿江濱。空搔首。何處是歸津。感舊卻憐新。情懷都不似。少年春。野花園柳共埃塵。盈尊酒。取醉莫辭頻。

漁歌子 惜懷賦

麥秀蘄蘄野雉飛。沙頭新柳葉如眉。風濺蕩。水連漪。正是溪魚上釣時。二月桃花紫錦香。一聲啼鴉萬蜂忙。歌款乃。濯滄浪。有酒無愁醉不妨。煙雨樓前溪水生。少微山下雜花明。楊柳岸。小舟橫。綠陰如幄聽啼鴛。漠漠風花撲面飛。萋萋煙草送人歸。彭澤菊。首陽薇。白酒蒼苔獨掩扉。雨聲一夜水漫沙。垓鶴長鳴蟻出窠。汀荇葉。石楠花。隨意漂流擁釣槎。蒼嶺松花結子成。南明山色翠相迎。游客思。故人情。不是陽關墮淚聲。三寸時魚碧玉鱗。一汀芳草綠羅茵。楓葉落。荻花津。笑殺黃埃馬上人。

滿庭芳 清明

積雨沉春。昏煙酣晝。不知還又清明。榆錢柳絮。相逐鬪輕盈。芳徑莓苔漸滿。青蘋與白芷俱生。踈籬畔。海棠開竹。有個鶉鳩鳴。寬心應是酒。酒衝愁陣。強似奇兵。愛星星白髮。知我生平。底用登樓看鏡。誤身世。只是虛名。空凝佇。落花如雪。雲霧瑣高城。

誠意伯文集卷之十九

公朝于王所。仲孫羯會晉韓不信。云云。城成周。

春秋與諸侯之覲王。而惜王所之非其地。與大夫之勤王。而傷王城之同于列國。夫趨事赴王者。臣子之所當爲。至于天子之守。則有先王之遺法焉。襄王下臨。僖公有王所之朝。春秋書公。而成其爲朝。謂天子在是。諸侯不可以不朝也。然不言明堂。而曰王所。則所非其地。異乎先王方嶽之禮矣。敬王命城王都。而諸大夫有成周之城。春秋列書大夫之名氏。謂天子有命。諸侯不可以不從也。然不言京師。而曰成周。則同於列國。而異乎先王作京之意矣。然則流水之朝宗。葵藿之向日。固人子之至情也。而下堂以見諸侯。與城郭溝池以爲固者。又豈天子之盛事哉。嗚呼。此聖人之所以不責諸侯大夫。而深不滿於王室之意歟。是故至于僖宗肆覲東后。天子巡諸侯之守者。然也。未聞下勞諸侯。而臨于非所之地也。王命仲山甫城及東方。天子徹諸侯之封者。然也。未聞請於諸侯。以城其所都之邑也。平輟既東。周綱解紐。歸枋邑。易許田。而朝覲之禮。委諸草莽。賦黍離。歌東楚。而二雅之音。變爲國風。於是霸圖興。而王道絕矣。推原其由。豈非天子自失其道。而致之哉。觀春秋之所書。然後正本澄源之意。可得而知矣。且蠻夷猶夏。寇賊竊宄。惟是大侯小伯。所當攘斥。非異人任。則夫城濮之勳。因其獻俘。而錫命之弓矢。以旌其勞可也。何至屈萬乘之尊。親舉玉趾。以勞晉侯于踐土乎。縱自輕也。柰宗廟何。成康之時。巡宜不知是。春秋安得不以爲貶哉。然而君雖失禮。臣不可以不盡其敬。是故諸侯就朝。雖無爲龍爲光之盛。而冠冕佩玉。覲天威于

咫尺猶足以明水木本源之義。謂非東遷以後之美事。不可也。是故我公書朝。以成其禮。故曰春秋與諸侯之親王。而惜王所之非其地也。嬖子匹嫡。亂生不夷。惟是二三大臣。相與僂力。以不阻墜。則夫定位之後。所當夙夜蚤畏。任賢脩政。以圖轉危而爲安也。何至以四海之廣。請城其都。以爲固乎。德則不競。城郭何爲。周公之作洛。宜不如是。春秋又安得而不譏之乎。然而上雖失政。下不可以不奉其令。是故大夫會城。雖有弗躬弗親之責。然敝築雉堞。服王事而靡盬。亦足以存宗邦。翰屏之典。謂非王室亂以後之美事。不可也。是故諸大夫書名以達其義。故曰春秋與大夫之勤王。而傷王城之同於列國也。夫春秋天子之事也。故其自治嚴而待人恕。惟其自治之嚴。故周之不振爲可貶。惟其待人之恕。故或成其朝。或與其城。而無吉焉。雖然。二百四十二年之間。書公之朝者二。而皆于王所。則言外之意可知矣。書大夫城成。固而無諸侯。則屬辭之法。又可見矣。然則二役也。謂之免於貶可也。而或者謂爲美之。則豈聖人之意哉。故嘗攷之。周室在襄王。則有子帶之難。在敬王。則有子朝之難。子帶之難。惟書天王居鄭。至晉文納王。則不書。蓋以是爲臣子之常也。子朝之難。始末皆書。而以城成周終之。是果足以爲美哉。嗚呼。齊桓首止之盛。不可及已。得如晉文。亦庶幾矣。至于晉侯午者。又文公之罪人也。

築郿大無麥禾。臧孫辰告糴于齊新延廩。

諸侯與不急之役。以空其國。而取給于人。猶不戒焉。春秋比事而書之。以示譏也。夫國以民爲本。而民以食爲本。可不相時而輕用其力也哉。莊公妄興築郿之役。而不計國儲之虛實。至于麥禾皆無。而當國之大夫。親往告糴于齊。其事急矣。而明年之春。又新延廩。何其輕慢國本。至于此極乎。春秋比而書之。而魯

之君臣無務農重穀之實。而有傷財害民之政。可見矣。吾聞古之爲國者。必時視民之所勤。民勤于力。則工築罕。民勤于食。則百事廢。未聞以凶年而興不急之役也。三年耕。必餘一年之食。九年耕。則餘三年之食。未聞在位二十八年。而無一年之積也。魯之莊公。則不然矣。以峻宇雕牆爲無損。以節用時使爲無益也。是故築郿之工未畢。而倉廩已空。告糴之跡猶新。而延廩復作。曾謂君國子民之道。而若是乎。宜其見譏於君子矣。且築者。勑作邑也。城邑所以禦暴。非時與制。不敢興也。況於無故而築邑乎。莊公不視歲之豐凶。而有築郿之役。不知其何爲也。若曰。禦暴保民。則魯國無故。苟無令德。太行孟門。且不可恃。而況於郿乎。若曰。虞山林藪澤之利。則非君人之心矣。未幾而倉廩盡竭。麥禾俱無。而曰。大顆粒不存之詞也。然後皇皇焉。無所措其手足。而臧孫辰奔告于齊。以請糴焉。以千乘之國。仰給于他人。以活其民。可不懼乎。不曰。如齊告糴。而曰。告糴于齊。見其情之急也。急病讓夷。何足爲功。適以昭其治名不洽實之罪焉耳。魯之君臣。蓋亦因此而加省矣。則又愈不知戒。以求於人之餘。而新延廩。夫延廩者。法廩也。養馬之所也。凶年飢歲。民食不給。而馬廩是。新推此心也。不至于率獸而食人乎。故書新延廩于告糴之後。所謂時黜舉羸。知其用力爲已悉矣。然則莊公之爲國也。可知矣。不然。春秋書築者七。而公有其四。書興作者九。而公有其三。書無麥苗。無麥禾。而皆見于莊公之世。何耶。魯十二公。臺池苑囿之役。莫多於莊公。而水旱螟蟻。多靡有蜚之災。皆備于莊公。天人感應之理。不誣矣。而公終不寤也。身死而妻子不保。幾亡其國。嗚呼。豈他人之咎哉。

初稅畝 蠶生 饑大有年

困民以致災者。理之常。悖道而獲福者。理之變。夫天人感應之理。春秋之所深謹也。是故螽蟥饑饉。國之災也。魯之宣公廢助法而用稅。虐民也。虐民而天降之災。宜矣。故所稅畝之年。螽生而饑。斯非理之常乎。百穀順成。國之福也。魯之宣公奪世嫡以有國。悖道而天降之福。異矣。故即位之十有六年。而大有年。斯非理之變乎。在他人以饑螽爲變。在宣公則爲常。在他人以有年爲常。在宣公則爲變。春秋誅亂臣。討賊子之法。嚴矣哉。商書曰。惟吉凶不僭在人。惟天降災祥在德。夫凶人爲不善。而致譴焉。天道之當然也。其或反之者。庸非異乎。是故螽蟥之害。法所當書。而他公皆記。有年之瑞。法不當書。而獨志于桓宣之册。聖人之旨。淵乎微矣。且饑者。五穀皆歉之謂也。宣公以不義得國。懼討于人。而竭力以事齊。水旱螽蟥相繼而起。於是國用不足。而稅畝之法興焉。初者。事之始也。稅畝者。公田之外。又履其餘畝而取之。是爲什而取二矣。以諸侯而擅改先王之法。以國君而行虐民之政。由是怨懟之聲。上聞于天。而戾氣應之。秋螽未息。冬螽又生。螽者。螽之子也。螽蟥相繼于二時。嘉穀其有孑遺乎。故遂至于饑饉。而無以振業。貧乏。春秋書螽生與饑。繼于初稅畝之後。則是災也。實稅畝之應。而宣公得之。非過矣。故曰。困民以致災者。理之常也。若夫有年者。五穀皆熟之謂也。宣公以庶孽之子。篡止嫡之位。使惡視二子。殞于非辜。而過市之哭。哀動魯國。是上不有王法。而下不有宗廟。王朝不能施殘執之刑。鄰國不聞有沐浴之請。而魯國又無石碯之臣矣。則惟天能誅之耳。其乖氣所感。兩螽而一旱。一水而兩饑。宜也。至于是歲而大有年焉。有年而曰大。則禾麻菽麥。黍稷種稊。實穎實粟。無所不有。是果何以致之哉。春秋書大有年。于螽生饑之明年。則是福也。非凶人之所當有。而宣公得之。爲反常矣。故曰。悖道而獲福者。理之變也。然則天道僭乎。曰。

非也。宣公在位十有八年，而獨是年爲有年。他年之歉可知矣。越明年而宣公死矣，獲罪于天者，宣公也。魯國之民不可盡絕，而周公不可摧也。稅畝矣，饑矣，而不畀之以有年，則周餘黎民何罪乎？天非爲宣公而有年也。夫豈僭耶？或曰：春秋之法，常事不書，惟變則書之。桓宣之有年，志變也。則桓宣之水旱螟螽，乃爲常矣。何以亦書之乎？曰：春秋天子之事也。天人相與之理，懼災思患之意。治惡人，矜小民之道，無所不備。是故觀凶災之迭見于二公，則知天道之不僭，而爲惡者知所警。觀有年之獨見于二公，則知惡人之不可容於世，而操刑賞之柄者，可以知所主矣。嗚呼！至哉！故曰：孔子成春秋，而亂臣賊子懼。

晉郤缺帥師伐蔡，戊申入蔡，諸侯盟于扈。

伯主能以力治二國，而不能以義討罪人。春秋比書而自見也。夫諸侯從夷，固伯者之所當問，而弑逆之惡，又烏可舍而不討也哉？晉靈之時，蔡從楚，以次厥貉，罪也。故郤缺帥師伐蔡，而入其國，力有餘矣。夫何齊有商人之亂，則諸侯爲會于扈，而受其賂，何不以所治蔡者治齊乎？春秋書伐蔡入蔡于前，而不序諸侯於盟，扈之役，知晉之所以力爭諸侯者，不過求逞其私耳。豈其知有義哉？嘗謂天下之事，有重有輕，故伯者之治，有緩有急，是故不能三年而總小功之察，謂之不知務。失肩背而養一指，則爲狼疾人矣。今也商人弑君，告于諸侯，已及莽矣。伯主無致討之令，而大夫無沐浴之請，何其久也。必有以也。一旦上卿授鉞，鞞鞞鞅鞅，出自絳郤，意其事之在齊也。旣而義旗不指于營丘之邦，馬首乃瞻于淮西之境，諸侯不無惑矣。師及于蔡，蔡人未服，則以戊申之日，鼓而入其國都，以百里之侯，邦倚蠻荆之勢，援未易破也。今以孤軍攻之，而城郭失其守，甲兵失其衛，使蔡侯泥首受罪，以爲城下之盟，謂晉師不強，而若此乎？苟以此

衆聲齊之罪。師直而壯。若舉江河以沃炎火。商人之血。何足以汙斧鉞耶。奈何諸侯之會于扈。名爲討齊。實以取貨。謂其力之不足乎。則八國諸侯。非直一郤缺之師也。惟其不以賊爲賊。而甘與賊爲徒也。是故于扈未盟。天下猶有所望。而齊猶有懼也。及夫于扈既盟。然後天下絕望。而商人成爲齊侯。於是變討罪之師。爲成亂之會。是舉諸侯而爲夷狄之行矣。不亦甚哉。春秋於伐蔡。而書帥師。書伐。書人。則其力之有餘可知。盟扈。略諸侯而不序。則其義之不足可見。而後討賊之功。不足以蓋其縱賊之罪矣。嗚呼。中國之所恃以制夷狄者。禮義而已。有賊不討。禮義亡矣。雖得百蔡。何益哉。厥後遂習爲常。至于陳夏氏之亂。方以會狄爲務。而楚莊遂爲辰陵之盟。晉卒無以爲伯。其來非一日矣。今觀入蔡之役。不足以離蔡于楚。而盟扈之役。反足以使魯從齊。則晉人見利忘義之效也。向使晉靈能移伐蔡之師于齊。而冀缺能推不可以怠之心。以納忠于盟扈之際。則晉之世伯。視文襄有光矣。豈其有郟之敗哉。噫。

考仲子之宮初獻六羽取郟大鼎于宋戊申納于太廟

正樂用于別宮。而非禮陳于祖廟。聖人據事書之。所以傷魯之衰也。夫禮樂者。國家之本。不可一日紊也。隱公立宮以祀仲子。而樂舞之數用六。用六雖正。而獻于妾母之宮。則非其所矣。桓公葵亂。以立宋督。而取郟大鼎之賂。求賂立賊。而納于先君之廟。豈不爲已甚乎。夫君子之事其親也。造次必以其禮。然則魯人之待周公。曾仲子之不若矣。嗚呼。悖哉。夫媵妾不可以爲夫人。未聞違禮立宮以祀之也。宗廟禮法之所在。未聞昭違亂之賂于其中也。魯於春秋。號爲秉禮。而若是乎。此聖人之所爲懼。而春秋之所以深謹也。蓋仲子者。惠公之妾也。惠公元妃孟子。既入于廟。則仲子無祭享之所矣。若以庶子爲君。爲其母築宮。

而使公子主祭之。典言之。則仲子非隱之母。安得爲立宮乎。至其樂舞之數。則於別宮。不敢同於羣廟。而降用六羽。自當時言之。蓋以爲得禮矣。以王制論之。則諸侯用六。奚取於仲子之宮哉。今也六羽。獻于妾母之前。而羣公之廟。用八。自若。曾是以爲禮乎。春秋因其始成而祀。書曰。考仲子之宮。既正名。其爲非禮矣。獻羽而書初者。以見前此未嘗有六佾之舞。所謂因事以明用八之僭也。若夫太廟者。周公廟也。曾謂周公而享非禮之祀乎。猶有鬼神。而以不義之物。陳于公前。公其無所依矣。不孝孰大焉。桓既篡兄而立。又推其惡。以及於人。於是僭齊鄭之徒。成宋督之亂。而取其賂器。置于周公之廟。是死周公也。不惟毀祖宗之靈。而又以教其百官。習爲夷狄禽獸之行。亂臣賊子。得志而無忌憚。至於此極哉。春秋書取郟大鼎于宋。取者。得非其有之稱。又書納于太廟。納者。不受而強致之謂。曰以戊申深謹之也。夫六羽者。當用之樂也。而在仲子之宮。郟鼎者。違亂之器也。而在周公之廟。四方之人。將於魯乎觀禮。而魯之禮。若是哉。此春秋之所爲懼也。因循至于僖公。而有禘太廟。致夫人之舉。文公。而有大事太廟。躋僖公之事。仲子猶別立宮。而成風。則直致之于太廟。仲子猶降用六羽。而成風。則直用天子之大禘。禮樂之紊。旣不可言。而亂倫逆理之事。紛紛然於周公之前。陳焉。何周公之不幸。至於此哉。周家之禮。公所制也。而公之子孫。若是他國。復何望哉。嗚呼。此春秋之所以假魯史而作也。夫。

公會齊侯伐萊公至自伐萊大旱

人君以不義勞民。爲可危。故天應之災。爲可懼。甚矣。乖氣之能致異也。魯之宣公。以篡得國。故屈己以事齊。今又勞民以會齊。而伐萊。天何義乎。公旣告至。而國內大旱。庸非嗟怨之氣。上感于天而致之乎。春秋

書伐書至於上。以著宣公之罪。繼書大旱於下。以見天道之應。不可誣也。嘗謂善惡之事作于下。而災祥之應見于上。此天人相與之至理也。是故僖公以務農重穀爲事。而三時之不雨。不足以爲其害。莊公以峻宇雕牆爲務。而一時之不雨。卽可以爲之憂。天之於人。各以類應。其可忽哉。今宣公之得國。既獲罪于天矣。況於卽位以來。煩其兵役。瀆其交際。虐內事外。而不恤其民乎。則天降之災。宜矣。齊爲不道。狡焉思啓封疆。故爲伐萊之舉。其所以召兵於魯者。恃其有援立之私恩也。宣自會于平州以後。奴役于齊。非一日矣。今又動魯國之衆。往爲之役。以伐無罪之萊。外結讐于遠人。而賈怨于百姓。則是行也。寧不危哉。幸而得歸。反行飲至。以告于先君之廟。甚哉其怙惡也。軍旅之後。必有凶年。蓋其愁歎之聲。怨憤之氣。上徹于天。而戾氣爲之應乎。是故伐萊方至。旱曠已作。旱而曰大。必至於滌滌山川。而不可沮。非眞僖文不雨之比也。春秋以大旱書者。抑旱而不雩耶。是無憂國恤民之心也。雩而不雨耶。是見棄于天矣。宣公造惡不悛。而流毒于其國。若是哉。聖人比而書之。所以哀魯國之民也。雖然。宣之虐用其民。不特此也。伐莒取向。伐邾取繹。改助法而用稅。非一事矣。天之示變。亦不特此也。螽之見經者三。饑之見經者二。至於大水。螽生。亦非一端矣。春秋備書于經。然則爲君而不仁不義者。亦可警矣。故曰。天災流行。必不於有道之國。豈不信哉。

鄭伐許鄭伯伐許

諸侯之陵虐小國。春秋狄之于前。而爵之于後。皆以著其惡也。夫春秋之法。有加貶而後見其罪者。有直書而罪自見者。惟明乎屬詞比事之意。斯得之矣。鄭人爲許之小弱也。每肆暴以伐之。皆罪矣。故我成公

之三年。書鄭伐許。以其一歲而再動干戈。爲惡已甚。故稱國以狄之。所謂加貶以見其罪者也。及其明年。襄卒而悼立矣。喪未踰年。而復伐許。其惡非不甚也。然自鄭伯而不貶。所謂直書而罪自見。經之書爵。又見其釋服從戎。有忘親之罪焉。由此觀之。春秋之法。可知矣。嗚呼。王澤竭。伯功淺。小國之迫于大國。春秋深傷之也。許以太岳之胤。密邇于鄭。鄭莊怙其詐力。託爲鬼神不逞之詞。入其國而披其地。其所以不遂殄其宗祀者。東遷之初。尙以滅國爲重事。故未敢蒙首惡之名。然而竄逐其君。置許叔于東偏。而公孫獲處其西。制其死生之命。雖有存許之名。亦何異於滅乎。其後許叔因亂竊入。未幾而齊伯興。故得保其遺祀。以俟他日。鄭人蓋以許爲俘邑久矣。特畏大國而未得逞其志耳。以義言之。許者先王所封之國。鄭安得而虐之哉。今鄭襄既背中國而事楚。遂藉強夷之勢。肆虎狼之心。一歲之間。再加兵於許國。不思己之見陵於晉楚者。亦惟國小而弱之故。可不自反。而以是施於叢爾之男邦乎。是與夷狄之所行無以異矣。春秋狄之。所以誅其不仁之心也。襄公既沒。悼公所宜改惡從善。以自新也。奈何父喪甫葬。遂以吉禮從。金革之事。以肆其毒于許。夫許之與鄭。非有不共戴天之讎。何至伐之若是亟哉。忘喪非禮。陵弱不仁。干大國之怒。不智卒之交。訟楚寔以中國之君。而聽于夷狄之大夫。然則鄭伯之自伐。亦甚矣。春秋於襄之伐許。雖書之于公子。去疾帥師伐許之後。而其惡未著。故必貶之。而後見。若夫悼之伐許。則上書葬鄭襄公。而繼之以鄭伯伐許。則其罪已明。不必貶矣。故曰。惟明于屬詞比事之義。斯得之矣。大抵春秋之法。既貶則多從同。是故晉之伐鮮虞也。既於昭公之十二年狄之矣。至于十有五年。苟夷之伐。則直書之。蓋與鄭伐許。鄭伯伐許之書法同矣。雖然。許獨無可議者乎。苟能修德行仁。以保其國。何畏乎一鄭。而乃恃楚。

以爲安。他日楚有亡郢之禍。而鄭遂有滅許之師。而葉夷白羽容城之遷。俱無益焉。嗚呼。觀遠臣以其所主。葉中華之禮義。而附夷以爲安。夫何社稷之能守哉。

陳侯使袁僑如會陳人圍頓陳侯逃歸

二國背夷以卽夏。乃不量力而陵小國。又不守義而叛伯主。此春秋之所惜也。夫爲國以禮。其可不慎而輕舉哉。陳之成公背楚從晉。而使袁僑聽命于鷄澤之會。可謂知所嚮矣。至于哀公。乃興圍頓之師。以挑楚人之怒。及夫于鄆有會。諸侯方急于陳。而又效匹夫之事。脫身以逃。則其舉不中禮甚矣。是故書陳侯使袁僑如會。見其背楚而從晉也。陳人圍頓。見其無故而怒楚也。陳侯逃歸。則又背晉而從楚矣。五歲之間。一來一往。君子蓋有取於成。而深不滿於哀焉。是故袁僑如會。而稱陳侯之使。致其志也。圍頓。而稱人貶也。逃義曰逃。逃者匹夫之事也。由此觀之。子奪見矣。嗚呼。陳以有虞之裔。列在三恪。雖其國邇于楚。然春秋之初。楚患已及蔡鄭。猶未至于陳也。齊桓之伯。陳無事于四鄰。故獨倚齊以爲安。桓公卽世。穆公首生厲階。以倡于齊之敵。則延盜入室。職陳之由。由是而取焦夷。由是而圍宛丘。則陳實自取之耳。尚賴晉文之興。而踐土如會。得以自拔于蠻夷之汙。不幸而有靈公之禍。中國無伯。而陳遂專屬于楚。亦可哀已。今也晉悼復文襄之業。實中國之大幸矣。陳侯厭楚之暴。而幡然改轍。雖不能躬來聽命於壇坫之間。而袁僑之使。亦足見其向華之實。以二十餘年服楚之國。一旦不召而來。春秋能不與其出幽谷而遷喬木乎。彼楚也。怒陳背己。則未敢聲兵來伐。而姑使頓問陳者何耶。侵欲之暴。其曲在己。故未有詞以加陳也。爲陳計者。修明德政。堅事伯主。而睦四鄰。叢爾之頓。亦何以伺其隙哉。不知自反。而肆其兵威。以圍頓。不

思頓小于陳。而陳小于楚。頓固非我敵也。而我豈楚敵哉。昔在穆公。嘗以頓故。受得臣之圍矣。今而圍頓。無乃履其覆轍乎。遂使楚人得以有詞于我。而陳國從此不遑寧處。伐而繼之以圍。陳雖噬臍。亦知無及。然當是時。晉君方明諸侯聽命。始之以戍。而繼之以救。未嘗頃刻而忘陳也。今又合諸侯于鄆。亦惟陳故。之以苟能完守以老楚。伏信以待晉。猶可爲也。奈何以千乘之君。效匹夫之舉。昔先君之成德。棄儀衛而逃奔。是下喬木而入幽谷。其父析薪。其子弗克荷負。春秋至是。不得而不責之矣。蓋嘗論之。春秋之時。陳與蔡鄭皆困於楚之國也。而其受患之故。多在於不量力以召侮。是故鄭之見伐。始于侵蔡。而蔡之被圍。由于滅沈。不思小國之見陵于我。亦猶我之見陵于楚也。惟不能推己及人。以至于此。是故陳人圍頓。獨加貶焉。蓋圍國非將卑師少所能辦。而書人焉。其貶明矣。雖然。晉之與楚爭者。陳與鄭也。自于鄆以後。而陳遂終于從楚。悼公之志。蓋自以得鄭爲足矣。晉人曰。有陳非吾事也。無之而後可。魯人曰。陳不服於楚。必亡。論而至此。則陳之不能自拔爲可矜。而不能拔陳於楚。則亦伯者之罪也。

城費叔弓帥師圍費

大夫役民以彊私家。而無以制陪臣之橫。可見其出乎爾者之反乎爾也。甚矣上行下效之捷于影響也。季孫宿爲政于魯。無故役民以城費。不過欲彊其私邑。以弱公室也。豈意至于意如。而南蒯據之以叛。叔弓帥師圍之。有如敵國。其效豈不深切著明矣乎。君子曰。所惡于下。毋以事上。所惡于上。毋以使下。觀季孫之所爲。亦可爲不能事君者之戒矣。夫先王之制。大都不過三國之一。中五之一。小九之一。所以示強幹弱枝之道。而弭亂之所由生也。昔者季友受費于僖公。至是九十年矣。未嘗有驅場之虞也。無故役民。

以城之。且當農事方殷之月。何其急耶。是季孫宿之欲斲喪公室。惟恐其弗及也。是故乘叔仲之媚已。而與版築之功。君且不顧於民。何有哉。一旦百雉之城。溥彼東土。而龜蒙之景。如兩國焉。由是而三分公室。有其一。由是而四分公室。有其二。惟其所欲而爲之。夫孰得而制之哉。而不思南氏之世爲費宰。亦猶季氏之世爲魯卿也。彼南蒯之欲出季孫。亦猶季孫之欲僭其君也。叔弓以國卿動魯國之衆。環而攻之。則向日之溝池雉堞。反爲他人之守。亦獨何哉。出乎己者之反乎己。不可誣也。春秋書城費于襄公之時。而又書圍費于昭公之世。所謂屬詞比事。原始可以知其終矣。故曰祿之去公室五世矣。政逮于大夫四世矣。故夫三桓之子孫微矣。夫三桓實分公室。而子孫以微。何耶。下陵上替。雖令不從。此其效也。或曰春秋不登叛人。南蒯以費叛。而不正其罪。何也。曰謂春秋法不書內叛。但書圍。則叛可知。此胡氏之說。其或有未盡歟。按左氏南蒯請子仲吾出季氏。而歸其邑于公子更其位。我以費爲公臣。則蒯之叛。叛季氏也。非叛公也。季氏無君之人。安得以叛名蒯。春秋亦安得以叛討夫。謀去意如者哉。不然。公山弗狃以費畔。召孔子。而子欲往何耶。

公至自管管侯使士匄來聘杞伯來朝邾子來朝築郎囿

交情睦于外。而逸樂肆于內。觀春秋比事之書。可以知望國之所以衰矣。夫國家閒暇。乃脩明政刑之時。而勞民以自奉。則豈君人之道哉。成公之末年。至自朝管。而管侯即使士匄來聘。大國睦矣。旣而杞邾邾子相繼來朝。小國睦矣。四鄰和睦。國家無故。不於此時立政立事。以新其國。乃役民以築鹿囿。夫何爲哉。君子以是知成公之終於不振而已矣。嘗觀成公在位十有八年之間。國內多故。甚矣。方其卽位之未幾。

也。亦棘有盟而東虐于齊。戰韓幸勝而南辱于楚。比年朝晉而汝陽之田終失于韓。穿之言僕僕從役而沙隨之會又中於僑如之譖。會葬而見止來聘而及盟。其所以困心衡慮者亦云至矣。何獨無憤悱自強之心乎。幸而晉悼新立。矯厲公之虐政。復文襄之故業。推親親之心以仁我。是以公之如晉。至不暖席而十旬之聘。踵及魯庭。以伯主之尊。報禮於魯。惟恐或後。晉之待魯。非復昔日比矣。於是杞伯。邾子之朝。項領相望。自吳伐郟之歲。曹伯來朝之後。諸侯不至魯庭者十年。謂魯之不見重于大國也。今而驟來。庸非爲晉重魯之故歟。大國來聘而小國來朝。公之困辱至此。可少殺乎。則當居安思危。鑒已往之不逮。圖將來之日新。明德脩政。懷保小民。維其時矣。不此之圖而槃樂傲怠。如恐不及。當農事之方殷。役丘民以築囿。囿曰鹿囿者。養鹿之所也。虞山藪之利。以奉耳目之娛。而不知國政已落三家之手。雖有臺池苑囿。其能獨樂之哉。春秋比而書之。義自見矣。厥後昭公之卽位也。魯亦未有事也。七年而公如楚。八年而叔弓如晉。九年而仲孫貜如齊。大國睦矣。而郎囿築焉。無乃效成公之尤乎。詩曰。且以喜樂。且以永日。宛其死矣。他人入室。築囿未幾。而周公之魯爲季孫之魯矣。他日定公亦築蛇淵之囿于墮。三都之日。卒使聖人去魯。而一變至道之國。終分崩離析而不能守。叔孫有言曰。無囿猶可。無民何爲。而魯之諸君不悟也。哀哉。

蔡侯鄭伯會于鄧公及戎盟于唐公至自唐

德不脩而懼外患者爲可鄙。身不正而結外交者爲可危。夫天下莫大於理。莫強於義也。曾何會盟之足恃哉。蔡鄭與鄧爲楚彊而懼。則相與爲會于鄧。而不自省其德之不脩也。不亦鄙乎。魯之桓公。篡其兄而

立則往與戎盟于唐。而不自念其身之不正也。不亦危乎。是故于鄧之會。特書于經。而于唐之盟。謹書其至。聖人之意見矣。嗚呼。方叔元老。克壯其猶。吾聞蠻荆之來威矣。未聞私相會聚而懼之也。元戎十乘。以先啓行。吾聞戎狄之是膺矣。未聞刑牲歃血以要之也。而況於時會發禁。行人掌其事。非列國之所得專。司盟之法。太史藏其約。非諸侯之所宜用也哉。今也。蔡鄭之爲會于鄧。不過謂我之封境密邇。荆蠻而竄路。繼縷之衆。實蕃有徒。惟我有邦。所當協比。以爲輔車相依之勢。自常情觀之。其策未爲失也。君子則曰。惟德可以自強。苟有令政。則湯以七十里無敵於天下矣。何不師之。而安其所以危乎。事醜德齊。莫能相尚。而徒以會聚爲能事。陋矣哉。三國之所爲也。春秋直書其事。雖無貶詞。而鄙之之意。自見于言外矣。若夫魯桓之及戎盟于唐。得無謂已得國本以不義。而狼子野心之種。實處東郊。我位新定。所當脩睦。以市繼好。息民之譽。自常人言之。以爲不足責也。君子則曰。夷狄之有君。不如諸夏之亡也。彼諸侯之甘心同惡者。無可望矣。安知禍之不在此乎。要言旣畢。反行飲至。以告先君之廟。幸矣哉。桓公之此行也。春秋先書及。以志其欲在魯。終書至。以志其幸而得歸。而危之之意見矣。觀之諸侯。已不能自強矣。觀之望國。又有甚焉。則夷夏盛衰之勢。判矣。嗚呼。濫觴不塞。必致于滔天之憂。履霜不謹。無惑乎堅冰之至。他日盟于齊。而戰于泓。次厥貉。而盟辰陵。甚而至於問鼎於周室。則楚之勢愈盛。而使蔡鄭之徒。能思所以自強。吾固知其不在此也。異日侵濟西。而爲魯患。阻燕貢。而逐曹君。極而至于敗劉康公之師。則戎之抗莫遏。而使中國無間可乘。吾又知其未至此也。詩曰。枝葉未有害。木實先撥。憂國者。盍亦以禮義爲尙。不然。何華夷之足辨哉。

鄭人侵宋。宋人衛人衛人伐鄭。荆伐鄭。會齊侯。宋公。云云。同盟于幽。

貳國背好。以啓華夷之交。爭外夷。猶夏而速諸侯之從伯。此世道之所以變也。夫夷狄之陵中國。豈無其故。而列國之成爲伯。亦豈無其由哉。故我莊公之時。鄭人棄二鄆之好。而問齊以侵宋。於是諸侯有伐鄭之舉。未幾而荆亦伐鄭。則華夷之爭鄭。非由鄭人侵宋以啓之歟。荆既伐鄭。而後于幽之盟。出於諸侯之所同欲。而齊伯成矣。然則來齊楚之爭者。鄭也。而成齊桓之伯者。荆也。比事以觀。豈不信哉。師人有言。國必自伐。而後人伐之也。其鄭之謂乎。又曰。爲淵驅魚者。獮也。爲叢驅雀者。鷓也。其楚之謂乎。我莊公之十年。齊宋齊始爲郎之次。其年荆亦敗蔡于莘。儼然有與君並興之勢矣。越四年而荆入蔡。於是乎有二鄆之會。諸侯之心。蓋已凜凜畏楚。而思倚齊以爲安矣。鄭何爲者。玉帛之好方同。而干戈之念又起。問諸侯之有事于鄭。而侵宋。潛師以掠人之境。何名也。是時宋方睦于齊。師而加宋。齊必救之。鄭豈不知此哉。而侵宋焉。是謂自作孽。以動天下之兵也。未幾而諸侯之師至矣。以一旅之侵。易三國之伐。鄭之爲謀。疎矣。不思既睽于齊。而又取轆于楚。遂使荆尸乘廣之卒。鳴鐘擊鼓。公然問其緩告之罪。而滎陽京櫟之間。自是多故。向使鄭人能守二鄆之好。則唇齒之勢方固。楚安得而輕犯之哉。故曰。貳國背好。而啓華夷之交爭也。若夫齊之圖伯。固未能卒。有諸侯也。北杏之會。宋人旋叛。二鄆之役。鄭又武心。屢曾而不敢爲盟。知人心未可以強一也。及夫荆患至鄭。則天下諸侯。皆有無厭及我之慮矣。於是大國若宋衛。小國若滑滕。遠國若陳許。望國若魯。無不皆來。而鄭伯亦不敢不親至矣。於是相與爲盟。且謂之同。而無不從齊之國矣。向使楚患未至于鄭。則桓公之伯。烏得而遽成哉。故曰。外夷猶夏。以速諸侯之從伯也。春秋書曰。鄭人

侵宋。責之也。三國伐鄭。而書人將卑師少也。荆伐鄭。狄之也。盟于幽。而書同。同欲也。諸侯書爵。與之也。不書我公。諱失信也。聖人予奪之意見矣。嗚呼。以列國而主天下之政。豈春秋之所欲哉。不得已也。則世道之變。可勝言哉。雖然。吾於齊桓伐鄭之事。不能無憾也。鄭突以篡而有國。當討也。使桓公能請于王。而正其罪。不亦美乎。而公之志。止于得鄭而已耳。伐鄭以討其侵宋。執鄭詹以問其不朝於天下之大義。無與也。論者謂召陵之役。不問楚之僭王。而問包茅之不入。蓋伯者之苟且。大抵類此。不然。九合諸侯。一匡天下。其功盛矣。何仲尼之門。羞稱之哉。

齊仲孫來齊高子來盟

外臣之來望國。其受命同。而所行異。春秋因其得失。而予奪之也。夫以道事君者。忠之大也。仲孫高子。皆齊大夫。仲孫之來。名爲省難。高子之來。名曰謀魯。其受命而來也。皆非有定難安危一定之辭也。春秋略其君臣之常詞。而不稱使。無以異也。然仲孫不勸其君。急于討賊。而俟其自斃。高子至則平魯難。而定僖公。使魯國賴之以安。是仲孫不能匡君以義。而高子則能權而合宜。故春秋一則直書曰來。而不言其故。一則美而稱子。且曰來盟。則二子之得失。可見矣。仲尼曰。君使臣以禮。臣事君以忠。謂之以禮。則不可爲私也。謂之以忠。則不以趨走承順爲恭。而以責難陳善爲敬也。然則仲孫高子之得失。豈不昭昭矣乎。夫齊之與魯。親則甥舅。且鄰國也。魯國有難。齊其可以坐視之乎。而況於盟幽之役。旣以伯主自任。昭大神。要言焉。於是乎授之諸侯。將何爲耶。天禍魯國。莊公卽世。而嗣子弗終。無所歸咎。魯之臣子。方將有討而力不足。則大國是望而已矣。桓公不脩德職。而有乘亂取國之心。乃使仲孫來魯。陽以省難爲名。而陰行

窺覘之計。伯主之義。豈若是哉。仲孫之言曰。不去慶父。魯難未已。則既知罪人之所在矣。則勸其君。共行天討。不可後也。乃曰。難不已。將自斃。固將坐而待之乎。雖有務寧魯難而親之之言。不足以蓋其幸灾。衞患之罪矣。卒使巨姦稔惡。無所忌憚。而武闔之禍。再作。向使仲孫能勸桓公。早爲之所。豈至此耶。春秋不言其故。而止曰。來。則其來之無名。可知矣。閔公無祿。魯國無君。桓公又使高子將南陽之甲。至魯而謀其國。其所以命高子者。想不異於仲孫矣。而高子則不然。君之命我。雖無一定之言。而我之事君。豈可不引之以當道哉。與其取魯而失天下之心。孰若安魯。以昭吾君之令德哉。於是制其闔外之命。魯未有君。我。是以定公子申之位。魯難未已。我是以有鹿門。吏門之城。魯民未安。我是以和其不協。而爲之盟。使周公之社稷。賴以不墜。而齊侯。獲存亡繼絕之名於天下。嗚呼。事君若高子。真所謂大臣哉。若仲孫者。可謂具臣而已矣。故春秋特褒之。而稱子。且曰。來盟。見其權在高子。而高子又能行權。而合乎善。非若仲孫之比矣。或曰。仲孫以省難來。安知其陰行窺覘之計乎。曰。觀桓公之問曰。魯可取乎。則知之矣。曰。然則仲孫何以稱字。而不貶乎。曰。仲孫雖不能勸君以討賊。而亦未嘗納君於惡也。故曰。君其待之。非也。而曰。君其務寧魯難。而親之。則是矣。故以仲孫方之高子。則不足。若加貶焉。則有勸桓公乘時以取魯者。又將何以罪之哉。此又輕重之權衡也。故曰。春秋非聖人莫能脩之。夫豈可以苟言哉。

晉人執虞公

諸侯徇利以失國。乃其自取之也。夫有國家。而以利徇人。未有不失之矣。其虞公之謂乎。虞公貪璧馬之賂。而從晉以滅虢。虢亡而虞亦隨之。春秋書曰。晉人執虞公。言以衆人執獨夫也。夫以千乘之國。爵爲上

公而管人執之。如一夫然。非虞公自取之乎。觀聖人之所書。可以爲貪利者之戒矣。夫虞。太王之昭也。管於是乎滅虞矣。則不言滅。而止言管人執虞公何耶。蓋滅者。亡國之善詞。上下之同力也。上無明王。下無方伯。諸侯而有壤地褊小。困於強暴。力不足而失其國。非其有以致之。則書滅。以見滅之者之罪。如譚遂。弦黃之類是也。若夫虞公。則異於是矣。以堂堂上公之尊。君百里之地。夫孰得而犯之哉。今也重貨財而輕兄弟。信邪說而違忠言。驥馬既入。而滅虢之師遂起。不思下陽滅而虢不能爲虢。虢滅而虞不能以爲虞。輔車相依。唇亡齒寒。宮之奇言之矣。而不聽。是愛社稷不如垂棘之璧。而視同姓之親。不如屈產之乘也。不仁不智。無禮無義。非獨夫而何哉。以千乘之君。而身爲獨夫。其亡也。非不幸矣。春秋不書管人滅虞。而曰管人執虞公。若曰。虞地之縑於管久矣。虞公之死命。制于管而已矣。故左氏曰。罪虞。且言易也。殺梁曰。其曰公者。猶下執之之詞也。嗚呼。利之能亡人國。若是哉。人亦有言。家必自毀。而後人毀之。國必自伐。而後人伐之。其如虞公矣。或曰。管之於虞。同姓也。衛侯燬滅邢。而生名之。虞固有罪。而管得從末滅。何耶。曰。滅人之國。其罪易見。而貪利以失國。其罪難明。下陽。邑也。而以虞管滅之爲文。管之罪已見矣。今又執虞公焉。虞公。天子之上公。而管人擅執之。是無王也。而得爲無罪乎。春秋不以梁亡之法書之。則亦不以恕管矣。若夫滅同姓之惡。復何待於貶耶。

莒人伐我東鄙圍台季孫宿帥師救台遂入鄆

伐國而圍人之邑。與救患而入人之邑者。皆王法之所不容也。夫兵。春秋之所惡。至于乘勢以爲利。尤有所不當爲者矣。我襄公之十有二年。莒人伐我東鄙。而圍台。書伐書圍。是罪之在莒也。季孫宿受命以救

台不受命而遂入鄆。書救而遂入，是罪之在季孫矣。莒固不義，而魯亦豈爲義哉？春秋比而書之，所以著二國阻兵脩怨之罪也。凡書伐者，皆惡其擅兵以爲暴也；伐而圍人之邑，則又甚矣。凡書救者，皆善其恤患而解紛也。救而遂入人邑，則救不足言，而入爲罪矣。是故叢爾莒國，敢伐我而圍邑，患自外至者也。言子固爲魯憂之，季氏強臣，因救邑而生事，患自內作者也。魯國之憂，至是始大矣。嗚呼！龍旂承祀，奄有龜蒙，魯周公之裔胄，春秋之時，惟齊倚其舅甥之故而轉爲仇敵，其他若宋若衛若晉若秦，皆不敢以一矢相向者，畏周公故也。今以僻陋在夷之莒，乃敢執干戈與魯周旋，庸非魯人自取之乎？于鄆之役，季友敗其師而俘其卿，莒人不敢報也。僖公屈千乘之尊，嫁女于其大夫，而自主之，又降班失列，下與之盟，封境之間，雖得無事，而辱國亦甚矣。宣公以不正之君，貪功徇利，以啓爭端，莒猶未敢致報，畏魯之有齊援也。襄公不務德政，而屬鄆以爲私，卒致莒人滅鄆，而侏儒有狐疘之敗，由是魯之不能爲人所料，而莒始敢稱兵伐我矣。至于今而圍台，乃莒人伐我之役也。問諸侯之有事，背盟好而興戈矛，今又伐我而圍其邑，莒之罪，不可勝誅矣。季孫受命以救台者，我之封邑，受諸先王，有民人馬，不可以不救也。師至而莒圍解，振旅以歸，復命可矣。乃乘時而遂入鄆，無乃怒蹠田而奪之乎？尤而效之，其罪與莒同矣。而擅權生事，不有其君，非細故也。其患豈而伐我東鄙而已哉？春秋書莒人伐我東鄙圍台，所以著莒人之罪，繼書季孫宿帥師救台，遂入鄆，帥師救台可也，而遂入鄆不可也。遂者專事之詞，入者不順之意。則季孫之罪不可逃矣。故嘗論之，莒魯之爭，每不利於公而利於季孫，厥後乘亂取鄆者，季孫也，而叔孫當其討伐，莒而取鄆者，又季孫也，而昭公受其辱，其事蓋權輿于救台入鄆之舉矣。故曰：莒患不足爲憂也，而大夫

之患深可爲魯憂也。詎不信哉。

衛人立晉

爲臣而擅置其君。爲子而專有其國。則皆得罪於王法矣。夫春秋爲正名分而作也。衛有州吁之亂。賊既討矣。其國人不請于天王而立晉。是擅置其君也。晉雖諸侯之子。無王命而遂立焉。是專有其國也。春秋書曰。衛人立晉。則衛人與晉之罪皆無所逃矣。古者諸侯繼世襲封。則內必有所承。爵位土田受之天子。則上必有所稟。必承國於先君者。所以重父子之親。必稟命於天子者。所以正君臣之義。天下之大倫。於是乎在。而可以私亂之乎。衛州吁以嬖人之子。弑其君而自立。諸侯連兵欲定其位。而衛人不以爲君。凡經八月而殺之于濮。謂衛國之無人焉。不可也。柰何知其一而不知其二乎。此聖人之所深惜。而特起衛人立晉之文也。歟。吾嘗觀衛人之殺州吁。而知春秋之初。人心之天理猶明也。及觀衛人之立晉。而傷春秋之時。人心天理之壞。亦自此始也。何也。擊鼓其鐃。踴躍用兵。介先君之寵。握百里之權。弑其君而虐用其民。有宋魯陳蔡以爲之黨。其勢未易取也。然而敢卽圖之。使一往而陳人遂執以請洸。以一告老之大夫。主其謀。而國人無不從。諸侯無敢沮。非人心天理之猶明。而若是夫。柰之何。討賊之後。遽爾相率自置其君。而不使一介行李。告于天子。視周室如無人焉。則不顧先王之典。而陷其君於無王之罪矣。彼晉者。宣公也。縱不足責。而石子賢人也。亦不念水木之有本源乎。無他。狃於見聞之習。而遂以爲常也。賢者而若是矣。人心天理之壞。可勝救乎。觀衛人立晉之文。繼于衛人殺州吁于濮之後。其爲深惜之可知矣。是故衛人書立立者。不宜立也。所以著擅其君之罪也。於晉絕其公子。言其內無所承也。所以明專有其國。

之非也。管也。既立。卒於不令。以亂衛國。大抵不正其始者。必不能善其終。蓋亦必然之理矣。或曰。春秋書立者。二。此年衛人立管。及昭二十三年。尹氏立王子朝。是也。彼則指其立之之人。而此則言衛人何也。蓋立子朝者。尹氏之私意也。朝不當立。而獨尹氏立之也。管雖不當專有其國。而實當立。故衛人之立管。特不請于王。爲可罪。而非若尹氏之私于子朝也。此又輕重之權衡也。吁。聖人之筆嚴矣哉。

三月癸酉大雨震電庚辰大雨雪

春秋紀陰陽之失節。所以示人君不可忽天道也。夫春秋常事不書。惟異而後書之。震電雨雪。常有之物。而以爲異。何耶。蓋周之三月。乃夏時之正月。陽氣未大發也。而大雨震電。陽失節矣。震電既發。則雨雪不當復降。越八日。而又大雨雪。是陽釋而陰復肆也。陰陽之交失若是。安得不以爲異乎。天人一理。有感則有其應。觀春秋之所書。而隱公之失政。可知矣。愚嘗求之洪範庶徵之論矣。君人者。所以建皇極。而納民于福者也。是故雨暘燠寒風之若否。由之而應。於是乎有恒寒恒燠之罰焉。人君知之。則遇災而懼。雖有其象。而無其應。不然。則應復爲感。而災咎之來必矣。是故震電者。陽精之發。而雨雪者。陰氣之凝。震電則發于燠。雨雪則凝于寒。不可並行也。隱公卽位九年。于茲不聞令政。而多涼德。以諸侯而不事天子。以國君而不撫庶民。軍旅數興。政權下替。君道之失久矣。今以建寅之月。未當啓蟄之時。而大雨震電。陽氣之運已過于早矣。雷電既發于癸酉之辰。而雨雪復作于庚辰之日。陽不順令。而動非其時。故不能勝陰之兆見矣。故震電而曰大雨震電。雨雪而曰大雨雪。則皆非小變矣。爲隱公者。蓋亦反躬而自省矣。德不脩。政不舉。歟。讒邪之未去。歟。善人之弗用。歟。抑小民之失其所。而祭祀之不其歟。何上天降鑒之若是。

也。我其夙夜畏天之威，而思所以自新，庶其免於戾矣。公則藐乎無所警也。方且伐宋取邑，會鄭入許，揚揚然自以爲功，而鍾巫之難作矣。春秋所書，雖然不言其應，而事應之符昭然不昧。故曰：非深明夫天人之理者，不可以言春秋也。抑嘗攷之于經，凡書雨雪者三，而兩在冬，若以夏時言之，則雨雪冬所當有，春秋法不當書，而況二百四十二年之間，豈止兩雨雪耶？故知春秋之以周正紀事，而書冬之爲建酉戌亥之月無疑也。此夏時之正月，則以震電雨雪兼作爲異，且又大而過常，則皆爲不時矣。嗚呼！讀春秋者，不以全經貫之，而欲因一句以求義，安能得聖人之微意哉！

公子結媵陳人之婦于鄆遂及齊侯宋公盟

大夫輕身以親淺事，而專命以抗公侯，春秋書之所以責其重以失已，而又輕以失人也。夫禮莫大於正名分，過與不及皆罪矣。而況於一出而兩失之乎？今公子結以國卿之尊，而下媵陳人之婦，是以所重臨乎禮之輕，既失已矣。既而以大夫之卑，而專事以及齊侯宋公盟，是以所輕干乎禮之重，又失人焉。然則結之不知禮也甚矣。春秋能不深惡之哉！吾聞之易曰：君子以裒多益寡，稱物平施，故以微者而視大夫，猶以大夫而視公侯也。其體之不敵，猶堂陛之有級，截然不可犯矣。今公子結以諸侯之子，爲富國之卿，固將任出謀發慮之寄，以匡社稷，庇民人也。今乃縱一己之私情，親媵婦之淺事，是謂以尊臨卑，而亂上下之等威矣。至於齊侯者，太師之胤，東州之方伯也。宋公者，先代之後，天子之上公也。夫豈列國大夫所可敵哉！乃不自揣，而敢上要之盟，無乃以卑抗尊，而紊君臣之名分乎？故以公子而媵微者之婦，是以冠而薦履也。以大夫而盟齊宋之君，則舉足而加首矣。不特此也，人臣非君命不越境，鄆，衛地也，以私事而

出不可也。大夫無遂事。盟者有國之大權。不稟于君而專之不可也。然則此行也。豈特失己失人而已哉。又有不臣之罪矣。春秋據事而直書之。結之罪其可逃乎。是故牲盤之好。方講于秋。至冬而三國之師。至于西鄙。故曰。國必自伐。而後人伐之。其公子結之謂乎。雖然。魯則失矣。齊亦未爲得也。彼結之求盟。其從其否。固在我也。何至以二國之君。而輒從其所欲哉。旣盟而後伐之。非矣。厥後季孫行父會齊侯于陽穀。求盟而齊侯弗及之盟。夫以商人之不義。且能卻行父之請。而況于堂堂伯主之尊乎。嗚呼。結不足責也。吾獨深爲齊桓惜之。

公會齊侯云云盟于牡丘。宋人伐曹。楚人敗徐于婁林。

伯謀不協而與國貳。此外夷之所以得肆其志也。甚矣。齊桓之伯有始而無終也。牡丘之役。將以救徐。而先爲盟。固可見其不協矣。誓言方新。而宋人有伐曹之舉。大功未立。而自攜貳。將何以禦外患耶。遂使楚人得志。而敗徐于婁林。中國之勢。於是乎衰矣。由此觀之。非桓公不能敦不息之誠。而至於斯歟。常謂齊內以治外者。善謀也。慎終以承始者。善道也。故外夷之進退。未嘗不視諸華之彊弱。而諸侯之向背。又豈不由伯心之思數哉。是故桓公之始伯也。鄭侵宋。則合宋衛以致討。荆伐鄭。則率魯宋而往救。分災討貳。諸侯無闕。故能壯中國之勢。以服四夷。召陵之功。蔚爲五伯之盛。誠可嘉也。使其嘗存是心。不亦善乎。柰何葵丘既會。震矜遂生。由是楚伐黃而不救。以次陴。倚角之助。反貽隊命亡氏之悲。則桓公之不足以宗主諸侯。人知之矣。不然。以密邇山東之徐。楚人何敢踰越險阻。以伐之耶。今楚而敢伐徐。則以不救黃。而覘桓公之不能矣。公能於此。而振旅焉。猶可及也。柰何八國諸侯。萃于牡丘。則不鼓行直指淮泗之間。以

孫徐人於焚溺。而方且刑牲歃血。以詔鬼神。諸侯君實有之。何辱盟焉。則伯謀之不協。可知矣。使敵人得以忖度其情。而淹留不退。誰之咎耶。大夫之救。不聞有功。而伐厲之師。徒爲黷武。未幾而無役不從。宋遂敢致怨。于伐厲從齊之曹。雖曰弱曹。不顧齊矣。不知牲丘之盟。何爲耶。外變未弭。內志已曠。俾好惡同之。之國。翦爲仇讎。而不能禁兄弟閔于牆。外禦其侮。今不然矣。中國之虛實。在楚人目中矣。於是荆尸乘廣之旅。蠶合豕突。以敗徐于婁林。則向日爲齊取舒之人。今亦無以庇其民矣。使三十餘年之功業。一旦掃地。豈不哀哉。嘗因是而論之。齊桓之伯業。有係於宋不小也。方其始也。宋公推戴。以爲盟主。而伯業以成。及其終也。宋人背之。以伐曹。遂卒無以制楚。昔者湯以七十里。文王以百里。曷嘗倚人以爲勢哉。譬之於水。有木者。其出無窮。若夫蹄涔溝澮。得雨而盈。霽則涸矣。嗚呼。此伯者之功烈。所以如彼其卑。而君子不願爲之也夫。

齊侯襲莒

大國用兵。以掩人之不備。春秋特書。以著其罪也。夫兵以禦暴。非所以爲暴也。而況以詭詐行之者乎。齊爲不道。乘莒人之不備。而潛師以襲之。不仁甚矣。春秋特起襲莒之文。而專目齊侯。則其包藏禍心之惡。何所道哉。先王用三驅。而不掩羣。君子釣而不綱。弋不射宿。待物且爾。而況於人乎。凡春秋書用兵。皆在所惡。然亦有聲罪伐人。而駐兵不戰以服之者矣。未聞有以襲書也。彼小國恃大國之安靖。已無故而加之兵。已有陵弱犯寡之罪。況以陰謀闕計。出其不意而掩取之乎。此春秋之所必誅而不赦者也。齊莊昔澶淵之會盟。而助叛臣以伐盟主。不義甚矣。人孟門取朝歌。無損於晉也。動而無所以生悖心。於是襲莒。

之念興焉。銜枚臥鼓。出莒人之不意。自謂一鼓可以得莒矣。而不虞其謀之不遂也。且于之門。傷股而退。蒲侯之遇。杞梁授首。亦何益哉。人亦有言。抑君似鼠。晝伏而夜動。其齊侯光之謂矣。春秋二百四十二年之編。此爲特筆。蓋用兵之中。其罪爲尤甚者也。而齊獨有焉。他日宋皇瑗帥師取鄭。師于雍丘。而鄭罕達亦帥師取宋。帥于岳。潛蹤密跡。伺人之間。以相傾覆。流而至于戰國。殘民以逞。若艾草菅。然始作俑者。其無後乎。今年未能得志。明年再興伐莒之師。構怨未已。而不知禍盈惡積。變起蕭牆。未幾何時。崔氏之難作矣。故曰。阻兵無衆。安忍無親。衆叛親離。難以濟矣。嗚呼。若齊莊公者。尙誰懟哉。抑嘗考之于經。凡特筆以著其暴者。多在于齊。故在襄公。則有遷紀邠郟之舉。在桓公。則有降鄆遷陽之文。不特此也。春秋未嘗書滅國也。而滅國亦自齊始。發揚蹈厲之志。以成從簡尙功之俗。蓋其流風之未泯歟。

誠意伯文集卷之二十

築臺于郎築臺于薛築臺于秦冬不雨

力役薦興而民困。故天降之異爲可憂。夫固國莫大於保民。而保民莫切於備患也。魯之莊公。不知務本而節用。故卽位之三十一年春。而築臺于郎矣。至夏而再築臺于薛。其秋又築臺于秦。三時而築三臺。是謂妄興力役。無故以勞民也。其冬而有不雨之異。夫民力困矣。而重之以天災。寧不深可憂乎。是故一歲築臺而至于三。則莊公之虐其民者。可見。一時不雨而書。則聖人之憂民者。可知矣。吾嘗觀于莊公之經矣。公之二十八年。一興築郟之役。而遂至于大無麥禾。則其不能務本節用。而無豫災之備。可知矣。築郟之歲。未嘗聞有水旱蝗螟之災也。而至于倉廩皆竭。況于連築三臺。而重以不雨之變乎。嗚呼。此春秋爲之深憂。而謹書之也。古者天子有靈臺。以候天地。諸侯有時臺。以候四時。夫豈以爲觀游之所哉。今莊公去國築臺于遠。則是爲耳目之娛。而勞民矣。勞民以自樂。使百姓見其車馬羽旄。皆疾首蹙頰。而相告。其何以爲國乎。故當卒歲于相之時。旣已築臺于郎矣。至舉趾條桑之月。又築臺于薛焉。侈心一肆。遂不可遏。又役享葵及菽之民。而築臺于秦。何至若是數數。而不憚煩也哉。財盡則怨。力盡則黷。怨黷之氣。積于下。而陰陽之氣。沴于上。是以不雨之應。遂見于二年之冬。嗚呼。天之愛民甚矣。豈使一人肆于民上。而淫從其欲哉。今茲之警。良可懼矣。是故一時不雨。非大災也。春秋猶謹書焉。所以寓憂民之深意也。抑嘗論之。魯於春秋。以周公之故。而爲天下諸侯之宗。莊公值齊桓之伯。宴安無事。苟能立政立事。以保又其民。

周公之業可復振也。今也不然。及此時盤樂怠傲，不亦深可惜哉！三築臺而不雨矣。明年之春，又城小穀。是以民力爲不足惜，而惟其所欲爲矣。身雖終於正寢，而嗣子卒斃於亂臣之手。其國幾亡。嗚呼！使天假之年，吾恐莊公之憂不在其子孫，而在其身矣。

齊侯衛侯鄭伯來戰于郎齊人衛人鄭人盟于惡曹

諸侯連兵以構怨，又結言以固黨。春秋所以直書于前而貶之於後也。夫征伐會盟，已非諸侯之所得爲。而況以不道行之者乎？鄭憾魯之後已，而挾齊衛之君爲郎之戰，是謂連兵以構怨，非義甚矣。旣戰而爲惡曹之盟，又結言以固黨，夫何義乎？春秋存其爵於戰，所以見其實，貶其爵於盟，所以正其罪。聖人之筆削嚴矣哉！嗚呼！九伐之法，職在司馬。王者所以討不庭，盟載之法，掌於司盟。聖人所以待衰世，有天子在，夫豈諸侯所得而私用哉！彼齊者，太師之胤，衛者，康叔之後，而鄭者，宣王之懿親也。我周東遷，子孫日失其序，惟是一二伯父叔舅，所當戮力以爲藩屏，豈如弁髦而因以敵之乎？今也不念先王先公而私相樹黨，以侵敗王略，使宗周之卑日益滋甚，其何罪大焉！嗚呼！此春秋之所必誅，而不以聽也。且郎之戰，何爲耶？魯桓天下之大惡，人人所得而討也。彼鄭伯旣首盟于越，以定其位，齊侯則繼會于稷，以濟其姦。衛亦坐視而不問也，則皆與之爲徒矣。今乃以周班後鄭之故，合三國之君，親將戎卒，壓周公之封境，以快心於一戰，尙爲知類也夫。是故春秋列序三國之爵，而曰來戰于郎。若曰三國之志爲此戰也，則其動衆無名，殘民不道之罪可見矣。鄭伯主兵而先齊者，所以治惡黨，猶衛州吁主兵而先宋也。惡曹之盟，又何爲耶？方其來戰也，旣曰同心以從事于兵革矣，復何嫌隙而結盟哉！蓋其合也不以義，則其中不無疑矣。於是

刑牲歃血。質之以鬼神。矢之以約誓。將以固其黨與。而求其所大欲。而不知信之不由中。盟何益哉。徒足
以長亂耳。春秋於此。貶其爵而稱人賤之也。若曰。無道之君。不足以當王爵也。則其慢鬼神。犯刑政之罪。
可見矣。是故始不書爵。則不知其爲三國之君。後不書人。則不足以瘴三國之惡。故前書爵。而以來戰著。
罪。後書其盟。而以奪爵示貶。屬詞比事之教。不亦深切著明矣哉。厥後不出三年。鄭伯果合紀魯而戰。齊
衛。明年齊衛又聽宋人之言。而伐鄭。誓言果足恃乎。卒之連兵結黨。惟利之從。今日取賂而納突。明日納
朔而歸俘。使兄弟之倫。君臣之義。委諸草莽而不存也。然後王綱漸盡。而天下變爲伯矣。吁。春秋深貶惡
曹之盟。其有以也夫。

季孫宿會晉士匄宋華閱衛孫林父云云于戚晉人執衛行人石買

黨大惡而治小罪。此晉伯不競之所由也。夫伯主之所以能宗諸侯者。以其能明天下之大義也。今衛孫
林父逐君而立不正大惡也。晉人乃合諸大夫于戚。以列其罪人于會矣。至于石買之伐曹。較之林父。非
小罪乎。晉則因其來使而執之。無乃不能三年而總小功之察也乎。觀春秋書于戚之會於前。而書執衛
行人石買于後。則晉之所以爲伯主者。可知矣。云云昔者桓王不討宋魯而伐鄭。以致繻葛之敗。王綱始
大不振。而春秋譏其不天。爲其不知輕重之倫也。今有以臣逐君。以弟篡兄。則相與爲謀。以成其亂。而欲
以威力禁與國之爭。吾知其無益矣。故曰。放飯流歃。而問無齒決。是之謂不知務。其斯之謂與。是故孫林
父衛之強臣也。昔也不能事君。而出奔晉。又介於大國。以歸其國。非定公之所欲也。其於先君且然矣。於
嗣君乎。何有。丘宮之盟。殺三公子。尹佗之追。直欲以一矢加之。君臣不帥職。而增淫發洩。罪孰大焉。晉悼

惑師曠之邪言。及中行假之妄議。不能其行天罰。而反爲之合。七夫于戚。以定其所立之人。其何以爲訓乎。遂使亂臣賊子。得有所恃。以縱其惡。而無所忌憚也。不亦甚哉。若夫石買之伐曹。非無罪也。然而毀瓶之怒。起于孫惻。當是時也。衛侯在外未入。而僭竊之剽。猶立于位也。使管平因曹人之愬。治其舊惡。告于諸侯。復衍廢剽。執孫林父而戮之。不亦善乎。今也舍此弗問。而執石買。徒以伐曹之故。伯討宜不如是矣。春秋先書于戚之會。旣出林父之名。而繼於衛侯出奔之後。後書管執石買。而貶稱人。且曰。執衛行人。則管人黨大惡。而治小罪之失。可見矣。嗚呼。買可討也。置林父而討買。則不可也。於是乎可以知春秋之權衡矣。故以悼公之賢。而伯止于蕭魚。至平公而遂有溴梁。大夫之縱。則皆黨孫氏之效也。諸侯之武。豈必假羽旄之事哉。向使管人以會戚之大夫。而討逐君之罪。以執石買之怒。移于孫氏。則管之伯業。未可量也。而不能馬惜哉。他日欒盈入於曲沃。而趙鞅入于晉陽。苟寅士吉射入于朝歌。大夫相繼而起。其患不減于林父。三家競爽。而靖公廢爲家人。其禍不止于衛侯。故曰。出乎爾者。反乎爾者也。又曰。始作俑者。其無後乎。推原其由。則于戚之會。可勝憾哉。

吉禘于莊公作僖公主

禮失於頤。而復失於緩。春秋所以病望國也。夫喪祭之禮。各有其時。緩與頤之失。均也。何謂頤。莊公喪制未終三年。而閔公遂行吉禘之祭。無乃太早乎。何謂緩。僖公卽世。十有五月。而文公始作練祭之主。則又太慢矣。先王制禮。以節人情。頤與緩。同爲不敬。魯爲秉禮之國。而若是焉。可歎也。夫古者三年之喪畢。致新死之主于廟。廟之遠。主當遷人祧。於是大祭于太廟。以審定昭穆之序。其禮有常期也。諸侯旣葬。則反

虞。虞主用桑。期年而練祭。練主用栗。故特祀之於寢。而不同於宗廟。以昭其孝思之誠。其日有定數也。今閔公既失之於顛。而文公又失之於緩。一緩一顛。皆以己意行之。先王之制紊矣。聖人愛禮甚矣。寧不爲周公之魯惜哉。自今觀之。吉禘于莊公。在閔公二年之五月。莊公之薨。至是二十三月。則三年之喪未畢矣。喪未畢也。而可以行吉禘之禮乎。禘非魯所當用。姑置未論。今先君方祀于寢。而非宮廟。遂用盛樂而行吉禮。三年之愛忘矣。爲子而忘三年之愛。是不有其父也。是事也。一舉而三失禮也。故春秋禘祭不書。因其顛。而書曰吉禘。見其用吉之早也。曰于莊公。明其于寢也。而閔公之失。不可掩矣。作僖公主。在文公二年之二月。則僖公之薨。十有五月。已過乎期三月矣。過基而猶未作主。可乎。生事死祭。禮之大節。以先君練祭之主。而作不及時。以爲微而忽之。慎終之意。蔑矣。事父而蔑慎終之意。不可以爲子也。是事也。積惡之原也。春秋於他公作主不書。以其緩而書之。且謹志其日焉。而文公之失。不可蓋矣。送死。人道之大變。而不謹其禮。履霜。堅冰之兆也。其可以爲小失乎。嗟夫。禘者。天子之祭也。魯僭天子。以爲常。不可勝書也。作主者。事亡之常禮也。不必書也。今皆見于春秋之經矣。爲國以禮。而祭祀又禮之大者。而至于如此。此時之魯。尙可爲周公伯禽之魯乎。又其甚者。禘太廟。以致妾母。縱逆祀。以亂昭穆。魯之禮。不可言矣。周家之禮。周公所制。以周公之子孫。而壞周公之法度。吾於他國。又何望焉。嗚呼。周公其哀矣。

曹公孫會自鄴出奔宋

賢者之後。能不失其去國之禮。春秋所以著其美也。夫聖人。不以常事過褒於人臣。其有所優者。必其有以取之矣。是故大夫去國。待放而後出奔。常禮也。曹公孫會能行之于春秋之世。則既賢於當時之人矣。

而況又爲子臧之後乎。春秋特因其出奔而書曰。曹公孫會自鄆出奔宋。鄆者。其食邑也。自鄆而出奔者。待放也。曹大夫鮮有以名氏書。其曰公孫賢也。而又賢者之後也。一人而二美具焉。可不書乎。古者大夫有罪。待放於其境。三年君賜之環。則復。賜之玦。則去。是臣子之常禮也。時入春秋。君臣道喪久矣。故臣子能專其邑者。無不叛其國。能使其衆者。無不要其君。以臧武仲之智。而據防以求後。況其他乎。今有人焉。語其世。則賢人之子孫也。觀其所行。又有異乎當時之人。則君子又烏得而不錄之哉。若曹之公孫會。是已。夫公孫會者。公子喜時之後也。喜時者何。所謂子臧是也。子臧者。曹宣公之庶子。宣公伐秦而卒于師。曹人使公子負芻守。而使喜時逆曹伯之喪。負芻乃殺太子而自立。子臧將亡。負芻懼而告罪。乃反致其邑焉。及晉侯之執負芻也。將見子臧於王而立之。子臧辭弗立而奔宋。曹人所謂社稷之鎮公子也。今會之出亡也。雖不可知其故。然當衰亂之世。獨能行古人之禮。故其去也。不卽走于他邦。而居于鄆。則非有大罪也。明矣。居鄆而君不賜之環矣。然後徐徐焉。自鄆出奔宋。其進退之間。雍容不亂。隱然有子臧之遺風焉。可謂不墜其世德矣。觀于子臧。已如彼。而子臧之後。又如此。子臧其不泯乎。春秋之義。善善也。長而惡惡也。短惡惡止其身。而善善及其子孫。安得不特書以著其美也哉。故奔。未有書自者。而書自鄆。則知其爲待放也。曹無大夫。唯公子首以鞏之戰。特書以示貶。此則特書公孫。則知其與之也。不書其入于鄆。則非叛也。自鄆出奔。而不以鄆繫之。曹則與宋華亥。向寧。華定。自宋南里出奔楚者。不同也。由此觀之。聖人之情見矣。抑嘗論之。國之衰也。未嘗不由親小人而遠賢臣也。是故維鵜在梁。刺于詩人。乘軒三百。數于伯主。其來久矣。故子臧賢公子也。致邑與卿而不出。公孫會好禮者也。去國而入于宋。然後自鄆來。而

公孫彊出矣。且不得以亡國之善詞書于經。嗚呼。悲夫。觀魯論記太師以下踰河蹈海。而知魯。觀春秋書子哀來奔。而知宋。吾於公孫會之去也。而又有以知曹矣。

秦伐晉狄侵宋楚子蔡侯次于厥貉

疆國並起。而伯勢分。春秋所以深爲世道慮也。世至文公。中國衰。而外夷強矣。是故秦有伐晉之師。而狄亦爲侵宋之舉。二強並起。遂使楚子得以乘間。而挾蔡侯。次于厥貉。以與晉爭伯。春秋狄秦于前。而晉楚于後。然則成楚之強者。秦與狄也。觀伐晉侵宋。而次厥貉。書于一年之間。諸侯之無伯害哉。嘗考春秋之時。倚方漢之險。以憑陵諸夏者。楚也。據崑崙之固。以抗衡伯國者。秦也。恃豺狼之爪牙。以逞其貪婪者。狄也。桓文不作。伯業不振。無歲不有秦狄之師。無國不有荆楚之患。春秋不以秦狄之患爲憂。而以秦狄黨楚爲憂者。何哉。蓋當時天下之所倚賴者。一晉而已。今荆旣盛于南。而秦又起于西。狄又跳踉于北。三強競爽。不弱一個焉。晉之世伯。不易守矣。是故秦人伐晉。而楚遂滅江。秦晉戰于令狐。而狄遂侵我西部。楚師至于狼淵。而狄又有侵齊之告。何其不約而同耶。南夷與北夷交。中國不絕如線。可不懼哉。況於晉君冲幼。不在諸侯。於是起范山之邪謀。生蠻荆之禍心。救鄭不及。楚人遂有以覘其不能。聘魯而傲。楚人遂敢以試其備強。而北方之圖。堅不可破矣。彼秦者。晉之姻親也。令狐之役。晉不謝秦。固不直矣。而秦納不正。豈爲無罪。康猶不悛。不顧義理之是非。而惟以報復爲事。與兵伐晉。以取北徵。當楚狄交亂之際。而乘時肆暴。陵轢諸侯之盟主。是以夏而爲夷之行。春秋以狄待秦者。晉之失伯。秦爲之也。由是狄患遂肆。而三恪之末。首被其侵。雖曰潛師。以爲侵掠。而豺狼之毒。寢不可遏。是役也。非特爲宋患也。將天下之患。自

此始矣。於是楚人知中國之多故。而乘勢以興。厥貉之次。以臨宋也。臨宋所以圖北方也。而宋果以狄雖不能禦。遂道以田孟諸。夫以變夷覆載不容之罪人。儼然入于中國。驅諸侯而奴役之。天下之變。有大於此者乎。故楚從此遂得書子。同于中國。以其強之成。自此始矣。春秋狄秦于前。而進楚于後。豈無意哉。觀楚秦相與滅庸。相與盟于蜀。而他日呂相絕秦之言。亦謂穆公卽楚謀我。則秦之黨可知矣。自是以後。楚伐曠而狄侵齊。楚圍巢而秦戰河曲。新城之盟。僅僅收拾。而齊又叛。晉人置不敢問。不欲更生一敵。以爲東顧之憂也。而不知文襄之業。堂堂然去矣。嗚呼。狄不足責也。楚亦污於荆蠻久矣。秦之先死于王事。有功於周室者也。穆公以于嶠之敗。出悔過之誓。聖人錄之。使其由是而進于善。則其伯豈止西戎而已哉。奈何連兵數歲。不能成尺寸之功。而徒以成楚人之暴抗。嗚呼。春秋狄秦。而至于再。其有以也夫。

宋人衛人人鄭宋人蔡人衛人伐戴鄭伯伐取之

諸侯連兵以爲暴。而敵國又乘其後。春秋所以交責之也。夫兵。聖人之所惡。而況以詭詐相報復乎。宋衛間鄭師之在外。而乘虛以入其國。旣入鄭矣。又召蔡人以伐戴。則其阻兵肆暴。未有若此之甚者也。而不虞鄭伯之起乘其弊。伐而兼取其師焉。夫宋衛固不義矣。而鄭亦豈得爲義哉。春秋書入。書伐。又書伐取。則爲交責之也。可知矣。周官九伐之法。大司馬掌焉。列國而非王命。不敢擅通其兵也。東遷以來。王綱不振。諸侯各自爲黨。以奸詐爲仁義。視殺戮爲尋常。侵奪紛紛。莫之能禁。其罪可勝誅哉。今鄭師以伐宋出。宋人知其國之無守也。於是挾衛人以擣其虛。所謂攻其無備。出其不意之謀也。果然造鄭國都。如入無人之境。是宋衛之得志於鄭矣。二國旣已入鄭。而驕故以伐戴。召蔡。借曰鄭有舊怨。戴何罪乎。不過乘時

微利以凌弱而犯寡耳。則其阻兵安忍之惡極矣。而不知鄭莊之計又巧也。方二國之入鄭也。鄭師已在郊矣。不還師以自救。而委國與之。避其銳也。及其既伐戴而圖之。擊其惰也。是故駐師于郊。多方以誤之。彼宋衛狃於入鄭之役。謂已實無敵矣。而不虞鄭伯之亦掩其不備。鄭攻其外。戴應其內。一舉而三國之師盡沒。亦可爲好兵毒衆者之戒矣。嗚呼。宋衛以是施之於鄭。而鄭又以此反之。其民何罪。而魚肉之。若是耶。然則宋衛蔡鄭皆不可以逃王者之刑也。春秋比書其事。而四國之惡彰矣。抑嘗考之。春秋之初。以詐用兵。莫甚於宋鄭也。前此宋人伐鄭。圍其長葛。鄭則輸平于魯。而不之救。長葛見取於宋。猶不顧也。宋人自謂無能爲矣。不知宋魯之黨既離。而郟防之取繼至。則宋已墮鄭之術中。而不寤也。至此又蹈其前轍焉。卒於民不堪命。禍發爾墻。嗚呼。若宋之殤公。所謂自取之也夫。

齊人鄭人入郟蔡人衛人陳人從王伐鄭

假王命以逞其私忿。抗王威以肆其不臣。甚矣鄭莊公之不道也。夫諸侯而不知有王。惡之大者也。鄭伯憾郟之不會伐宋。於是託於王命。而挾齊人以入其國。入者不順之詞也。則其假王命以逞私忿者。可見矣。既而以不朝得罪於王。王帥諸侯以討其罪。乃敢用兵交戰于繻葛。王非諸侯之敵者。抗王威以肆其不臣。其罪又何如哉。春秋於入郟。書人書入。以著齊鄭之罪。於伐鄭不言戰敗。所以存天下之防也。嗚呼。鄭者。宣王之懿親。我周之東遷。晉鄭焉依。則鄭實王室之藩屏也。奈何寤生以小人。之雄。連諸侯以逞其不義。東遷之初。實爲無王之首。是故伐衛而專征伐之權。盟石門而亂司盟之法。溫麥周禾。君臣道喪。取邑易田。滅紀廢典。則其不知有王也久矣。至是以兵入郟。果欲尊王室哉。觀繻葛之一戰。可以究其姦雄。

不道之心矣。夫邲者文之昭也。當魯之九年。鄭人伐宋。召邲。而邲不與。非邲罪也。鄭莊以其嘗爲王之卿士。而託於王命。以敗諸侯。於是合齊人以虐邲。而誣以違命之罪。干戈戎馬。造其國都。而王臣不行。王師不出。則其矯假之罪已明。而猶未也。一旦王奪其政。遂懷忿而不朝。以致天王奮怒。躬帥三國以伐之。此舉雖非天討。而鄭之見伐于王。尤足信其入邲之爲矯矣。不然。鄭方糾遯王。惡何至自受王師之伐也哉。王師既至。乃不俯首請命。而敢執干戈與天子周旋。繻葛之後。至以一矢加之乘輿。逆埋悖道。而有若此者乎。春秋不言其戰與敗。所以爲王諱。而存天下之大防也。雖然。鄭之所以敢抗王者。未始不由入邲之役致之也。易曰。履霜。堅冰至。矯制入邲。而王不問。然後大假王命。以制諸侯。於是而入許。於是而納馮志。得意滿。遂有繻葛之舉矣。自繻葛以後。而王命不行。伯圖遂啓。故夫東周之不振。皆寤生之所爲也。論而至此。鄭莊之罪不容誅矣。而齊以太公之裔。賜履之命。非不重也。乃不能以義制鄭。而從其所欲。然則祿父者。亦寤生之徒與。

杞子來朝。公子遂帥師入杞。

事人而失其禮者。固可責。責人之失禮。而加以兵者。尤可罪。夫惟智者爲能以小事大。而仁者爲能以大事小也。若杞者可謂不知。而魯亦可謂之不仁也歟。夫杞不朝王而朝魯。非禮矣。況以中華而用夷俗。以夷變夏。杞之罪容可免乎。魯之於杞。有婚姻之好焉。誨之以文告。加之以訓辭。抑豈不可。而公子遂帥師入其國。則太甚矣。春秋交著其罪。故杞本伯爵。而貶稱子。狄之也。公子遂帥師。言其用大衆也。入者。不順之詞也。而二國之罪。皆無所逃矣。昔者太王之事昆夷。以小事大者也。其詩曰。肆不殄厥愾。亦不隕厥問。

曷嘗自外於禮乎。湯之事葛，以大字小者也。其書曰：乃葛伯仇餉，初征自葛。曷嘗以失禮而遽伐之乎。春秋之時，人心斃壞，天理不明，故小國安于僻陋，而無自強之志。大國矜其威力，而無仁愛之心。於是并吞並起，弱肉強食，然後禮義衰而干戈橫行。中國微而夷狄暴橫，莫之能禦。夫豈無故而然哉。且杞者先代之後，先王以之備三恪，而作賓者也。今而棄命廢職，忘先君之所事，守不能居其封爵，亦可鄙矣。縱以微弱之故，欲恃大國以鎮撫其社稷，則有先公之遺法在。何至以夏后之子孫，用東夷之習俗，投章甫而襲左衽，變禮樂而言侏離，已則無禮，以汙大禹之明德，其何罪大焉。春秋因其來朝之用夷禮，遂從而夷之。以見杞之自絕于中國也。由此觀之，杞則誠有罪矣。奈何魯以周公之胤，周禮所在，彼小國不能自振，而倚我大國以爲援，其情亦可矜也。而況於伯姬在杞，甥舅之好，庸可棄乎。彼之來朝，豈不有慕於我，而爲是僕僕也乎。威儀文詞之不類，進退揖讓之或愆，皆教告誨以引以翼，以繼武王周公興滅舉廢之心，可也。今也不然，來朝之車甫旋，而上卿授鉞，直造東樓之國，舍曰有罪，何至於此。彼以其卑，我以吾暴，嘉善而矜不能之意，果安在乎。春秋書公子遂帥師入杞，繼于杞子來朝之後，則杞之失禮可罪也。而魯之不道，不亦甚乎。抑嘗考之，桓之二年，杞嘗朝魯，未幾而魯亦入杞，則杞每以朝魯而受其兵，何哉。桓不足貴也。僖公號稱賢君，而亦若是耶。禘太廟，致夫人，而嫡妾之分失，愛季姬，遇鄆子，而閭門之防亂，況又從楚盟齊，乞師於楚，使天下淪於塗炭，魯之爲魯，庸愈於杞乎。不省己而以責人，嗚呼！微春秋不仁者，皆得以文其惡矣。

及晉處父盟公孫敖會宋公云云晉士穀盟于垂隴

受人之非禮而效其尤者。罪在望國。待人以非禮而貳其過者。罪在伯主。夫大夫不可以抗諸侯。禮之大節也。今也文公朝晉而及晉處父盟。是晉以非禮加魯而魯受其辱矣。奈何垂隴之盟。宋陳鄭之君在焉。而我以公孫敖會之。晉又以士穀主之。晉既貳過。魯亦效尤。遂使有臣之分。從此大案於天下。而之咎耶。春秋於處父之盟。沒公不書。而處父去氏於垂隴之盟。則據事直書。而罪自見矣。夫同盟之法。已非列國之所當專。況於以大夫而與諸侯盟乎。周道衰微。王綱解紐。及邾盟蔑。隱公實肇其端。至于浮來之敵。降尊從卑。于折之盟。以下援上。則亂常失序。皆自我魯爲之。寧不重可歎乎。齊桓叔伯而以公子結抗盟爲討。于防之敵。魯又不祥。直至後幽之盟。齊伯大定二十餘年。綱紀粗立。抑何幸歟。晉文以譎主諸侯。而翟泉之役。首爲厲階。王臣且不顧矣。況與國乎。襄公當國家多難之時。不知以禮信屬諸侯。而以不朝來討。文之伯也。未能改物。何遽至此。我文公不能以周禮自守。而畏大國之威。奔走聽命。辱莫大焉。晉侯不念同姓之懿。而暴蔑周公之裔。冒以宣示其侈。處父大夫也。敢盟天子之公侯乎。滅紀廢典。以干先王之法。度其何罪如之。春秋沒公以爲魯諱。魯人恥之。君子亦恥之也。至于垂隴之會。宋以三恪之賓。陳以虞帝之後。鄭以宣王之懿。親咸與在列。而晉又使士穀主其盟。是晉襄之待諸侯。皆以大夫當之矣。一之已甚。其可再乎。晉不足責也。魯亦可以省矣。人以大夫盟我。我之辱也。敖也何人。而使上敵三國之君。辱於人不戒。而亦此辱人。夫效尤禍也。不知政權下逮。自此始矣。是故有處父之盟。而後有垂隴之盟。晉有處父。士穀。而魯有公孫敖。相視而起。相觀而化。三家六卿之禍萌矣。春秋嚴謹始之法。故深貶處父。而垂隴之役。遂列二子之名氏。非但直書以從同而已也。若曰大夫之交政于天下。自此始也。由是而大夫皆得以

名氏書于經矣。仲尼曰：始作俑者，其無後乎？由是晉有趙盾，魯有仲遂，紛紛迭起，而桃園之事，過市之哭，繼見。嗚呼！濫觴之不寒，孰滔天之可遏？履霜之不謹，知堅冰之必至。他日昭公遂，哀公走，靖公廢，乃其效歟。然後知春秋正名辨分，必謹于始，爲後世慮，至深遠矣。

楚人伐鄭，公子遂會晉人，云云。救鄭，楚子使椒來聘。

外夷猾夏，而中國失禦侮之道，故外夷遂強，而用中國之禮焉。此夷夏盛衰之大機也。夫外夷之所以強，皆由中國不振而已矣。當我文公之時，晉靈少懦，不在諸侯，楚人師于狼淵，以伐鄭，是以此嘗晉之能否也。晉大夫以五國之師救鄭，而緩不及事，春秋貶大夫而人之以見中國之不振，自此始歟。由是楚勢遂張，而使椒聘魯，乃以爵書，而君臣並見，然後華夷無復辨矣。可不爲之寒心哉！嘗謂夷狄猾夏，未足憂，而中國之衰爲可憂，何哉？當齊桓創伯之時，荆始入蔡，而伐鄭，其勢張矣。桓公同盟于幽之後，荆始來聘，其進不過書人，而國號且未改也。既聘之後，屢駕伐鄭，而改稱楚，不駸駸乎強大，而將不可遏歟。然而次陸之伐，振旅于前，而城濮之戰，獻捷于後，終桓文之世，不得以爵見經，以中國之有人也。城濮以來，楚人不敢北嚮者，十有五年，今而忽起伐鄭之師，寧不謂中國無人，而可以逞其願乎？是役也，嘗華夷盛衰之大機也。晉之執事，不思折衝禦侮，以消外患，雖起救鄭之師，而逡巡畏縮，不卽赴敵，遂使鄭國失三大夫，不得已而及楚平，誰之咎耶？春秋於伐鄭之楚，猶以人書，向使晉能遏之於此，亦何致遂成其強哉？惟晉人不識事勢，而坐失其機，然後強夷得遂其志，而越椒來聘，公然以中華之禮，行乎望國，觀其以玉帛而來，固異乎執干戈以從事，推原其心，豈誠知義而慕之者哉？不過借此以爲窺覘之計耳。春秋於救鄭之役，

貶諸大夫而稱人。而中國之失策。自此始也。至于來聘之役。遂進楚而稱子。以蠻荆之得與齊晉並肩。自此始也。由是而次厥貉。由是而侵陳。遂侵宋。無乃濫觴于伐鄭。而滔天于聘魯也歟。甚而至于辰陵之盟。于郟之戰。首足遂倒懸焉。然則晉靈趙盾長亂之罪。無所逃矣。或曰。來聘之舉。傳謂與之。今子之云。得無異乎。曰。君臣並書。固與之也。而寢強之意見焉。不然。何以從此而凡役得書。得耶。愚請爲之說。曰。滕子來朝。自是而皆稱子。若曰。滕之淪于夷狄。自朝桓始也。楚子使椒來聘。自是而得稱子。若曰。楚之進于中國。自聘魯始也。吁。聖人之旨微矣哉。

齊侯使其弟年來聘有年

禮施於不當施之人者。人事之失。瑞降于不當降之國者。天道之變也。夫時聘結好。常禮也。而以爲非。何哉。魯桓以不義得國。王法所當討也。今齊侯使其弟年來聘。茲非人事之失乎。百穀順成。嘉瑞也。而以爲異。何哉。魯桓以不義得國。天理所不容也。今五穀皆熟。以有年。茲非天道之變乎。在他君以聘問爲禮。而施于桓公。則非在他君以有年爲常。而降于桓公。則異。聖人之旨微矣哉。嘗謂春秋之作。無非爲存天理。正人倫計也。人事舛。則倫不正。天道僭。則理不明。聖人上奉天時。下立人紀。故有賞刑之庸。而有燮理之道焉。春秋天子之事也。安得不於天人之際。交致其謹也哉。是故魯桓篡隱。而奪其位。人倫之大變也。執之者。無罪殺之者。無禁。暴明其惡。恭行天罰。宜也。魯之臣子。義不戴天。而莫能討。則鄰國之所當舉法也。況於太公實受賜履之命。齊可以不問乎。奈何不脩方伯之職。乃使其貴介弟將玉帛以脩好。人事之反。其常未有甚於此者矣。春秋書曰。齊侯使其弟年來聘。所謂禮施于不當施之人也。桓篡隱而有其國。天

理之大變也。不有人禍，必有天殃。旱乾水溢，疾疫饑饉，宜也。天下諸侯，視以爲常，而莫能討，則惟天能誅之耳。況於豐年之瑞，當應于有道之國，魯何以致此乎？奈何不有凶災之譴，當其卽位之三年，乃獲五穀皆熟之慶，天道之反其常，未有甚於此者矣。春秋特書曰：有年，是謂瑞降于不當降之國也。春秋深明天人之理，安得不以爲非常之事，而謹書之哉？厥後宣公之惡，猶桓也。元年齊侯與之會于平州，以定公位，則亦僖公修聘之類也。十六年而大有年，則亦桓公有年之類也。人事之失，天道之變，春秋特於二公備之。聖人誅亂討賊之法，嚴矣哉！雖然，弟年來聘，齊之罪也，而有年之瑞，天亦僭乎。以桓公在位十有八年，大水螽災，每見于經，而僅一有年，則他歲之歉可知矣。桓公之罪可誅，而周公之遺民不可殄也。天爲民而有年，豈桓公有以致之哉？不然，彭生之難，亦不異於蔦氏之禍，何耶？故曰：天定亦能勝人，不可誣矣。

考仲子之宮築王姬之館于外

望國以非禮爲禮，春秋書之，所以正其失也。夫知其不當爲而爲之者，天下之大罪矣。故仲子，惠公之妾也，不當祀以夫人之禮，而隱公成其父之邪志，爲別立宮以祀之，蓋自以爲得禮，而不知其非禮也。齊者，魯之仇也，不當爲之主婚，而莊公忘其父之讐，爲築王姬之館于外，亦自以爲得禮，而不知其悖禮也。由此言之，豈非故爲其所不當爲者乎？此春秋所以深惡之也。古者庶子在父母之室，爲其母不禮，所以厭於尊，慈母與妾母不世祭，所以降於嫡，此禮之當辨者也。況以妾母而敢立宮以尊之乎？父母之讐，不共戴天，兄弟之讐，不與同國，九族之讐，不同鄉黨，此義之當行者也。況以父讐而敢築館，以主其婚乎？今隱公妾嫡庶之分，而莊公忘父子之親，天理絕而人倫亡矣。春秋安得不深責之哉？且仲子者，桓公之妾母

也。隱公承先君之邪。而讓非其所當讓。將立其子。而先尊其母。特以孟子既入惠公之廟。則仲子不得與之並享。則非不知仲子之爲妾矣。故特奉之以別宮。自常情言之。則不敢致諸太廟。而別立宮焉。疑若稱也。由君子觀之。則謂公雖不敢耐仲子於太廟。而立宮之禮亦非。故春秋因其始祀而書曰。考仲子之宮。考者。始成而祀也。不曰夫人。而曰仲子。正其名也。而隱公之以非禮爲禮。可知矣。莊公之於齊。不共戴天之讐也。天王嫁女子齊。而使魯爲之主。害義甚矣。爲莊公者。泣血以請辭焉。而勿從之可也。奈何藐然不顧。而遂受命焉。然不館之於國內。則非不知其不當爲也。故特築王姬之館于外。自常情言之。則築館于外。不失居喪之禮。疑若可也。以大義言之。則公也。方當寢苦枕戈之時。而與仇人主婚姻之禮。不亦悖乎。故春秋特書築王姬之館于外。則莊公之以非禮爲禮。又可見矣。夫考宮。常事也。其得爲者不書。而考仲子之宮。則書。以其亂夫婦之倫也。考宮書于上。而繼之以初獻六羽。六羽尤非仲子所當用。則隱公之罪不可逃矣。魯主王姬久矣。其得爲者不書。而莊公之主齊婚。則書。以其忘父子之倫也。築館書于上。而繼之王姬歸于齊。歸齊則非魯所當主。而莊公之罪不可道矣。斯二者三綱之所繫也。春秋安得不深謹之哉。嗚呼。魯之禮若是耶。而曰。猶秉周禮也。然則當時諸侯之於禮。可知矣。

會于蕭魚。秦人伐晉。莒人伐我東鄙。圍台。

伯主旣服武國。而不能制外患。此春秋之所惜也。夫功不在大。而患不在小也。惟不慮患于功成之後。則未有不失之者矣。晉悼公叠三駕之勞。以得鄭于蕭魚之會。此中國莫大之功也。奈何秦人繼之以伐晉。借曰秦晉仇也。蕞爾莒。乃敢伐我東鄙。而圍台。彼固有以覘晉之怠矣。而當悼公之世。有是焉。寧不深可

惜哉。故自蕭魚而晉伯衰矣。吾嘗觀于齊桓公矣。方其伯之盛也。攘夷狄。恤與國。糾遯王。慝如恐弗逮。何其勤耶。至于葵丘既盟。怠心遽肆。由是楚狄交熾。公不能抑。君子傷之。以爲有始而無終也。然而緣陵之城。救徐之役。功雖不足。猶有事焉。而未至如晉悼之遽自畫於服鄭也。人徒知葵丘爲桓公盛衰之會。又孰知夫蕭魚爲悼公勤怠之機耶。何也。悼公之人國也。遂不臣七人。以治內。圍宋彭城。以治外。而復伯之權輿。已在此矣。由是而睦諸侯。和戎狄。三分四軍。以待來者。其勤爲何如耶。故鄭人之未服也。申之以五會。震之以三駕。屢盟而屢叛。屢叛而屢伐。公亦知服人以威之未盡善矣。於是乎肆青園鄭。聊以張吾三軍。而納斥候。禁侵掠。旋繼于行成之後。講好會。而卻擔盟。推至誠以待鄭。使反覆之人。不惟而革。而有服其心。庶幾乎王者之氣象矣。奈何服鄭之後。遂自縱弛。秦虎狼也。黨楚而來謀我。盍亦預爲之防乎。今也徒知一鄭之服爲可喜。而不知外侮之至爲可憂。蠶有毒。況敵國乎。秦人來伐。乃使士魴以孤軍禦之。卒易秦而不設備。于櫟之戰。不敢以告諸侯。亦可恥矣。比及明年。僻陋在夷之莒。亦敢興師伐魯。而圍其邑。夫魯晉之同姓。事晉最謹。而莒敢陵之。豈徒弱魯而已。知晉之意而不畏也。觀春秋書蕭魚之會。而繼書秦人伐晉。明年又書莒人伐我東鄙。圍台。無乃與盟于葵丘。而繼書狄滅溫。楚人伐黃之事類乎。雖然。蕭魚之會。晉悼之終也。諸侯賴之。稍獲息肩。當衰亂之世。亦可謂之小康。然以聖人之王道律之。則不然矣。悼公以清明之資。而止于此。寧不深可惜哉。悼公沒。晉伯替矣。推原其由。悼公之政。大抵以大夫分之。當其盛也。有荀罃。魏絳之良。及其衰也。伐秦。制于欒黶。而會戚感于荀偃。師曠。然駸駸不振。而溴梁之兆見矣。無競維人。豈虛語哉。

宋皇瑗帥師取鄭師于雍丘鄭罕達帥師取宋師于壘

列國互用詐以相覆。春秋直書之。亦可見出乎己者之反乎己也。夫兵聖人之所惡也。而況於以詐謀交相傾覆者乎。我哀公之九年。宋皇瑗帥師取鄭師於雍丘。越五年。而鄭罕達又帥師取宋師于壘。夫取者。悉虜而俘之也。成師以出而使敵人得盡取之。則敗者必有不備不虞之失。而勝者必有出其不意之計。詐謀並作。仁義塗炭。寧不重可憐哉。觀春秋書宋鄭互相取師之文。可以有所感矣。先王用三驅而不掩羣。君子釣而不綱。弋不射宿。待物且爾。而況人乎。時入春秋。言侯放恣。干戈相撻。靡有寧歲。用詐逞奇。紛紛而莫之禁。以奸宄爲仁義。以殺戮爲尋常。在王法不可勝誅矣。今鄭大夫欲外取邑以與嬖人。於是乎有圍宋雍丘之舉。其罪豈不大哉。春秋乃舍鄭人之圍邑。而專著宋人取師之罪何也。夫敵加於己。自反而有禮焉。則脩文告以卻之。不得則告于天子。請于方伯。必有能伸之者。今也不然。則圍鄭師于雍丘。日遷舍以合壘。是宋人之志在於盡割其衆。而異於解罔視禽者矣。則不仁孰大焉。故春秋不書鄭之伐宋。而但曰宋皇瑗帥師取鄭師于雍丘。言取則無一人得脫可知。而鄭之懸軍深入。自取敗亡之罪。亦可見矣。佳兵不祥之器。出乎爾者必反乎爾矣。不越五載。而鄭罕達又以取宋師書于經。夫向巢欲盡平元之族。而圍壘亦猶鄭人之圍雍丘也。鄭罕達救壘而圍宋師。亦猶皇瑗之救雍丘而圍鄭師也。則鄭人之志亦在於報宋。必欲悉虜而俘之矣。彼以不道施諸我。而我又以不道報之。以怨易怨。當何時而已乎。春秋亦不書宋人之伐鄭。而直書曰鄭罕達帥師取宋師于壘。則用詐之罪在鄭。而宋之不備不虞。以取喪敗之罪。又可知矣。夫國以民爲本。君子之愛民也。如保赤子。不時且不敢使。況以私忿小怨。驅而納諸陷阱。

之中使其肝腦塗地。骨肉離析。至此極哉。有伯者作。且不可容。律以春秋之王法。皆當服上刑矣。抑嘗考之。春秋之初。書曰。宋人衛人入鄭。而繼之曰。宋人蔡人衛人伐戴。鄭伯伐取之。是二國之以詐謀相掩。非一日矣。桓文迭起。而取師之文。不見于經。至是乃兩見焉。而又出于宋鄭。宋以先代之後。作賓王家。而鄭以母弟懿親。蕃屏王室。而壞法亂紀。至于如此。可勝誅哉。嗚呼。觀宋殤鄭莊於春秋之始。而知天下之無王。觀宋皇瑗鄭罕達於春秋之終。而知天下之無伯。始而諸侯。終而大夫。又可以言世變矣。

仲孫羯會晉荀盈云云。城杞晉侯使士鞅來聘。杞子來盟。

伯主以天下私其親。故命使施禮爲可鄙。而屈身要信爲可賤也。夫惟義可以率人。苟以其私。則無以令與國矣。今晉之平公。以杞出之。故合十二大夫而城杞。役諸侯以私其母家。罪莫大焉。是故既城之後。而使士鞅來聘。來聘所以拜城杞也。未幾而杞子又以來盟。至魯來盟。所以拜杞田也。比事以觀。則其以不義動人。而有不慊於心者。可知矣。然則晉之失伯。不亦宜哉。夫伯者。所以合諸侯而匡天下也。苟以德命。誰敢不從。是故齊桓公以諸侯之師。城邢封衛。天下翕然以存亡繼絕之美歸齊。不聞桓公之遣使以謝諸侯。而亦不聞邢侯衛侯之親往結盟于諸侯也。而邢遷如歸。衛國忘亡。其功爲何如哉。惟其心在於公義。而非爲私也。今晉侯以奕世之伯。號令諸侯。非弱於齊也。而城杞之後。僕僕馬來聘來盟之。不暇。寧不可鄙賤哉。何以言之。晉平之母。杞女也。杞於是時。非有外患如邢衛之在齊桓時也。德則不競。而介於大國。以勞諸侯。夫諸侯者。天子之諸侯也。非晉國之役也。昔者平王不撫其民。而戍母家。詩人有束薪蒲楚之刺。君子傷之。而況於晉乎。今晉臣彪不恤周宗之闕。而夏肄是屏。於是乎合十二國之大夫。勤版築于

東樓之杞。文之伯也。未至改物。何以有此。棄同卽異。不仁。役人以私。不義。不義不仁。何以爲伯主。當時魯鄭大夫。有甚乎之嘆。而不敢違也。則天下皆知其不當爲。而魯亦自知其不可矣。城杞之役甫旋。而士鞅之聘踵至。謂區區禮文之末。可以蓋其愆。而收諸姬之心乎。則其鄙也。不待貶而自見矣。旣成其國。又治其田。使晉命之出于公。魯何敢不盡歸乎。今齊魯以肥杞。乃以卿大夫相繼于朝。府無虛月之故。則晉之所以令諸侯者。利而已矣。來盟以固歸田。而以國君親其事。且不守中華之禮。而用夷俗焉。夫以士田之故。親辱于人。是徇利也。以先代之後。而變于夷。是棄禮也。禮虧利勝。其能國乎。嗚呼。晉以城杞之故而來聘。杞以得地之故而來盟。則伯主之所以爲伯主。杞子之所以爲諸侯。皆可知矣。春秋於城杞。則列序十二大夫。以著其勳衆之罪。而繼之以晉侯。使士鞅來聘。又繼之以杞子。來盟。杞稱子。賤之也。蓋嘗考於斯時。天下甚多故也。吳楚交政于中國。此何時耶。平公舉七世之伯業。一朝付之於楚。自謂可以奠枕而居矣。不知于虢之會。再讀舊書。于申之役。楚主中夏。他日將通少習之言。一出而執戎蠻。子亦歸于楚。如事天子。然誰生厲階。至今爲梗。蠻夷侮其外。而大臣叛其內。晉國卒剖而爲三。則皆平公之罪矣。城杞之役。可勝歎哉。

楚人伐黃楚人伐徐公至自會

外患自遠而至。近春秋危望國。以見伯業之衰也。夫華夷之勢不兩立。伯業衰。則夷狄強矣。當齊桓之暮年。楚人伐黃。而公不救。然後楚復伐徐。夫黃遠國。而徐在山東。與齊爲鄰。非外患自遠而至。近乎是以牡丘之盟。春秋始書公至自會。而桓德之衰。與國皆有可危之勢。於是因魯以見其餘也。楚之爲中國患久。

矣。東遷以來，僭號稱王，憑陵上國，尚賴齊桓、桓伯，以攘夷安夏爲己任。是以有次陘之役，而中華之勢復振，抑何幸也。奈何葵丘既會，震矜遂生，一念之怠，前功遽廢。使強夷得以忖度其心，而前日相與周旋之國，悉蒙其患。自遠以及于近，豈不駸駸乎剝床及膚也哉。觀春秋危公之意，亦可懼矣。且夫黃自貫澤受盟于齊，於是有陽穀之會，相爲犄角，以牽制楚人之肘腋，用能致屈完之來盟，則黃實有功於齊也。今楚人敢興兵以伐黃，無乃討其前日從齊之故與？黃以從齊見伐于楚，則楚帥之起，乃所以嘗齊也。齊既視黃而不救，然後浸淫而及徐。鳴鐘擊鼓，將問徐以何罪，不過爲其附齊而取舒也。借曰黃遠國也，雖鞭之長，不及馬腹。徐在齊之宇下，可不被髮纓冠而往救之乎？始之伐黃，則置而不恤，繼之伐徐，則救而不顧，則桓公之不競，不足庇與國可知矣。是故春秋凡桓公之盟會，皆不書至安之也。至于杜丘之盟，始書公至自會，夫楚之患自黃而及徐矣。徐之去魯不遠也，輔車相依，唇亡齒寒，寧不有無厭及我之患乎？嗚呼，豈獨魯也。天下之從齊者，莫不岌岌乎殆矣。春秋魯史故至公以著其危，而他國從可知焉。商書曰：靡不有初，鮮克有終。吾於桓公見之矣。厥後公卒未幾，而楚遂至其國都，以盟魯鄭陳蔡。越八年而以師伐齊，取穀。至是則盟貫取舒，進次于陘之憾，悉報無遺。嗚呼，向使桓公敦不息之誠，當楚人伐黃而振旅焉，天下事豈至此也。或者謂桓公初致江黃之時，管敬仲嘗有言矣。桓公不從而卒貽禍于二國，吁，仲之言是也。而未知道也。使其能引公以正心脩身而行王道，則豈無自彼氏羌莫敢不來享，莫敢不來王之遺事乎。而仲不能也。使小國賢君欲自援於蠻夷之汙而不克遂其志，君子蓋深傷之，不然，仲之器不小矣。

吳入郢於越入吳公會晉侯及吳子于黃池於越入吳

強國征還力於外而不慮敵人之乘其後。觀春秋書吳之事。亦可以爲戒矣。方吳之敗楚而入郢也。師猶在楚。而於越乘虛以入吳。亦可警矣。至于黃池之會。方與晉侯爭長。何不慮於越之入其國耶。春秋始書於越入吳于吳入郢之後。再書於越入吳于公會晉侯及吳子于黃池之後。則其虛內事外阻兵安忍之效。豈不深切著明也哉。嘗謂以力勝人者。人亦以力勝之。此理之必然也。春秋之季。吳國天下莫強焉。長岸雞父之戰。滅巢滅徐之文。經不絕書。猶曰以蠻夷而攻蠻夷也。及其勝楚。則遂及齊而及魯。及晉。若火之燎于原。不可響邇。自以爲莫能敵已。不知禍亂相尋。罔有紀極。東南又生一越。爲其腹心之患。一之已甚。而至于再。姑蘇之棲兆矣。豈不可爲陵人而不顧己者之大戒哉。自今觀之。吳乘楚之得罪於中國而伐之。雖曰因以復怨。猶有名也。至于五戰而造其國都。係累其人民。鞭撻其冢墓。君居其君之寢。大夫處其大夫之室。乘約肆淫。恣行無忌。暴橫未有甚於此矣。方且揚揚然自以爲得志也。不思國內空虛。而於越之兵。擣其不備。入其巢穴。如造無人之境。無乃出乎己者之反乎己也乎。春秋書吳入郢而繼之以於越人吳。比事以觀。可謂深切著明矣。吾意吳人爲是恐懼而警省也。豈意夫勝齊伐魯之後。復駕晉而爭伯。黃池有會。方將逞其梟雄。以長上國。不知勾踐之又躡其後也。死灰燃于會稽。而太子斃於姑蔑。所得幾何。不足以償所喪。春秋書公會晉侯及吳子于黃池。而又繼之以於越入吳。何其蒙患于前。而又戒於後也。嗚呼。吳以力勝楚。而越又以力勝之。吳以強陵晉。而越又以強陵之。天道好還。豈不信哉。闔閭之時。猶曰不備不虞而已矣。若夫差何其愚耶。春秋因事而比書之。垂戒之意遠矣。是故觀人郢而會黃池。宜吳之盛也。而於越入吳。敗亦隨之。譬之蛇豕踰躅。卒以自償。不亦可哀也哉。雖然。吳不足論也。吾於

此而爲中國諸侯悲也。當入郢之時，特以晉不救蔡，而吳得假之以爲功。吳興而晉遂失伯，雋李一敗，北響之圖稍輟，而諸侯莫之省也。齊衛方助叛臣以撓晉，魯方有事于邾，而晉則惟納蒯賸伐鮮虞之是務也。而皆不以吳爲憂，遂使伐陳會魯，勢焰大熾，而齊晉大國俱受其患，庸非自致之耶。然後吳越爭衡，而春秋終矣，其可歎也夫。

公子結媵陳人之婦于鄆，遂及齊侯、宋公盟，齊人宋人伐我西鄙。

大夫越禮以生事，而貽患于其國。春秋據事直書，而自見矣。夫失己失人，寇之招也。今公子結以國卿下媵陳人之婦，既失己矣。媵婦之後，遂專事以及齊侯、宋公盟，公侯豈大夫之敢敵乎？是以牲敵徒陳，而反以致三國之伐。然後生事病國之禍見矣。結可責也，而齊侯、宋公亦不得免焉。古者大夫之出疆也，受命而不受詞，有可以安社稷、利人民者，專之可也。未聞專命而非禮以致患者也。夫人必自侮，然後人侮之。國必自伐，而後人伐之，皆由己以致之。況於己爲大夫，固當使其君安富尊榮，而民無侵陵之患也。今一舉而害及其國，其罪豈不大哉？是故公子結者，魯之卿也。媵婦淺事，非大臣之當親，今乃縱其私情，去國踰境，以媵微者之婦，則以尊而臨卑，紊上下之分矣。彼齊侯者，太師之胤，尊爲東州之方伯，宋公者，先代之後，爵爲天子之上公，夫豈列國大夫所可敵哉？今結也，因媵婦之行，遂及二君爲盟焉。夫盟者，有國之大事也，乃不稟命于君而專之，外有以卑抗尊之罪，而內有以臣專君之惡，一舉而二罪併焉，其可乎哉？他日西鄙之伐，辱國殄民，果誰之所致乎？則結之罪，不可逃矣。是故媵婦淺事，不當書，而春秋特書曰：公子結媵陳人之婦于鄆，陳人微者，既見其重以失己矣，而繼之曰：遂及齊侯、宋公盟，遂者專詞，及者所欲。

又見其輕以失人也。至于西鄙之師，而書曰伐。見三國之有詞于伐也。然則三國義乎？曰魯則失矣。三國亦豈義哉？夫以伯主之嚴，上公之重，誰得而犯之？藁爾大夫而求盟，其從其否，誠在我耳。訓之以禮義，道之以名分，不與之盟可也。執而治之可也。何至以二大國之君，俛首與之共敵？既敵之後，而以兵刃臨之。夫抗尊求盟者，公子結也。西鄙之民何罪？慢鬼神而食話言，虐無辜以黷威武，不義甚夫。吾嘗觀乎文公之經，有曰：季孫行父會齊侯于陽穀，齊侯弗及盟。夫以商人之不義，且能卻大夫之請，何桓公乃不能慎之于始，而悔之于終乎？然則結也不足責也。齊爲伯主，於是乎有慙德矣。

公圍成公至自圍成築蛇淵囿

君令不行于陪臣，而勞民以自樂，甚矣魯之不競也。夫佚游從欲，已非人君之當爲，而況作於患難之時乎？是故成魯邑也，而彊臣據焉。定公欲墮其城，而親帥師徒以圍之。卒不能克而返，是正恐懼警省之時也。奈何告至之後，乃役民以築蛇淵之囿，尙可謂知務乎？春秋書公圍成，公至自圍成，于十有二年之冬，而書築蛇淵囿于十有三年之夏，則定公之失君道可知矣。嗚呼！魯自宣公受國于東門氏，而祿去公室矣。成公失政，而政逮于大夫，丘甲之作，費邑之城，三軍之作，中軍之舍，不絕于經。三家競爽，不弱一個馬。孰知陪臣之又專制其後哉？至于孔子攝相，然後費邠繼墮，公室可爲之兆，已見于此。使其終用聖人，魯可以爲政于天下矣。雖百成何能爲哉？今定公不知二邑之墮，出于仲尼之化，而以爲己功也。於是親帥其師以圍成，而不知公斂處父之徒，無君之人也。於公何難哉？是以無成，是無孟氏之言，一動彊臣之心，而深溝高壘，堅守弗下，以封內之邑，而用師圍之，有如敵國，已見魯之失政矣。況以堂堂國君之尊，伐一

陪臣而不能勝。卷甲而歸。亦可危已。吾意定公因是而懼。改前轍以自新。委國聖人之不暇也。奈何。怙不知畏。告至之後。反自肆于驕樂。當舉趾條桑之月。役農作之民。以築囿焉。夫築者。創始之詞。而囿者。育鳥獸之所也。當閑暇之時。且不可爲也。而況於蕭牆之寇未弭。此何時耶。而自放於盤樂怠傲。無乃安危利藪而樂其所以亡乎。置民人社稷于度外。而以奉己爲重。顛倒錯亂。未有甚於此者矣。春秋先書公圍成。而繼之以公至自圍成。危之意已見。至明年之夏。而有築蛇淵囿之書。則定公之不足與有爲也明矣。卒之女樂至庭。而聖人以燔肉去。遂使一變至道之國。日淪于微弱。而大野之麟。卒虛其應。悲夫。吾嘗觀乎春秋書築臺及囿。凡六見。莊公一年而築三臺。當齊桓方伯四鄰和睦。國家無事。可以有爲而不爲也。故魯自是始弱。及莊公告終。而遂大亂。國幾亡。成公之時。內政歸于強臣。而外屢辱于大國。末年。晉悼復伯。稍獲見重。而遂築鹿囿。昭公游於季孫之術中。而築卽囿。卒以客死。今定公不以先君爲鑒。而又履其轍焉。嗚呼。無囿猶可。無民何爲。邦分崩離析而不能守。是誰之咎哉。

取汶陽田公會楚公子嬰齊于蜀

藉勢以復地。其利國也。爲甚微。致賂以從夷。其辱國也。爲甚大。夫爲國而不知以義爲利。未有不受其咎者矣。魯之成公。恃晉之勢。一戰勝齊。以取汶陽之田。以亂而易亂也。其利國不亦微乎。遂使楚人以此藉口。而爲陽橋之役。公也。乃屈千乘之尊。會其大夫于蜀。致賂納質。以求免焉。則其辱國大矣。觀春秋書取汶陽田于前。而書公會楚公子嬰齊于後。則魯之所獲。不如所喪。爲國而不以禮。其效豈不深切著明矣哉。嘗謂天下莫大於禮。莫強於義。是故諸侯修睦。以事天子。不敢失也。而後蠻夷順令。以事中國。不敢違

也。今也友邦冢君不能和協而使外夷得以借此以爲猶夏之階。不亦甚哉。觀成公之所以勝齊而辱於楚者。抑亦可以爲戒矣。且夫汶陽魯故田也。而見奪於強大之齊。考於建邦土地之圖。若在封域之中。則先王所錫先祖所受。不敢失墜。所當告于天王以正疆界。不當擅兵以取之也。不然。侵才得之。則固有興滅繼絕之義。齊固不得而有。亦豈魯之所當有哉。今魯之戰齊也。以大夫之一怒。而介於大國。幸以獲勝。則藉郤克之言以取汶陽。而不使一介告諸天子。是惟強力之恃。而於君臣之義蔑矣。雖取故邑。與奪人之有何異哉。而不知我以強力陵人人。人亦以強力而陵我矣。未幾楚人遂有侵衛侵我之師。以問伐齊之故。甥舅之國。剪爲仇讎。而使蠻夷得以爲詞。亦已愼矣。而又不能親賢修政。保固疆圉。乃以國君之尊。親會公子嬰齊于蜀。而薦侑焉。以周公之裔。千乘之君。降班失列。以聽于夷狄之大夫。豈不哀哉。惟其不能以禮爲國。以及此憂也。故曰藉勢以復地。其利國也。爲甚微。致賂以從夷。其辱國也。爲甚大也。季孫行父爲國上卿。固當上使其君保安富尊榮之位。而下庇其民使無辛苦墊隘之禍也。而乃不忍一朝之忿。殘民以逞其私。汶田之歸。揚揚然自以爲功。而辱逮君父不顧也。方將立武宮以宣示其侈。而不知他日韓穿一言。復束手以歸諸齊。而所得者爲虛文。不足以償所喪。然後知不以義爲利。而以利爲利。乃有國家者之大患。而春秋譏取汶陽田之意遠矣。

重刻誠意伯劉公文集後序

誠意伯劉公文集。固括一方文獻。實爲明百代文章勛業之宗。儒先理學之統也。刻自永樂初王太史景後。凡三易梓矣。歲久寢墮。論次或盪。海內學士大夫。誦說略慕公者。每嗟咨焉。嘉靖己未。公鄉達斗山樊侍御。嘗刻於北畿巡院。東南脩辭士人。尠得覲視。且經義刪遺。似非全集。隆慶壬申春。豫章虬峯謝公。持斧按兩浙。不崇正學。風厲人文。行部至括。握劉公簡籍。惻然曰。集殘缺矣。士君子有志用世明道。舍是何所。法程哉。迺檄烈搜討遺文。重手校而鈔焉。公諸遠爾。意甚渥也。刻成。授烈序。諸未簡。序曰。烈自撮髮讀書。卽跂嚮公。勛業文章。爲古今殊絕人物。恨不一至其地。爲之藻藝。奮感依馮。茲猥以譾薄。承乏公郡。獲瞻儀刑。章典復辱掛名文字中。以自託於尙友。豈非疇昔之願哉。夫天將開一代文明之治。則必篤生名世之臣。以應昌期。邁會風雲。翊主佐命。贊謨決策。撥亂攘夷。輔成皇王之化。未始不本之於道德文章。道德文章。精神心術之微也。古之君子。若伊尹於商。呂望於周。其阿衡鷹揚事業。已定於莘野渭濱之時。子房始遇沛公。運籌決策。以成帝業。亡一不酬。孔明臥草廬。與先主商推孫曹。因蜀之資。以圖天下。終身不易其言。公天挺人豪。鍾稟特異。固伊呂之亞。子房孔明之儔也。生于元季。阨寒抗憤。則已有憂天下致太平之意。故撰著郁離。覆瓿諸篇。章言雖雄渾奧。密閎辨激壯。體裁殊而據忠闡性。則皆所以鋪擷其拯世救民之心。釀醞夫禮樂法制之教。出入造化。機變鬼神。卒澤於道德仁義之懿。及其明炳物先。克識真主。起從而受心膺之寄。柄帷幄之籌。殄漢殲吳。驅夷奠夏。指授諸虓虎熊貔。柱石之臣。以成高皇帝大一統。

之業。滌穢。瀚羶。復還三代之華。何其偉歟。嗟。樹開國之助猷。昭傳世之文章。與古先豪傑兼休並顯於千百世之後。公蓋出有所爲。而生非無意者矣。豈章句之儒。虛誦讀。守空文。罔效尺寸已哉。是固烈之依憑嚮慕之私也。謹序。

隆慶六年秋七月朔後學建安陳烈頓首書。

